



ସୁଗାନ୍ତର



# ସୁଗାନ୍ତର

ସ୍ବର୍ଗୀୟ শিবনাথ শাস্ত্রী

[ তৃতীয় সংস্করণ ]



প্রকাশক

ইণ্ডিয়ান প্রেস লিমিটেড

এলাহাবাদ

১২২৩

দ্রষ্টব্য: স্বত্ব সংরক্ষিত ]

[ মূল্য ২/- দুই টাকা



## প্রকাশক

শ্রীঅপূর্বকৃষ্ণ বসু

ইণ্ডিয়ান প্রেস লিমিটেড, এলাহাবাদ ।

## প্রাপ্তিস্থান

- ১। ইণ্ডিয়ান প্রেস লিমিটেড, এলাহাবাদ ।
- ২। ইণ্ডিয়ান পাবলিশিং হাউস  
২২।১, কর্ণওয়ালিস্ স্ট্রীট, কলিকাতা ।

## কাস্টিক প্রেস

২২, স্কটিয়া স্ট্রীট, কলিকাতা

শ্রীকমলাকান্ত দাশগুপ্ত কর্তৃক মুদ্রিত ।



# যুগান্তর

## প্রথম পরিচ্ছেদ

১৮৫২ খৃষ্টাব্দের কথা বলিতেছি। ঐ সালের ১০ই বৈশাখ দিবসে এক বিবাহের লগ্ন আছে। সেই লগ্নে নদীয়া জিলার অন্তর্গত নশিপুর গ্রামের সুপ্রসিদ্ধ বিখ্যাত তর্কভূষণ মহাশয়ের সর্বকনিষ্ঠা কন্যা শ্রীমতী ভুবনেশ্বরী বিবাহ হইবে। সেই জন্ত মহা ধুমধাম সহকারে আয়োজন হইতেছে; অর্থাৎ ব্রাহ্মণ পণ্ডিতের গৃহে যতটা ধুমধাম হওয়া সম্ভব, তাহাই হইতেছে। কিন্তু তাহা বলিয়া কেহ যেন মনে না করেন যে তর্কভূষণ মহাশয় একজন যেমন তেমন ব্রাহ্মণ পণ্ডিত। তিনি দেশের মধ্যে একজন সুপ্রসিদ্ধ নৈয়ায়িক। বাল্যকালে ভাটপাড়ার প্রসিদ্ধ কুলচন্দ্র বিদ্যানিধি মহাশয়ের নিকট ব্যাকরণ, কাব্য ও অলঙ্কার পাঠ করিয়া, প্রতিষ্ঠাভাজন হইয়া, নবদ্বীপে পাঠ সাঙ্গ করিবার জন্ত গমন করেন; সেখানে সুবিখ্যাত রঘুরাম শিরোমণি মহাশয়ের নিকট প্রাচীন ও নবান্বিত এবং সবিস্তর ত্রায়দর্শন পাঠ করিয়া পাঠ সমাপ্ত করেন। সে কালে শিরোমণি মহাশয়ের ছাত্রবৃন্দের মধ্যে বিখ্যাতই প্রথর মেধা ও গভীর পাণ্ডিত্যগুণে সর্বাগ্রগণ্য ছিলেন। একবার কোন ক্রিয়া উপলক্ষে শোভাবাজারের রাজবাটিতে এক মহাসভা হয়। ঐ সভাতে অঙ্গ, বঙ্গ, কলিঙ্গ, দ্রাবিড় প্রভৃতি আর্য্যাবর্ত্ত ও দাক্ষিণাত্যের দূরতম দেশ সকল

হইতে নিমন্ত্রিত পণ্ডিতমণ্ডলী সমবেত হইয়াছিলেন। সেই সভাস্থলে মিথিলা দেশ হইতে সমাগত এক মহামহোপাধ্যায় পণ্ডিতের সৰ্ব্বপ্রধান শিষ্যের সহিত রঘুরাম শিরোমণি মহাশয়ের সৰ্ব্বপ্রধান শিষ্য বিশ্বনাথের বিচার উপস্থিত হয়। ঐ বিচারে সমগ্র পণ্ডিতমণ্ডলী দর্শক ও বিচারক ছিলেন। বিচারকালে মৈথিল ছাত্র যখন পরাস্তপ্রায় হইয়া পড়িলেন, তখন তাঁহার গুরু সন্ধিচারের রীতি লজ্জনপূর্বক স্বীয় ছাত্রকে সাহায্য করিতে প্রবৃত্ত হইলেন; কিন্তু তাঁহারই সহিত বিশ্বনাথের বিচার বাধিয়া গেল। বিচারে সৰ্ববাদিসম্মতিক্রমে বিশ্বনাথই জয়ী বলিয়া পরিগণিত হইলেন। তাঁহার প্রগাঢ় ব্যাপ্তি, শাস্ত্রীয় মৌমাংসাতে অদ্ভুত নিপুণতা ও ক্ষুরধারসম মেধা দর্শনে চারিদিক হইতে ধৃত ধৃত রব উথিত হইল। সেই দিন হইতে তিনি এবং তাঁহার গুরু পণ্ডিতমণ্ডলীর নিকট সুপরিচিত হইয়া গেলেন। বিশ্বনাথ রাজভবন হইতে প্রচুর পারিতোষিক লাভ করিলেন; এবং সমবেত পণ্ডিতমণ্ডলী সেই সভামধ্যে তাঁহাকে তর্কভূষণ উপাধি দ্বারা সম্মানিত করিলেন। তদবধি তর্কভূষণ মহাশয় স্বীয় বাসগ্রামে নিজ ভবনেই চতুষ্পাঠী করিয়া অধ্যাপনাকার্য্যে নিযুক্ত আছেন। তাঁহার বিদায়-আদায়ও তাঁহার যশের অনুরূপ। গৃহিণী, পাঁচটি পুত্র, পাঁচটি পুত্রবধূ, চারিটি কন্যা, দশ বারটি পৌত্র পৌত্রী, দুইটি বিধবা ভ্রাতৃজায়া, তদ্বিন্ন দুইটি আশ্রিতা বিধবা, সাত আটটি ছাত্র, তিনটি ভৃত্য, দুইটি দাসী, ছয়টি সৎসার গাভী, তিন জোড়া হালের গরু, ইহার উপরে অতিথি অভ্যাগত, এই বৃহৎ পরিবারের ভরণপোষণ তিনি অবলীলাক্রমে চিরদিন চালাইয়া আসিতেছেন। ইহাতেই অহুমান করা যাইতে পারে, তাঁহার আয়ের অবস্থা কি প্রকার। আর একটা কথা না বলিলে কোকে কিছু জমে পড়িতে পারেন। বিদায় আদায়ের আর তাঁহার একমাত্র আয় নাই। তাঁহার পিতামহ কালীকির বিভাগকার

মহাশয় একজন ভক্ত শাক্ত লোক ছিলেন। তিনি নরসিংধিপতি কালী কৃষ্ণচন্দ্রের সাহায্যে নিজ ভবনে এক পাষণময়ী কালী-প্রতিমা প্রতিষ্ঠা করেন। তদুপলক্ষে রাজা কৃষ্ণচন্দ্র নাকি তাঁহাকে এক হাজার বিঘা ভূমি কালীর নামে দেবোত্তর রূপে দিয়াছিলেন। তর্কভূষণ মহাশয় তাঁহার মধ্যম পুত্রের সহায়তায় সেই হাজার বিঘা ভূমির উপরে আরও প্রায় সাত আট শত বিঘা বাড়াইয়াছেন। ইহার উপরে তাঁহার পুত্র-দ্বয়ের আয়। সুতরাং যে বলিয়াছি, তর্কভূষণ মহাশয় যেমন তেমন ব্রাহ্মণ পণ্ডিত নহেন, তাহা সত্য। তাঁহার বসত বাটীটী একটী রাজ্য জুড়িয়া আছে। বাড়ীর মধ্যে পাকা একতালা শয়নের ঘর প্রায় দশটী, দুইটী রান্নাঘর, একটী বিধবাদের, অপরটী সাজার, একটী ভাঁড়ার ঘর, একটী বসিয়া আহার করিবার ঘর ও একটী প্রকাণ্ড ধানের গোলা; তাহাতে সম্বৎসরের খোরাকের ধান সঞ্চিত থাকে। বাহির বাড়ীতে একটী চণ্ডীমণ্ডপ; তাহাতে বসিয়া তর্কভূষণ মহাশয় ছাত্রদিগকে পড়াইয়া থাকেন। চণ্ডীমণ্ডপের দুই পার্শ্বে দুইটী পাশ-বরা, সম্মুখে বিস্তৃত উঠান, উঠানের পূর্বে ও পশ্চিমে অতিথি অভ্যাগত ও ছাত্রদিগের থাকিবার জন্ত চারি পাঁচটী ঘর, উঠানের দক্ষিণে, দরজার উভয় পার্শ্বে, বিস্তীর্ণ চালা; তাহাতে প্রায় দেড়শত কি দুইশত লোক একসঙ্গে বসিয়া আহার করিতে পারে। বাহির বাড়ীর চণ্ডীমণ্ডপ ঘর ও চালাগুলির ইটের গাঁথুনি কিন্তু খড়ের চাল। বাড়ীর সম্মুখে এক প্রকাণ্ড পুকুরিণী ও তাহার চারিদিকে নানাজাতীয় পূজোপযোগী পুষ্পবৃক্ষ; তন্মধ্যে শ্রীকল ও জবাফুলের গাছ বিশেষ ভাবে শোভা পাইতেছে; বাহির বাড়ীর পশ্চিমদিকে গোয়ালবাড়ী; সেখানে গন্ধর গোয়াল ও ভূত্যানিগের থাকিবার ঘর ও দুইটী প্রকাণ্ড খড়ের গাদা; পূর্বদিকে কলীবাড়ী, কলার কালীর মন্দির ও তৎসংলগ্ন ভূমিখণ্ডে দুইটী পাশ-ঘর; ভিতর বাড়ীর

পশ্চাতে চতুর্দিকদিগের ঘাট সরিবার জন্ত একটি পুষ্করিণী ও তাহার চতুর্দিকের জমিতে শিমের সময় শিম, বেগুনের সময় বেগুন, কুমড়ার সময় কুমড়া প্রভৃতি রন্ধনশালার উপযোগী তরিতরকারীর বাগান। এতদ্ভিন্ন গ্রামের পার্শ্বে তাঁহার আর একটি বাগান বাড়ী আছে। তাহার একপার্শ্বে প্রায় ২৫১৩০ বাড়ি বাঁশ, অপরদিকে অনেকগুলি আম, কাঁঠাল, জাম, জামরুল প্রভৃতি ফলের গাছ; মধ্যে একটি পুষ্করিণী; তাহাতে অনেক মৎস্য। সুতরাং যে বলিয়াছি, তর্কভূষণ মহাশয় যেমন তেমন ব্রাহ্মণ পণ্ডিত নহেন, তাহা কি সত্য নহে?

এপ্রকার গৃহস্থের গৃহে কত্কার বিবাহের আয়োজন যেক্রপ ধুমধাম সহকারে হইতে পারে, তাহাই হইতেছে। বিশেষতঃ ভুবনেশ্বরী তর্কভূষণ মহাশয়ের সর্বকনিষ্ঠা কন্যা। আর ত তাঁহাকে কত্কার বিবাহ দিতে হইবে না; সুতরাং অপর কত্কারদিগের বিবাহে যাহা করেন নাই, ভুবনের বিবাহে তাহা করিতেছেন। এবার ফাল্গুন মাস পড়িলেই নূতন খড় দিয়া বাহির বাড়ীর ঘর ও চালাগুলি ছাওয়া হইয়াছে; ভিতর বাড়ীর ঘরগুলি কলি ফিরাইয়া নূতনপ্রায় করা হইয়াছে; বাড়ীর ভিতরে আর একটি অতিরিক্ত ঘর ভাঁড়ার বলিয়া গণ্য করিয়া প্রায় একমাস কাল হইতে নানা দ্রব্যসামগ্রীতে পূর্ণ করা হইতেছে; বাদ্যকর, মালাকর ও গ্রামের চতুর্দিকের চাষালোকদিগকে বিতরণ করিবার জন্ত অনেক ডোল পূর্ণ করিয়া চিড়ে, মুড়কী প্রভৃতি প্রস্তুত হইয়া রহিয়াছে; বিবাহের একমাস পূর্বে হইতেই গৃহ আনন্দ-কোলাহলময় হইয়া উঠিয়াছে; কন্যা তিনটি বিবাহোপলক্ষে পতিগৃহ হইতে আনীত হইয়াছে; তাহাদের পুত্রকন্যা-গুলি অপরপর শিশুদিগের সহিত মিশিত হইয়া বাড়ীটি একেবারে মাথায় করিয়া তুলিয়াছে; দাসদাসীগণ ছোবান নূতন কাপড় পরিয়া ঘুরিয়া বেড়াইতেছে; ভুবনের গায়ে হলুদের দিন হইতে বাহিরে সানাই ও কাড়া

নিরন্তর বাজিতেছে ; কয়েকদিন হইতে পিতল-কাঁসার জিনিষ সকল ভায়ে ভায়ে বাহির করিয়া মাজা হইতেছে ও বর-সজ্জার জিনিষপত্রে ঘর পূর্ণ হইয়া যাইতেছে। যে দিন ভুবনেশ্বরীর গাত্রে হরিদ্রা দেওয়া হয়, সেদিন তর্কভূষণ মহাশয় গ্রামস্থ সমুদয় ব্রাহ্মণকে প্রায় আধসের তৈল সমেত এক একখানি বকুনা বিতরণ করিয়াছেন। বিষয়ী লোকে শুনিলে হয় ত আশ্চর্য্যান্বিত হইবেন ; ভাবিবেন, নশিপুরের গ্রাম একখানি ব্রাহ্মণ-প্রধান গণ্ডগ্রামের সমুদয় ব্রাহ্মণকে এক একখানি বকুনা বিতরণ করা ত বড় সহজ কথা নয়। সে বিষয়ে একটা কথা স্মরণ রাখিতে হইবে। বিষয়ী লোকের পক্ষে এত বকুনা বিতরণ করা সহজ নয় বটে, কিন্তু তর্কভূষণ মহাশয়ের পক্ষে তত কঠিন নহে। তাঁহার ভবনের বহুদিন অব্যবহৃত সিন্দুকগুলি খুলিয়া দেখিলে বোধ হয় ২৫।৩০ মণ পিতল-কাঁসার বাসন পাওয়া যায়। পিতলের বকুনা ও ষড়া প্রভৃতি বৎসরের মধ্যে এত জমে যে মধ্যে মধ্যে কাঁসারি ডাকিয়া কতকগুলি করিয়া বিক্রয় করিয়া ফেলিতে হয়। অতএব বকুনা বিতরণ তাঁহার পক্ষে বিশেষ ব্যয়সাধ্য নহে। আর ব্যয়সাধ্য হইলেই বা কি ? ভুবনেশ্বরীর বিবাহ তিনি মনের সাধ মিটাইয়া দিতেছেন।

আর দুই দিন পরেই ভুবনেশ্বরীর বিবাহ। লোকজনে বাড়ী গম্-গম্ করিতেছে ; বেলা অবসানপ্রায় ; দিবাকর পশ্চিমাঞ্চলে ঢলিয়া পড়িয়াছে ; রবির কিরণজাল ভূতলকে পরিত্যাগ করিয়া ক্রমেই বৃক্ষাগ্রভাগকে অবলম্বন করিতেছে ; চতুর্পার্শ্বের গ্রামবাসী কৃষিগণ নশিপুরের হাটে সমস্ত দিন বেচা-কেনা করিয়া ক্রমে গৃহাভিমুখে প্রতিনিবৃত্ত হইতেছে ; কুলবধূগণ সাম্মাহিক অঙ্গমার্জনাতে জলকলস-কক্ষে গৃহাভিমুখে যাইতেছেন, গাভীগণ দিবসান্তে উৎসুক-চিত্তে গৃহাভিমুখে ফিরিতেছে ; তর্কভূষণ মহাশয়ের ভবনের অদূরে একদল বালক একটা

অতিরিক্ত গোবৎস লইয়া ক্রীড়া করিতেছে ; তাহার দলবদ্ধ হইয়া অটুপাত ও করতালিমান পূর্বক গোবৎসটির পশ্চাৎ পশ্চাৎ ধাবিত হইতেছে, আর সেটা উর্দ্ধপুচ্ছ হইয়া অশিশুর তায় ইতস্ততঃ দৌড়িতেছে ; তাহার জন্মের রজ্জুতে দৃঢ়বদ্ধ থাকিয়া বৎসটির প্রতি সতৃষ্ণনয়নে দৃষ্টিপাত করিতেছে ও শিশুকুলের প্রতি বিফল আক্রোশ প্রকাশ করিতেছে ; পাড়ার বালিকারা শিশু-ক্রোড়ে এই কৌতুক দর্শন করিতেছে । এ দিকে তর্কভূষণ মহাশয় চণ্ডীমণ্ডপের মধ্যে একখানি পিঁড়ীতে পৃষ্ঠ দিয়া বসিয়া দুইটা ছাত্রকে ত্রায়ের পাঠ বলিয়া দিতেছেন । তাঁহার বয়স্ক্রম ৬০ কি ৬১ বৎসরের ন্যূন হইবে না । কিন্তু তাঁহার দেহের বল ও অঙ্গসৌষ্ঠব দেখিলে এত বয়স বলিয়া বোধ হয় না । যৌবনকালে তিনি যে বলবান্ পুরুষদিগের মধ্যে একজন অগ্রগণ্য ব্যক্তি ছিলেন, তাহা তাঁহার বিশাল বক্ষঃস্থল, সুগঠিত দস্তপাটি, পলিতার্ক কেশগুচ্ছ, মাংসল পেশী ও কর্মক্ষম বাহুযুগল দেখিলেই বুঝা যায় । তাঁহার বর্ণ উজ্জল শ্রাম, গোরকান্তি বলিলেও হয় ; নেত্রদ্বয় বিস্তৃত ও প্রতিভার জ্যোতিতে উজ্জল, বিস্তৃত লজ্জাটে গভীর চিন্তার রেখা ও তহুপরি রক্তচন্দনের ফোঁটা ; গলদেশে সোণাবাঁধান রুদ্রাক্ষের মালা ; বাম হস্তের নিকটে একটি নস্তুর শঙ্খক ; যখনই কোন কূট তর্ক বা ফাঁকি উপস্থিত হইতেছে, তখনই শঙ্খকটা বাহুহস্তে তুলিয়া লইয়া অগ্ৰমনস্ক ভাবে একটিপ নস্ত্র নাসারন্ধ্রে দিয়া বলিতেছেন, “হঁ, তার পর,”—অমনি সমস্তাটির উত্তর যোগাইয়া ফাইতেছে ।

চণ্ডীমণ্ডপের দাবার এক পাশে দ্বিতীয় পুত্র শ্রীশঙ্কর ব্যাকরণ ও কাব্যের ছাত্রদিগকে পাঠ বলিয়া দিতেছেন । অদূরে কতকগুলি প্রতিবেশী ব্রাহ্মণ তামাক সেবন করিতেছেন, ও তর্কভূষণ মহাশয়ের স্বর্গীয় শিষ্য ৬৩তরানাস বিভাবাচল্পতি মহাশয়ের বিদ্যে কল্পেপকল্প করিতেছেন ।

প্রথম ব্যক্তি।—হাঁ, হাঁ, তাঁকে বেশ মজা করছে কি ?

দ্বিতীয় ব্যক্তি।—তা আর হবে না ! সে ত বেশী দিনের কথা নয় । র'সো দেখছি । তাঁর মৃত্যুর সময়ে তাঁর সর্বকনিষ্ঠা কন্যা বিজয়ার বয়স দুই বৎসর ছিল । বিজয়ার বয়স এখন ছাব্বিশ সাতাশ বৎসর হবে । তাহ'লে তিনি চব্বিশ পঁচিশ বৎসরের অধিক করেন নাই । মনে হচ্ছে না ? তিনি উজ্জল শ্রামবর্ণ, অপেক্ষাকৃত খর্বাকৃতি, একহারা লোক ছিলেন ; সর্বদা তসর বা গরদ কাপড় পরে থাকতেন ; মাথার চুলে জটা বেঁধে গিয়েছিল ; গলদেশে ও দুই হাতে রুদ্রাক্ষের মালা ছিল । তেমন সাধক লোক কি আর হয় !

তৃতীয় ব্যক্তি।—ওঃ, তিনি একজন সিদ্ধপুরুষ ছিলেন, রামপ্রসাদের গ্রাম কালীমন্ড্রে সিদ্ধ হয়েছিলেন । তাঁর বিষয়ে কত আশ্চর্য্য আশ্চর্য্য গল্প শোনা যায় । শুনেছি, তিনি যখন কালীমন্ডরে শব-সাধনে বসতেন, তখন নাকি দুটো শিয়াল বন হতে প্রতিদিন এসে তাঁর হাত হতে বলি খেয়ে যেতো ; এবং একটা কাল সাপ নাকি এসে সমস্ত রাত্রি তাঁর সম্মুখে ফণা ধ'রে থাকতো ।

দ্বিতীয়।—ও ত সামান্য ! আরও কত আশ্চর্য্য ঘটনার কথা শুনে পাওয়া যায় । তাঁর একটা বিশেষ প্রশংসার বিষয় এই যে তিনি শাক্ত লোক ছিলেন বটে, কিন্তু তান্ত্রিকদের নিষিদ্ধ আচার তাঁর কিছুই ছিল না । তিনি বলতেন, বামাচার প্রভৃতি তামসিক লোকদিগেরই জন্ত । তাঁর কণ্ঠ বেমন মিষ্ট ছিল, গান বাধবার শক্তিও আশ্চর্য্য ছিল । তিনি একটা পদ মুখে সর্বদা উচ্চারণ করতেন ; সেটা যেন কাণে লেগে রইত ।

প্রথম।—সেটা কি ?

দ্বিতীয়।—জিনি মধো যথ্য বলবেন :—



“জয় শিব শঙ্কর, গৌরীপতি হর

জয় জয় জয় হে ভবেশ।”

প্রথম।—ওঃ, সেই অনুসারে বুঝি তর্কভূষণ মহাশয়ের পাঁচ পুত্রের নাম শিবচন্দ্র, শঙ্কর, গৌরীপতি, হরচন্দ্র ও ভবেশ।

দ্বিতীয়।—তা বুঝি তুমি এতদিন জানতে না? শিবচন্দ্র, শঙ্কর ও গৌরীপতি এই তিনজনকে তিনি দেখিয়া যান। নিজ প্রিয় নাম অনুসারে ইহাদের নাম দিয়েছিলেন। অবশিষ্ট নামগুলি তাঁকেই স্মরণ করে তর্কভূষণ মহাশয় দিয়েছেন।

প্রথম।—কালী, তারা, ঘোড়শী, ভুবনেশ্বরী, কন্যাদের এ নামগুলিও বুঝি তাঁর দেওয়া?

দ্বিতীয়।—আরে তিনি তখন কোথায়? ওগুলি তর্কভূষণ মহাশয়ের নিজের কীর্তি।

প্রথম।—পর্যায়টা ভাঙ্গা হোল কেন? একটা মেয়ের নাম মহাবিছা রাখলেন না কেন?

দ্বিতীয়।—সে কৌতূকের কথা বুঝি জান না? কর্তা তৃতীয়া কন্যার নাম মহাবিছা রাখতে চেয়েছিলেন। কিন্তু গৃহিণী ও গৃহের অপরাপর সকলে কোন ক্রমেই তা পছন্দ করলেন না। মেয়েরা বলে,—“কি ব'লে ডাকবো? মহা মহা বলবো? না বিচ্ছে বিচ্ছে বলবো? না মহী মহী বলবো?” এই গোলমালে মহাবিছা নামটা রাখা হ'লো না। কর্তা ঘোড়শী রাখলেন। গৃহিণী বললেন, “ওমা, ওমা, একি একটা নাম আবার এল? মান্বের নাম কি ঘাঁড়াশী হয়?” কিন্তু তর্কভূষণ মহাশয় অনেক কষ্টে মহাবিছা নামটা ছেড়েছিলেন, ঘোড়শীটা আর ছাড়তে পারলেন না।

শুনিয়া সভাস্থ সকলে হাস্ত করিয়া উঠিলেন। এইরূপ কথোপকথন

চলিতেছে, ইতিমধ্যে দ্বারে একখানা গাড়ী আসিয়া লাগিল। নশিপুর গ্রামে আসিবার রাস্তা কাঁচা। কেবল গ্রীষ্মকালে দুই একখানা ঘোড়ার গাড়ী কখনও কখনও দেখা যায়; অত্র সময়ে গাড়ী আসিবার যো নাই, নোকাতেই গত্যাত হইয়া থাকে। দ্বারে গাড়ী লাগিবামাত্র কর্তা বুঝিলেন, বিজয়ার গাড়ী দ্বারে লাগিয়াছে। অমনি নগ্নের শষ্যকটি টেকে গুঁজিয়া গাত্ৰোত্থান করিলেন। বিজয়া তাঁহার সর্বকনিষ্ঠা ভগিনী। তাঁহার পিতার তিন পুত্র ও জয়া বিজয়া নামে দুই কন্যা হয়। তন্মধ্যে দুই পুত্র ও এক কন্যা অসময়ে গত হইয়া বৃদ্ধ বয়সের সন্তান ঐ বিজয়ামাত্র অবশিষ্ট আছে। সুতরাং বিজয়া তাঁহাদের বড় আদরের ধন। তাঁহার স্বপুত্রালয় চানকের নিকট; কিন্তু তিনি স্বীয় পতি ও দেবরদিগের সহিত কলিকাতাতেই বাস করিতেন। কয়েক মাস হইল, একটি পুত্র ও একটি কন্যা লইয়া অকালে বৈধবা-দশা প্রাপ্ত হইয়াছেন। পুত্রটির নাম ইন্দুভূষণ; বয়ঃক্রম দশ এগার বৎসর। বালকটি একহারা গোরবর্ণ, নাকটি টিকল, চক্ষুদ্বয় বিশাল ও উজ্জ্বল, মস্তকে ঘন আকুঞ্চিত কেশজাল। কন্যাটির নাম বিদ্যাবাসিনী, বয়ঃক্রম ছয় সাত বৎসরের অধিক হইবে না; তাহারও শরীরের কান্তি নিখুঁত বলিলে হয়। বিজয়ার গাড়ী দ্বারে লাগিবামাত্র, পাড়ার বালকবালিকা-গণ, যাহারা গোবৎসটীকে লইয়া ক্রীড়া করিতেছিল, সকলেই খেলা ফেলিয়া ছুটিয়া আসিল। কেহ বা চিত্রার্পিতের গ্রাম অশ্বদ্বয়ের গতিবিধি লক্ষ্য করিতেছে; কেহ বা গাড়ীর অভ্যন্তরস্থ ব্যক্তিদিগের প্রতি একদৃষ্টে চাহিয়া আছে; আবার কোন কোন বালক অশ্বদ্বয়কে লক্ষ্য করিয়া বলিতেছে, ‘ঘোঁড়া, ঘোঁড়্ ঘোঁড়াতে যাবি, ঘোঁড়া বেগুন পোড়া খাবি—’ ইত্যাদি। গাড়ী দাঁড়াইবামাত্র ভবেশ গাড়ী হইতে অবতরণপূর্বক হাত ধরিয়া ইন্দুভূষণ ও বিদ্যাবাসিনীকে নামাইল এবং

“ছোট পিসি কঁাদ কেন, নাম না” বলিয়া বিজয়াকে নামিবার জন্ত বাক্য বার অনুরোধ করিতে লাগিল। হায় ! বিজয়া আজ গাড়ী হইতে নামিতে পারিতেছেন না। যে পিত্রালয় চিরদিন তাঁহার পরম আরামের স্থান, পিতৃসম জ্যেষ্ঠ সহোদরের ও মাতৃসমা ভ্রাতৃজন্মার অকৃত্রিম স্নেহ ও পরিবারস্থ সকলের আদর যত্ন পাইবার স্থান, যেখানে রোগে শোকে ভয়ে বিপদে মস্তক রাখিয়া তিনি কত বার নিরাপদ হইয়াছেন, যেখানকার প্রত্যেক পদার্থ তাঁহার শৈশবের ক্রীড়া এবং যৌবনের আশা ও আকাঙ্ক্ষার সহিত সম্বন্ধ, যেখানে ভালবাসিবার কত বস্তু বিद्यমান, বিবাহিতা হইয়া পরগৃহবাসিনী হইলেও যেখানে আসিবার জন্ত তাঁহার হৃদয় কত না, উৎসুক হইত ও আনন্দে নৃত্য করিত, আজ অলঙ্কারবিহীনহস্তে ও বিধবার বেশে সেই ভবনে তিনি সহসা প্রবেশ করিতে পারিতেছেন না। গাড়ীর এক কোণে মুখ লুকাইয়া চক্ষের জল মুছিতেছেন। অবশেষে ভবেশের বাগ্নতায় গাড়ী হইতে অবতরণ করিলেন। ইতিমধ্যে কর্ত্তা মহাশয়ও দ্বারে আসিয়া উপস্থিত। অত্র সময়ে বিজয়া পিতৃসম জ্যেষ্ঠের চরণে ভূমিষ্ঠা হইয়া প্রণতা হইতেন; আজ তাঁহাকে দেখিয়াই দুর্নিবার শোকসাগর উথলিয়া উঠিল; আর এক পদও অগ্রসর হইতে পারিলেন না। পুনরায় বাহিরের দ্বারের কপাটের কোণে মুখ লুকাইয়া অশ্রু মোচন করিতে লাগিলেন। কেবল ইশারায় সন্তান দুটীকে জ্যেষ্ঠের চরণে প্রণাম করিতে আদেশ করিলেন। তাহার মাতুলের চরণে প্রণত হইল। অত্র সময় হইলে তর্কভূষণ মহাশয় তাহাদিগকে দুই একটী আশীর্বাদসূচক কথা বলিতেন; কিন্তু আজ তাঁহারও মুখে বাক্য সরিল না, বিজয়াকেও কিছু বলিতে পারিলেন না। তাঁহার স্বভাবিক ধৈর্য ও মানসিক বলের দ্বারা শোকাবেগ সংবরণ করিয়া রাখিলেন; বিশাল চক্ষুদ্বয় আরক্তবর্ণ ও অশ্রুতে পূর্ণ হইয়া আসিল; কিন্তু

সে অশ্রু পড়িতে দিলেন না। ইতিমধ্যে অন্তঃপুর হইতে গৃহিণী, কালীতারা প্রভৃতি মহিলাপন বিজয়ার অভ্যর্থনার জন্য বহির্দ্বারে আসিয়া উপস্থিত। বিজয়াকে দেখিয়াই কত্রী ঠাকুরাণী ডাক ছাড়িয়া কান্দিয়া উঠিলেন ;—“ওরে বিজয়ী কি সাজ সেজে বাপের বাড়ী আস্চে রে!” বিজয়া এতক্ষণ শোকের উচ্ছ্বাস অনেক পরিমাণে সংবরণ করিয়া রাখিয়াছিলেন, আর পারিলেন না; মাতৃসমা ভ্রাতৃজয়ার বক্ষস্থলে মস্তক রাখিয়া কান্দিতে লাগিলেন। এই দৃশ্য দেখিয়া ধীর স্থির প্রবীণ তর্কভূষণ মহাশয়ও আর দাঁড়াইতে পারিতেছেন না; আবেগে সর্বশরীর কাঁপিতেছে, আর চক্ষের জল রোধ করিয়া রাখা ভার; কঠোর প্রতিজ্ঞাতে ওষ্ঠাধর দংশন করিতেছেন এবং ঐ শোকের দৃশ্য হইতে অপর দিকে মুখ ফিরাইয়াছেন। অবশেষে কিঞ্চিৎ বিরক্তি-স্বচক স্বরে বলিলেন ;—“আঃ বাহিরে কান্নাকাটি কেন? বাড়ীর ভিতর লইয়া যাও।” ক্রমে শোকের স্রোত বহিয়া অন্তঃপুর মধ্যে গেল। বধুগুলি ভিতর বাটীর দ্বারে আসিয়া অপেক্ষা করিতেছিলেন; তাঁহারাও সেই ক্রমেনে যোগ দিলেন। কয়েক মিনিট সে অন্তঃপুরে শোকাশ্র ও আর্তনাদ ভিন্ন আর কিছুই রহিল না।

তর্কভূষণ মহাশয় চণ্ডীমণ্ডপে উঠিয়া “তারাঃ” বলিয়া একটা দীর্ঘ-নিশ্বাস ফেলিয়া স্বস্থানে গিয়া বসিলেন। কিন্তু তাঁহার আরক্ত নেত্রদ্বয় ও ধীর গম্ভীর মুখের প্রতি দৃষ্টিপাত করিয়া কিয়ৎকাল কাহারও কথা কহিতে সাহস হইল না; সকলেই নিস্তব্ধ। এদিকে ভৃত্যদিগকে বিজয়ার জিনিষপত্র অন্তঃপুরে লইয়া বাইতে আদেশ কবিবার পূর্বেই গোবিন্দ নামে তর্কভূষণ মহাশয়ের স্বগ্রামবাসী একটা ছাত্র মোটগুলি বহিয়া ভিতরে লইয়া গেল; এবং বিজয়ার চরণে প্রণত হইয়া পদধূলি লইল। বিজয়া সেই শোকাশ্রর মধ্যেও একবার জিজ্ঞাসা করিলেন,

“গোবিন্দ, তোমাদের বাড়ীর সব কুশল ?” গোবিন্দ বিনয়ানবনত মস্তকে উত্তর দিয়া সেই শোক ও বিলাপধ্বনির ক্ষেত্র হইতে সরিয়া পড়িল।

অত্ৰকার এই শোকাশ্র ও আৰ্ত্তনাদের মধ্যেও বাড়ীর শিশুদিগের আনন্দের সীমা নাই। ইন্দুভূষণ ও বিদ্যাবাসিনীকে পাঠিয়া তাহারা যেন স্বর্গের চাঁদ হাতে পাইয়াছে ; চতুর্দিকে আসিয়া বেষ্টন করিয়াছে, এবং সমাগত পাড়ার বালকবালিকাদিগের প্রতি এমনি অবজ্ঞা-ও-অহঙ্কার-সূচক দৃষ্টিপাত করিতেছে, যেন এমন ইন্দু বিন্দু আর কাহাদেরও হয় না। অর্দ্ধ দণ্ডের মধ্যে ইন্দু বিন্দুর হস্তে কিঞ্চিৎ মিষ্টান্ন পড়িল। তাহারা যে স্থতির ভাবে বসিয়া আহার করিবে, তাহার যো নাই ; বালক-বালিকাগণ তাহাদিগকে িড়কীর পুকুর ও বাগান দেখাইবার জন্ত লইয়া গেল। এদিকে ক্রমে শোক শান্তমূর্ত্তি ধারণ করিল, ও মহিলাগণের পরস্পর কুশল-প্রশ্ন আরম্ভ হইল ; এবং ভুবনেশ্বরীর বিবাহোৎসবের আনন্দ-শ্রোত, যাহা বিজয়ার আগমনে ক্ষণকালের জন্ত প্রতিহত হইয়াছিল, পুনরায় সবেগে বহিতে লাগিল।

.

---

## দ্বিতীয় পরিচ্ছেদ

তর্কভূষণ মহাশয়ের পুত্রকন্যাদিগের বিশেষ পরিচয় কিছুই দেওয়া হয় নাই। তাঁহাদের নামের ইতিবৃত্ত-মাত্র সকলে অবগত হইয়াছেন।

সর্বজ্যোষ্ঠের নাম শিবচন্দ্র বিদ্যারত্ন;—তাঁহার বয়ঃক্রম চল্লিশ বৎসরের ন্যূন হইবে না। ইঁহার বিজ্ঞাসাধা সুপ্রসিদ্ধ পিতার অনুরূপ নহে, এবং প্রতিভাশক্তিও তাদৃশ নহে; কিন্তু ইনিও পণ্ডিতমণ্ডলীর মধ্যে একজন গণনীয় ব্যক্তি। নানাশাস্ত্রে ইঁহার প্রগাঢ় ব্যাপ্তি এবং যজন যাজন অধ্যয়ন অধ্যাপন প্রভৃতি ব্রাহ্মণোচিত কর্ম্মেই ইঁহার অভিনিবেশ। ইনি কলিকাতার হাতীবাগানে নিজের এক চতুষ্পাঠী করিয়া অধ্যাপনা কার্যে নিযুক্ত আছেন। এতদ্বিন্ন শোভাবাজারের রাজবাড়ীতে সভাপণ্ডিতের কার্য্যও করিয়া থাকেন। ইনি হাতীবাগানে যে বাড়ীতে থাকেন, তাহা একটা সুপ্রশস্ত একতলা পাকা বাড়ী। সে বাড়ীটা রাজারা তাঁহারই জন্ত নিৰ্ম্মাণ করিয়া দিয়াছেন।

মধ্যম পুত্র শ্রীশঙ্কর;—ইনি জ্যোষ্ঠের অপেক্ষা প্রতিভাশালী ও মেধাবী। ইনিও নবদ্বীপে পাঠ সাঙ্গ করিয়া প্রতিষ্ঠাভাজন হইয়াছেন। তবে সে প্রতিষ্ঠা পিতার ত্যায় নহে। ইনি বাসগ্রামেই অবস্থিতি করিয়া অধ্যাপনাকার্য্যে পিতার সহায়তা করিয়া থাকেন। শ্রীশঙ্করের আ একটা গুণ এই যে, তাঁহার বুদ্ধি উভয় দিকেই খেলে। তিনি শাস্ত্রে মৰ্ম্মগ্রহণে যেমন সূচত্বর, নবানুষ্ঠিতে বিশেষ পারদর্শিতা থাকাতে, বা তিথি, প্রায়শ্চিত্তাদির ব্যবস্থাদানে যেমন সুনিপুণ, বিষয়-রক্ষাতে তেমনি সূক্ষ্ম। তর্কভূষণ মহাশয়ের বৈষয়িক উন্নতির কথা যে পূর্বে

বলিয়াছি, তাহার অনেকটা শঙ্করের বুদ্ধির গুণে; স্মৃতরাং শঙ্কর গৃহে থাকিয়া সকল দিক রক্ষা করিয়া থাকেন; তাঁহাকে পিতার দক্ষিণ হস্ত বলিলেও অত্যাক্তি হয় না।

তৃতীয় পুত্র গৌরীপতি;—ইনি নবদ্বীপে পাঠ সাজ করিয়া বেদ বেদান্ত পাড়বার জ্ঞান বিগত দুই বৎসর হইতে কানীধামে অবস্থিতি করিতেছেন। লোকের ধারণা, ইহার মত বুদ্ধিমান ও প্রতিভাশালী ব্যক্তি এই সুবিখ্যাত পণ্ডিতবংশেও জন্মে নাই। ইনি কুলের ভূষণ, বংশের প্রদীপ ও দেশের গৌরব পরূপ হইবেন, এইরূপ সকলের আশা।

চতুর্থ পুত্র হরচন্দ্র;—ইনি কিছুদিন স্বীয় পিতার চতুষ্পাঠীতে ব্যাকরণ কাব্য প্রভৃতি পাঠ করিয়াছিলেন; কিন্তু অনবধানতাবশতঃ বিশেষ কিছু শিখিতে পারেন নাই। কিছুকাল হইল পাঠ সাজ করিয়া এক প্রকার নিষ্কর্মা বসিয়া আছেন। হরচন্দ্র কিছু আমোদপ্রিয় লোক। নিষ্কর্মা লোকের যদি আমোদ-প্রিয়তাটাও না থাকে, তবে কাল কাটান দ্রুত। হরচন্দ্রের একটা ঈশ্বরদত্ত শক্তি আছে; সে জ্ঞান গ্রামস্থ সমুদায় আমোদপ্রিয় লোক তাঁহাকে চায়। তিনি বেশ গাইতে পারেন। বস্তুতঃ বলিতে গেলে এটি তাঁহাদের পরিবারের পৈতৃক সঙ্গুণ। তর্কভূষণ মহাশয়ের স্বর্গীয় পিতা ৮তারাদাস তর্কবাচস্পতি মহাশয় একজন সুগায়ক ছিলেন। হরচন্দ্র সেই শক্তি বহুল পরিমাণে উত্তরাধিকারিস্বত্বে প্রাপ্ত হইয়াছেন। কেবল তাহা নহে, তিনি গোপনে একজন ওস্তাদের নিকট বেশ বাজাইতেও শিখিয়াছেন। স্মৃতরাং আমোদ-প্রিয় দলে তাঁহার ঝড়ই আদর।

পঞ্চম পুত্র ভবেন্দ্র;—ইহার বিদ্যালিক্ষা লইয়া পরিবার-পরিজনের সহিত তর্কভূষণ মহাশয়ের কিঞ্চিৎ মতভেদ উপস্থিত হইয়াছিল। গ্রামে কতিপয় ভদ্রলোকের যত্নে একটা ইংরাজী স্কুল স্থাপিত হইলে শিবচন্দ্র,

শঙ্কর ও পরিবারস্থ মহিলারা সকলেই ভবেশকে সেখানে প্রেরণ করিবার প্রস্তাব করিলেন। তর্কভূষণ মহাশয়ের ইংরাজী শিক্ষার প্রতি বিশেষ আস্থা নাই। এ বংশের সকলে সংস্কৃত বিদ্যাতে বিশেষ পারদর্শী হয়, ইহা তাঁহার আন্তরিক ইচ্ছা। বিশেষতঃ ইংরাজী-শিক্ষিত নব্য যুবকদের নানা প্রকার উচ্ছৃঙ্খলতার বিবরণ শুনিয়া তাঁহার মনে এক প্রকার ভীতির সঞ্চার হইয়াছে ; সুতরাং তিনি প্রথমে ভবেশকে ইংরাজী স্কুলে দিতে কোনক্রমেই সম্মত হন নাই। সে প্রায় ১৩১৪ বৎসর বয়স পর্য্যন্ত তাঁহারই চতুষ্পাঠীতে ব্যাকরণ কাব্যাদি পড়িল। কিন্তু অবশেষে শিবচন্দ্রের বিশেষ অনুরোধে তাহাকে ইংরাজী স্কুলে দেওয়া হইয়াছে। শিবচন্দ্রের যে ইংরাজী শিক্ষার প্রতি বিশেষ আস্থা আছে, অথবা নব্য শিক্ষিতদিগের উচ্ছৃঙ্খলতাকে যে তিনি ঘৃণা করেন না, তাহা নহে, বরং অনেক বিষয়ে তিনি স্বীয় পিতা অপেক্ষাও অনুদার ; কিন্তু শোভা-বাজারের রাজবাটীর বাবুরা তাঁহাকে বুঝাইয়া দিয়াছেন যে ব্রাহ্মণপণ্ডিতি ব্যবসায়ে আর অধিক দিন চলিবে না ; অন্ততঃ সংস্কৃত বিদ্যার সঙ্গে সঙ্গে কিয়ৎপরিমাণে ইংরাজী শিক্ষা করা আবশ্যিক। বুঝাইয়া দিয়া তাঁহাদের মধ্যে একজন শিবচন্দ্রের জ্যেষ্ঠ পুত্র গিরিশচন্দ্রের হিন্দুস্কুলে পড়িবার ব্যয় বহন করিতে স্বীকৃত হইয়াছেন। তদনুসারে ইতিপূর্বেই তর্কভূষণ মহাশয়ের কিঞ্চিৎ অনিচ্ছাসত্ত্বেও গিরিশচন্দ্রকে হিন্দুস্কুলে দেওয়া হইয়াছে। পরে শিবচন্দ্র ভবেশকেও ইংরাজীস্কুলে দিবার জন্ত বিশেষ অনুরোধ করিয়াছিলেন ; তদনুসারে ভবেশ ইংরাজী স্কুলে গিয়াছে।

কথাগুলির বিশেষ পরিচয় আর কি দিব ? এদেশে ভদ্রকুল-কন্যাদের পরিচয় দিবার রীতি নাই। এইমাত্র বলিলেই যথেষ্ট যে তাহার সকলেই বিবাহিতা এবং প্রথম তিনটি সন্তানসন্ততির মুখ দর্শন করিয়াছে।

ভুবনেশ্বরীর বিবাহের পর প্রায় দশ বার দিন অতীত হইয়াছে।



আত্মীয় কুটুম্ব প্রভৃতি নিমন্ত্রিত ব্যক্তিগণ স্বীয় স্বীয় স্থানে প্রতিনিবৃত্ত হইয়াছেন। শিবচন্দ্র এখনও বাটীতে আছেন। ভুবনের বিবাহোৎসব শেষ হইলেই তর্কভূষণ মহাশয়ের অন্তরে একটি প্রবল চিন্তা জাগরুক হইয়াছে;—বিজয়ার জ্ঞা কি করা যায়। তর্কভূষণ মহাশয়ের স্নেহের গভীরতা কত, তাহা তাঁহার ধীর গম্ভীর ও দুর্ববগাহ আকৃতির উপরে লক্ষ্য করা যায় না। তাঁহার অল্প মনোগত ভাবই বাক্যে বা বাহিরের উচ্ছ্বাসে প্রকাশিত হইয়া থাকে; কার্য্যে সে সমুদায়ের প্রকাশ। বিজয়ার বৈধবাদশা-প্রাপ্তির দিন অবধি তাঁহার হৃদয়ের মর্ম্মস্থানে একটি আঘাত লাগিয়াছে এবং অপরাপর চিন্তার সহিত বিজয়ার চিন্তা বিশেষরূপে হৃদয়ে জাগিতেছে। তিনি ভাবিতেছেন, বিজয়ার আকার প্রকার যেরূপ দাঁড়াইয়াছে, তাহাতে আর তাহাকে চক্ষুর অন্তরালে পাঠাইতে সাহস হয় না। আর বস্তুতও নববৈধবা বিজয়ার দেহমানে স্তম্ভং পরিবর্তন ঘটিয়াছে। তাঁহার সেই উজ্জ্বল গৌর-কান্তি যেন মলিনতা-মেঘে আচ্ছন্ন হইয়াছে; সেই চির-প্রসন্ন মুখ কিরূপ গম্ভীর ও প্রশান্ত ভাব ধারণ করিয়াছে, দেখিলে খেদযুক্ত সস্ত্রমের উদয় হয়; জীবনের প্রতি কি এক প্রকার অনাস্থা, বিষয়-সুখের প্রতি কি এক প্রকার নির্লিপ্ত ভাব, সকলের প্রতি কি এক অপূর্ব সৌজা, নিজের সুখ অপরকে দিবার জ্ঞা কি এক প্রকার বাগতা সর্বজীবে কি এক অদ্ভুত দয়া, মুখশ্রীতে কি এক প্রকার পবিত্রতার আভা; দেখিলে বোধ হয় শোকাগ্নি মানবীকে পোড়াইয়া দেবী করিয়া তুলিয়াছে। তর্কভূষণ মহাশয় যে মুহূর্ত্তে বিজয়ার বৈধব্যান্ধিলিত মুখের প্রতি দৃষ্টিপাত করিয়াছেন, সেই মুহূর্ত্ত হইতেই বৃষ্টিতে পারিয়াছেন যে শোকের দারুণ শেল সে প্রাণে অতিশয় বাজিয়াছে। তদবধি আর তাঁহাকে দেবরদিগের নিকটে প্রেরণ করিবার ইচ্ছা নাই। আর প্রেরণ করিবেনই বা কাহার নিকটে? হুই দেবরই ইংরাজীতে স্মর্শিক্ত

বটে, কিন্তু উভয়েরই আচরণ বিগর্হিত, এবং আচার-ভ্রষ্ট বলিয়া উভয়েরই প্রতি তর্কভূষণ মহাশয়ের বিশেষ অশ্রদ্ধা। মধ্যম ডেপুটী কালেক্টরী কর্ম পাইয়া নিজের জীপুত্র লইয়া মেদিনীপুরে অবস্থিতি করিতেছেন। কনিষ্ঠ যদিও উপার্কক এবং কলিকাতাবাসী, তথাপি তাঁহার আশ্রয়ে বিজয়াকে রাখা বাঞ্ছনীয় নহে। এই সকল চিন্তাতে তর্কভূষণ মহাশয়ের মন কয়েকদিন হইতে বিশেষরূপে আন্দোলিত হইতেছে। তিনি মনে মনে সঙ্কল্প করিয়াছেন যে বিজয়াকে নশিপুরেই রাখিবেন এবং তাঁহার বিনোদনের জন্ত আগামী জ্যৈষ্ঠ মাসেই একজন উৎকৃষ্ট কথক আনাইয়া বাড়ীতে কথকতার আয়োজন করিবেন। কিন্তু তাঁহার মনের এ পরামর্শ কাহারও নিকট ব্যক্ত করেন নাই; মনে মনে সমুদায় বন্দোবস্ত করিতেছেন। এতদ্ব্যতীত তিনি আর একটা কাজ করিয়াছেন। কয়েক মাস পূর্বে তিনি এক একখানি কৃতিবাসের রামায়ণ ও কাশীরাম দাসের মহাভারত আনাইয়া, হরচন্দ্রের হাতে দিয়া, মধ্যে মধ্যে অন্তঃপুরস্থ মহিলাদিগকে পড়িয়া শুনাইতে আদেশ করিয়াছিলেন। অভিপ্রায় এই ছিল, পুরাণ শ্রবণ করিয়া জীলোকদিগের অবসরকালটা ভালরূপে কাটিয়া যাইবে এবং ধর্ম্মে মতি বাড়িবে। তদনুসারে হরচন্দ্র মধ্যে মধ্যে রামায়ণ ও মহাভারত পড়িয়া অন্তঃপুরবাসিনী রমণীদিগকে শুনাইয়া থাকেন। কিন্তু কয়েকদিন হইল, কর্তা গৃহিণীর মুখে শুনিয়াছেন যে, বিজয়া স্বীয় পতির নিকট বেশ লিখিতে ও পড়িতে শিখিয়াছেন। শুনিয়া দুইদিন কি ভাবিলেন; তৎপরে বিজয়াকে ডাকিয়া উক্ত গ্রন্থদ্বয় পড়িয়া মহিলাদিগকে মধ্যে মধ্যে শুনাইবার ভার দিলেন। মনের অভিপ্রায় বোধ হয় এই রহিল, বিজয়া যখন পড়িতে শিখিয়াছে, তখন এভার তাহাকে দিলে সর্ব্বাংশেই কল্যাণ।

একদিন রাজিকালীন আহারের সময় উপস্থিত। তর্কভূষণ মহাশয়

বাহির বাটী হইতে অন্তঃপুরে আসিলেন। আসিয়াই সৰ্বাগ্রে বিধবাদিগের নিকটে গেলেন এবং তাঁহাদিগের সাম্বাহিক জলযোগের কিরূপ ব্যবস্থা হইয়াছে, তাহার তত্ত্বাবধান করিলেন। অবশেষে পুত্রগণসমভিব্যাহারে আহার করিতে বসিলেন। গোবিন্দ ও অপর কয়েকজন ছাত্রও বাহিরের রোয়াকে আহার করিতে বসিল। পুত্রগণের সহিত তাহাদিগকে লইয়া আহারে বসিতে তর্কভূষণ মহাশয়ের আপত্তি নাই, কারণ তাহার বাটীর ছেলেরই মত। কিন্তু তাহা হইলে সে বেচারাদের আর আহার হয় না। তর্কভূষণ মহাশয় এমনি গম্ভীর প্রকৃতির মানুষ, যে, ভয়ে তাহাদের আর মুখে হাত উঠে না। এই জন্ত গোবিন্দ গৃহিণী ঠাকুরাণীর দ্বারা বলাইয়া বাহিরে খাইবার বন্দোবস্ত করিয়া লইয়াছে। আজ বাহিরে বিজয়া তাহাদের আহারের তত্ত্বাবধান করিতেছেন, এবং এক একবার আসিয়া জানালার পার্শ্বে গৃহিণীর নিকটে দাঁড়াইয়া ভিতরের আহারকারীদিগকে দেখিতেছেন। পুত্রগণেরও পিতার সঙ্গে আহার করা এক ঘোর বিড়ম্বনা। একে তর্কভূষণ মহাশয়ের প্রকৃতি অতি গম্ভীর, তাহাতে মেজাজটা। কিছু রুক্ষ। একটু কথাই অসাবধানতা, বা কাজের ত্রুটি হইলেই তাঁহার তিরস্কার সহ্য করিতে হয়। সেই ভয়ে ছেলেরাও অনেক সময় স্বতন্ত্র ঘরে আহার করিয়া থাকে। আজ কিন্তু সকলে একত্র বসিয়াছেন। নীরবে আহার চলিয়াছে; শিশুরা সকলে ঘুমাইয়া পড়িয়াছে; কেবল বিজয়ার কথা বিক্ষ্যবাসিনী ও শিবচন্দ্রের একটা কথা স্মৃতি দ্বিজন জানালার উপরে বসিয়া আহার দেখিতেছে; জানালার অপর পার্শ্বে গৃহিণী ঠাকুরাণী দণ্ডায়মানা আছেন; তিনি দুইদিকের আহারের তত্ত্বাবধান করিতেছেন; দুইটী বধু অবগুণ্ঠনাবৃত হইয়া পরিবেশন করিতেছেন।

মধ্যে কর্তা একবার বিরক্তিস্বরে ভবেশকে বলিলেন, “তোমার ধাবার

সময় শুষ্ক শব্দটা এখনও গেল না ! সর্বদাই বোল টানিস্ কেন ?” সে বেচারার আহ্বারের সময় কি এক প্রকার শব্দ হয়। অনেকবার তাহাকে বলিয়া দেওয়া হইয়াছে, সেও সর্বদা সাবধান থাকিবার চেষ্টা করে ; বিশেষতঃ পিতার সঙ্গে বসিলে ত কথাই নাই ; কিন্তু কি তার দুর্ভাগ্য, যেই একটু অগ্রমনস্ক হয়, অমনি কোথা হইতে “শুষ্ক শুষ্ক” শব্দটা আসে। আজও দুই একবার সেইরূপ হইয়াছে। গৃহিণীর কোলের ছেলে। তিনি ছাড়িবেন কেন ? বলিলেন, “ঐ জ্ঞেই ত ওরা তোমার সঙ্গে বসে না।” কর্তা উত্তর করিলেন না ; আবার নীরবে আহ্বার চলিল। অবশেষে কর্তা ঠাকুরাণী নীরবতা ভঙ্গ করিলেন। তিনটি বিড়াল ভোজনকারীদিগের পাতের নিকট উপস্থিত ; তাহার মধ্যে একটা কিছু অধিক অস্থির। সে লাস্কুল তুলিয়া ম্যাও ম্যাও করিয়া পরিবেশনকারিণী বধূদিগের সঙ্গে ছুটাছুটি করিতেছে। অপর দুইটা নিতান্ত উদাসীন ভাবে পাতের অদূরে অর্দ্ধমুদ্রিত নয়নে বসিয়া আছে। তাহাদেরও দৃষ্টি ভোজনকারীদিগের হস্তের সহিত উর্দ্ধে ও অধোতে গতয়াত করিতেছে। গৃহিণী অস্থির বিড়ালটাকে লক্ষ্য করিয়া বলিলেন ;—“মন্স রে ! লক্ষীছাড়া বেরালটার ছুটোছুটি দেখ ! দূর, দূর, দূর হ ! বিন্দু, একগাছা বাড়ি নিয়ে মেরে তাড়িয়ে দে ত !”

তর্কভূষণ মহাশয় এতক্ষণ মার্জ্জারদিগের প্রতি মনোযোগ করেন নাই। গৃহিণীর কথাতে তাঁহার দৃষ্টি সেইদিকে আকৃষ্ট হইল। তিনি জানিতেন, বাড়ীতে দুইটা বিড়াল আছে। আবার তৃতীয়টা কোথা হইতে আসিল ? বলিলেন, “আমাদের ত দুটো বেরাল ছিল, ওটা আবার কোথা হতে এল ?”

গৃহিণী। ঐ হতভাগা দুটো কোথেকে ডেকে এনেছে ! ছুটোছুটি দেখ না !

তর্কভূ। পেটে ভাত না থাকলে সকলকেই ছুটোছুটি করতে হয়।  
এই দেখ ওর ছুটোছুটির ওষুধ আমি দিচ্ছি।

এই বলিয়া মাছ ভাত মাথিয়া পাতের নিকট একরাশি অন্ন দিলেন।

গৃহিণী। ঐ জন্তাই ত ওগুলো বাড়ী ছেড়ে নড়ে না; থেয়ে থেয়ে  
খোদার খাশী হয়ে উঠছে!

তর্কভূ। তোমার বাড়ীতে এলে তুমি খেতে দেবে না; আর  
একজনদের বাড়ীতে গেলে তারা খেতে দেবে না; তবে ওরা বাঁচবে কি  
করে? ওরা কি বাজার থেকে কিনে এনে রেঁধে খাবে?

এই কথা শুনিয়া পুত্রদিগের বড়ই হাসি পাইল; কিন্তু কেহই সাহস  
করিয়া হাসিতে পারিল না।

গৃহিণী। (বিজয়াকে লক্ষ্য করিয়া) শুনলি ভাই, কথা শুনলি?  
এমন মানুষ কখন দেখেছিস? কলে ইঁদুরটী পড়লে মারতে দেবেন না;  
কোন জানোয়ারকে একটু কষ্ট দিতে দেবেন না; বেরালগুলোর আদর  
জ্ঞাখ না—যেন ঠাকুরপুতুর।

বিজয়া। বৌদিদি, থাক, থাক, তোমার বেরাল থেমেছে!

তর্কভূ। (বিজয়ার কণ্ঠস্বর শুনিয়া) এই যে বিজয়া! দেখ বিজয়া,  
আমি ক’দিন হতে তোমার বিষয় ভাবছি। তোমার অভিপ্রায় কি?  
তুমি কি দেবরদের নিকট ফিরে যাবার ইচ্ছা কর?

বিজয়া। তোমরাই ত বলে থাক, এরূপ অবস্থায় স্ত্রীলোকের  
পতিকূলে দেবরের আশ্রয়ে থাকাই কর্তব্য।

তর্কভূ। তা ত জানি; কিন্তু তোমার দেবরেরা যে মানুষের মত নয়!

বিজয়া। তা মিথ্যে নয়; কিন্তু সেটা কেমন দেখায়? লোকে  
বলবে যেই এমনি দশা হলো, অমনি যাদের সঙ্গে এতদিন কাটালে,  
তাদের সকলকে ফেলে গিয়ে বাপের বাড়ী উঠলো!

তর্কভূ। তা ত লোকে বলবে ; কিন্তু তা দেখলে হবে না। দেখতে হবে, তোমাকে দেখে কে ? তোমার আকার প্রকার বেরূপ দেখছি, তাতে তোমাকে দেখবার লোক চাই।

গৃহিণী। আহা ! তা বৈকি ? এ শরীরটাতে কি কিছু আছে ? একেবারে পাত হ'য়ে গিয়েছে। আর ওকে বললেও ত শুনবে না, বলি বিধবা কি আর কেউ হয় নি ? যে গেছে, তার জন্তে শরীরটে পাত ক'রে কি হবে ? এক বেলা এক মুঠো খাওয়া, তাও ভাল ক'রে খাবে না, যেখানে সেখানে পড়ে থাকবে, শরীরটার উপরে একেবারে দৃষ্টি নেই ; শরীরের আর অপরাধ কি ?

বিজয়া। কেবল তাও নয়। ছেলেটা ইংরাজী স্কুলে পড়ছে। ওর কাকা একটু পড়াশুনা দেখতে পারে। তাদের ছেলে তারা মানুষ করলেই ত ভাল।

শঙ্কর। কেন, ভবেশ ত এখানকার ইংরাজী স্কুলে পড়ে ; আর এ স্কুলও ভাল ; ইহার উন্নতি বিষয়ে বাবুদের বেশ মনোযোগ আছে ; এখানেই ইন্দুকে দেওয়া যাবে ; ভবেশের সঙ্গে যাবে আসবে।

বিজয়া আর দুইটা কথা আপাততঃ গোপন রাখিলেন। প্রথম, তাঁহার পরলোকগত পতি নন্দকিশোর বন্দোপাধ্যায় মহাশয় মৃত্যু-শয্যাতে স্বীয় সহোদরদিগের হস্তে তাঁহাকে ও পুত্রকত্তাকে সমর্পণ করিয়া গিয়াছেন। সেই মৃত্যু-শয্যার আদেশ তাঁহার মনে অনুল্লভ্যনীয় হইয়া রহিয়াছে। দ্বিতীয় কথা, তাঁহার কন্যা বিদ্যাবাসিনীকে লেখা পড়া শিখাইবার ইচ্ছা। সে এখন কলিকাতার বেথুন সাহেবের নব-প্রতিষ্ঠিত বালিকাবিদ্যালয়ে পড়ে। তাঁহার পতি মহাশয় একজন সুশিক্ষিত, উদারভাবাপন্ন ও বিদ্যোৎসাহী লোক ছিলেন। মহাত্মা বেথুনের সহিত তাঁহার পরিচয় ও আত্মীয়তা ছিল। বেথুন তাঁহাকে অতিশয় প্রীতি করিতেন। বেথুনের

বালিকাবিভাগের স্থাপন বিষয়ে তিনি একজন উৎসাহ-দাতা ও সহায় ছিলেন ; এবং নিজ কত্যাটিকে পাঠোপযুক্ত বয়স হইবার পূর্বেই ঐ স্কুলে দিয়াছিলেন। কেবল তাহা নহে ; তাঁহারই প্রযত্নে বিজয়া ঘরে বসিয়া অতি উত্তমরূপে বাঙ্গালা লিখিতে ও পড়িতে শিখিয়াছেন। তিনি নিজ জ্ঞানের রসের আনন্দ পাইয়াছেন ; সুতরাং তাঁহার আন্তরিক ইচ্ছা যে কত্যাটির পাঠের সুব্যবস্থা হয়। নশিপুরে তাহার কতদূর সুবিধা হইবে, সে বিষয়ে সন্দেহ। কয়েকজন শিক্ষিত যুবকের উত্তম গ্রামে একটি বালিকাবিভাগ স্থাপিত হইয়াছে। উদ্যোগ-কর্তৃগণ তর্কভূষণ মহাশয়ের বাটীর বালিকাদিগকে লইতে আসিলে তিনি বলিয়াছিলেন, “বালিকাদিগের দশ বৎসর না হইতেই ত বিবাহ দিতে হইবে, দুই অক্ষর বাঙ্গালা পড়াইয়া কি হইবে?” এই কথা শুনিয়াই তাঁহারা চলিয়া গিয়াছেন। তৎপরে কেহ আর বিশেষ জেদ করে নাই ; সুতরাং এ পরিবারের বালিকারা স্কুলে যায় না। বিজয়ার সন্দেহ আছে, তর্কভূষণ মহাশয় বিদ্যাবাসিনীকে স্কুলে যাইতে দিবেন কি না। এ সকল কথা এখন ব্যক্ত করিঙ্গেন না, কেবল বলিলেন, “আচ্ছা ভেবে দেখি, কি করিলে ভাল হয়।”

ভবেশ। না, ছোটপিসি ! তোমার যাওয়া হবে না ! তুমি আবার কি ভেবে দেখবে ? ছোটপিসী আমাদের সকলকে ভালবাসেন না কিনা, তাই কেবল যাব যাব করেন !

তর্কভূ। (কিঞ্চিৎ বিরক্তি-কর্কশ স্বরে) “থাক্, তোর রসিকতা রেখে দে !”

ভবেশ বেচারি অপ্রস্তুত ! প্রথম তিরস্কারের পর অন্তকার রাত্রে তাহার আর কথা কহা উচিত হয় নাই।

আহারান্তে তর্কভূষণ মহাশয় “ভেলো” কুকুরকে ভাত দিবার জন্ত হরচন্দ্রকে আদেশ করিয়া আচমনার্থ নিজের শয়ন-ঘরের দিকে গমন

করিলেন। শিবচন্দ্র ও শঙ্কর বাহির বাটীতে গেলেন। হরচন্দ্র অন্তর্মুগ্ধ লইয়া খিড়কীতে গিয়া “ভেলো, ভেলো! আয়, আ-তু-তু” বলিয়া চীৎকার করিতে লাগিলেন। ভবেশ আচমনাস্তে তাড়াতাড়ি আসিয়া আনন্দে করতালি দিয়া বলিতে লাগিল, “এইবার ছোটপিসি! এইবার কি হবে? এইবার শক্ত হাতে পড়েছ; বাবার হাতে পড়েছ, এইবার ত থাকতেই হবে!” এই বলিয়া আনন্দে কালীর পৃষ্ঠে এক কীল।

কালী। মাগো গিছি!

গৃহিণী। মেয়েটাকে মারলে দেখ!

তারা। ওর ভালবাসা ঐ রকম! যাকে ভালবাসে তার হাড়গোড় ভেঙ্গে দেয়।

বিজয়া। সত্যি! ওর মুখ দেখলে আর যেতে ইচ্ছা করে না। ভবেশ, আমি থাকলে তুমি বড় খুসী হও?

ভবেশ। তার আর কথা! তুমিই ত আমাদের ঘরের লক্ষ্মী।

জ্যোষ্ঠাবধু। আচ্ছা উনি শোবেন কোথায়?

ভবেশ। কেন আমার ঘরে!

জ্যো. ব। তুই কোথায় যাবি? ( পাঠক ভুলিবেন না, ভবেশ জ্যোষ্ঠাবধুর দ্বিতীয় সম্ভানের সমবয়স্ক। )

ভবেশ। কেন, মার কাছে।

জ্যো. ব। আর ছোট বৌ যখন আসবে, কোথায় থাকবে?

ভবেশ। ( কিঞ্চিৎ বিরক্ত ভাবে ) সে যেখানে ইচ্ছা থাকবে। কেন, ছোটপিসীর কাছে থাকবে?

জ্যো. ব। আঃ কপাল! এমন মানুষেরও বিষয়ে দেয়! এত! বয়েস হলো, দাড়ি গোঁপ উঠলো, তোর বুদ্ধিও হুঁ হুঁ হবে কবে?



গৃহিণী। আলাই বালাই, কিসের ব্যয়স! তোমরাই মেনে ব্যয়স দেখ! ও আমার কালকের ছেলে; সব সতের বছর; বেটের বাচ্চা বড়ীর দাঁস, ও আমার বেঁচে থাক্।

অম্মি সন্তানের প্রতি এক ঝলক ভালবাসা উধলিয়া উঠিল; স্নেহে তাহার মস্তক নিজবক্ষে ধারণ করিলেন।

ভবেশ। (আদরে মাতার কণ্ঠালিঙ্গন করিয়া) দেখ ছোটপিসি! আমাদের এই মা'টা যেন মিছরির কুঁদো।

বিজয়া। তা সত্যি!

ক্রমে রমণীগণ বন্ধনশালার দিকে গমন করিলেন, ভবেশ তাহার ঘরে গিয়া পড়িতে বসিল।

রাত্রিকালে বিজয়া শয্যাতে শয়ন করিয়া নিজের নশিপুরে থাকিবার বিষয় অনেক চিন্তা করিয়াছেন। মুমূষুপতির মৃত্যু-শয্যার সে আদেশটী তিনি কোনক্রমেই অতিক্রম করিতে পারিতেছেন না। প্রেমের কি স্বধর্ম! মৃত ব্যক্তির চরিত্রের গুণাবলী প্রেমাস্পদের চিত্তের উপরে দ্বিগুণ বলের সহিত কার্য্য করে। নন্দকিশোর বন্দ্যোপাধ্যায়কে বিজয়া এখন ঘেরূপ নিকটে অনুভব করিতেছেন, বোধ হয় জীবদ্দশাতে তত করেন নাই। তাঁহার এক একটা কথা ও এক একটা কাজ যেন জীবন্ত হইয়া তাঁহাকে শাসন করিতেছে। তিনি ভাবিয়া চিন্তিয়া স্থির করিলেন,—‘দেবরগণ আমাকে তাড়াইয়া না দিলে আমি তাঁহাদিগকে ত্যাগ করিয়া দূরে থাকিতে পারি না।’ বিদ্যাবাসিনীর শিক্ষার বিষয়ে এই স্থির করিলেন যে, এ বিষয়টা জ্যেষ্ঠের নিকট গোপন করা বিধেয় নয়; তৎপর দিনই সমুদায় কথা ভাগিয়া বলিবেন; যদি সে বিষয়ে জ্যেষ্ঠের অমত হয়, তাঁহাকে বাধ্য হইয়া কলিকাতায় থাকিতে হইবে।

পরদিন মাধ্যাহ্নিক আহ্বানের পর বিশ্রামান্তে তর্কভূষণ মহাশয় উঠিয়া

মুখ প্রক্ষালন করিয়া বসিবামাত্র বিজয়া তাঁহার শয়নগৃহে উপস্থিত হইলেন ।

তর্কভূ। কি বিজয়া, কোনও কথা আছে নাকি ?

বিজয়া। হাঁ আছে ।

তর্কভূ। কি কথা ।

বিজয়া। তুমি যে আমাকে এখানে থাকতে বল্ছো, সে বিষয়ে একটা কথা আছে । বিন্দু কল্কেতার মেয়ে স্কুলে পড়ে । তাঁর বড় সাধ ছিল বিন্দুকে ভাল ক’রে লেখাপড়া শেখাবেন ; মরবার সময়ে আমাকেও অকুরোধ ক’রে গেছেন ; এখানে থাকলে ত বিন্দুর পড়াশুনা বন্ধ হবে ।

তর্কভূ। ( একটু বিরক্ত স্বরে ) তোমাদের ঐ গুলোই ত আমি ভালবাসি না । নন্দকিশোর সংলোক ছিল বটে, কিন্তু সকল কাজে একটু বাড়াবাড়ি ছিল । তার ফল দেখ, ভাই ছোটোর কি দশা ঘটেছে । মেয়েছেলের লেখাপড়ার জন্ত এত ব্যস্ততা কেন ? আর পড়বেই বা কত দিন ? দশ বৎসর না হতেই ত স্বপ্তর ঘরে পাঠাতে হবে । এদেশে ত কোনও দিন মেয়েছেলের লেখাপড়ার প্রথা নাই ; সংসারের কোন্ কাজটা আটকে আছে ?

বিজয়া। তোমার কাছে আমার প্রাচীনকালের কথা বলা শোভা পায় না । শুনেছি সেকালে নাকি মেয়েরা লেখাপড়া শিখতেন এবং জ্ঞানীদের সঙ্গে শাস্ত্রালাপ করতেন ? আর শাস্ত্রেও নাকি স্ত্রীলোকের বিদ্যাশিক্ষাতে নিষেধ নাই ।

তর্কভূষণ মহাশয় অতিশয় সদাশয় ব্যক্তি ; যে একটু উৎসাহ আসিয়াছিল, ভগিনীর পবিত্র ও সরলতাপূর্ণ মুখের প্রতি দৃষ্টিপাত করিয়াই তাহা অন্তর্হিত হইয়াছে । পুনরায় ধীরভাবে বলিলেন,—“হাঁ তুমি বা শুনেছ

তা সত্য ; প্রাচীনকালে রমণীদের বিদ্যাশিক্ষার রীতি ছিল বটে, আর ইহাও সত্য যে, এ বিষয়ে শাস্ত্রে নিবেদন নাই। আমার মনের কথাটা এই, যে প্রথাটা রহিত হয়েছে, এমন কি দরকার পড়েছে, যে নূতন ক'রে সে প্রথাটা চালাতে হবে ?”

বিজয়া। দরকার আছে বৈ কি ? আচ্ছা ভেবে দেখ দেখি, আমি পড়তে জানি বলে তুমি আমাকে রামায়ণ মহাভারত পড়ে বৌদের শোনাতে বলেছ। যে জন্তু বলেছ তা আমি বুঝেছি ; আমার একটা কাজ বাড়ে ও বৌদেরও উপকার হয়। যদি বোরা পড়তে পারতেন, রামায়ণ মহাভারত পড়ে কি উপকার পেতেন না ? বিদ্যাশিক্ষা করলে ত জ্ঞানলাভ করবার উপায় হয় ; জ্ঞান কি পবিত্র বস্তু নয় ? কি পুরুষ কি স্ত্রীলোক সকলের পক্ষেই কি জ্ঞানলাভ করা দরকার নয় ?

এ বিষয়ে তর্কভূষণ মহাশয় কখনও এত কথা ভাবেন নাই। রামায়ণ মহাভারত পড়ার কথাতেই তাঁহার চিন্তের সমক্ষে একটা নূতন চিন্তা আনিয়া দিল ; তিনি ক্ষণকাল নিস্তব্ধ হইয়া ভাবিতে লাগিলেন। ভাবিলেন, বিদ্যাবাসিনী ঘাঁহার কথা, সে ব্যক্তি স্ত্রীশিক্ষার বিষয়ে একজন উৎসাহী লোক ছিলেন ; বিজয়ারও সাধ কথাকে লেখাপড়া শেখায় ; এ অনুমতি না পাইলে হয়ত কলিকাতাতে চলিয়া যাইবে ; গিয়া সেই সকল স্বজাতি-ও-স্বধর্ম-বিদ্রোহী লোকের সংস্রবে পড়িবে ; যে ভয়ে তাহাকে দূরে রাখিতে চাহিতেছি, তাহা পূর্ণমাত্রায় ঘটবে। ভাবিয়া চিন্তিয়া বলিলেন,—“আচ্ছা তুমি যদি ইচ্ছা কর ত তোমার মেয়েকে এখানকার স্কুলে দিও।”

বিজয়া। তবে কাল কি পরন্তু আমি একবার কলিকাতায় যাই ; যদি এখানে থাকতে হয়, তবে আমার দেবরদের অনুমতিক্রমেই থাকা উচিত।

তর্কভূ। তা বৈ কি ? সে বেশ কথা। যাও তাঁদের সঙ্গে পরামর্শ  
ক'রে এসগে। কিন্তু জ্যেষ্ঠের প্রথমে আসবার চেষ্টা ক'রো ; জ্যেষ্ঠের  
প্রথমে কালোবাড়ীতে কথা বসবে। আমার ইচ্ছা তুমি তখন এখানে থাক।

এই কথোপকথনের দুই একদিন পরেই বিজয়া কলিকাতায় কনিষ্ঠ  
দেবরের ভবনে গমন করিলেন।

.

---

## তৃতীয় পরিচ্ছেদ

পরলোকগত নন্দকিশোর বন্দ্যোপাধ্যায় মহাশয় বিজ্ঞান জ্ঞাত বিশেষ কিছু সংস্থান করিয়া রাখিয়া যাইতে পারেন নাই। তিনি স্বভাবতঃ অতিশয় দয়ালু ও উদার প্রকৃতির লোক ছিলেন। আত্মীয়স্বজনের, প্রতিবেশিবর্গের ও অপরাপর লোকের সুখঃখের প্রতি উদাসীন থাকিতে পারিতেন না। এরূপ লোকের হস্তে অর্থ সঞ্চিত হওয়া বড়ই কঠিন। তাহাতে আবার তাঁহাকে স্বীয় উপার্জিত অর্থের দ্বারা সমগ্র পরিবারের ব্যয়ভার চালাইয়া, সহোদর ভ্রাতৃদ্বয়ের উৎকৃষ্টরূপ শিক্ষার ব্যয় বহন করিতে হইত। যৌবনের প্রারম্ভেই পিতামাতার পরলোক হওয়াতে তিনি ভ্রাতৃদ্বয়ের অভিভাবক ও পিতৃস্থানীয় হইয়াছিলেন। তাহাদের রক্ষা, শিক্ষা ও পরিণয়াদি সমুদায় কার্য্য তাঁহাকেই সম্পন্ন করিতে হইয়াছে। ভ্রাতৃদ্বয়কে যত উৎকৃষ্ট শিক্ষা দেওয়া সম্ভব, তাহা দিবেন, এই তাঁহার মনে একটা সাধ ছিল। সুখের বিষয় যে, সে সাধ পূর্ণ হইয়াছিল। তিনি মরিবার কিছু দিন পূর্বে উভয় ভ্রাতাকেই সুশিক্ষিত ও কৃতী দেখিয়া গিয়াছেন। মৃত্যু-শয্যাতে উভয় সহোদরকে নিকটে ডাকিয়া তাহাদের হস্তে স্বীয় বিধবা পত্নী ও পুত্রকন্যার ভার অর্পণ করিয়া যান।

পূর্বেই উক্ত হইয়াছে যে, মধ্যম সহোদর হরিকিশোর বন্দ্যোপাধ্যায় একটী ডেপুটী কালেক্টারী কর্ম্ম পাইয়া মেদিনীপুরে অবস্থিতি করিতেছেন। ইনি একজন সেকালের হিন্দু কালেক্টরের সৈন্যের স্ফলারশিপ-প্রাপ্ত সুশিক্ষিত ব্যক্তি। কালেক্টে থাকিতে থাকিতেই ইঁহার যশঃসৌরভ

চারিদিকে একরূপ পরিব্যাপ্ত হইয়াছিল যে, তখনই তাঁহার দিকে রাজপুরুষদিগের দৃষ্টি আকৃষ্ট হয় ; এবং কালেজ হইতে উত্তীর্ণ হইবামাত্রই দুই শত টাকা বেতনের একটা কর্ম প্রাপ্ত হন। সেই কর্ম হইতে ডেপুটী কালেক্টর পদে উন্নীত হইয়াছেন। ইংরাজী-শিক্ষিত দলে ইঁহার বিজ্ঞাবুদ্ধির ভূয়সী প্রশংসা শুনিতে পাওয়া যায়। সকলেই বলে, বাঙ্গালীর ছেলে হইয়া এমন ইংরাজী লিখিতে ও বলিতে প্রায় দেখা যায় না। আর বাস্তবিক সে কথাও সত্য ; তাঁহাকে ইংরাজী-সাহিত্য-মোচাকের একটা মাছি বলিলেও হয় ! ইংরাজী সাহিত্যে এমন উৎকৃষ্ট গ্রন্থ নাই যাহা তিনি পাঠ করেন নাই। সুপ্রসিদ্ধ ইংরাজ কবি মিলটনের “প্যারাডাইজ লষ্ট্” হইতে পৃষ্ঠার পর পৃষ্ঠা অনর্গল মুখস্থ বলিয়া যাইতে পারেন। শেক্সপীয়ারের নাটক সকল এমন সুন্দর রীতিতে পড়িতে পারেন যে, পার্শ্বের ঘর হইতে শুনিলে লোকের বোধ হয় যেন একজন ইংরাজ অভিনয় করিতেছে। একরূপ শুনা যায় যে, তাঁহার শেক্সপীয়ার পড়া শুনিয়া কাপ্তেন রিচার্ডসন্ সাহেব একবার তাঁহাকে কতকগুলি পুস্তক পারিতোষিকস্বরূপ উপহার দিয়াছিলেন। বিদ্যালয়ে পাঠকালে হরিকিশোর অপর কতিপয় যুবকের সহিত সম্মিলিত হইয়া একটা বিতর্ক-সভা (Debating Society) স্থাপন করেন। সেই সভাতে তাঁহার কয়েকজন প্রধান বক্তা ছিলেন। কিন্তু বক্তৃতাশক্তি হরিকিশোরকে কেহই অতিক্রম করিতে পারিত না। তিনি যখন ওজস্বিনী ভাষাতে সুবৃক্তসহকারে জ্ঞানীশিক্ষার আবশ্যকতা, বাল্যবিবাহের অনিষ্টকারিতা, জাতিভেদের কদর্য্যতা প্রভৃতি বর্ণনা করিতেন, তখন সভাস্থ যুবকদের মন একেবারে অগ্নিময় হইয়া উঠিত ; এবং তাহার কবরতালির চটপটা ধ্বনিতে ঘর কম্পান্বিত করিয়া তুলিত। সভাভঙ্গে সকলেই হরিকিশোরকে একটা প্রকাণ্ড রিকরমার বলিয়া শ্রদ্ধা-ভক্তি করিতে করিতে ঘরে যাইত। আর হরিকিশোর যে ঘোবনের

প্রারম্ভেই একজন রিফরমার বা সংস্কারকদলভুক্ত লোক হইয়াছিলেন, তাহার কোন সন্দেহ নাই। তিনি ইংরাজী শিক্ষার গুণে উদারভাবাপন্ন হইয়াছিলেন; দেশ-প্রচলিত কোন প্রকার কুসংস্কার তাঁহার মনে ছিল না; এবং ইহা দেখাইবার জন্তই বোধ হয়, দশজন যুবক একত্র হইলে সর্বসমক্ষে সাহস করিয়া সুরাপান করিতেন। সে সময়ে সুরাপান করাটা রিফরমারদিগের একটা প্রধান লক্ষণ ছিল। নন্দকিশোর বন্দ্যোপাধ্যায় অতিশয় মিতাচারী লোক ছিলেন। তিনি সহোদরের এই রিফরমেশনের সংবাদ পাইয়া তাঁহাকে অনেক তিরস্কার করেন। ইহা লইয়া দুইভ্রাতাতে বিবাদ ও কিছুদিন মনাস্তরও ঘটিয়াছিল। অবশেষে হরিকিশোর স্বীয় কৰ্ম্মস্থলে গমন করেন ও নন্দকিশোরের মৃত্যু হয়।

সর্বকনিষ্ঠ যুগলকিশোর বন্দ্যোপাধ্যায়; ইনিও একজন শিক্ষিত ব্যক্তি। তবে মধ্যমের ত্রায় যশস্বী হইতে পারেন নাই। ইনি সম্প্রতি কলিকাতায় জি, টি, সার্ভে অফিসে, একশত টাকা বেতনে একটা কৰ্ম্মে নিযুক্ত আছেন। পঠদশাতে রিফরমেশন বিষয়ে ইনি মধ্যমের অনুগামী হইয়াছিলেন; অর্থাৎ গোপনে একটু একটু সুরাপান ও অখাদ্য ভোজন করিতে শিখিয়াছিলেন। নন্দকিশোরের জীবদ্দশাতে রিফরমেশনের বেগটা কিছু সংবত ছিল। তিনি পরলোকগত হইলে যুগলকিশোর অবাধে ও অসঙ্কোচে নিজের রুচি ও প্রবৃত্তি অনুসারে চলিতে আরম্ভ করিয়াছেন। তাঁহার কলিকাতার বাসার বৈঠকখানাতে প্রায় প্রতিদিন রাত্রেই কতকগুলি সমবয়স্ক বন্ধুর সমাগম হইয়া থাকে। সকলেই ইংরাজী-শিক্ষিত, সকলেই সংস্কারক ও স্বজাতি-বিদ্বেষী। ইংরাজ জাতির মত জাতি নাই, শেফপীয়ারের মত কবি নাই, বেকনের মত জ্ঞানী নাই, নিউটনের মত তত্ত্ববিদ নাই, ইংরাজী সুরার মত আমোদ দিবার জিনিষ নাই, এবিষয়ে ঐ যুবকদের সকলেরই মতের অদ্ভুত একতা। তাঁহারা

পাঁচজনে একত্র হইলেই বাঙ্গালা ভাষার প্রতি বিজ্ঞপ, ব্রাহ্মণপণ্ডিতের প্রতি উপহাস ও প্রচলিত রীতিনীতির প্রতি কটুক্তি<sup>১</sup> বর্ষণ করিয়া থাকেন; এবং সর্বশেষে ইংরাজী সূরা সেবনের দ্বারা, ও অখাদ্য ভোজনের দ্বারা, সংস্কারকার্যের পরাকাষ্ঠা প্রদর্শন পূর্বক স্ব স্ব গৃহে প্রতিনিবৃত্ত হন। অবশ্য এত কথা বাহিরের লোকের বিদিত নহে; একটা জনরব আছে এইমাত্র। সেকেলে লোকেরা এই যুবকদলকে মনে মনে ঘৃণা করেন ও দূরে পরিহার করিবার চেষ্টা করেন। বিজয়াকে কলিকাতাতে থাকিতে হইলে, এই দেবরেরই আশ্রয়ে থাকিতে হয়; তাহাতে তর্কভূষণ মহাশয়ের বিশেষ আপত্তি। কিন্তু যে দিন নন্দকিশোর বন্দ্যোপাধ্যায় মৃত্যুশয্যাতে সহোদরদ্বয়কে ডাকিয়া তাঁহাদের হস্তে স্বীয় পত্নী ও পুত্রকণ্ঠার ভার অর্পণ করিয়া যান, সে দিনের, সে ঘটনার কথা বিজয়ার স্মৃতিতে জাগ্রত রহিয়াছে। দেবরদ্বয়ের নিকট হইতে দূরে থাকিবার প্রস্তাব যখনই তাঁহার সমক্ষে উপস্থিত হয়, তখনই যেন তাঁহার মনে বলে, তাহা হইলে তিনি অপরাধিনী হইবেন। সুতরাং তিনি স্বীয় পতির মৃত্যুশয্যার কথা স্মরণ করাইয়া দিয়া পুত্রকণ্ঠার রক্ষা ও শিক্ষার ভার গ্রহণ করিবার জন্ত দেবরদ্বয়কে বার বার অনুরোধ করিতে লাগিলেন। যুগলকিশোরের কথার ভাবে বোধ হইল, তিনি একাকী সে ভার বহনে অসমর্থ ও অনিচ্ছুক। হরিকিশোর অধিকাংশ সাহায্য করিলে তিনি তাহাদিগকে স্বীয় তত্ত্বাবধানে রাখিয়া শিক্ষাদান করিতে পারেন। এই কথোপকথনের পর বিজয়া সমুদায় বিবরণ আত্মপূর্বক লিখিয়া মধ্যম দেবরকে মেদিনীপুরে পত্র লিখিলেন। দিনের পর দিন যাইতে লাগিল, পত্রের কোনও উত্তর নাই। কয়েকদিন পরে বিজয়া দ্বিতীয় পত্র লিখিলেন, তাহারও উত্তর নাই। শেষে যুগলকিশোর মধ্যমের অভিপ্রায় জানিবার জন্ত নিজেকে এক পত্র লিখিলেন। সংক্ষেপে উত্তর আসিল;—“আমার



অনেক দেনাপত্র; আমি অধিক কিছু সাহায্য করিতে পারিব না, তবে ইশু যদি হিন্দুকুলে পড়ে, তাহার স্কুলের বেতন পাঁচ টাকা মাসে দিতে পারি।” এই উত্তর পাইয়া যুগলকিশোর অতিশয় চট্টয়া গেলেন। বলিলেন, “দেনাপত্রের আলা কি কেবল তাঁরই? আমারও অনেক দেনাপত্র আছে। তিনি যদি তিন শত টাকা বেতন পাইয়াও পাঁচ টাকার অধিক দিতে না পারেন, তবে আমি কোন্ সাহসে একেলা এত বড় ভারটা গ্রহণ করি?”

বিজয়া দেবরত্নের এই ভাব দেখিয়া মর্ম্মাহত হইলেন। পতির যত্নশয্যার সেই দৃশ্য বার বার তাঁহার স্মৃতি-পথে উদ্ভিত হইতে লাগিল; পতি মহাশয় দেবরত্নের নুশিক্ষার জন্য যাহা কিছু করিয়াছিলেন সমুদায় চক্ষের নিকট আসিতে লাগিল; সেই সকল স্মরণ করিয়া গোপনে অনেক অশ্রু বিসর্জন করিলেন। অবশেষে গতান্তর না দেখিয়া নশিপু্রে থাকিবার জন্য দেবরত্নের অনুমতি প্রার্থনা করিলেন। এ অনুমতি পাইতে আর অধিক বিলম্ব হইল না। যুগলকিশোর বলিলেন, “সে ত বেশ! এখানে থাকা আর সেখানে থাকা একই কথা।” বিজয়া মনে মনে কিঞ্চিৎ ক্ষুব্ধ হইলেন, কিন্তু মুখ ফুটিয়া কিছুই বলিলেন না। অবশেষে তাঁহার নশিপু্রে ফিরিয়া আসাই স্থির হইল।

বিজয়া যখন নশিপু্রে পুনরাগমন করিলেন, তখন তর্কভূষণ মহাশয়ের পরিবারস্থ ব্যক্তিগণের আনন্দ আর মনে ধরে না! গৃহিণী বলিলেন, “বাচলাম বাপু, তুই আমার হাতের কাজ গুলো বুঝে নিলে আমি বাঁচি।” পুত্রগণ সকলে মহা আনন্দ প্রকাশ করিতে লাগিল; বধূগণ বিজয়াকে বেষ্টন করিয়া অকৃত্রিম সন্তোষ প্রকাশ করিতে লাগিলেন; দাস দাসী পরিবার পরিজন কাহারই আনন্দ প্রকাশ করিতে বাকি রহিল না। তর্কভূষণ মহাশয়ের আনন্দ বাহিরে বুঝিতে পারা গেল না; কিন্তু

বিজয়া দাক্ষণ বৈধব্যাধশা প্রাপ্ত হইয়া তাঁহার স্নেহ ও পরিবারপরিজনদের আদর-বত্বের মধ্যে নিরাপদে প্রতিষ্ঠিত হইলেন, ইহাতে তাঁহার প্রাণে যে গভীর তৃপ্তি জন্মিল, তাহার কিছু কিছু সেই গভীর আকৃতিতেও লক্ষ্য করিতে পারা গেল। বিজয়া নশিপুরে প্রতিষ্ঠিত হইবামাত্র গৃহিণী তাঁহার হস্তে ভাড়াবের চাবিগুলি দিয়া তাঁহাকে এক প্রকার সংসারের কর্ত্রী করিয়া দিলেন। তিনি সেই ভার বধাসাধ্য বহন করিতে লাগিলেন।

বিজয়া গৃহের কর্ত্রী হওয়াতে দাসীদ্বয়, বিধবা চতুষ্টয় ও বধূগণ, সকলেরই অল্লাধিক কাজ বাড়িয়া গেল। পরিষ্কারপরিচ্ছন্নতা ও শৃঙ্খলার দিকে তাঁহার অতিশয় দৃষ্টি। গৃহে বা প্রাসঙ্গ্যে বা কোনও লুক্কায়িত কোণে, কোন স্থানেই, একটু মলিন দ্রব্য পড়িয়া থাকিবার ঘো নাই; তাহা হইলেই দাসীদ্বয়কে তিরস্কার সহ্য করিতে হয়। বধূগণ নিজ নিজ গৃহ অপরিষ্কার বা বিশৃঙ্খল করিয়া রাখিতে পারেন না; রাখিলেই দেখিতে পান যে বিজয়া নিজে তাঁহাদের গৃহ পরিষ্কার করিতেছেন ও জিনিষ পত্র গুছাইতেছেন। তখন তাঁহারা ছুটিয়া আসিয়া তাঁহার হস্ত হইতে কাঁটাগাছি কি কাপড়খানি কাড়িয়া লইতে পথ পান না। পূর্বে সংসারের কাজকর্মের শৃঙ্খলা ছিল না; কে কি করিবে, তাহার ঠিক থাকিত না; “তরকারিগুলো কুটে দেওনা গো, মাছটা কুটে দেওনা গো”, করিতে করিতে একজন বধূ গিয়া কুটিতে বসিলেন; এইরূপে কাজ চলিত। ফল এই হইয়াছিল, কোন কাজ সময়ে হইত না। বিজয়া সে নিয়ম রহিত করিলেন। রন্ধন, মাছতরকারি কোটা, ছেলেদের প্রাতরাশ প্রস্তুত করা, প্রভৃতি সমুদায় কার্যের ভার এক এক জনকে ভাগ করিয়া দিলেন; এবং নিজে সকলের সঙ্গে থাকিয়া খাটিতে লাগিলেন। ঘেন কলের মত সমুদায় কাজ চলিতে লাগিল। অবশ্য বিজয়ার পরিশ্রমটা কিছু গুরুতর হইতে লাগিল। কিন্তু তিনি হুগুচিতে সে শ্রম বহন করিতে লাগিলেন।

কেবল তিনি কেন, মিষ্ট স্বভাবের এমনই গুণ, তাঁহার ব্যবস্থা সকলেই ছুঁচ-চিন্তে পালন করিতে লাগিলেন।

এ স্থলে কেহ কেহ হয়ত জিজ্ঞাসা করিবেন যে, রন্ধনের ভার, মাছ তরকারি কোটার ভার, ছেলেদের প্রাতরাশের ভার, এ সমুদায় ভার ত অপরের হস্তেই রহিল। গৃহিণীর নিজের হস্তে কেবল এক ভাঁড়ারের ভার ছিল। তাহাও যদি বিজয়াকে দিলেন, তবে তাঁহার আর কি কাজ থাকিল? কেন, তাঁহার কি কাজ নাই? যে দশ বারটা পোল্ল পোল্লীর উল্লেখ করিয়াছি, সে স্কুলটা রাখে কে? সে কি সাধারণ ব্যাপার? তাহাদের মধ্যে সর্বদাই কিচিমিচি, টিকটিকি, চুলোচুলি, হাতহাতি, নখাঘাত, দণ্ডঘাত ও পদাঘাত প্রভৃতি চলিতেছে। সে সময় সেই শিশুদের মধ্যে পড়িয়া বিবাদের মীমাংসা করা, চিনির পাতাটি বা মিছরির কাগজটি বাজারের সানগ্রীর সহিত আসিয়া নামিবামাত্র যখন একেবারে সেইদিকে বহুসংখ্যক ক্ষুদ্র চরণের গতি হয়, তখন অগ্রসর হইয়া সেগুলি রক্ষা করা ও নখে খুঁটিয়া একটু একটু দিয়া সকলকে বিদায় করা, ঐ ক্ষুদ্র সৈন্তদের কাহারও সর্দি কাসি জ্বর প্রভৃতি হইলে গাছ-গাছড়া প্রভৃতি কুড়াইয়া পাঁচন প্রলেপ প্রভৃতি প্রস্তুত করা, বঁটীতে কলম কাটিয়া কয়ল ঘসিয়া কালি করিয়া বালকদিগকে পাঠশালাে প্রেরণ করা, এবং সর্বশেষে প্রত্যেক দিন সন্ধ্যাকালে ঐ শিশুদের মধ্যে সমাসীন হইয়া “একানন্ডের কথা”, “ব্যাঙ্গনা ব্যাঙ্গনী পাখীর কথা”, “পক্ষীরাজ ঘোড়ার কথা” প্রভৃতি নানা কথা বলিয়া ভ্রাহাদিগকে নিদ্রায়িত করা, এসকল বি কাজের মধ্যে নয়? তাঁহার কাজের অভাব কি? বৎসরে একটা দুইট করিয়া তাঁহার বংশ বৃদ্ধি হইতেছে, সুতরাং তাঁহার কাজের অন্ত নাই বলা ইহা বলিলে অসঙ্গতি হয় না যে বিজয়া আসিয়া সংসারের ভার গ্রহণ করিতে তিনি তাঁহার নিজের প্রকৃত কাজ করিবার অধিক সময় পাইলেন।

একদিন বেলা তৃতীয় প্রহর গড়াইয়া যায় ; উঠানের রৌদ্র গোলার গায়ে উঠিতেছে, দাসীদ্বয়ের একজন গৃহ মার্জনা করিতেছে, অপর জন জল বহিতেছে ; বিধবাদের একজন রোয়াকের এক পার্শ্বে বসিয়া পদদ্বয় প্রসারিত করিয়া শলিতা পাকাইতেছেন ; গৃহিণীর আসর এখনও ভাঙ্গে নাই ; তিনি সন্মুখের রোয়াকে পা ছড়াইয়া বসিয়াছেন, একটী বধু মাথার চুল বাঁছিয়া দিতেছে, আর একজন স্থূল বর্ন্তুল বাহুখানি নিজ কক্ষে লইয়া একটী ছোট বিহুকের দ্বারা ঘামাছি মারিতেছে ; জ্যেষ্ঠা বধু নিদ্রাভঙ্গে উঠিয়া তাঁহার ঘরে সর্বকনিষ্ঠ সন্তানটিকে ক্রোড়ে লইয়া আদর করিতেছেন ; পার্শ্বের দাবাতে ছেলেরা পুতুল খেলিতেছে ; বিজয়া তাঁহার ঘরে শয়ন করিয়া একাগ্রমনে নিঃশ্বাস রামায়ণ পাঠ করিতেছেন, ওদিকে বাহিরে কালীবাড়ীতে কথকতা বসিবার উপক্রম হইতেছে, ধর্ম্মানুরাগী বৃদ্ধ ও বৃদ্ধাগণ এক একটী করিয়া কথকতার আসরে আগমন করিতেছেন ; কথক ঠাকুর বাহির বাড়ীর পশ্চিমের ঘরে মাধ্যাহ্নিক আহারের পর একঘুম ঘুমাইয়া উঠিয়া মুখহস্তাদি প্রক্ষালন করিতেছেন ; এবং তর্কভূষণ মহাশয় আহারান্তে বিশ্রামের পর চণ্ডীমণ্ডপে গিয়া স্বস্থানে বসিয়াছেন ; এমন সময়ে গোবিন্দ একজন চাষা লোককে সঙ্গে করিয়া অন্তঃপুরে প্রবিষ্ট হইল । ঐ ব্যক্তি তর্কভূষণ মহাশয়ের একজন প্রজা । সে দুইটী বড় মাছ, দুইটী মানকচু ও অপরাপর অনেক সামগ্রী উপঢৌকন স্বরূপ লইয়া আসিয়াছে । গৃহিণী ডাকিয়া বলিলেন, “ভাঁড়ায়ী ঠাকুরণ পড়া ছেড়ে ওঠ গো, তোমার ভাঁড়ারের জিনিষ এসেছে ।” ইহা শুনিয়া বিজয়া বাহিরে আসিলেন এবং তাহাদিগকে লগ্নে লইয়া ভাঁড়ারের দিকে গমন করিলেন । ভাঁড়ারে জিনিষগুলি পৌঁছাইয়া দিয়া গোবিন্দ চলিয়া যায়, এমন সময় বিজয়া ডাকিলেন—“গোবিন্দ, শোন !” গোবিন্দ দাঁড়াইল !

বিজয়া। আমি অনেকদিন হতে তোমাকে কিছু জিজ্ঞাসা করব মনে করছি; এতদিন হয়েই ওঠে নি। তুমি কি পড়া ফেলে এসেছ ?

গোবিন্দ। না, আমাদের পাঠ দেওয়া সাজ হয়েছে।

বিজয়া। তবে একটু স্থির হয়ে শোন। তোমরা এখন কয় ভাই বোন ?

গোবিন্দ। পাঁচ ভাই, দুই বোন।

বিজয়া। তোমাদের চলে কি প্রকারে ?

এইবার গোবিন্দের মুষ্টিল। সে অতি লাজুক ছেলে, সহস্র কণ্ট পাইলেও আপনাদের দারিদ্র্যের কথা কাহাকেও বলে না। কাহারও নিকট কোনও দিন কোনও সাহায্য প্রার্থনা করে নাই। আপনাদের দুঃখের কাহিনী লইয়া কাহারও দ্বারস্থ হওয়াকে কাপুরুষোচিত কর্ম বলিয়া মনে করে। সুতরাং বিজয়ার প্রশ্নে তাহার অন্তরে এক প্রকার লজ্জার আবির্ভাব হইল। সে দাঁড়াইয়া অতৃদিকে চাহিয়া কিম্বৎকণ ভাবিতে লাগিল। বিজয়া বুঝিতে পারিলেন, তাঁহার প্রশ্নের উত্তর দিতে তাহার মনে ক্লেশ হইতেছে।

বিজয়া। তুমি কি ক্লেশ পাইলে ? আমাকে পর ভেব না ; তুমি তো আমাদের বাড়ীর ছেলে ; আমি অনেকদিন তোমাদের খবর জানি না বলেই জিজ্ঞাসা করেছি।

গোবিন্দ। অতি কষ্টে চলে।

বিজয়া। তোমার বাবার সেই কাসির ব্যায়রাম কি এখনও আছে ?

গোবিন্দ। হাঁ, আছে।

বিজয়া। ভবিষ্যতে তোমার উপরই তাঁদের প্রধান নির্ভর ?

গোবিন্দ। হাঁ, তা বৈ কি ?

বিজয়া। তুমি কেবল সংস্কৃত পড়ে ব্রাহ্মণপণ্ডিত কাজের দ্বারা কি নিজের অবস্থার উন্নতি করতে পারবে ?

গোবিন্দ। যেকোন দিন কাল পড়েছে, তাতে সে আশা অল্প। সেই জন্তেই আমি রাত্রে ভবেশের নিকট একটু একটু ইংরাজী পড়তে আরম্ভ করেছি এবং বাঙ্গালাতে অল্প ভূগোল প্রভৃতি শিখেছি।

বিজয়া। ওরূপ লোকের হাতে পায়ে ধরে এক আধটু ইংরাজী পড়ে কি বেশী শিখতে পারবে ?

গোবিন্দ। যত দূর হয় ; অগ্র উপায় ত নাই।

বিজয়া। তুমি কেন কল্কেতায় গিয়ে থাকবার চেষ্টা কর না ?

গোবিন্দ। বাবা একে অতি ভাল মানুষ, তাতে সর্বদা পীড়িত ; তিনি যে গিয়ে কোন বন্দোবস্ত করতে পারেন, তার সম্ভাবনা নাই। কে যোগাড় করবে ?

বিজয়া। আচ্ছা, তোমার কল্কেতায় থাকবার সুবিধা যদি করতে পারি, তা হলে কি তুমি কল্কেতায় যেতে পার ?

কলিকাতায় বাইবার কথা শুনিয়া গোবিন্দের মন আনন্দে নৃত্য করিয়া উঠিল। সে কলিকাতার সংস্কৃত কালেজে গিয়া পড়িবে, এই তাহার মনের বড় সাধ, ; এই তাহার প্রাণের অনেক দিনের পোষিত আকাঙ্ক্ষা ; এই তাহার বহুদিনের আগ্রহাবস্থার স্বপ্ন। কিন্তু সেরূপ যোগাযোগ হওয়া দুর্লভ বোধে সে বাসনা হৃদয়ে এক প্রকার চাপিয়া রাখিয়াছে। বিশেষ সংস্কৃত কালেজে বেতন দিবার নিয়ম হইয়াছে শুনিয়া আরও দমিয়া গিয়াছে। কোথায় বা থাকে, কে বা খাইতে দেয়, কে বা বেতন দেয় ! পিতা পীড়িত ও দীনদরিদ্র ; তিনি যে গিয়া যোগাড় করিয়া দিবেন, তাহা সম্ভব নয়। সে নিজে অতিশয় লাজুক ; কাহাকেও যে কিছু বলিবে, তাহাও পারে না। সুতরাং সে বিষয়ে সে একপ্রকার

মিরাশ। বিজয়ার প্রস্তাব শুনিয়া অগ্র লোক হইলে লক্ষ দিয়া উঠিত, কত কথা বলিত, কিন্তু সে ধীরভাবে উত্তর করিল;—“তা হলে ত জালই হয়।”

বিজয়া। তুমি কোন্ স্কুলে পড়তে চাও ?

গোবিন্দ। সংস্কৃত কলেজে।

বিজয়া। সেখানে কি ইংরাজী পড়ায় ?

গোবিন্দ। হাঁ, এখন পড়ায়। আর বিশেষ আমি সংস্কৃত অনেকটা পড়েছি, অগ্র স্কুলে ভর্তি হলে সে সব বৃথা যাবে।

বিজয়া। আমি যদি সুবিধা করতে পারি, তোমাকে বলবো।

গোবিন্দ যাইতে প্রস্তুত; বিজয়া বারণ করিয়া বলিলেন;—“একটু দাঁড়াও, আমি আসছি।” গোবিন্দ দুই এক মিনিট অপেক্ষা না করিতে করিতে বিজয়া আবার আসিলেন। আসিয়া বলিলেন,—“আমি তোমাকে একটা অনুরোধ করতে যাচ্ছি। তুমি অনুরোধ রাখবে ত ?”

গোবিন্দ। কিরূপ অনুরোধ না জানলে কিরূপে বলবো ?

বিজয়া। বিশেষ কঠিন অনুরোধ নয়। কথাটা কি জান, আমি তোমাকে পাঁচটা টাকা দিচ্ছি, আজ সন্ধ্যার সময় গিয়ে গোপনে তোমার মায়ের হাতে দিয়ে এস।

এই বলিয়া পাঁচটা টাকা অঞ্চল হইতে বাহির করিলেন। গোবিন্দ অতিশয় লজ্জিত হইয়া অধোবদনে দাঁড়াইয়া রহিল।

বিজয়া। তুমি মনে করো না যে আমি দান করছি। আমার দান কক্কার মত অবস্থা নয়। আমার এখানে আসা অবধি এক মাসের অধিক কাল ভূমি বিন্দুকে পড়াচ্ছি; আমার শক্তি থাকলে তোমাকে আরও অধিক দেওয়া উচিত ছিল। ইহা তোমার পরিশ্রমের সমাজ

পারিতোষিক মাত্র জান্বে। না নিলে মনে করব যে কিরূপ সম্ভাবে দ্বিচ্ছিত্তি, তুমি তা বুঝতেই পারলে না।

শেষোক্ত কথাগুলিতে গোবিন্দ আর না লইয়া থাকিতে পারিল না।

বিজয়া। আমি ত তোমাকে বিন্দুকে পড়াতে বলি নাই; তুমি যে আপনা হতে পড়াও, ইহার কারণ কি?

গোবিন্দ। আপনার ঐ মেয়েটী বড় বুদ্ধিমতী; ওর সঙ্গে কথা কহিলে আনন্দ হয়; একদিন কথায় কথায় বললে কল্কেতায় ওর পড়বার মাষ্টার ছিল, এখানে কেউ নাই; তাই আমি বলিছি,—আচ্ছা আমি তোমাকে পড়া বলে দেব।

বিজয়া। তুমি যেমন ছেলে তার মত কাজই করেছ; আচ্ছা তুমি যেমন পড়াচ্ছ তেমনি পড়াও, আমি মাসে তোমাকে পাঁচ টাকা করে দেব।

গোবিন্দ। (সলজ্জভাবে) না, আমি টাকা নেব না।

বিজয়া। সে বিষয় পরে দেখা যাবে! বিন্দুকে কেমন দেখুছ?

গোবিন্দ। ওর স্বভাব চরিত্র বড় ভাল; সচরাচর এমন মেয়ে দেখা যায় না; কেবল দোষের মধ্যে একটু একগুঁয়ে।

বিজয়া। ওতেই ওকে খেয়েছে; ওটা ওদের বংশের দোষ; তিনি বড় একগুঁয়ে লোক ছিলেন; ইন্দুও একগুঁয়ে।

এইরূপ কথোপকথন হইতেছে, ইতিমধ্যে একজন ছাত্র গোবিন্দকে ডাকিতে আসিল। গোবিন্দ তাড়াতাড়ি বাহিরে চলিয়া গেল। বিজয়া কথা শুনিতে যাইবার জন্ত প্রস্তুত হইতে গেলেন।

এইস্থলে গোবিন্দের কিঞ্চিৎ পরিচয় দেওয়া আবশ্যিক বোধ হইতেছে। গোবিন্দ ঐ নশিপুর গ্রামের রামনিধি চাটুর্ঘ্যের জ্যেষ্ঠ সন্তান। রামনিধি কোথা হইতে যে সে গ্রামে আসিয়াছিলেন, তাহা কেহ বলিতে পারে না। এইরূপ শুনা যায়, তিনি দক্ষিণ দেশের লোক। পূর্বদেশে



ভিক্ষা করিতে গিয়াছিলেন, ফিরিয়া যাইবার সময় কি স্ত্রে নশিপুরে আসিয়া অনেকদিন থাকিয়া যান। সেই সময়ে নশিপুরের হরিহর চক্রবর্তীর একটি কন্যার বিবাহের দিন স্থির হইয়াছিল। দিন হির, গাত্রে হরিদ্রা পর্য্যন্ত হইয়া গেল, তারপর কি জানি কি কারণে বরপক্ষ ও কন্যাপক্ষে বিবাদ হইয়া বিবাহের দিন বর আসিল না। তখন মহাবিপদ! কন্যাকর্তা অন্তোপায় হইয়া নিদ্রিত রামনিধিকে তুলিয়া আনিয়া কন্যা সম্প্রদান করিলেন। তখন রামনিধির বয়ঃক্রম ৩০।৩৫ এর কম হইবে না। রামনিধি সে বিবাহে বাধা দিয়াছিলেন, কিন্তু শুনে কে? সকল বাধা বিপত্তি উল্লঙ্ঘন করিয়া বিবাহ হইয়া গেল। কিছুদিন লোকে ইহা লইয়া গোলমাল করিল; কেহ বলিল, রামনিধি ব্রাহ্মণ নয়; কেহ বলিল, ভাট বামন; এমন কি এই কারণে কয়েক মাস হরিহর চক্রবর্তীকে একঘরে হইয়া থাকিতে হইল। কিন্তু শেষে গোলমাল থামিয়া গেল। তদবধি রামনিধি নশিপুরেই বাঁধা পড়িলেন। শ্বশুরের প্রদত্ত কদ্রেক বিধা ভূমি ও গ্রামের জমিদার বাবুদের বাড়ীতে পূজারির কাজ করা ভিন্ন তাঁহার অগ্র সম্বল নাই। এখন তাঁহার বৃদ্ধাবস্থা বলিলে হয়। ব্রাহ্মণ নিরীহ ভালমানুষ; মুখে কথাটা নাই; বর্ণ-জ্ঞান-বিহীন, নিজের নামটীও স্বাক্ষর করিতে পারেন না; লোকের দ্বারে ভিক্ষা করার অভ্যাস নাই। সেই কয়েক বিধা ভূমি ও ঠাকুরপূজা হইতে যাহা কিছু পান, তদ্বারা আঁত কষ্টে পরিবার প্রতিপালন করিয়া থাকেন। ইহার উপরে আবার তাঁহার কাসের পীড়া, মধ্যে মধ্যে হাঁফ কাস বাড়িয়া সকল কন্ঠের বাহির হইয়া পড়েন। গোবিন্দ এই ঘোর দারিদ্র্যের মধ্যে প্রতিপালিত। তাহার বয়ঃক্রম ১৮ কি ১৯ বৎসর হইবে, কিন্তু তাহার দেহ একরূপ স্তম্ভ ও সবল যে দেখিলে ২৩ কি ২৪ বৎসর বলিয়া বোধ হয়। দেহে অপরিমিত বল থাকাতে গোবিন্দ সকল প্রকার দৈহিকশ্রমসাধ্য কার্যে

সর্বদাই অগ্রসর। কোনও স্থানে যাইতে, আসিতে, মোট বহিতে ও অপরাপর শ্রমসাধ্য কাজ করিতে, সে সর্বাপেক্ষা অগ্রগণ্য ; এজন্য সে সকলের প্রিয়।

ওদিকে কালীবাড়ীতে কথকতা বসিয়াছে। কথক ঠাকুর যথাসময়ে বেদীর উপরে সমাসীন হইয়াছেন। তাঁহার পরিধানে অতি শুভ্র পটবস্ত্র ; সুস্থ ও সবল দেহটি সুপারিস্কৃত ও শুভ্র চাদরখানির দ্বারা অর্দ্ধাবৃত ; চাদরের ভিতর হইতে গোরকাস্তি ও তদুপরী সুমার্জিত উপবীতী দৃষ্ট হইতেছে ; কণ্ঠে রুদ্রাক্ষের মালা ; ললাটদেশে শ্বেতচন্দনের দ্বারা প্রলিপ্ত ; উত্তমাস্ত্র পুষ্পমালার দ্বারা পরিবেষ্টিত ; তাহার দুইটা অংশ দুই কর্ণমূলের নিকট স্থলিতেছে ; তাঁহার আকৃতি সৌম্য ; চক্ষুদ্বয় বিশাল ও দৃষ্টি মাধুর্য্যবাজক। ইনি দেশের একজন সুপ্রসিদ্ধ কথক ; নাম গঙ্গাধর শিরোমণি। অপরাপর কথকতা ব্যবসায়ীগণের অধিকাংশই যেমন সংস্কৃতানভিজ্ঞ, কোনও রূপে কথকতা শিক্ষা করিয়া কাজ চালাইয়া থাকেন, শিরোমণি মহাশয় সেরূপ নহেন ; ইনি সংস্কৃতভাষাব্যাপন্ন ব্যক্তি, একজন আদিতীয় পৌরাণিক, এবং বোধ হয় অনুরাগবশতঃই কথকতা ব্যবসায় অবলম্বন করিয়া থাকিবেন। ইঁহার আকৃতি যেমন কমনীয়, কণ্ঠও তেমন সুমিষ্ট ; কথকতার মধ্যে যে সকল গান গাইয়া থাকেন, তাহার অধিকাংশ ইঁহার স্বরচিত। শিরোমণি মহাশয়ের কথকতা শিক্ষিত বিত্তা নহে ; তিনি একজন উপস্থিতবক্তা ও সুরাসিক লোক। একবারকার একটা ঘটনা উল্লেখ করিতেছি ; তাহা হইতেই সকলে বুঝিতে পারিবেন, তাঁহার প্রত্যাশমতীত্ব কিরূপ। একবার কলিকাতার কোন ধনীর ভবনে তিনি কথা কহিতেছেন। লক্ষণের শক্তিশেলের বিষয়ে কথা হইতেছিল। লক্ষণ শক্তিশেলের আঘাতে অচেতন হইয়া পড়িয়াছেন ; তখন রামচন্দ্র বানরদিগকে ডাকিয়া জিজ্ঞাসা

করিলেন—“হাঁ হে কপিগণ ! তোমাদের মধ্যে ত সকল কাজের উপযুক্ত বানর আছে ; গাছ, পাথর বহিবার বানর, সেতু বাঁধিবার জন্ত ইঞ্জিনীয়ার বানর, ইত্যাদি সকল শ্রেণীর বানর দেখি ; বৈদ্য বানর কি কেহ নাই ?” যখন কথাটা এইস্থলে পৌঁছিয়াছে, তখন কলুটোলার বৈদ্যজাতীয় সেনবংশজ একজন বড়লোক আসরে প্রবেশ করিতেছেন। ঐ বড়লোকটির সহিত শিরোমণি মহাশয়ের আত্মীয়তা ছিল ; তাঁহার দিকে অঙ্গুলি নির্দেশ করিয়া কথক বলিয়া উঠিলেন ;—“এই যে বৈদ্য বানর উপস্থিত !” অর্মান সভামধ্যে একটা হাস্তের রোল পড়িয়া গেল। আজ কিন্তু তিনি রসিকতা করিতেছেন না। আজ আর এক রসের অবতারণা করিয়াছেন। তর্কভূষণ মহাশয়ের বিশেষ আদেশক্রমে তিনি দক্ষ-যজ্ঞ, সতীর প্রাণত্যাগ, হিমালয়ে সতীর জন্ম, সতীর তপস্বী ও হরের সহিত পুনর্মিলন, এই পৌরাণিক আখ্যায়িকা অবলম্বন করিয়া কথা কহিতেছেন। অদ্য হরকে পাইবার জন্ত সতীর তপস্বী বিষয়ে কথা হইতেছে। শিরোমণি মহাশয়ের প্রতিভাগুণে এমনি ভাবের আবির্ভাব হইয়াছে যে, সকলেই স্পন্দ-হীন। বিশেষতঃ গিরিরাজ-পত্নী মেনকা ও উমার কথোপকথনের স্থলটি এমন সুন্দর হইয়াছে যে, সে সময়ে কেহই চক্ষুদ্বয়কে শুষ্ক রাখিতে পারেন নাই। তর্কভূষণ মহাশয়ের মুখের প্রতি দৃষ্টিপাত করিয়া দেখা গেল, যে, ভাবাবেশে তাঁহার মুখমণ্ডল দীপ্তিশালী হইয়া উঠিয়াছে, এবং দুই চক্ষে অজ্ঞাতসারে জলধারা বহিতেছে। কালীর দালানে চকের অন্তরালে মহিলাগণ বাসিয়াছেন। সেখানে বিজয়ার চক্ষে জলধারা বহিতেছে। শিরোমণি মহাশয় মূল বিষয় অবলম্বন করিয়া পাত্তিব্রতাদর্শের মহিমা, দেবদ্বিজের ভক্তি, বৈরাগ্য, তপস্বী, ইন্দ্রিয়-নিগ্রহের আবশ্যিকতা, প্রভৃতি অনেক বিষয়ের অবতারণা করিয়াছেন; এবং প্রত্যেকটাই পৌরাণিক আখ্যায়িকার সাহায্যে এক্রপ উজ্জল

রূপে চিত্রিত করিয়াছেন যে, ঐ সকল উপদেশ সকলের হৃদয়ে দৃঢ় মুদ্রিত হইয়া গিয়াছে। কথার মধ্যে যে কতবার সভাস্থ ব্যক্তিদিগের মুখ হইতে “ধন্য ধন্য” “সাধু সাধু” শব্দ উচ্চারিত হইয়াছে, তাহা বলা যায় না।

ক্রমে বিপ্রগণের সায়ংসন্ধ্যার সময় উপস্থিত হওয়াতে কথা ভাঙ্গিয়া গেল। সকলে কথকের ভূমসী প্রশংসা করিতে করিতে স্বীয় স্বীয় ভবনে প্রতিনিবৃত্ত হইলেন। তর্কভূষণ মহাশয় সায়ংসন্ধ্যা করিবার জন্ত কালীমন্দিরে প্রবিষ্ট হইলেন ; মহিলাগণ স্ব স্ব গৃহে চলিলেন।

আজ দুই ব্যক্তি দুই ভাবে শয্যাতে বাইতেছেন। মানবের হিতার্থে কোনও সদনুষ্ঠান করিলে লোকে যে প্রকার বিমল আত্ম-প্রসাদ অনুভব করে, তর্কভূষণ মহাশয় সেই আত্ম-প্রসাদ লইয়া শয়ন করিতেছেন। এতদ্বারা অনেকের ধর্ম্মে মতি বাড়িবে, এই চিন্তাতে তাঁহার প্রাণে এক প্রকার আনন্দের সঞ্চার হইতেছে। তিনি মনে মনে সংকল্প করিতেছেন, যে, প্রতিবেশিগণের হিতার্থে প্রতিবৎসর বৈশাখ মাসে বাড়ীতে এইরূপ কথা দিবেন। এতদ্ভিন্ন তাঁহার ধর্ম্মবিশ্বাসও অত্যাধিকার কথাতে দ্বিগুণ উজ্জ্বল হইয়া উঠিয়াছে। তিনি তাঁহার অভীষ্ট দেবতা হর-পার্বতীকে যেন চক্ষুর সমক্ষে দেখিতেছেন। অগ্নি দিন তিনি কেবল মাত্র ‘দুর্গে দুর্গতিহারিণী !’ বলিয়া ইষ্টদেবতার নাম স্মরণ করিয়া শয়ন করেন, আজ সেই দুর্গার সান্নিধ্য অনুভব করিয়া তাঁহার শরীর কণ্টকিত হইতেছে। এইভাবে তিনি আজ শয্যাতে বাইতেছেন।

বিজয়ার ভাব অগ্নি প্রকার। অগ্নি দিন শ্রান্ত ক্লান্ত হইয়া শয্যাতে বাইবামাত্র তাঁহার নিদ্রা হয়। অগ্নি মনের উত্তেজনা বশতঃ নিদ্রা আসিতেছে না। নানা প্রকার চিন্তা হৃদয়ে উপস্থিত হইতেছে। তিনি ত পূর্বাবধিই তপস্বিনী হইয়াছিলেন ; আহাৰে, বিহারে, বিষয়-সুখভোগে যোর ওদাসীত্ব অবলম্বন করিয়াছিলেন ; অন্যকার কথাতে কঠোরতর

তপস্কার বাসনা তাঁহার অন্তরে আগুনের মত জলিয়া উঠিয়াছে। তিনি মৃত পতির গুণাবলী যতই স্মরণ করিতেছেন, ততই আপনাকে অতি হীন বলিয়া অনুভব করিতেছেন, এবং পরকালে তাঁহার সহিত মিলিত হইবার উপায়স্বরূপ কঠোর তপস্যা আবশ্যক বলিয়া অনুভব করিতেছেন। দ্বিতীয়তঃ, সেই যে তাঁহার পতি মৃত্যুদিনে শেষ কথা বলিয়া গিয়াছেন—“ঈশ্বরের চরণাশ্রয় করিয়া থাকিও,” বৈধব্যদশাপ্রাপ্তির দিন হইতে সেই কথাটি মনের মধ্যে ঘুরিতেছে; আজ আবার বিশেষভাবে জাগিয়া উঠিয়াছে। বিজয়া মনে মনে আপনাকে প্রশ্ন করিতেছেন—ঈশ্বরের চরণাশ্রয় করা কাহাকে বলে? দাদা কি ঈশ্বরের চরণাশ্রয় করেন নাই? উহার মনে ত বেশ শাস্তি দেখিতে পাই, সে শাস্তি কেন আমার মনে আসে না? ওরূপ বিশ্বাসের দৃঢ়তা আমার কেন হয় না? আমি কেন অন্তরে কিছুই ধরিতে পারি না? তিনি যে বলিতেন, দেবদেবীর উপাসনা অজ্ঞ ও দুর্বল ব্যক্তিদের জন্য, আমার দাদা কি তবে অজ্ঞ ও দুর্বল? যে সকল কথা আজ শুনিলাম, এ সকল কি কবির কল্পনা? তাহাই যদি হয়, কেন তিনি আমাকে সত্য উপাসনা শিখাইলেন না? তাহা হইলে যে আজ কিছু ধরিতে পাইতাম ও প্রাণে শান্তিলাভ করিতাম। ফল কথা এই, নন্দকিশোর বন্দ্যোপাধ্যায় মহাশয় তখনকার ব্রাহ্মসমাজের একজন উৎসাহী সভ্য ছিলেন। তিনি বিজয়ার যোগ বৎসর বয়স হইতেই তাঁহাকে নিজ ভাবাপন্ন করিবার চেষ্টা করিয়াছেন; নিজে তাঁহাকে উত্তমরূপে বাঙ্গালা পড়িতে শিখাইয়া মহাত্মা রাজা রামমোহন রায়ের “বিচারের চূর্ণক” “পৌত্তলিক প্রবোধ” প্রভৃতি ব্রাহ্মসমাজের গ্রন্থ সকল পড়াইয়াছেন; প্রতি মাসে রীতিমত “তত্ত্ববোধিনী পত্রিকা” পড়িতে দিয়াছেন; তাহাতে যে সকল বৈজ্ঞানিক প্রবন্ধ বাহির হইত, তাহা অবলম্বন করিয়া মুখে মুখে তৎসংক্রান্ত আরও

অনেক কথা শিখাইয়াছেন ; ভূচিত্র আনিয়া এই ধরাটা কত বড়, তাহা বুঝাইয়া দিয়াছেন এবং সংক্ষেপে ভূগোলের স্থূল স্থূল বিবরণগুলি শিখাইয়াছেন ; বিজয়ার মনটাকে এইরূপে প্রশস্ত ও উদার করিয়া তুলিয়াছেন । তাঁহার মনের যে কোনও সংস্কারকে ভ্রান্ত সংস্কার বোধ হইয়াছে তাহাই ভাঙ্গিবার চেষ্টা করিয়াছেন ; সকলি ভাঙ্গিয়াছেন ; কেবল ভাঙ্গেন নাই, জঁখর ও পরকালে বিশ্বাসটা ; বরং তাহা দৃঢ় করিবার প্রয়াস পাইয়াছেন । একজন অসাধারণ প্রতিভাসম্পন্ন রমণীর পক্ষে দশ বার বৎসরকাল একরূপ শিক্ষাবীনে থাকিলে যাহা হয়, বিজয়ার পক্ষে তাহাই ঘটিয়াছে । পাছে এই মনস্থিতি নারীকে বৃদ্ধিতে কেহ ভ্রমে পড়েন, সেই জন্ত এত কথা বলা ।

যাহা হউক, বন্দোপাধ্যায় মহাশয় বিজয়াকে যে শিক্ষা দিয়াছিলেন, তাহার ফল এই হইল যে, বিজয়া মনে মনে দেশপ্রচলিত পৌত্তলিক ক্রিয়াকলাপের প্রতি আস্থাবিহীন হইলেন ; ক্রমে ধর্ম্মভাব যেন তাঁহার অন্তর হইতে বিলুপ্ত হইয়া গেল । তৎপরে তিনি কালের স্রোতের সঙ্গে ভাসিয়া যাইতেন ; কৌলিক আচার সমুদায় পালন করিতেন ; অথচ হৃদয়ের কোনও দৃঢ় প্রতীতি রাখিতেন না । পতি যতদিন জীবিত ছিলেন, ততদিন তাঁহার কাজ ছিল, ভুলাইয়া রাখিবার মত বিষয় ছিল ; সুতরাং হৃদয়ে শূন্যতা অনুভব করিতে পারেন নাই । অকালে পতিবিয়োগ হওয়াতে তাঁহার বোধ হইল যেন হঠাৎ নোকা ডুবিয়া জলে ভাসিলেন ; তৎপরে হাত বাড়াইয়া ধরিতে যান, ধরিবার মত কিছুই পান না । এখনও তিনি ঐ প্রকার অবস্থাতে আছেন । তবে স্বীয় পতির অনুসরণ করিয়া চিরদিন লৌকিক ও কৌলিক ক্রিয়াকলাপে যোগ দিয়া আসিতেছেন ; এবং এখনও দিবার সংকল্প রহিয়াছে । সনাতন রীতিনীতিবিরুদ্ধ কোনও আচরণ কখনও করেন নাই ; করিবার ইচ্ছাও নাই । তর্কভূষণ

মহাশয় তাঁহার ভিতরকার এত কথা জানেন না। কিরূপেই বা জানিবেন? বিজয়া হুই একদিনের জ্ঞা পিত্রালয়ে যখন আসিতেন, তখন সাবধানে আপনার মনের ভাব গোপন রাখিতেন ও সকল ক্রিয়াকলাপে যোগ দিতেন। এমন কি তিনি যে এত লেখাপড়া শিখিয়াছেন, তাহাও তর্কভূষণ মহাশয় অগ্রে তত জানিতেন না।

সে যাহা হউক, বিজয়া প্রায় সমস্ত রজনী অনিদ্রাতে ও বহু চিন্তাতে বাপন করিয়া এই প্রতিজ্ঞা লইয়া উঠিলেন, যে, আরো কঠোর তপস্বীতে আপনাকে নিষ্ক্রেপ করিবেন। তদনুসারে ইহার দুইদিন পরেই সেই সুন্দর আনিতস্থলস্থিত ঘন নীল কেশরাশি কাটিয়া ছোট করিয়া ফেলিলেন। ইহাতে গৃহিণীর মনে এতই উত্তেজনা হইল যে, পাঁচ সাত দিন তাঁহার মুখে আর অত্র কথা ছিল না;—যে আসে সকলকেই বলেন—“বিজয়া অমন চুলগুলো কি করে কাটলো দেখ।” অবশেষে একদিন তর্কভূষণ মহাশয় বিরক্ত হইয়া বাগলেন—“কেটেছে তাতে কি হয়েছে? বেশই ত করেছে; ও যেমন বংশের মেয়ে, সেই রকম কাজ করেছে; ওই ত বৈধব্যাচার।” তদবধি গৃহিণী নিরস্ত হইলেন।

## চতুর্থ পরিচ্ছেদ

যেমন একটা জাহাজ চলিয়া গেলে নদীর জলরাশি অনেকক্ষণ পর্য্যন্ত আন্দোলিত থাকে, এবং নদীপার্শ্বস্থিত ক্ষুদ্র তরঙ্গীগুলির কম্পনে সেই আন্দোলন অনুভূত হয়, সেইরূপ গৃহস্থের গৃহে কোন একটা বৃহৎ ঘটনা ঘটিলে তাহার কম্পন অনেক দিন থাকে ; এবং অনেক বিষয়ে সেই কম্পন লক্ষ্য করিতে পারা যায়। ১০ই বৈশাখ ভুবনেশ্বরীর বিবাহ শেষ হইয়া গিয়াছে, আজ জ্যৈষ্ঠ অবসান প্রায়, তথাপি তাহার কম্পন আজিও চলিয়াছে। আজিও তন্নবদ্বন্দ্ব লোকজনের বিদায় আদায় চলিয়াছে। বাত্মকর, মালাকার প্রভৃতি বিদায় হইতেছে। স্বগ্রামের ও চতুষ্পার্শ্বের গ্রামের দরিদ্র লোক, যাহারা এই সময়ে কিছু কিছু পাইবার আশা করে, তাহারাও যথেষ্ট পাইতেছে। তর্কভূষণ মহাশয় মনের সাধ মিটাইয়া এই সকল দরিদ্র লোককে প্রীত করিয়া দিতেছেন। তাঁহার নিজ প্রজাগণ এই বিবাহোপলক্ষে স্বতঃপ্রবৃত্ত হইয়া যথাসাধ্য সাহায্য করিতে জটী করে নাই। তাহারাও বিবাহোৎসবান্তে তাঁহার পিতৃসম হস্ত হইতে আনন্দ ও আশীর্বাদে চিহ্নস্বরূপ নানাবিধ উপহার প্রাপ্ত হইতেছে। কয়েকজন প্রজা সেই বিবাহের সময়ে আসিয়া এখনও পড়িয়া রহিয়াছে, তত্ত্ব প্রভৃতি বহন করিতেছে, ও গৃহের অপরাপর কার্য্য করিতেছে। কেবল তাহা নহে। গ্রামে একদল নিষ্কর্মা যুবক আছে ; তাহারা বৎসরের মধ্যে একটা বারইয়ারি করিয়া থাকে। গ্রামের প্রকাণ্ড স্থানে একটা আটচালা বাঁধিয়া একটা ঠাকুর তুলিয়া, কয়েকদিন যাত্রা গান প্রভৃতির আয়োজন করিয়া, নিজেরা আমোদ করে ও গ্রামবাসীদিগকে আমোদ যোগায়। গ্রামের লোক এ কার্য্যে আনন্দের সহিত সাহায্য করিয়া থাকে। কারণ, ইহা জিন্ন সৎসরের মধ্যে গ্রামের সামান্য লোকের আমোদ প্রমোদ করিবার



অল্প উপায় নাই। গ্রামের মধ্যে বিবাহ কি শ্রদ্ধ কি অল্প কোন অনুষ্ঠান, হইলে ঐ যুবকদল কিঞ্চিৎ পয়সা আদায় করিতে ছাড়ে না। সকলের হাত ছাড়ান যায়, তাহাদের হাত ছাড়ান দুষ্কর। তাহারা এইরূপে যে কিছু আদায় করে, তাহা সম্বৎসরকাল কাহারও হস্তে জমাইয়া রাখে; তৎপরে বারইয়ারি উৎসবের সময় ব্যয় করে। তাহারা তর্কভূষণ মহশয়কেও ধরিয়াছে। কিন্তু তাঁহাকে পীড়াপীড়ি করিয়া ধরিবার প্রয়োজন হয় নাই। তিনি নিজে গম্ভীর প্রকৃতির লোক হইলেও যুবকদিগের ঐ সাম্বৎসরিক পূজার উৎসবের পক্ষপাতী; ছেলেরা, বিশেষতঃ গ্রামের সাধারণ লোকে, বৎসরে দুই চারিদিন আমোদ প্রমোদ করে, ইহা মন্দ নয়, মোটামুটি তাঁহার এই প্রকার একটা ধারণা আছে। ছেলেরা আসিয়া ধরাতে তিনি বলিয়াছেন—“ওহে বাপু! আমাকে পীড়াপীড়ি করবার প্রয়োজন নাই। আমার বাগানের বাঁশ কাড় হতে তোমাদের আটচালা বাঁধিবার বাঁশ লইও এবং তদ্বিন্ন আমি এককালীন দশটি টাকা দিতেছি, লইয়া যাও।” যুবকদল অতি সন্তুষ্ট হইয়া তর্কভূষণ মহাশয়ের বদাগত্য প্রশংসা করিতে করিতে গিয়াছে।

ঐ যুবকদল বিদায় হইলেই আর এক যুবকদল আসিয়াছিলেন। ইহাদের প্রযত্নে গ্রামের ইংরাজী স্কুলটি স্থাপিত হইয়াছে ও চলিতেছে। ইহারাও বারইয়ারিদলের অনুকরণ করিয়া বিবাহাদি উৎসবে কিছু কিছু অর্থ আদায় করিয়া থাকেন। ইহারা উপস্থিত হইলে তর্কভূষণ মহাশয় বলিয়াছেন—“অবশ্য তোমাদের কিছু প্রাপ্তির আশা করবার অধিকার আছে; বারইয়ারির জন্ত ১০/- দশ টাকা দিয়াছি, আর তোমরা ত দেশের একটা উপকার করবার জন্ত লেগেছ, তোমাদের সাহায্য করা অবশ্য কর্তব্য। তোমাদের উদ্দেশ্য অতি মহৎ, তোমরা দেশের হিতৈষী বহু।” এই বলিয়া তাহাদিগকে ২৫/- পঁচিশ টাকা দিয়াছেন। এইরূপ

ভুবনেশ্বরীর বিবাহের সময় হইতে যে ব্যয় আরম্ভ হইয়াছে, তাহার শেষ আর স্বরায় হইতেছে না। ইহার উপরে কথক ঠাকুরের বিনায়ের ব্যয় ; তৎপরে এই জ্যোষ্ঠের শেষেই জামাই-বধীর সময় প্রথম দুই জামাতাকে আনান হইয়াছে ; তৃতীয়, কার্য্যানুরোধে আসিতে পারেন নাই। তাঁহার ভবনে এবং নব জামাতা প্রসিদ্ধ উলোগ্রামের রামরতন মুখুষ্যে মহাশয়ের তৃতীয় পুত্র শ্রীমান্ জ্ঞানেন্দ্রনাথের ভবনে, জামাই-বধীর তত্ত্ব প্রেরিত হইয়াছে। নবজামাতার তত্ত্ব একরূপ প্রচুর পরিমাণে দেওয়া হইয়াছে যে, দেখিয়া রামরতন মুখুষ্যে মহাশয়ের প্রতিবেশবাসিনী গৃহিণীগণ ধৃত ধৃত করিয়াছেন। এই সকল কারণে তর্কভূষণ মহাশয়ের ব্যয় আর থামিতেছে না।

ভুবনেশ্বরীর বিবাহের সময় হইতে যে ছাত্রদের অনধ্যায় আরম্ভ হইয়াছে, তাহা এখনও পুনঃপ্রতিষ্ঠিত হইতেছে না। গোলেমালে দিন কাটিয়া যাইতেছে। জ্যোষ্ঠপুত্র শিবচন্দ্র দুইদিন হইল কলিকাতায় গিয়াছেন। অল্প কথ্য বন্ধ আছে। বেলা তৃতীয় প্রহর অতীতপ্রায়। বাহিরের চণ্ডীমণ্ডপে তর্কভূষণ মহাশয় তাঁহার স্বস্থানে আসীন ; সমাগত কতিপয় প্রতিবেশীর সহিত কথোপকথন করিতেছেন। শঙ্কর বাহিরের দাবাতে বসিয়া কয়েকজন চাষা লোকের নিকট তাহাদের একটি গাভীর অপমৃত্যুর বিবরণ শুনিতেছেন ; তাহারা প্রায়শ্চিত্তের ব্যবস্থা লইতে আসিয়াছে। এমন সময়ে বাহিরে অদূরে ভয়ানক কোলাহল শ্রুত হইল। সকলের চিত্ত স্বভাবতঃ সেই দিকে আকৃষ্ট হইল। তর্কভূষণ মহাশয় কথাবার্তীর মধ্যে একবার জিজ্ঞাসা করিলেন ;—“ওকি গোলযোগ ?” উপস্থিত প্রতিবেশীর মধ্যে একজন বলিলেন,—“বোধ হয় ছেলেরা খেলা করছে।” আবার সকলে একটু অমনমন হইলেন। কিন্তু গোলযোগ ক্রমেই বৃদ্ধি পাইতে লাগিল। অবশেষে তর্কভূষণ

মহাশয় একজনকে দ্বারের নিকট গিয়া শুনিতে বলিলেন। সে ব্যক্তি দ্বারে গিয়া বলিল,—পূর্বদিকে কোথায় ঘরে আগুন লেগেছে। শুনিবামাত্র তর্কভূষণ মহাশয় শখুকটী হাতে করিয়া গাত্রোথান করিলেন, এবং পরিধেয় বস্ত্র সংযত করিতে করিতে বাড়ী হইতে বাহির হইলেন। তিনি যদি ব্যস্তগমস্ত হইয়া চলিলেন, তবে তাঁহার সঙ্গে সঙ্গে শঙ্করও চলিলেন; চাষা লোকগুলিও চলিল; উপস্থিত প্রতিবেশিগণ চলিলেন; ছাত্রগণ যে কয়জন ছিল, চলিল। তাঁহারা পথে গিয়া শুনিলেন, নাপ্তে বাড়ীতে আগুন লাগিয়াছে। উপস্থিত হইয়া দেখেন যে, কয়েকখানি ঘরে আগুন লাগিয়াছে; ধূ ধূ করিয়া জলিতেছে; প্রবল বায়ুভরে সেই আগুন চতুর্দিকে ছড়াইয়া পড়িতেছে; এবং গোবিন্দ একখানি প্রজ্জ্বিত গৃহের চালে উঠিয়া দা দিয়া চাল কাটিয়া নামাইবার চেষ্টা করিতেছে; তাহার চতুর্দিকে অগ্নি; মধ্যো মধ্যো ধূমে তাহার চক্ষুর্দ্বয় আবৃত হইয়া যাইতেছে; আর কিয়ৎক্ষণ পরেই সেই জ্বালারাশি আসিয়া তাহাকে গ্রাস করিবে; সকলে চারিদিক হইতে চাৎকার করিতেছে, “ও গোবিন্দ আর নয়, ও গোবিন্দ আর নয়; শীঘ্র নেমে পড়; ওরে মলি মলি”।

নিজ ছাত্রের এই পরোপকার-প্রবৃত্তি ও সাহস দর্শনে এই ঘোর ব্যস্ততার মধ্যেও তর্কভূষণ মহাশয়ের মনে কিঞ্চিৎ আনন্দ হইল; কিন্তু তিনি বুঝিলেন যে, আর এক মুহূর্ত্তও গোবিন্দের সে চালের উপর থাকা কর্তব্য নয়। ডাকিয়া বলিলেন, “গোবিন্দ নামিয়া পড়।” গুরুদেব আদেশমাত্র গোবিন্দ লম্ফ দিয়া নামিয়া পড়িল।

যে নিষ্কর্মা বারইয়ারদলের উল্লেখ পূর্বে করিয়াছি, তাহারা কোথা হইতে সদলে আসিয়া উপস্থিত। সকলে অবশিষ্ট ঘরগুলি বাঁচাইবার চেষ্টা করিতে লাগিল। কিরূপে আগুন লাগিল, কার দোষে আগুন লাগিল, এসকল প্রশ্ন করিবার সময় নাই; সকলেই বিপন্নিবারণের জন্য

বাস্তব। তর্কভূষণ মহাশয় চালে উঠিলেন না, জল বহিলেন না, বিশেষ একটা কিছু করিলেন না বটে, কিন্তু তাঁহার পরামর্শে, ব্যস্ততায় ও উৎসাহদানে, সে ক্ষেত্রে কি এক অপূর্ণ ভাবের আবির্ভাব হইল! সকলে প্রাণকে প্রাণ জ্ঞান না করিয়া অগ্নি নির্বাণ করিবার চেষ্টা করিতে লাগিল। কিন্তু চেষ্টা করিলে কি হইবে? একে জ্যেষ্ঠ মাস, সমুদায় জলাশয় শুষ্ক; কিয়দূরে চাটুর্ঘ্যেদের পুকুরে একটু জল আছে বটে, কিন্তু কলসি কলসি করিতে কলসি আসে না; কলসি আনিতে দশজন ছুটিতেছে; এক জনের হাতের কলসি ধরিয়া তিন জনে টানাটানি করিতেছে; সকলেই চীৎকার করিতেছে, স্তত্রাং কাহারও কথা কেহ শুনিতে পায় না; কেহ বা জল দিতে দিতে কলসি ফেলিয়া জিনিষপত্র বাঁচাইতে ছুটিতেছে; কেহ বা জিনিষপত্র টানিতে টানিতে ছুটিয়া আসিয়া কলসি ধরিতেছে। ওদিকে সময় বৃষ্টিয়া বায়ু আসিয়া দেখা দিয়াছে; জ্বালারাশি সর্বভূক বৈশ্বানরের লোলায়মান জিহবার গ্রাস আকাশ-দেহ লেহন করিয়া চতুর্দিকে ধাবিত হইতেছে; স্তত্রাং তর্কভূষণ মহাশয় যে ঘরগুলি বাঁচাইবার ইচ্ছা করিয়াছিলেন, তাগ বাঁচাইতে পারিলেন না।

এই বাস্তবতার মধ্যে দুইটী শিশু সন্তান সঙ্গে একটী বিধবা নারী দাঁদিয়া ছুটাছুটি করিতেছে; “ওগো বাবা! আমার কি হবে গো! ওগো এই হতভাগিনীর যে মাথা রাখবার জায়গা নেই গো! ওগো কি হলো গো!” তর্কভূষণ মহাশয় ঐ বিধবাকে চিনিতেন। দুই বৎসর হইল সেই হতভাগিনী পতিহীনা হইয়া, দুইটী শিশু সন্তান লইয়া, ঐ নাপিত বাড়ীর পার্শ্বে একখানি কুঁড়ে ঘরে পড়িয়া থাকিত; এবং ধান গানিয়া, গৃহস্থের বাড়ীতে ক্রিয়াক্ষেপে খাটিয়া ও পাট কাটিয়া দড়ি বিক্রয় করিয়া, অতিকষ্টে আপনার ও শিশু দুইটীর ভরণপোষণ নির্বাহ করিত।

ভুবনেশ্বরীর বিবাহের সময় তর্কভূষণ মহাশয় তাহাকে ও তাহার সন্তানদিগকে এক একখানি নূতন বস্ত্র ও পাঁচটা টাকা দিয়াছিলেন। সমুদায় বস্ত্র ও টাকা তাহার ঘরের একটা আমকাঠের সিন্দুকে ছিল। যাঁ আশুনা লাগিয়া তাহার সর্বস্ব গিয়াছে; তাই সে পাগলের তায় কাঁদিত ছুটিয়া বেড়াইতেছে। সে নিকটে আসিলে তর্কভূষণ মহাশয় বলিলেন— “আহা বাছা! তোর ঘরখানি গেল।” এই কথা বলিতে তাহার চণ্ডে জল আসিল; শেষে বলিলেন, “তুই কাঁদিস্নে; তোর ঘর আবার হবে।” সে কি তা শোনে, সে কাঁদিয়া আর এক দিকে ছুটিয়া গেল।

অবশেষে আশুনা নির্বাপিত হইল। তখন কাহার কি গিয়াছে, কেহ মারা পড়িয়াছে কিনা, গরু বাছুর কিছু মরিয়াছে কিনা, এই সকল অনুসন্ধান আরম্ভ হইল। ক্রমে সায়ংসন্ধ্যার সময় উপস্থিত। তর্কভূষণ মহাশয় গৃহাভিমুখে প্রাণিবৃত্ত হইবার পূর্বে হরের মাকে ডাকিয়া বলিয়া আসিলেন—“তুই ছেলে ছোটোকে নিয়ে আমাদের বাড়ীতে গিয়ে রাতে থাকিস্। তোর যা গেছে সে জন্তে ভাবিস্নে; আমার বাঁশ ঝাড়ে বাঁশ আছে, গাদাতে খড় আছে; তোর যেমন ঘর ছিল তেমন হবে।”

এদিকে গোবিন্দ কিঞ্চিৎ পূর্বেই বাড়ীতে ফিরিয়া আসিয়াছে। আশুনা লাগিয়া তাহার দুই খানা পা একেবারে কলসিয়া গিয়াছে। সে বাহির বাড়ীতে আসিয়া নিজের শয়ন-ঘরে পড়িয়া ছটফট করিতেছিল। কাহাকেও কিছু বলে নাই। কিন্তু বিজয়া বাড়ীর ভিতর হইতে কেমন করিয়া সে সংবাদ পাইয়াছেন। তর্কভূষণ মহাশয় সদলে বাড়ীতে আসিয়া দেখেন, বাহিরের ঘরে বিজয়া, গৃহিণী, কালী, তারা প্রভৃতি গোবিন্দের গুশ্রমাতে রত হইয়াছেন। কি একটা প্রণেপ দেওয়া জ্বালাটা একটু কমিয়াছে। ইহা দেখিয়া তিনি সায়ংসন্ধ্যা করি কালীবাড়ীতে গেলেন। যাইবার পূর্বে ভৃত্যকে বলিয়া গেলেন, “হয়ে

মার ঘর পুড়ে গিয়েছে ; আজ রাত্রে কোথাও পড়ে থাকবে ; কাল প্রাতে খিড়কীর পথের ধারের ঘরের কাটকাটরাগুলো বাহির করে কেলে ঘরটা পরিষ্কার করে দিও ; তার ঘর তৈয়ার হওয়া পর্য্যন্ত সে সেখানে থাকবে।”

এদিকে গোবিন্দ একটু সুস্থ হইলেই বিজয়া জিজ্ঞাসা করিলেন, “ঘরে আগুন কি করে লাগলো ?”

গোবিন্দ। নাপ্তেদের রান্না ঘরের চালে একটা দড়ি ঝুলান ছিল ; রান্না থাওয়ার পর উনানে আগুন ছিল ; একটা ছোট ছেলে কোন্ অবসরে রান্না ঘরে প্রবেশ করে, উনানের আগুনে একটা নারিকেল পাতা জ্বালাইয়া কেমন করে সেই দড়িতে আগুন লাগিয়ে দিয়েছিল।

বিজয়া। তুমি তখন কোথায় ছিলে ?

গোবিন্দ। আমি মার সঙ্গে দেখা করে বাড়ী হতে আসছিলাম।

বিজয়া। আগুনের ভিতরে গেলে কেন ?

গোবিন্দ। আমি গোলমাল শুনে ছুটে এসে দেখলাম, একখান ঘর জ্বলছে, তাহা ঝাঁচবার কোনও উপায় নেই ; পাশের পুকুরটাতে এক বিন্দুও জল নেই, সকলে চাটুখোদের পুকুর হতে জল আনতে ছুটছে ; এদিকে বাতাসের জোরে আগুন ছড়িয়ে পড়ছে। দেখতে দেখতে আর এক খানা ঘরে লাগলো ; তখন সকলে বললে, সেই ঘরের চাল কেটে নামিয়ে দিতে পারলে অন্য ঘর গুলো বাঁচে। দেখলাম সকলেই বলে, “ওঠনা” “চালটা কাটনা” কিন্তু কেউ ওঠে না। অবশেষে আর থাকতে পারলাম না, নিজেই উঠলাম।

গৃহিণী। বাবা, আপনার প্রাণটা বাঁচিয়ে ত পরের উপকার করতে হয়।

ক্রমে মহিলাগণ একে একে অন্তঃপুরে প্রতিনিবৃত্ত হইলেন। বিজয়া

অনেকক্ষণ গোবিন্দের নিকট বসিয়া তাহাকে বাতাস করিতে লাগিলেন। গোবিন্দ অতি লাজুক ছেলে; সে তাঁহাকে বারবার অন্তঃপুরে বাইতে অনুরোধ করিল, কিন্তু তিনি গেলেন না; অবশেষে মৌন হইয়া পড়িয়া রহিল। অনেকক্ষণ পরে বিজয়া গোবিন্দকে নিদ্রিত দেখিয়া অন্তঃপুরে গমন করিলেন।

তর্কভূষণ মহাশয়ের সাংস্কার্য ও জপ সমাপন করিতে প্রায় দেড়ঘণ্টা দুইঘণ্টা অতীত হইয়া গেল। তদন্তে তিনি বাহির বাড়ীতে আসিয়া মধু চাকরকে ডাকিয়া জিজ্ঞাসা করিলেন, ‘হরেন মা ছেলে দুটি নিয়ে এসেছে কি?’ যখন শুনিলেন আসিয়াছে, তখন বলিলেন, “বিজয়াকে গিয়ে বল, যে তাদের যেন কষ্ট না হয়, ভাঁড়ার ঘরের রোয়াকে আজ রাতে তারা থাকবে।” “যে আজ্ঞা” বলিয়া মধু সেই আদেশ পালন করিতে গেল। তর্কভূষণ মহাশয়ও চণ্ডীমণ্ডপে নিজের স্থানে উত্তিয়া সমাগত কতিপয় প্রতিবেশী ব্রাহ্মণের সহিত শাস্ত্রীয় আলাপে প্রবৃত্ত হইলেন।

প্রতিবেশিগণ স্ব স্ব গৃহে প্রতিনিবৃত্ত হইলে, তর্কভূষণ মহাশয় যথাসময়ে আহারাদি করিয়া সকাল সকাল গিয়া শয়ন করিলেন। কিন্তু অল্প তাঁহার মন কিরূপ উত্তেজিত, কোন রূপেই নিদ্রা হইতেছে না। কেবল অগ্নিকাণ্ড ও হরের মার কথা মনে আসিতেছে। অনেকক্ষণ পরে নিদ্রা আসিল। কিন্তু গৃহী লোকের বিশ্রাম-সুখ সম্পূর্ণরূপে তাঁহাদের আয়ত্তাধীন নহে। কখন কোন্ ঘটনা ঘটে, তাহা কে বলিতে পারে? রাত্রি দুই প্রহর অতীত না হইতে কে একজন আসিয়া শঙ্করের ঘরের দ্বারে তাঁহাকে ডাকিতেছে। শঙ্কর প্রগাঢ় নিদ্রাতে আছেন; অনেক বার ডাকাডাকি করাতেও উত্তর দিতেছেন না। ইত্যবসরে বিজয়া দ্বার খুলিয়া বাহির হইলেন। শুনিলেন, গৌরীপতির স্বপ্নের

গ্রামের কয়েকজন লোক বরষাত্র গিয়াছিল, তাহারা বিবাহান্তে স্বদেশে ফিরিয়া যাইতেছে; সে দিন রাত্রে সেখানে থাকিবে। এই সকল কথোপকথন হইতেছে, এমন সময়ে গৃহিনী ঠাকুরাণী দ্বার খুলিয়া বাহির হইলেন, এবং আপনার দ্বারে দাঁড়াইয়াই চীৎকার করিয়া জিজ্ঞাসা করিলেন, “বিজয়া! কি রে, এত রাত্রে কে ডাকাডাকি করে?” এই চীৎকারে কর্তার ঘুম ভাঙ্গিয়া গেল। তাঁহার কর্ণে বিজয়ার এই কথাগুলি প্রবেশ করিল—“বৌ দিদি! কর কি? দাদার ঘুম ভেঙ্গে যাবে; চোঁচো কেন? কয়েকজন লোক এসেছে, বা কববার আমরাই কবচি?” তর্কভূষণ মহাশয় বুঝিলেন, কয়েকজন অতিথি উপস্থিত। অমনি উঠিয়া বাহিরে আসিলেন “কি বিজয়া! কে এসেছে?”

বিজয়া। সেজ কর্তার স্বস্তরের দেশ হতে পাঁচজন ভদ্রলোক বরষাত্র গিয়েছিলেন। তাঁরা ঘরে ফিরে যাচ্ছেন। আজ রাত্রে এখানে থাকবেন।

তর্কভূষণ। শঙ্করকে তোলা, আর সেজ বৌমাকে তোলা। তাঁর ব্যাপের বাড়ীর লোক, তিনি উঠে আতিথ্য ককন। (ইতি মদ্যে শঙ্কর ও সেজ বৌ দুইজনেই উঠিয়া বাহির হইয়াছেন।) তাঁদের পাওয়া দাওয়ার যোগাড় ত কর্তে হবে।

বিজয়া। তাঁরা বলছেন সন্ধ্যার সময় বাজারে জল খেয়ে এসেছেন, কেবল একটু শোবার বন্দোবস্ত হলেই হয়।

তর্ক। সে কাজটা তাঁরা ভাল করেন নাই। আসছেন ভদ্রলোকের বাড়ী; বাজার হতে খেয়ে এলেন কি করে? ও কথাই নয়; তুমি ভাঁড়ারে দেখ রান্নার কি কি যোগাড় হতে পারে; প্রাতে তাঁদের নিশ্চয় আহার হয় নাই; সমস্ত রাত্রি কি উপবাসে রাখা যেতে পারে?



বিজয়া। সকল আয়োজনই আছে, এখনি ডাল ভাত হতে পারে ; কেবল মাছটা নেই।

তর্কভূষণ। সমস্ত দিন অনাহারের পর মাছের ঝোল ভাতটা হলেই ভাল হতো। মধো একবার পুকুরে জালটা ফেলে দেখুক না, যদি দৈবাৎ মাছ মিলে যায়।

শঙ্কর। না—বাবা! এ রাত্রে কি মাছ ধরা হতে পারে? ঐ ডাল ভাত হোক।

তর্ক। তা ত আছেই ; যদি মাছটা যুটে যায় মন্দ হয় না ; তুমি মধোকে একবার ডাক না। আর আমি কি বাহিরে ভদ্রলোকগুলির কাছে যাব ?

শঙ্কর। না বাবা! এ রাত্রে আর আপনাকে যেতে হবে না ; আপনি শয়ন করুন, যা করবার ছোটপিসী ও আমি করে নিচ্ছি।

বিজয়া। তাইত, কাজটাই বা এমন কি, দেখতে দেখতে ভট্টো উনান জেলে সেজ বো ও আমি ওঁদেরকে খাইয়ে দিচ্ছি। দাদা! তুমি শোওগে।

পুত্র ও ভগিনীর তাড়াতে কর্তা আর বাহিরে যাইতে পারিলেন না, মধুর অপেক্ষা করিয়া রোয়াকে দণ্ডায়মান রহিলেন।

শঙ্কর। আমি মধোকে জাল ফেলতে বলছি, আপনি গিয়ে শয়ন করুন না।

ওদিকে গৃহিণী আসিয়া ঠেঙ্গিতেছেন,—“ওগো চলো, ঘরে চলো ; সব একটু ঘুমিয়েছিলে, ঘুমটা ভেঙ্গে গেল! আমার যেমন কিছু মনে থাকে না।”

তর্ক। ( বিরক্তি-কর্কশ স্বরে ) আঃ কর কি ! ঘুমটা কি এতই হলো ? এইরূপে দুই কর্তা গিন্নীতে কিয়ৎক্ষণ বিবাদ চলিল। অবশেষে মধু আসিয়া উপস্থিত।

তর্ক। মধু, একবার জালিগাছা খিড়কীর পুকুরে বার দুই ফেলে দেখত কিছু পড়ে কিনা।

মধু। যে আজ্ঞে।

গৃহিণী। এমন বাতিক গ্রস্ত মানুষ নাকি হয়! চল্লো এই রেতে পুকুরে মাছ ধরতে।

তর্ক। ওগো সমস্ত দিন অনাহারে পথশ্রম করে যদি আস্তে, তাহলে জান্তে পারতে চারটি মাছের ঝোল ভাতের জগা বাঙ্গালির প্রাণটা কেমন করে।

সৌভাগ্যক্রমে মধু জাল ফেলবামাত্র কতকগুলি বাটা মাছ পাইল। তর্কভূষণ মহাশয় গুনিয়া অতিশয় সন্তুষ্ট হইলেন। এদিকে বিজয়া ও সেজ বো দুই উনান জালিয়া ডাল ভাত চড়াইয়া দিয়াছেন। দেখিতে দেখিতে, ডাল মাছের ঝোল ভাত প্রস্তুত হইল। অতিথিদিগকে অন্তঃপুরে ডাকিয়া আনা হইল। তর্কভূষণ মহাশয় ভোজন স্থানে আগমন করিলেন; স্নিগ্ধ সম্ভাষণে অতিথিদিগকে নানা প্রশ্ন করিয়া আপ্যায়িত করিলেন; এবং যতক্ষণ তাঁহারা আহার করিলেন, ততক্ষণ নিকটে দণ্ডায়মান থাকিয়া প্রত্যেকের আহারের তত্ত্বাবধান করিলেন। অতিথিগণ পরিতোষ পূর্বক আহার করিয়া পরস্পর তর্কভূষণ মহাশয়ের পরিবারটির প্রশংসা করিতে করিতে বাহিরে শয়ন করিতে গেলেন। তর্কভূষণ মহাশয় পুনরায়, “দুর্গে দুর্গাতি-হারিণী।” বলিয়া ইষ্টদেবতার নাম স্মরণপূর্বক শয়ন করিলেন।

## পঞ্চম পরিচ্ছেদ

এবার দারুণ গ্রীষ্ম পড়িয়াছে। বৃষ্কেরা বলিতেছেন, তাহারা অনেক বৎসরের মধ্যে গ্রীষ্মের এরূপ প্রখর প্রতাপ দর্শন করেন নাই। খানা, খন্দ, খাল, বিল, পুকুর, পুষ্করিণী সমুদায় শুকাইয়া গিয়াছে; কোথাও একবিন্দু জল নাই; অত্যাচ্ছন্ন বৎসর বৈশাখের মধ্যভাগ হইতেই মধ্যে মধ্যে এক এক পশলা বৃষ্টি হইয়া গ্রীষ্মের উত্তাপের অনেকটা উপশম করে, এবং জৈষ্ঠের প্রারম্ভেই চাবের কাজ আরম্ভ হইয়া যায়; এবার জৈষ্ঠ মাস বিগত-প্রায়, আকাশে একবিন্দু মেঘের সঞ্চার নাই; চারিদিক ধূ ধূ করিতেছে, মাঠের তৃণ শুকাইয়া গিয়াছে; মাটি ফাটিয়া কুটীফাটা হইয়াছে; চাব বাসের কাজ আরম্ভ হইতে পারিতেছে না। এই প্রখর গ্রীষ্মের দিনে একদিন বেলা প্রায় দ্বিতীয় প্রহর অতীত-প্রায়। তর্কভূষণ মহাশয়ের অন্তঃপুরে যেন দ্বিপ্রহর রাত্রি! কে কোথায় পড়িয়া ঘুমাইতেছে, তাহার ঠিকানা নাই। যে যেখানে ছায়া পাইয়াছে, সেইখানে পড়িয়াছে। গৃহিণী এক পাল নাতি পুতি পরিবেষ্টিত হইয়া তাঁহার শয়ন ঘরের মেঝেতে পড়িয়া ঘুমাইতেছেন, তাহারাও ঘুমাইয়া পড়িয়াছে; বধূগণ স্বীয় স্বীয় গৃহে নিদ্রিত আছেন; বাহিরে যেন অগ্নি বৃষ্টি হইতেছে! ভেলো কুকুর গোলার নীচে পড়িয়া আলোহিত রসনা বিনির্গত করিয়া শ্বাসিতেছে; বিড়ালগুলি ছায়াবৃত্ত স্থানে পড়িয়া ঘুমাইতেছে; ভবেশের পোষা শালিক পাখীটী নিজ নয়নদ্বয় উন্টাইয়া, নিজ খাঁচাতে শয়ন করিয়া, নিদ্রাস্থ অশুভব করিতেছে; এবং মধ্যে মধ্যে কোনও কিছু শব্দ শুনিয়া জাগিয়া উঠিয়া

একবার “কালী তরাও” বলিয়া আবার চক্ষু মুদিত করিতেছে। এমন সময়েও কেবল এক শ্রেণীর জীবের বিশ্রাম নাই; তাহারা পাড়ার বালক বালিকা। তাহাদের চক্ষে ঘুম নাই। যাহারা স্কুলে পড়ে, তাহাদেরও প্রাতে স্কুল হওয়াতে তাহারা ছপূর বেলা বাড়িতে থাকে, ও দৌরাঘা করিয়া বেড়ায়। এই শিশুদলের মধ্যে যাহারা ছষ্ট ও পিতামাতার অবাধ্য, তাহারা জনকজননীকে নিদ্রিত দেখিয়া সরিয়া পড়িয়াছে; এবং আত্ম কাননে কাননে ঘুরিয়া ঢিল মারিয়া আম পাড়িতেছে; ও গাছে উঠিয়া পক্ষীশাবক চুরি করিয়া বেড়াইতেছে। আর যাহারা পিতামাতার বাধ্য, তাহারা দলবদ্ধ হইয়া কোনও ছায়াযুক্ত স্থানে বসিয়া খেলা করিতেছে। অথ তর্কভূষণ মহাশয়ের ভবনের শিশুদিগের এই অবস্থা। বিদ্যাবাসিনী, সুখদা ও অপরাপর কয়েকটি বালকবালিকা পাশের দাবাতে বসিয়া পুতুল খেলিতেছে। কেবলমাত্র তাহাদের কথোপকথনের অপরিপূর্ণ শব্দ সেই মধ্যাহ্নের প্রগাঢ় নিস্তব্ধতাকে ভঙ্গ করিতেছে।

ভবেশ কেবল শালিক পাখী পুষিয়া ক্ষান্ত হয় নাই। স্কুলের কোনও বালকের বাড়ী হইতে কতকগুলি পায়রা আনিয়াছে। তর্কভূষণ মহাশয় যখন প্রথম সেগুলিকে দেখেন, তখন বাড়ী অপরিষ্কার করিবে বলিয়া বিরক্ত হইয়াছিলেন; কিন্তু ক্রমে যখন দেখিলেন তাহারা রহিয়া গেল, তখন তাহাদের জ্ঞা খিড়কীর পথের ধারে পাশের দাবার নিকটে খোপ বাধিয়া দিতে বলিয়াছিলেন, এবং আহারার্থে প্রাতঃ আহারের মটর কড়াইএর বন্দোবস্ত করিয়া দিয়াছেন। নিরাপদ স্থানে খোপ পাইয়া ও আহারের উত্তম বন্দোবস্ত পাইয়া ক্রমশঃই তাহাদের বংশ বৃদ্ধি হইতেছে। তাহাদের মধ্যে যে ছই চারিটি দেখিতে সর্কাপেক্ষা সুন্দর, বাড়ার বালকবালিকারা তাহাদের পায়ে ঘুঙুর পরাইয়া দিয়াছে।

পায়রাগুলি এমনি গাধেঁষা যে, শিশুদের পাত হইতে ভাত কাড়িয়া খায়, পায়ে পায়ে বেড়ায়; ও হাত হইতে মটর খুঁটিয়া লয়। তাহার ছুই তিনটি পায়রা আজ ছেলেদের খেলার স্থানে ঘুরিয়া বেড়াইতেছে। পুতুলটীকে কাপড় পরাইয়া শোয়াইবামাত্র একটি পায়রা আসিয়া তাহাকে ঠোকরাইতেছে। একটি বালিকা বলিয়া উঠিল, “মর পায়রাটা আবার মরতে এল; আমার পুতুলটীকে ঠোকরাচ্ছে কেন ভাই?” একটি বালক বলিল, “ঠুক্রে দেখছে খাবার জিনিষ কিনা।” এই বলিয়া বাম হস্তে পায়রাটাকে সরাইয়া দিল। এইরূপ কথোপকথন চলিতেছে। ক্রমে কত্নাকে কাপড় পরাইয়া প্রস্তুত করা হইল। এইবার শশুর বাড়ী পাঠান হইবে। কত্নার মাতা বলিল,—“ওগো বেহারারা পাল্‌কী আন, পাল্‌কী আন।” চারিটি বালকে পাল্‌কী ধরিয়া আনিল। তন্মধ্যে পুতুলকে শোয়ান হইল; বেহারারা তুলিল; কত্নার মাতার ত কাঁদা চাই, সুখদা কাঁদিয়া উঠিল;—“ওগো মা, তোমায় ছেড়ে কেমন করে থাক্‌বো গো।”

গিরিশচন্দ্র তাঁহার শয়ন-গৃহে শয়ন করিয়া কি একখানা ইংরাজী পুস্তক পাঠ করিতেছিলেন; হঠাৎ ক্রন্দনের ধ্বনি তাঁহার কর্ণগোচর হওয়াতে, তিনি চমকিয়া উঠিলেন; ক্ষণকালের জন্ত গ্রন্থখানি হইতে তাঁহার চিত্ত সেইদিকে আকৃষ্ট হইল; তিনি উঠিয়া দেখিবার জন্ত বহির্গত হইলেন। গিয়া দেখেন, চারিটি বালকে বেহারা হইয়া একপাশে পুতুলের পাল্‌কী ধরিয়াছে, পাল্‌কার মধ্যে একটি পুতুল, সে সুখদার কত্না, বিষ্ণুবাসিনীর পুতুলের সঙ্গে তাহার বিবাহ হইয়াছে, কত্না পাল্‌কী করিয়া শশুর বাড়ী যাইতেছে, তাই সুখদা ক্রন্দনের অভিনয় করিতেছে। গিরিশচন্দ্র বলিলেন—“বাঁচলাম বাবা! তাদের কান্না শুনে মনে করেছিলুম বুঝি একটা কি কাণ্ডই হলো।” এই বলিয়া শিশুদের মধ্যে একটু খেলা

করিবার জন্য বসিলেন। বলিলেন—“ওরে আমি আজ তোদের বাড়ী অতিথি ব্রাহ্মণ, আমাকে কি খেতে দিবি?” সুখদা ও বিদ্যাবাসিনী গিরিশচন্দ্রকে একখানি খেলাঘরের পিঁড়ী বসিতে দিয়া, ব্যস্তসমস্ত হইয়া পাঁচ বাজান ভাত রাঁধিয়া ফেলিল। রাঁধিয়া ফেলিবার ভাবনা কি! ইঁহর মাটির ভাত, খেংরা কাটির ডাঁটা, চাকুন্দ বিচারি ডাল, খোলাকুচির মাছ, পানের বোটার তরকারী, এ সমুদায় ত নিকটেই প্রস্তুত। অতএব পাক শাক শীঘ্রই হইয়া গেল। গিরিশচন্দ্রও পরিতোষ-পূর্বক আহাৰ করিলেন। পরিশেষে গিরিশচন্দ্র একটা সুন্দর পুতুল হস্তে তুলিয়া লইয়া বলিলেন—“বাঃ বেশ সুন্দর পুতুলটা, এটা কার?”

সুখদা। ওটা আমার, বিন্দু কেড়ে নিয়েচে।

বিদ্যাবাসিনী। আমি কেড়ে নিয়োচি? মিথো কথা! তুই আমার একখান ভাল কাপড় নিয়ে বদল দিসনি?

সুখদা। হেঁ, আমি বুঝি বদল দিইয়েছি?

বিদ্যাবাসিনী। (নাসাগ্রে আঙ্গুলি দিয়া) ওমা, তুই যে সব করতে পারিস! ডাক ওদের পুটীকে, কি বলে? আমি কি তোরা পুতুল চেয়েছিলেম, তুই আমার কাপড়খানা নেবার জন্তে পুতুলটা আমাকে দিলি।

সুখদা। হেঁ, তাই বুঝি।

বিদ্যাবাসিনী। (নিতান্ত বিরক্ত হইয়া) এহ নে, তোরা পুতুল নে, যে মিথো কথা বলে তার সঙ্গে আমি খেলিনে।

এই বলিয়া খেলা ছাড়িয়া উঠিয়া দাঁড়াইল ও গমনে উত্তত।

সুখদা। এই তোমার কাপড় তুমি নেও।

বিদ্যাবাসিনী। আমি কাপড় চাইনে; আমি আর খেলবো না।  
বলিয়া প্রস্থান।

গিরিশ। বিন্দু যেও না, শোন, শোন, এদিকে এস। (বিদ্যাবাসিনী

মুখ ভার করিয়া কিঞ্চিৎ দূরে আসিয়া দাঁড়াইল।) একটা কথাই অত রাগ কি করতে আছে।

বিক্রাবাসিনী। যে মিথ্যা বলে, আমি তারে দেখতে পারিনে, একটা পুতুলের কি এতই লোভ, যে আমি মিথ্যা কথা বলবো? আমার মা বত ভাল ভাল পুতুল দিয়েছিলেন, আমি সব ওদের দিয়েছি।

বাস্তবিক বিক্রাবাসিনীর হৃদয়টা কিছু প্রশস্ত; সে আপনার ভাল ভাল খেলনাগুলি পাড়ার দশজন বালিকাকে বিলাইয়া দিয়াছে। সে পিতামাতার নিকট যে শিক্ষা পাইয়াছে, তাহাতে মিথ্যা কথার প্রতি তাহার বড়ই ঘণা। আর তার খেলাতে মন নাই; সে দিন ত আর সুখদার সঙ্গে কোনক্রমেই খেলিবে না। গিরিশচন্দ্র অনেক বুঝাইলেন, কিছুতেই না। অবশেষে গিরিশচন্দ্র তাকে ধরিয়া আনিবার জন্য দুইজন বালককে আদেশ করিলেন। সে শক্ত মেয়ে, খুঁটীর মত রহিল; তাহারা দুইজনে হাত ধরিয়া টানাটানি করিয়া আনিতে পারিল না। অবশেষে গিরিশচন্দ্র নিজে উঠিলেন; তখন বিক্রাবাসিনী ছুটিয়া নিজ জননীর গৃহের মধ্যে প্রবেশ করিল; গিরিশচন্দ্র অনুসরণ করিলেন। বিজয়া আলু থালু হইয়া একাগ্রচিত্তে একটা বৃক্ষের দিকে চাহিয়া কি ভাবিতেছিলেন, তাহাদের পদশব্দে শশবাস্ত হইয়া অঙ্গ আবরণ করিলেন; এবং জিজ্ঞাসা করিলেন—“কি, কি, ব্যাপারটা কি?”

গিরিশ। দেখ ছোড়্দিদি! তোমার এই মেয়েটা বাপু বড় একগুয়ে।

বিজয়া। কেন কি হয়েছে?

গিরিশ। আমাদের সুকীর সঙ্গে বেশ খেলছিল, কি একটা পুতুল নিয়ে তব্বার করলে, তারপর আর কোন ক্রমেই খেলবে না। আমি কত বুঝালান, ধরে আনিবার জন্য ছুটো ছেলেকে পাঠালাম, কার সাধ্য

কিছুতেই পারা গেল না। শেষে আমি যদি ধরতে গেলাম, ত তোমার ঘরে পালিয়ে এল।

বিক্রা। আমি কেন খেলবো? যে মিথ্যা কথা কয়, তার সঙ্গে আমি খেলিনে। মা, স্ককীর সেই পুতুলটা কি আমি কেড়ে নিয়েছি? স্ককী নাকি কাপড় নিয়ে বদল দেয় নি?

বিজয়া। হাঁ আমাকে পুতুলটা দেখিয়েছিল ও বলেছিল বটে, যে কাপড় নিয়ে বদল দিয়েছে। তা স্ককীর পুতুল, স্ককী নিলেই বা।

বিক্রাবাসিনী। নিক্ না, আমি ফেলে দিয়েছি। মিথ্যা কথা বলে কেন?

বিজয়া। (গিরিশের প্রতি) থাক, খেলবে না ত খেলবে না, টানাটানি করে আর কি হবে? গিরিশ। তুমি একটু বসো; একটা কথা আছে।

গিরিশচন্দ্র বিজয়ার তত্ত্বপোষের একপার্শ্বে বসিলেন।

“তুমি কি এমন কোনও বাঙ্গলা বই জান, যাতে পরকালের বিষয় পরিষ্কার করে লেখা আছে?”

গিরিশ। এমন কোনও বাঙ্গলা বইএর কথা ত মনে হয় না; তবে ইংরাজিতে আমরা যে ফিলজফি পড়ি, তাতে এ বিষয়ে অনেক কথা আছে।

বিজয়া। তার কি বাঙ্গলা অনুবাদ হয় নি?

গিরিশ। না।

বিজয়া। তুমি সেই ইংরাজী বইটা পড়ে আমাকে শোনাতে পার ও ভাবার্থটা বুঝে দিতে পার?

গিরিশ। তা পারি, এক দিন-দেব।

বিজয়া। তাতে কি আছে?



গিরিশ। ঈশ্বর ও পরকাল কতদূর বিশ্বাসযোগ্য, তাহারি সম্বন্ধে বিচার আছে।

বিজয়া। আমি ঠিক তাই চাই।

গিরিশ। আচ্ছা, তবে এক দিন শুনো।

বিজয়া। আর একটা কথা আছে; তোমাদের বাসাতে আমাদের গোবিন্দের একটু থাকবার জায়গা হয় না?

গিরিশ। জায়গার অভাব কি? আমি ও পক্ষু যে ঘরে থাকি, সে ঘরেও হতে পারে, অথ ঘরেও হতে পারে। আর এত লোকের পাওয়া চলে, তারও একমুঠা ভাত হতে পারে।

বিজয়া। তবে গোবিন্দকে সঙ্গে করে নিয়ে যাও না কেন? তার বড় ইচ্ছা সংস্কৃত কালেজে পড়ে; লজ্জাতে কাকেও কিছু বলতে পারে না। তাকে লেখাপড়া শিগিয়ে দিতে পারলে একটা গরিব পরিবারকে রক্ষা করা হয়।

গিরিশ। গোবিন্দ ত বাড়ীর ছেলে, সে থাকবে তাতে আর কি? তবে এ বিষয়ে একটু গোলযোগ ঘটেছে; বাবা যে আর পরের ছেলে বাসাতে রাখতে চান এরূপ বোধ হয় না।

বিজয়া। কেন, কি গোলযোগ ঘটেছে?

গিরিশ। বাবা পক্ষুর প্রতি বড় চটেছেন; চটে বলেছেন, “আর পরের ছেলে বাসাতে রাখবো না; বাঁধ কেটে লোণা জল আর নিজের ক্ষেতে আনবো না।”

বিজয়া। তোমার মাসতুতো ভাই পক্ষু? সে ত ভাল ছেলে, সকলের মুখেই তার প্রশংসা শুনি, বড় কর্তা তার উপরে এত চটলেন কেন? (বিজয়া ব্যয়োজ্যোষ্ঠ ভ্রাতৃপুত্রদ্বিগকে বড়কর্তা, মেজকর্তা, সেজকর্তা প্রভৃতি শব্দে সম্বোধন করিয়া থাকেন।)

গিরিশ। সে ত ছেলে ভাল, তার মত সচরিত্র ছেলে আজ কাল দেখা যায় না ; কিন্তু তার কতকগুলি বড় দোষ আছে । প্রথম, সে সন্ধ্যা-আল্হিক করে না ; দ্বিতীয়, সে বুধবার বুধবার ব্রাহ্মসমাজে উপাসনা করতে যায়, ও তত্ত্ববোধিনী পত্রিকা নেয় ; তৃতীয়তঃ, প্রতি শনিবার রাত্রে কি এক “নবরত্ন” সভা করতে যায় । বাবা এই সকল কথা শুনে একেবারে হাড়ে চটে গেছেন ; তার সঙ্গে আর কথা কন না ।

বিজয়া। পঞ্চ কি বলে ?

গিরিশ। আমি তাকে কত বলেছি ; সে বলে সন্ধ্যা-আল্হিক করবো কি, বা বিশ্বাস করি না, তা করা ত ভণ্ডাম । আমি বলি, সব কথা কি তুমি বোঝ ? একটা প্রথা চলে আস্চে, করলেই বা ; তা সে কোনও মতেই শোনে না ।

বিজয়া। ব্রাহ্মসমাজে যায়, তত্ত্ববোধিনী কাগজ পড়ে, তাতে রাগের বিষয় কি ? আমাদের তিনি ত ব্রাহ্মসমাজে যেতেন, তত্ত্ববোধিনী কাগজও নিতেন । ব্রাহ্মসমাজে ত পরমেশ্বরের উপাসনা হয় ; আর আমি নিজে তত্ত্ববোধিনী কাগজ পড়ে দেখেছি, তাতে অতি চমৎকার কথা থাকে, পড়লে মানুষের জ্ঞান হয় ; সকলেরই ত তত্ত্ববোধিনী পড়া উচিত ।

গিরিশ। ও ছোড়্দিদি, তুমি মেয়েমানুষ কিনা, তাই সোজাসুজি বুঝেছ । ব্রাহ্মসমাজে গিয়েই ত বেগড়ানে বুদ্ধি বটে । সেখানে গিয়েই ত শোনে পুতুলপূজা করতে নেই, জাত্টিে কিছু নয়, কুসংস্কারগুলো ছাড়তে হয় ।

বিজয়া। কৈ আমাদের তাঁর ত বেগড়ানে বুদ্ধি দেখি নাই ।

গিরিশ। তিনি ত বুদ্ধিমান জ্ঞানী লোক ছিলেন । মনে যাই থাকুক, কাজে সমাজবিরুদ্ধ আচরণ কিছু করতেন না । এরা আবার এককাটি সরেস ! বাঁশের চেয়ে কঞ্চি শক্ত কিনা । তবে ইহার ভিতর একটা কথা

আছে। পক্ষুর বেগড়ানে বুদ্ধিটা বোধ হয় কেবল ব্রাহ্মসমাজ থেকে হয়নি; সে ডফসাহেবের স্কুলে পড়তো, মিশনারি সাহেবেরা তার সঙ্গে লেগেই আছে; একবার ত একটা গুজবই উঠলো, পক্ষু খ্রীষ্টান হবে।

বিজয়া। তুমি ত বাপু বেগড়ানে বুদ্ধি বলছো, আমি ত তা বলতে পারিনি। ধর্মো মতি, পরমেশ্বরে ভক্তি, জ্ঞানে রুচি হলে যদি বেগড়ানে বুদ্ধি হয়, তবে সে বেগড়ানে বুদ্ধি আমাদের সকলের হোক। আমরা অতি অধম, ভগবানকে ভুলেই থাকি; তাঁতে যদি কারুর মতি গতি হয়, সে ত অনেকেরই কথা।

গিরিশ। তুমি যে উটো বুক্লে; পুতুলপূজো করবো না, জাত ভাঙবো, সন্ধ্যা-আহ্নিক করবো না এই সব বুদ্ধিই বেগড়ানে বুদ্ধি। ঈশ্বরে মতি হয়, সে ত ভালই; সেই সঙ্গে হাদামাগুলো যোটে বলেই ত দোষের কথা।

বিজয়া। ও কথা থাক। আবার একটা কি সভার নাম করলে, “নবরত্ন” নাকি?

গিরিশ। হাঁ “নবরত্ন”; সেটার বিষয় আমি ভাল জানি না; পক্ষুর মুখে শুনেছি। তার নাম “নবরত্ন” নয়, আসল নামটা আত্মোন্নতি-বিধায়িনী সভা। ব্রজরাজ ঘোষ নামে একটা সভার বাড়ীতে সে সভা বসে; এরা ৯ জনের অধিক সভা নেয় না বলে, সেই ব্রজরাজের মা নাকি সভার নাম নবরত্ন দিয়েছেন। তারা যাকে তাকে যেতে দেয় না; নাস্তিককে সভা করে না; যে मद খায়, তাকে সভা করে না; আর তাদের একটা নিয়ম এই আছে, সভাতে কর্তব্য বলে যা ঠিক হবে, তা সকলকে করতেই হবে।

বিজয়া। বাঃ! এরূপ সভা ত বেশ; আজ-কালকের দিন লেখা পড়া শেখা ধর্মের মধ্যে নাস্তিক, নাস্তিক, একটা ধূয়ো পড়ে গেছে;

এরা ত বেশ, নাস্তিককে নেয় না। আর মদ খায় না এটাও ত বেশ কথা। শেষ কথাটাও মন্দ নয়। যা কর্তব্য বলে ঠিক হয়, তা ত করাই ভাল।

গিরিশ। সভাটা কি রকম সর্ব্বনেশে একবার ভেবে দেখলে না? আজ যদি তারা ঠিক করে ভাত রাখবে না, তবে, কাল তাদের মধ্যে যারা দামন আছে, সকলেই পৈতা ফেলে দেবে। আজ যদি ঠিক করে, বালাবিবাহ করা হবে না, কাল তাদের কেউ আর বালাবিবাহ করবে না। পুতুল পূজো করা হবে না, বালাবিবাহ করা হবে না, এ ছোটো নাকি ঠিক করে গেছে; এখন জাতিভেদের উপর তর্ক চলছে।

বিজয়া। পঞ্চ কি এই সভার সভা? সে পুতুল পূজো করবে না, বালাবিবাহ করবে না, প্রতিজ্ঞা করেছে?

গিরিশ। করেছে বৈ কি, তবে আর কি বলছি? বিয়ের জন্তে তাকে কত পীড়াপীড়ি করা হয়েছিল, কোন ক্রমেই করলে না।

বিজয়া। বড় কর্তা এসব কথা জানেন?

গিরিশ। এত কথা কি আর জানেন? তা হলে কোন্ দিনে তাকে তাড়িয়ে দিওন। কেবল এইমাত্র শুনেছেন, যে শনিবার শনিবার কোথায় সভা করতে যায়, তাতেই এত রাগ। বাবা সভা করতে যাওয়াটা দেখতে পারেন না। আর বোধ হয় আমাকে ইংরাজী পড়তে দিয়ে অবধি তাঁর ভয়টা কিছু বেশি; পাছে ছেলে বিগড়ে যায়।

বিজয়া। যাক, ওসব বাহিরের কথা; গোবিন্দকে তোমাদের আসাতে রাখবার কি হবে?

গিরিশ। বাবারই প্রধান আপত্তি; তিনি এতদিন বাড়ীতে ছিলেন, এনি থাকতে থাকতে কথাটা তুললে না কেন?

বিজয়া। বলি বলি করে ভুলে গেলাম।

গিরিশ। এক দিকে দেখতে গেলে, বাবা থাকতে না তুলে ভালই করেছে। তিনি পঞ্চুর বিশেষ বিবরণ কর্তা দাদা মশাইকে বলে অমত করে দিতেন, তা হলে আর হতো না। এখন কর্তা দাদা মশাই সকল কথা না শুনে গোবিন্দকে যদি পাঠান, বাবা আর ফেরাতে পারবেন না।

বিজয়া। বড় কর্তা কি আর পঞ্চুর কথা দাদাকে বলতে বাঁকি রেখেছেন।

গিরিশ। বোধ হয় বলেন নি। সে দিন ত কর্তা দাদা মশাইয়ের সাক্ষাতে ব্রাহ্মসমাজের কথা হচ্ছিল, কর্তা দাদা মশাই ত কিছু বললেন না।

বিজয়া। ও গিরিশ! তুমি বুঝি দাদাকে আজও চেন নি? উনি ঐ সকল কথার মধ্যে বসে আছেন, অথচ কোনও কথাতে থাকেন না। কার উপরে কি ভাব, তা কি হঠাৎ প্রকাশ করেন? আচ্ছা, যদি দাদা পঞ্চুর কথা শুনেই থাকেন, তা হলে কি হবে?

গিরিশ। গোবিন্দকে কর্তা দাদা মশাই ভালবাসেন। এটা ত বুঝবেন সে গরীবের ছেলে, তার একটা উপায় হলে ভাল হয়। ছোড়্দিদি! তুমি একটু নিরাগয়ে বসো; দয়াটা খুব আছে, হয় ত মত হবে।

বিজয়া। বেশ কথা, তাই বলবো। আমি বললে মত হতে পারে; আমাকে দাদা বড় ভালবাসেন; আমার কোন কথা প্রায় ফেলেন না।

গিরিশ। কর্তা দাদা মশাইয়ের ধুগড়ীর ভিতর খাসা চাউল; দেখলে কে বলবে মানুষটীতে রস কস কিছু আছে, কিন্তু যাকে ভালবাসেন, প্রাণ দিয়েই ভালবাসেন।

বিজয়া। আবার যাকে ঘৃণা করেন, অমনি প্রাণ দিয়েই ঘৃণা করেন।

গিরিশ। ঠিক বলেছ, কর্তা দাদা মশাইয়ের আধাআধি কিছু নাই ; লোক-দেখানে কাজ একটুও নাই ; মনে এক রকম বাহিরে অল্প রকম দহা করতে পারেন না।

বিজয়া। যা হোক, তবে আমি শীঘ্র দাদাকে একবার নিরালয়ে বলবো ; তোমার প্রতি অনুরোধ, তুমি গোবিন্দকে একটু দেখবে, বইখানা আসখানা যোগাড় করে দেবে।

গিরিশ। সে বিষয় বলা বাহুল্য মাত্র, সে ত আমাদের বাড়ীর ছেলে।

এই কণোপকণের পর দিনেই বিজয়া তর্কভূষণ মহাশয়ের নিকট গোবিন্দের কলিকাতায় শিবচন্দ্রের বাসাতে থাকিবার প্রস্তাব করিলেন। তর্কভূষণ বলিলেন ;—“ও যদি আপনার অবস্থার উন্নতি করতে পারে, ভালই। শিবচন্দ্রের এত দিকে এত ব্যয় হয়, আর ও থাকলে কি বিশেষ ব্যয় হবে ? আচ্ছা, গিরিশের সঙ্গে সে কলকাতায় যাক।”

তদনন্তর গ্রীষ্মাবকাশের পর কলেজ খুলিবার সময় গোবিন্দ গিরিশ-চন্দ্রের সহিত কলিকাতায় গেল, এবং এক টাকা বেতনে সংস্কৃত কলেজে ভর্তি হইল। বিজয়া গৃহিণীর সহিত পরামর্শ করিয়া গোবিন্দের খরচের জ্ঞান মাসে মাসে ৩ টাকা করিয়া গোপনে গিরিশের নিকট পাঠাইবার বন্দোবস্ত করিলেন।

গিরিশচন্দ্র ও গোবিন্দের কলিকাতা যাত্রার অব্যবহিত পরেই গৃহিণী ও বিধবা-চতুষ্টয় দশহরার দিন গঙ্গাস্নান করিবার জ্ঞান শাস্তিপুরে গিয়াছিলেন।

ভূবেন্দ্রবীর বিবাহের সময় যোড়শী পিজালয়ে আসিলে, গৃহিণী তাহার

সহিত এই পরামর্শ করিয়া রাখিয়াছিলেন যে, দশহরার সময়ে তিনি ও বিধবা-চতুষ্টয় এক দিনের জ্ঞাত গঙ্গানানার্থ তাহার স্বশ্রমালয় শান্তিপুরে গমন করিবেন ; এবং বিজয়া সংসারের ভার লইয়া থাকিবেন । তর্কভূষণ মহাশয়ের নিকট এষ্ট প্রস্তাব উপস্থিত করিলে তিনি আপত্তি উত্থাপন করেন নাই । দশহরার দিন সন্নিকৃষ্ট হইলে, গৃহীণীগণের শান্তিপুর গমনের চিন্তা হৃদয়ে উদিত হইতে লাগিল । কি উপায়ে তাঁহাদিগকে প্রেরণ করা যায় ? এমন সময়ে দৈবাৎ শান্তিপুরের একখান ঘোড়ার গাড়ি গ্রামে আসিয়া উপস্থিত । কর্তা তৎক্ষণাৎ গাড়োয়ানকে ডাকাইয়া সেই গাড়ি ভাড়া করিলেন । এইরূপ স্থির হইল যে দশহরার পূর্বদিন মহিলারা আহারান্তে সেই গাড়িতে শান্তিপুরে গমন করিবেন ; তৎপর দিন গঙ্গানানান্তে সেখানে যাপন করিয়া, তৃতীয় দিবসে নশিপুরে ফিরিয়া আসিবেন । মধু চাকর তাঁহাদের সমভিব্যাহারী হইবে ।

যথাসময়ে গৃহীণী ও বিধবা-চতুষ্টয় আহারাদি করিয়া গাড়িতে যাত্রা করিলেন । মধু চাকর উপরে গাড়োয়ানের নিকট বসিয়া চলিল । আবাড়ের প্রারম্ভে রোদ্দের অতি প্রখর তেজ ; বর্ষা এখনও নামে নাই । এই রোদ্দে অশ্বদ্বয়ের পক্ষে গাড়ি টানিয়া যাওয়া বড় সহজ নহে । কয়েক ক্রোশ অতি ক্রেশে আসিয়াই অশ্বদ্বয় একেবারে ক্লান্ত ও শক্তিহীন হইয়া পড়িল ; সুতরাং চক্রধরপুরের বাজারে তাঁহাদিগকে অনেকক্ষণ অপেক্ষা করিতে হইল । বৃক্ষের ছায়াতে গাড়ি দাঁড় করাওয়া, অশ্বদ্বয়ের মুখ খুলিয়া তাহাদিগকে ঘাস দিয়া, গাড়োয়ান তামাক খাইতে গেল । বিধবা-চতুষ্টয়ের মধ্যে একজন নামিয়া গেলেন ; গৃহীণী ও অপর বিধবাব্রয় গাড়িতেই রহিলেন । মধু নামিয়া দোকানে গিয়া বসিল ; এবং পথিকদিগের সহিত আলাপ পরিচয়ে প্রবৃত্ত হইল ।

তর্কভূষণ মহাশয় আসিবার সময় মধুর হস্তে দশটা টাকা দিয়াছেন

এবং তাহা হইতে গাড়ির ভাড়া ২৥০ আড়াই টাকা, ও যোড়শীর খণ্ডরা-  
লয়ের তিনটি শিশুর হাতে ৩ টাকা দিগা, অবশিষ্ট টাকা রমণীগণের  
পুণ্যার্থে ব্যয় করিতে আদেশ করিয়াছেন। গৃহিণীকে কেবল এইমাত্র  
বলিয়া দিয়াছেন—“মধুর নিকট টাকা রহিল, প্রয়োজন মত চাহিয়া  
লইও।” এতদ্বিন্ন গৃহিণী নিজে পাঁচটি টাকা স্বতন্ত্র আনিয়াছেন, তাহা  
তাহার অঞ্চলে বাঁধা রহিয়াছে। বিধবাগণও যথাসাধ্য কিছু কিছু অর্থ  
অঞ্চলে বাঁধিয়া আনিয়াছেন।

বৃক্ষতলে গাড়ি অপেক্ষা করিতেছে, এমন সময় একটী ডোম-  
জাতীয়া রমণী ভিক্ষা করিবার জন্ত গাড়ির দ্বারে উপস্থিত। তাহার  
কোড়ে একটী ছয় সাত মাসের শিশু সন্তান। তাহার শিশুটী দেখিয়া  
কর্ত্তী বলিলেন;—“ওমা ওমা, কেমন সুন্দর ছেলেটা দেখ, যেন পাথুরে  
গোপালটী! কি জাত কে জানে, কোলে করবার বো নেই, তা না হলে  
কোলে নিতাম।” তৎপরে তিনি যখন সে হতভাগিনীর হৃৎকের কাহিনী  
শুনিলেন, যখন জানিতে পারিলেন, যে একমাস কাল হইল তাহার পতি  
তাহাকে ও ঐ শিশুটীকে পরিত্যাগ করিয়া অপর একটী দ্বীলোককে  
লইয়া কোন্ দেশে পলাইয়া গিয়াছে, এমন মুষ্টি-ভিক্ষা করিয়া অতি কষ্টে  
ঐ হতভাগিনীর দিন চলে, তখন তাঁহার মন কৃপাতে আর্দ্র হইল।  
বলিলেন;—“আহা! এমন সুন্দর ছেলেটা একটু দুধ পায় না।” এই  
বলিয়া আপনার অঞ্চল হইতে একটী টাকা বাহির করিয়া ঐ শিশুর হৃৎকের  
জন্ত সেই রমণীকে দিলেন; এবং বলিলেন—“তুই নশিপুরে আমাদের  
বাড়ীতে যাস, তোর একটা উপায় করে দেব।” কিন্তু সে নশিপুরে কার  
বাড়ীতে যাবে? জিজ্ঞাসা করাতে গৃহিণী বলিলেন—“জানিস্বে, সেই  
অমুক তর্কভূষণের বাড়ী।” তিনি ভাবিলেন, তাঁহার পতির গ্রাম বিখ্যাত  
বাস্তিকে জানে না, নরলোকে এমন কে আছে? কিন্তু তর্কভূষণ মহাশয়ের



বিজ্ঞা বন্ধির খ্যাতি, এই ডোম-কন্নার কর্ণে পৌছে নাই। আর পৌঁছেই বা কি? অমুক তর্কভূষণ বলিলেই ত কিছুই বুঝা যায় না। তর্কভূষণ মহাশয়ের সমগ্র নামটা রমণীদিগের কেহই বলিতে পারিতেছেন না। গৃহীণীরা ত কথাই নাই; তিনি পতির নাম কিরূপে ধরিবেন? যে তিনটি বিধবা গাড়িতে আছেন, তাঁহারাও সম্পর্কে তর্কভূষণ মহাশয়ের ভ্রাতৃবধু কিরূপে ভাগুরের নাম ধরিবেন? যে বিধবাচারি নাম ধরিবার অধিকার আছে, তিনি গাড়িতে নাই। মহা মুঞ্চিল! রমণীগণ বুঝাইবার জন্য যাহা কিছু বলিতেছেন, তাহাতে ঐ ডোম-কন্না কিছুই বুঝিতে পারিতেছে না। অবশেষে সে গিয়া একজন দোকানদারকে ডাকিয়া আনিল। সেই সঙ্গে আরও কয়েকজন লোক আসিল। গাড়ির দ্বারে জনতা! ব্যাপারটা কি? রমণীরা নশিপুরের কোন্ ব্রাহ্মণের কথা বলিতেছেন, তাহা স্থির করিতে হইবে। গাড়ির দ্বারে জনতা দেখিয়াই মধু ছুটিয়া আসিল। গৃহীণী মধুকে তর্কভূষণ মহাশয়ের নামটা বলিয়া দিতে আদেশ করিলেন। দোকানদার শুনিয়া বলিল, “ওঃ জানি, জানি, আমি ওকে পাঠিয়ে দেব।”

একাভিচারিণী চালিয়া বাইতে না বাইতে আবার আর এক দল ভিক্ষুক উপস্থিত। এক দণ্ডের মধ্যে সেই ক্ষুদ্র গ্রামের দরিদ্র ও ভিক্ষুকদিগের মধ্যে এই বাড়ী ছড়াইয়া পড়িল যে, বাজারের গাড়িতে কে একজন বড়লোকের স্ত্রী যাইতেছেন, তিনি বৈশ্যের স্ত্রীকে একটা টাকা দিয়াছেন। অমন একটা দুইটা করিয়া অনেকগুলি ভিক্ষুক গাড়ির দ্বারে আসিয়া উপস্থিত। আবার মধু ছুটিয়া আসিল। সে মনে ভাবিল, গৃহীণীর নিকট আরও টাকা আছে, তাহা তাঁহার হস্তে থাকিলে একটাও থাকিবে না; সেগুলি কাড়িয়া লওয়া আবশ্যক। ভাবিয়া বলিল—“মহাশয়! আপনার কাছে আর কত টাকা আছে?”

গৃহিণী। সে কথায় তোমার কাজ কি ?

মধু। আপনার অসাধ্য ত কিছু নেই। কুবেরের ভাণ্ডার আপনার হাতে দিলে এক দিনে লুটিয়ে দিতে পারেন। দেন, আমার কাছে টাকাগুলো দেন।

গৃহিণী। টাকা কি জন্তে ? গরিব দুঃখীকে পাওয়াবার জন্তেই ত। আহা ওদের পেটে ভাত নেই, গায়ে বস্ত্র নেই, এসব দেখে কি থাকা যায় ?

মধু। সে আমি বুঝবো, আপনি টাকাগুলো আমাকে দেন না। পেটে ভাত নেই ? আপনিও যেমন, ওরা ভাত খেয়ে ঘরে ঘুমুচ্ছিল, একজনকে একটা টাকা দিয়েছেন কিনা, তাই শুনে সব ছুটে এসেছে।

এই বলিয়া সে সেই ভিক্ষুক জনতাকে গালাগালি দিয়া তাড়াইয়া দিতে আরম্ভ করিল।

গৃহিণী। আঃ মধু কর কি ? অমন করে তাড়িয়ে দেও কেন ? ওরা কি বলছে শুনতে দেও না।

মধু। ও ঢের শোনা আছে ; আপনারা বাড়ীতে থাকেন, তাই শুনতে পান না, আমরা পথে ঘাটে সর্বদাই শুনছি। আমাকে টাকাগুলো দেন না ; যাকে যা দিতে হয়, আমি দিচ্ছি।

গৃহিণী দেখিলেন, টাকাগুলি না দিলে মধু কোন প্রকারেই ছাড়ে না, অবশেষে অঞ্চল হইতে চারিটা টাকা বাহির করিয়া মধুর হস্তে দিলেন। মধু সেই ভিক্ষুক জনতাকে ডাকিয়া একটু অন্তরালে লইয়া গেল, এবং গালাগালি দিয়া অধিকাংশকেই তাড়াইল। কতকগুলি ছাড়িবার পাত্র নহে ; তাহারা মধুর নিকট তাড়া খাইয়া আবার গৃহিণীর নিকট আসিল। মধু গালাগালি দিয়া সকলকে তাড়াইয়া দিয়াছে শুনিয়া, গৃহিণী ঠাকুরাণী অতিশয় বিরক্ত হইলেন ; এবং মধুকে ডাকাইয়া তিরস্কার করিয়া অবশিষ্ট

কয়েকজনকে কিছু কিছু দিয়া বিদায় করিতে আদেশ করিলেন। তিনি যাহাকে চারি আনা দিতে বলিলেন, মধু তাহাকে দুই আনা দিয়া বিদায় করিল; তিনি যাহাকে আট আনা দিতে বলিলেন, মধু তাহাকে চারি আনা দিল; এইরূপ করিয়া দিতে দিতে আরও দুই টাকা ব্যয় হইয়া গেল। মধু ভাবিতে লাগিল, এখন শীঘ্র গাড়ি ছাড়িলে হয়, আর অধিক বিলম্ব করিলে আমার হস্তস্থিত টাকার উপরেও টান পড়িবে। সে গাড়োয়ানকে স্বরা দিয়া যাত্রা করিল।

নশিপুরের নারীগণ ক্রমে শান্তিপুরে ষোড়শীর শ্বশুরালয়ে উপস্থিত হইলেন। সেখানে তাহারা সমুচিত সমাদরের সহিত গৃহীত হইলেন। পর দিন সকলে গন্ডামান করিলেন। মধু শিশুদিগের হস্তে দিবার জন্ত তিনটি টাকা গৃহিণীর হস্তে দিল, তিনি শিশুদিগকে দিলেন। গন্ডাতীরে গৃহিণী যে দান ধান করিলেন, তাহাতে মধুর হস্তে কয়েক আনা পয়সা মাত্র অবশিষ্ট রহিল। সেই সম্বল হস্তে লইয়া, সে তৎপরদিন মহিলাদিগকে সঙ্গে করিয়া নশিপুরে প্রস্থান করিল।

তাহাদের কিরিয়া আসিবার দুই এক দিন পরেই ডোম-কত্যা গঙ্গী নশিপুরের বাড়ীতে আসিয়া উপস্থিত। ওদিকে হরের মার নূতন ঘর বাঁধা হইয়া, সে সেই ঘরে থিয়াছে। তর্কভূষণ মহাশয়ের আদেশক্রমে গঙ্গী সেই পিড়িকার ঘরে আশ্রয় পাইল; এবং বাহির বাড়ীর গোয়ালে গরুর সেবা করিতে লাগিল। বর্ষাশেষে তর্কভূষণ মহাশয় গ্রামের মধ্যে একটু জমির যোগাড় করিয়া তাহাকে একটা ঘর বাঁধিয়া দিলেন। সে নশিপুরের অধিবাসিনী হইয়া রহিল।

## ষষ্ঠ পরিচ্ছেদ

গ্রীষ্মাবকাশের অবসানে গিরিশচন্দ্র ও গোবিন্দ কলিকাতায় যাওয়ার পর হইতে পূজার সময় পর্য্যন্ত এই কয়েক মাসের মধ্যে আর একটি উল্লেখযোগ্য ঘটনা ঘটিয়াছিল ; সেটী নশিপুরের নিষ্কর্মা যুবকদের কলিকাতা গমন । এই নিষ্কর্মা যুবকদের উল্লেখ অগ্রেই করা হইয়াছে । ইহার অনুরূপ যুবকদল অনেক গ্রামেই দেখিতে পাওয়া যায় ; অন্ততঃ যে সময়কার কথা হইতেছে, সে সময়ে অনেক গ্রামে দেখিতে পাওয়া যাইত । নশিপূর ব্রাহ্মণ-প্রধান গ্রাম, স্মতরাং ইহাদের সকলেই ব্রাহ্মণ-সন্তান । কোনওরূপে খাওয়া পরা চলিয়া যায় বলিয়া ইহাদের কাজ কর্ম করিবার প্রবৃত্তি নাই ; ঘরে বসিয়াই থাকে । ইহাদের অধিকাংশের বয়ঃক্রম ১৮।১৯ হইতে ২৫।২৬ এর মধ্যে । গল্প করিয়া, তাস খেলিয়া ও হাস্য পরিহাস করিয়া ইহাদের সমুদায় সময় অতিবাহিত হয় । তর্কভূষণ মহাশয়ের চতুর্থ পুত্র হরচন্দ্র যে আমোদপ্রিয় দলের প্রিয়পাত্র বলিয়া পূর্বে উল্লেখ করা গিয়াছে, সে দল স্বতন্ত্র ; তাহাদের বিবরণ পরে দেওয়া যাইবে । ইহারা বারইয়ারির দল । এই ব্রাহ্মণযুবকগণ আলস্তে দিন যাপন করে বটে, কিন্তু ইহাদের দ্বারা গ্রামের লোকের অনেক উপকার হয় । ইহারা অতিশয় পরোপকারী । যদি রাত্রি দ্বিপ্রহরের সময়ে কাহারও গৃহে মানুষ মরে, সংবাদ পাইবামাত্র ইহারা সদলে উপস্থিত হয়, ও শব বহন, শবদাহ প্রভৃতি করিয়া গৃহস্থের মহোপকার সাধন করে । গৃহদাহ উপস্থিত হইলে ইহারা দলে বলে আসিয়া পড়ে ; কাহারও ভবনে বিবাহ শ্রাদ্ধাদি অনুষ্ঠান উপস্থিত হইলে, এবং খাটিবার লোক না

থাকিলে, ইহারা উপস্থিত হইয়া রন্ধন, পরিবেশন, প্রভৃতি সমুদায় কার্যের ভার লইয়া বাহ্যতে স্নশৃঙ্খলরূপে কার্যা সমাধা হয়, সে বিষয়ে বিধিমতে সাহায্য করে। এই গুণে ইহারা সকলের প্রিয়; এবং এই কারণেই ইহারা মধ্যে মধ্যে লোকের উপরে যে কিছু উপদ্রব করে, তাহা গ্রামস্থ লোক সহ্য করিয়া থাকে।

ইহাদের কিছু কিছু উপদ্রবও আছে। তাহার কয়েকটি উদাহরণ দেওয়া যাইতেছে। কোনও গৃহস্থের গৃহে পরিবারস্থ লোকেরা তাহাদের একটা বালিকা বধূকে বড় ক্রেশ দিত। এই কারণে যুবকদল সে পরিবারের প্রতি বিরুদ্ধ ছিল। একদিন ইহারা শুনিল যে সেই বধূটির পতি ( তাহাদের পরিচিত একটা যুবক ) পিতামাতার প্রয়োচনায় বালিকা বধূটিকে গুরুতর রূপে প্রহার করিয়াছে। ইহাতে যুবকদল এতই চটিয়া গেল, যে সেইদিন রাত্রেই সেই যুবককে একাকী পথে পাইয়া সকলে পাড়িয়া একরূপ প্রহার করিল, যে সে কয়েকদিন উত্থান-শক্তি-রহিত হইয়া রহিল।

আর একবার আর একটা কাণ্ড বাধাইয়াছিল। এই নশিপুর গ্রামে কায়স্থজাতীয় একজন লোক আছেন। লোকে কুপণতা বশতঃ তাঁহার নাম করে না, কেবল “অমুক ঘোষ” বলিয়া সঙ্ক্ষেতে নির্দেশ করিয়া থাকে; অতএব আমরাও তাঁহার নাম না করিয়া অমুক ঘোষ বলিয়া নির্দেশ করিব। অমুক ঘোষ একজন ধনশালী ব্যক্তি; অথচ নিতানৈমিত্তিক ক্রিয়াকলাপে আবশ্যক মত দুই পয়সা ব্যয় করিতে অতিশয় নারাজ। এই বিষয় লইয়া গ্রামবাসীদিগের মধ্যে সর্বদা আলোচনা হইয়া থাকে। প্রাতঃকালে তাঁহার সহিত পথে সাক্ষাৎ হইলে লোকে অনেক সময় তাঁহাকে শুনাইয়াই বলিয়া থাকে—“আজ গতিক ভাল নয়, দিনটা ভাল গেলে হয়।” একবার পূজার পূর্বে

একদিন রাত্রে এই যুবকদল অমুক ঘোষের গৃহে এক দুর্গা প্রতিমা ফেলিয়া দিল। এদেশে প্রথা আছে, কোনও গৃহস্থের গৃহে ঠাকুর ফেলিয়া দিলে, গৃহস্থকে বাধ্য হইয়া পূজার আয়োজন করিতেই হয়। কিন্তু অমুক ঘোষ সহজে হারিবার লোক নন; তিনি সেই রাত্রেই নিজ ভৃত্যদিগের দ্বারা ঐ প্রতিমা জলে ফেলিয়া দিলেন। পরদিন প্রাতে যুবকদল যখন শুনিল যে, প্রতিমা জলে ফেলিয়া দিয়াছে, তখন তাহারা সেই প্রতিমার গণেশটা তুলিয়া, তাহার স্বন্ধে কাছা পরাইয়া, অমুক ঘোষের হস্তে গণেশ-জননীর অপবাত মূর্ত্তা, বলিয়া দ্বারে দ্বারে ভিক্ষা করিতে আরম্ভ করিল। শুনিতে পাওয়া যায়, এইরূপে প্রায় চারি পাঁচ শত টাকা তুলিয়া তাহারা মহাবুমধাম সহকারে গণেশ-জননীর শ্রাদ্ধ করিয়াছিল।

আর একটা কাণ্ড ইহা অপেক্ষাও বিগহিত হইয়াছিল। নশিপুরে জয়রাম বাচস্পতি নামে এক বৃদ্ধ ব্রাহ্মণ ছিলেন। প্রায় এক বৎসর হইল তিনি পরলোকগত হইয়াছেন। পুত্র পৌত্র, কন্যা, দৌহিত্রে তাঁহার ঘর পরিপূর্ণ, তথাপি ৬৫ বৎসর বয়সে যখন তাঁহার গৃহ শূন্য হইল, তখন বৃদ্ধ পুনরায় দারপরিগ্রহ করিবার জন্ত বাস্ত হইয়া উঠিলেন। ইহা তাঁহার একটা বাতিকেব মধ্যে দাঁড়াইল। বাহাকে নিকটে পান তাহারই সহিত গম্ভীর ভাবে এই আলোচনাতে প্রবৃত্ত হন; “তুমি বল ত বাপু! গৃহের একজন কর্ত্তা না থাকিলে কি গৃহের শৃঙ্খলা থাকে?” লোকে বলে,—হাঁ তা বৈ কি?” ক্রমে সমস্ত গ্রামে ইহা একটা কোতূকের ব্যাপার হইয়া উঠিল। বাচস্পতি মহাশয় যখন পথ দিয়া যাইতেন, গ্রামের বালকবালিকাগণ করতালি দিয়া বলিত—“বিষে পাগলা বুড়ো বর, বিশের মাকে বিষে কর।” বিশের মা একজন কৈবর্ত্তজাতীয়া বৃদ্ধা স্ত্রীলোক, তাহার একটা চক্ষু নাই ও এক পায়ে গোদ। বাচস্পতি মহাশয় এই কথা শুনিলেই ক্রুদ্ধ হইয়া শিশুদিগকে প্রহার করিবার জন্ত ধাবিত হইতেন। তাহাদের

সহিত দৌড়িয়া পারিবেন কেন, তাহারা হরিণশিশুর ত্রায় লক্ষ দিয়া কোথায় পলাইয়া যাইত। একবার এই নিষ্কর্মা যুবকদল মনে করিল, যে বৃদ্ধ বাচস্পতিকে প্রতারণা করিয়া একটা ভোজ আদায় করিবে। ইহাদের একজন ঘটক সাজিয়া গম্ভীরভাবে বাচস্পতি মহাশয়কে বলিল— “ঠাকুর দা, লক্ষ্মীছাড়ারা আপনাকে নিয়ে তামাসা ঠাট্টা করে, আমি কিন্তু আপনার জন্ত একটা কনে দেখে এসেছি।” বাচস্পতি অমনি তন্ময়ন্ব। ক্রমে প্রকাশ পাইল, যে কন্যাটি পার্শ্বের এক গ্রামে আছে, তাহার পিতা মাতা নাই; ভাই বিবাহ দিতে স্বীকৃত হইয়াছে; সমুদায় ঠিক; কেবল দিন স্থির করিলেই হয়। বৃদ্ধ বাচস্পতির সহিত এই বন্দোবস্ত হইল, যে বিবাহ-যাত্রার পূর্বদিনে তাহাদিগকে ভোর দম লুচি সন্দেশ খাওয়াইবেন। তদনুসারে দিন স্থির হইয়া তৎপূর্বদিন যুবকদল উত্তমরূপ ভোজের আমোদ করিল। পরদিন বর লইয়া বিবাহ দিতে গেল। গ্রামের লোকে মনে করিল, সত্য সত্যই বৃদ্ধি বিবাহ দিয়া আনিতে যাইতেছে। ও দিকে সে গ্রামের একজন যুবকের সহিত ঠিক করিয়া রাখিয়াছে যে, তাহাদের ঘরে বিবাহের আসর করিয়া রাখিবে এবং একটা বালককে স্ত্রীলোকের কাপড় পরাইয়া কন্যা সাজাইয়া রাখিবে। সেই কন্যার সহিত যথাসময়ে বিবাহ হইয়া যাইবে। তৎপরে শয়ন-গৃহে একটা খড় ও মূর্নিস্থিত কন্যামূর্তি শয্যাতে শয়ান রাখা হইবে। ঐ মূর্তির মস্তক ও দুই বাহু লৌহের তারের দ্বারা পার্শ্ববর্তী গৃহের সহিত সংযুক্ত থাকিবে। বৃদ্ধ ব্রাহ্মণ যেই শয্যাতে গিয়া বসিবেন, অমনি মৃন্ময়ী কন্যা উঠিয়া দুই বাহু বিস্তার করিয়া নাচিতে আরম্ভ করিবে। পীরামর্শ মত সমুদায় বন্দোবস্ত হইয়াছিল। যথাসময়ে পুরোহিত আসিল; কন্যা আসিল; এবং কন্যার ভ্রাতা কন্যাকর্তা হইয়া বিবাহ দিল। বৃদ্ধ ব্রাহ্মণ বাসর ঘরে গিয়া যেই বসিলেন, অমনি শয্যাতে শয়ান মৃন্ময়ী কন্যা উঠিয়া

দুই বাছ প্রসারিত করিয়া শয্যার উপরেই নাচিতে আরম্ভ করিল। ইহাতে বৃদ্ধ ব্রাহ্মণ অতিশয় ভয় পাইয়াছিলেন। তিনি চীৎকার করিয়া দ্বার খুলিয়া কাঁপিতে কাঁপিতে বাহিরে আসিয়া পড়িলেন। আসিয়া দেখেন, যুবকদল করতালি দিয়া হাসিতেছে। তখন বুঝিলেন, যে সমুদায় প্রবঞ্চনা। তর্কভূষণ মহাশয় এষ্ট সংবাদ শুনিয়া যুবকদিগকে ডাকিয়া অনেক তিরস্কার করিয়াছিলেন। ইহাদের পরোপকারপ্রবৃত্তির গুণে, গ্রামের লোকে এরূপ অনেক উপদ্রব সহ করিয়া থাকে।

ইহাদের আর একটা কীর্তির কথা বলিতে হইতেছে। ইহাদের সকলগুলিই ঔদরিক ও ভোজন-পটু। ইহারা একবার চৌদ্দ পনের জনে একত্র হইয়া কোনও স্থানে নিমন্ত্রণে গিয়াছিল। সেখানে পূর্ণদাত্রায় চর্ক্যা, চোষা, লেহা, পেয়, সর্ববিধ আহারের পর পনের জনে প্রায় বিশ সের মিঠাই খাইয়াছিল; তদবধি গ্রামের লোক ইহাদিগকে হাঁসের দল বলিত। ইহারা সেই নাম মঞ্জুর করিয়া লইয়াছে। একজন ইংরাজীশিক্ষিত যুবকের পরামর্শে, আপনাদের মধ্যে ঔদরিকতা ও ভোজন-পটুত্ব বিষয়ে সর্বগ্রগণ্য ব্যক্তিকে “সোয়ান” নাম দিয়াছে। সোয়ান পক্ষী রাজহংস অপেক্ষা সুন্দর ও বলবান; সুতরাং সোয়ান ইহাদের দলপতি। যেখানেই নিমন্ত্রণ হউক না কেন, সকলে যাউক আর না যাউক, সোয়ানকে যাইতেই হয়। ইহাদের নিয়ম এই, সকলগুলি একসঙ্গে আহার করিতে বসে; নিমন্ত্রণকর্তাকে সেরূপ বন্দোবস্ত করিতেই হয়। আহারে বসিবার পূর্বে “সোয়ান” দাক্ষিণহস্ত হংস মুখাকৃতি ও উর্দ্ধে উৎক্ষিপ্ত করিয়া, মুখে হংসের ছায়া শব্দ করে। তাহাই ইহাদের আহ্বানধ্বনি। ভিড়ের মধ্যে যে যেখানে থাকুক, সোয়ানের ডাক শুনিলেই তৎক্ষণাৎ সকলে সমবেত হয় ও আহারে বসে। সোয়ানের নিম্নে দুই শ্রেণী আছে;—এক রাজহংস, অপর পাতিহাঁস। যাহারা



ভোজন-শক্তিতে নিকৃষ্ট, তাহারাই পাতিহাঁস। আহারে সুদক্ষ বলিয়া একবৎসর হইল ইহারা গোবিন্দকে দলে ভর্তি করিয়া পাতিহাঁস করিয়া রাখিয়াছে। ইহাদের মেঘর হইতে হইলে দুইটী মাত্র গুণের প্রয়োজন; স্বভাবচরিত্র ভাল হওয়া চাই এবং ভোজনে পটুতা চাই। গোবিন্দের সে উভয় গুণই আছে।

এতদ্বিন্ন ইহাদের রাজহংসের দলে একটী বিশেষ বান্ধি আছে, তাঁহার কক্ষিৎ পরিচয় দেওয়া আবশ্যক। তাঁহার নাম “তাওক” বা “অষ্টাবক্র”। সকলে হয়ত ভাবিতেছেন, এ আবার কিরূপ নাম? ভিতরকার কথাটা এই, ইহার নাম তারক। তারকের জন্মগত কিছু বৈশিষ্ট্য আছে। তাহার বুদ্ধিযোগ অতি অল্প। জন্মাবধি অঙ্গসন্ধির একরূপ শিথিলতা, যে তারক সোজা হইয়া ভাল করিয়া হাঁটিতে পারে না। হাঁটিতে গেলেই ভাসিয়া চুরিয়া, দেহটা এক প্রকার হইয়া যায়। এজন্য গ্রামের অনেক লোকে তাহাকে অষ্টাবক্র বলে। এতদ্বিন্ন তারকের কথা কহিতে গেলে লাল পড়ে, ও সকল কথা ভাল উচ্চারণ হয় না। কেহ তাহার নাম জিজ্ঞাসা করিলে বলে, “তাওক”। এজন্য যুবকদল তাহাকে “তাওক” বলিয়া ডাকিয়া থাকে। তাওক কি গুণে ইহাদের দলে আসিল? কেবল ভোজনশক্তির গুণে। তাওকের কুক্ষিটী যেমন সুদীর্ঘ, তেমনি সুবিশাল; সুতরাং অনেক দ্রব্য তাহাতে ধরে। এই কারণে যুবকদল তাহাকে হাঁসের দলে ভর্তি করিয়া লইয়াছে। কেবল তাহা নহে, এক বৎসরের মধ্যে রাজহংসের দলে প্রোমোশন দিয়াছে। তাওকের বুদ্ধিযোগ যে অত্যল্প, সেটী তাহার পৈতৃক সদগুণ। তাহার পিতা নবকান্ত রায় বুদ্ধিমত্তাগুণে গ্রামে প্রসিদ্ধ ছিলেন। তাঁহার বুদ্ধিমত্তার নিদর্শন স্বরূপ অনেক গল্প গ্রামে প্রচলিত আছে। একবার নাকি নবকান্তের জননী তাঁহাকে বাজার করিবার জন্ত পয়সা দিয়াছিলেন।

এক হাতে মাছের পয়সা, অপর হাতে তরকারির পয়সা দিয়া, উত্তমরূপে বুঝাইয়া দিলেন, কি কত আনিতে হইবে। সর্বশেষে বলিয়া দিলেন, “মাছ ও তরকারি আলাদা করিয়া আনিও, মিশাইও না।” নবকান্ত বিজ্ঞতাসূচক গ্রীবাসঞ্চালন দ্বারা জানাইলেন, যে এত বলিয়া দেওয়া নিশ্চয়োজ্ঞ। কিন্তু কিয়ৎক্ষণ পরেই পথ হইতে ফিরিয়া আসিলেন। মহা বিপদ উপস্থিত! আস পয়সা ও নিরামিষ পয়সা মিশিয়া গিয়াছে! অর্থাৎ দুই হাতের পয়সা ভুলক্রমে এক হাতে হইয়া গিয়াছে। আর একবার বাড়ীতে একটা অনুষ্ঠানের সময় লোকাভাবনিবন্ধন নবকান্তের হাতে একটা টাকা দিয়া, তাঁহার পিতা বলিয়া দিলেন, “প্রথম হাতে তরিতরকারি ভাল পাওয়া যায়; শীঘ্র যাও, প্রথম হাতে ভাল তরিতরকারি যাহা দেখিবে, এক টাকার কিনিয়া আনিবে।” তাঁহার প্রতি যে এতটা বিশ্বাস স্থাপন করা হইল, ইহাতে সাতিশয় প্রীত হইয়া, নবকান্ত দুই হাত ছলাইয়া বাজারে চলিলেন; মনে মনে আশা করিয়া গেলেন, বিশ্বাসের উপযুক্ত কাজ সেদিন নিশ্চয় করিবেন। গিয়াই দেখেন, কুমারেরা এক বাজরা কলিকা নামাইয়াছে। অমনি প্রথম হাটের জিনিষ সেই এক বাজরা কলিকা ক্রয় করিয়া বাড়ীতে আসিলেন। পিতা দেখিয়া বলিলেন,—“হাঁ আবাগের বেটা ভূত! তরিতরকারি বলতে কি কল্কে বুঝায়?”

“তাওক” সেই বুদ্ধিমানের সন্তান, স্মৃতরাং তাহার বুদ্ধির প্রার্থনা তদনুরূপ হইবারই কথা। তাওকের বুদ্ধিতে কতদূর হয়, তাহার কিন্তু পরীক্ষা হইল না। কেহ কখনও তাহাকে লেখা পড়া শিখাইবার চেষ্টা করে নাই; করিলে শিথিতে পারিত কিনা, বলিতে পারি না। অনুমানে বোধ হয়, শিথিলেও শিথিতে পারিত; কারণ, এই যুবক মলের একজন তাওককে অনেক কষ্টে “ক” লিখিতে শিখাইয়াছে। সে গৌরবে

তাড়কের পা মাটিতে পড়ে না। কেহ তাকে “ক” লিখিতে বলিলেই দৌড়িয়া একথানা কয়লা কি একটা কিছু আনিয়া মৃত্তিকার উপরে প্রকাণ্ড এক “ক” লিখিয়া দেখায়; নিতান্ত যদি কয়লা কি অল্প কিছু না পায়, অঞ্জুরির অগ্রভাগ দ্বারা আকাশে “ক” লিখিতে আরম্ভ করে।

যাহা হউক, এই হাঁসের দল বর্তমান আষাঢ় মাসে ভূপেন্দ্রনাথ রায় নামক তাহাদের সঙ্গী একজন যুবকের বিবাহে বরযাত্র হইয়া কলিকাতায় বাহিতেছে। রথের পূর্বদিন বিবাহ হইবে। ইহাদের পরামর্শ এই যে, ইহারা বিবাহের পরদিন কলিকাতাতে রথ দেখিবে, তৎপর দিন কাছাকাটে বাহিবে, তৎপরে কয়েকদিন সহর দেখিয়া, উল্টা রথের সময় নাভেশের রথ দেখিয়া গ্রামে ফিরিবে। উত্তম আহার ও আমোদ করা ইহাদের কলিকাতা যাত্রার উদ্দেশ্য; স্মরণ্য তাড়কে সঙ্গে লইয়াছে। গোবিন্দ, শিবচন্দ্রের হাতিবাগানের বাণী হইতে আসিয়া ইহাদের সঙ্গে যুটিয়াছে। তাড়কে দেখিয়া সে বালিয়াছে, —“অষ্টাবক্রকে আনা ভাল হয় না; বিদেশে বড় বিদ্রাট ঘটবে।” কিন্তু তখন আর বালিয়া কি হইবে? যুবকদল হাসিয়া তাহার কথা উড়াইয়া দিল; কিন্তু গোবিন্দের মনে একটু ভয় রাহল।

যথাসময়ে বিবাহসভায় বর ও বরযাত্রগণ উপস্থিত। হাঁসের দলের যুবকগণ অল্প সময়ের মধ্যেই বুঝিতে পারিল, যে সহরের যুবকাদিগের সহিত বাগ্‌যুদ্ধে ও রাসিকতাতে হয়লাভ করা তাহাদের পক্ষে সহজ নহে। সহরের যুবকগণ সকলেই ইংরাজীতে আভিজ্ঞ, দুই কথাতে পরাস্ত করিয়া দিবে। বেগতিক দেখিয়া হাঁসের দলের ইংরাজ-ভাষানাভিজ্ঞ যুবকগণ আর আসরে বসিল না; ইতস্ততঃ বিচরণ করিতে লাগিল। কেবল ইংরাজী শিক্ষিত কয়েকজন সহরের যুবকাদিগের সহিত বাগ্‌যুদ্ধে প্রবৃত্ত হইল। কিন্তু “তাড়ক” অকুতোভয়! সে সভামধ্যে গম্ভীর

ভাবে বসিয়াছে। অবশেষে কত্য়াপক্ষীয় একটি যুবক তাহার নিকট উপস্থিত।

প্রশ্ন। আপনি কি বরযাত্র ?

তাওক। আমি বয় নয়, যুপেন বয়।

বেচার। তাওক বরযাত্র শব্দের অর্থ বর ভাবিয়াছে ; স্মৃতরাং প্রকৃত উত্তরই দিয়াছে। বরং এই বলিয়া তাহার বুদ্ধির প্রশংসা করিতে হয়, যে তাহার এতটুকু জ্ঞানও আছে যে ভুপেন সেদিনকার বর। কত্য়াবাদীগণের সাধা কি, সহসা তাওকের উত্তরের অর্থ গ্রহণ করে। আবার প্রশ্ন—“আপনার নাম কি ?”

তাওক। আমা নাম তাওক।

এই কথা বলিতে এক বলক লাল পড়িয়া গেল। কত্য়াপক্ষীয় যুবকটি এই উত্তর শুনিয়া, হাসিয়া সঙ্গিগণকে ডাকিয়া বলিল,—“ওরে ভাই এদিকে আর এখানে এক চাঁজ পাওয়া গেছে।” অমনি সকলে দৌড়িয়া সেখানে উপস্থিত হইল। পুনরায় প্রশ্ন—“আপনার কে আছে ?” তাওক উত্তর দিল, “আমা গউ আছে।”

এ কথাটারও টীকার প্রয়োজন। নশপুরের বাড়ীতে তাওক সমস্ত দিন কি করে ? তাহার একটি গরু আছে ; সমস্ত দিন সেই গরুটি গাইয়া থাকে। কখনও নাড়িয়া বাধিতেছে ; কখনও গোয়ালে গইয়া থাকিতেছে ; কখনও খড় কাটিতেছে ; কখনও খোল ভিজাইতেছে ; সমস্ত দিন অল্প কর্ম্য নাই। বাস্তবিক গরুটি তাহার যেক্রপ প্রিয়, তাহাতে জগতের মধ্যে তাহার আপনার লোক “গউ আছে” এ কথা বলা অত্যাশ্চর্য্য হয় নাই।

পুনরায় প্রশ্ন—“আপনি লেখা পড়া করেছেন ?”

তাওক। আমি “ক” নিক্তে পাই। (পুনরায় লাল পতন)।

এই বলিয়া তাওক শূন্যে অঙ্গুলির অগ্রভাগ দ্বারা “ক” লিখিতে আরম্ভ করিল। ইহা দর্শন করিয়া সহরের যুবকগণ করতালি দিয়া অটুটাস্ত করিতে লাগিল।

গোবিন্দ আসরের দূরে দূরে ভ্রমণ করিতেছিল, এই হান্তধ্বনিতে তাহার দৃষ্টি তাওকের দিকে আকৃষ্ট হইল। সে তৎক্ষণাৎ নিকটস্থ হইয়া বলিল—“মহাশয় আপনারা ওকে ছেড়ে দিন, একটু দরকার আছে;” এই বলিয়া তাওকের হাতে ধরিয়া আকর্ষণ করিতে লাগিল। তাওক কি যাইতে চায়! তাহার তখন “ক” লিখিবার ঝোঁক হইয়াছে; বিজ্ঞাটা না দেখাইয়া সে উঠিতে চায় না। গোবিন্দ তাহাকে বলপূর্বক আকর্ষণ করিয়া বাহিরে লইয়া গেল, এবং আহারের পাত হওয়া পর্য্যন্ত সমগ্র সময় বাহিরে বাহিরে দূরিতে লাগিল।

ক্রমে আহারের সময় উপস্থিত। ছাতের উপরে আটচালা বাঁধিয়া আহারের স্থান হইয়াছে। হংসগণ “সোয়ানের” আস্থানানুসারে ছাতের উপরে উপস্থিত। তাহাদের নিয়ম ছিল, সকলগুলি একত্রে বসিবে; বরকর্তা সেইরূপ বন্দোবস্ত করিয়া দিলেন। মহোৎসাহে আহার চলিল। সে বাড়ীর পুত্রদিগের নাম, বক্ষিমচন্দ্র, জনজিৎলাল, চিরঞ্জীব ইত্যাদি গৃহস্থামী বার বার পুত্রদিগকে ডাকিতেছেন,—“বক্ষিম, জজিৎ, চিরঞ্জীব—এদিকে এস।” হাঁসের দলের একটা যুবক বলিয়া উঠিল;—“ওহে ভাই! এ যে দেখি পিকিন, গানাকিন, ক্যান্টন।” ইহাতে ভোজনকারীদিগের মধ্যে একটা হাস্যের রোল উঠিল। কল্যাকর্তা প্রবীণ লোক, যুবকদিগের এ প্রকার ব্যবহারে কিঞ্চিৎ অপদস্থ হইয়া বলিলেন,—“এ ছেলেগুলি বৃদ্ধি বরষাত্র? বাঃ বেশ তৈয়ারি ছেলে ত। ভদ্রলোকের ছেলের এমন ইতরের মত ব্যবহার কেন?” এই কথা বলিয়া তিনি অন্তদিকে গমন করিলেন। গোবিন্দ নগ্নদিগের এই ব্যবহারে

নিভান্ত বিরক্ত হইয়া বলিল,—“তোমরা অতি অসৎ; উনি অতি প্রবীণ লোক, বরসে বাপের বড়; উহার প্রতি এই ব্যবহার কর্ত্তে লজ্জা হলো না? যেমন কর্ম্ম তেমন ফল, বেশ হয়েছে, মুখের মত জুতো পেয়েছ; এমন জানলে আমি তোমাদের সঙ্গে যুটতাম না।” ইহার পরে যুবকদল কণ্ঠাকর্ত্তার প্রতি ক্রোধ করিয়া ক্ষতি করিবার মানসে আর এক ব্যাপার আরম্ভ করিল। পাত হইতে লুচি মিঠাই তুলিয়া পশ্চাৎদিকে ছাত হইতে নীচে ফেলিয়া দিতে লাগিল। তাহা লইয়া গোবিন্দের সহিত ঘোরতর বিবাদ হইল। অবশেষে কেহ লুচি কি মিঠাই দিতে আসিলেই গোবিন্দ বলে,—“আর লুচি মিঠাই দিবেন না। গুঁরা ছাত হ’তে পিছনে সমুদায় ফেলে দিচ্ছেন।” সঙ্গী যুবকগণ গোবিন্দকে সমুচিত শিক্ষা দিবে বলিয়া শাসাইল; গোবিন্দ তাহা গ্রাহ্যই করিল না।

পরদিন রথযাত্রার দিন। প্রাতে আহারের সময় আবার একটা কাণ্ড হইয়া গেল। গোবিন্দ ‘তারক’কে নিজের পার্শ্বে লইয়া বসিয়াছে; কি জানি কেহবা বিরক্ত করে। নির্ঝিল্লি আহার চলিয়াছে। যখন মৎস্ত আসিতেছে, তখন অপর পার্শ্বের একটা যুবক তাণ্ডকের কাণে কাণে বলিল,—“তাওক, তুই মাছ খাস্নি। তোর খুকীর জ্বর দেখে এসেছি; তোর খুকীর জ্বর হ’লে কি তোর বো মাছ খায়?” তাণ্ডক মন্তক সঞ্চালন দ্বারা জানাইল, খায় না। যুবকটা বলিল,—“তবে তুইও মাছ খাস্নি।” তারকের দুর্ব্বল মস্তকের মধ্যে এই একটা নূতন কথা প্রবেশ করিল। তাহার বুকি থাক, বা না থাক, একটা খুকী আছে। সে অনেকবার নিজ পত্নীকে কণ্ঠার পীড়ার সময় মৎস্ত আহার পরিত্যাগ করিতে দেখিয়াছে; কিন্তু এ বিষয়ে যে তাহার কোনও বাধ্যতা আছে, সে কথা কখনও তাহার মনে উদয় হয় নাই। এখন সহজ ভাবেই বুঝিল বো যখন খায় না, তখন আমারও খাওয়া

উচিত নয়। গোবিন্দ এ কথোপকথনের মর্ম্ম কিছুই বুঝিতে পারিল না। তৎপরে যখন মংস্ত্র উপস্থিত, তারক কোনক্রমেই মংস্ত্র লইবে না। কারণ জিজ্ঞাসা করাতে বলিল,—“খুকী বালসেচে।” “সোয়ান” বলিলেন,—“খুকী বালসেছে তা তোর কি? তুই মাছ খা।” তারক বলিল,—“বো কায় না।” তখন ভোজের স্থল অটুতান্ত্রের ধ্বনিতে ফাটিয়া বাইতে লাগিল। কেহ কেহ বলিতে লাগিল, “ওমা, এমন মান্বষেরও আবার খুকী আছে; কোন্ মেয়ের কপাল পুড়িয়েছে?” গোবিন্দ তাওকের কাণে কাণে অনেক বুঝাইল, তারক কোনক্রমেই মাছ খাইল না। অবশেষে গোবিন্দ অপর পার্শ্বস্থিত যুবকটাকে অনেক তিরস্কার করিতে লাগিল; এবং তৎপর দিনটী তারককে লইয়া গ্রামে ফিরিবার ভয় দেখাইল।

সন্ধ্যার সময়ে হাঁসের দল রথ দোখিবার জন্ত কলিকাতার রাজপথে বাতির হইল। তারক সঙ্গে আছে। গোবিন্দ তারককে বলিয়াছে,—“তাওক আনার চাদর ধরে থাকিস্, যেন ছাড়িসনে।” তারক তদনুসারে গোবিন্দের চাদর ধরিয়া পশ্চাতে পশ্চাতে যাইতেছে। ইতিমধ্যে মাড়োদের রূপার রথ উপস্থিত। সে রথ দোখিয়া কি আর তারক চাদর ধরিয়া থাকিতে পারে? কখন যে গোবিন্দের চাদর ছাড়িয়া দিয়া রূপার রথের সঙ্গে সঙ্গে গিয়াছে, তাহা কেহ জানিতেও পারে নাই। বজ্রবাজারের চৌরাস্তার নিকটে গিয়া গোবিন্দ দেখিল, তারক পশ্চাতে নাই। একি সর্ব্বনাশ! তাওক, তাওক! অষ্টাবক্র, অষ্টাবক্র! ভিড়ের মধ্যে কত ডাকাডাকি হইল; উত্তর নাই। উত্তর দিবে কে? তারক নিরুদ্দেশ হইয়া চলিয়া গিয়াছে। কি করা যায়, গোবিন্দ ভাবিয়া আকুল। সঙ্গিগণ বিরক্ত হইয়া বলিল,—“মরুক বেটা বোকারাম, যেমন কর্ম্ম তেমন ফল। চাদর ছেড়ে দিয়ে গেল কেন?”

গোবিন্দ। আমি ত ঐ জুই বলেছিলাম, ওকে আনা ভাল হয় নাই। এখন কি করা যায়?

প্রথম যুবক। কি আর করা যাবে? এ ভিড়ে কোথায় খোঁজা যাবে? যেখানে যাক, পুলিশের হাতে পড়বেই, কাল খবর পাওয়া যাবে।

গোবিন্দ। সে কি হয়? এমন করে কি ফেলে যাওয়া যেতে পারে? সে কিছু বলতেই পারবে না, মহাবিপদে পড়বে।

দ্বিতীয় যুবক। একেবারে যে কিছু বলতে পারবে না, তা নয়; বিবাহ বাড়ীর ঠিকানাটা বললেও বলতে পারে।

গোবিন্দ। হাঁ, সে আবার ঠিকানা বলবে।

প্রথম যুবক। তবে তুমি কি করতে চাও?

গোবিন্দ। একবার খুঁজতে হচ্ছে।

দ্বিতীয় যুবক। কোথায় খুঁজবে?

গোবিন্দ। আমার নিশ্চয় বোধ হচ্ছে, সেই রূপার রথখানার সঙ্গে সঙ্গে গিয়েছে। সেখানে কোন্ দিকে গেল, একবার দেখতে হচ্ছে।

প্রথম যুবক। সে রথ কাদের তা কি ক'রে জানবে?

গোবিন্দ। সহরের লোক কি বলে দিতে পারবে না? তোমরা বাসাতে যাও। আমি তার অব্যেথেষ্টে চলেলাম।

গোবিন্দ যদি চলিল, তবে আর একটা যুবকও তাহার সঙ্গে লইল। দুইজনে লোকের নিকট জিজ্ঞাসা করিতে করিতে জানবাজারে রাণী রাসমণির বাড়ীর অভিমুখে চলিল।

ওদিকে তারক রূপার রথের সঙ্গে সঙ্গে রাসমণির প্রাঙ্গণে উপস্থিত। তাহার অদ্ভুত গতি ও বিচিত্র ভাব দেখিয়া এক দল লোক তাহার চতুর্দিকে ঘিরিয়াছে। যতই প্রশ্ন করিতেছে, ততই হাস্তের তরঙ্গ উঠিতেছে;



কোনও প্রশ্নের উত্তর বুঝিবার যো নাই। প্রশ্ন—তুমি কে? উত্তর—  
আমি তাওক।

প্রশ্ন। তোমাদের বাড়ী কোথা?

উত্তর। বেণীদেব পুকুএ দাঁএ। (লাল পতন)।

বেচারী সত্য কথাই বলিয়াছে। নশিপু্রে বেণী নামক একটা  
সমবয়স্ক যুবকের পুকুরের ধারে তাহাদের বাড়ী।

প্রশ্ন। কোন্ গ্রামে?

উত্তর। আমাদের গাঁয়ে। (লাল পতন)।

প্রশ্ন। সহরে কেন এসেছ?

উত্তর। বুপেন বয়, বিয়ে কএচে।

এটাও বেচারী ঠিক বলিয়াছে। তাহার ইহা স্মরণ আছে যে, ভূপেন  
বরের সহিত কলিকাতায় আসিয়াছে। ইহার অধিক আর সে কি  
বলিতে পারে?

এইরূপ কথোপকথন ও অটুহাস চলিয়াছে, এমন সময় গোবিন্দ ও  
সঙ্গী যুবকটী আসিয়া উপস্থিত হইল। তাহারা তারককে সেই বিপদ হইতে  
মুক্ত করিয়া লইয়া গেল। পরদিন প্রাতে গোবিন্দ তারককে হাতিবাগানের  
বাসাতে লইয়া গেল, এবং যথাসময়ে নশিপু্রে প্রেরণ কারিল।

## সপ্তম পরিচ্ছেদ

একদিকে বর্ষার শেষ হইয়া শারদ-আকাশ যেমন প্রসন্ন মূর্তি ধারণ করিল, অপর দিকে শারদীয় উৎসবের আয়োজন হইতে লাগিল। এবারে ভুবনেশ্বরীর বিবাহে অনেক ব্যয় হইয়া যাওয়াতে তর্কভূষণ মহাশয়কে পূজার ব্যাপারটাতে অত্যান্ত বৎসরের তুলনায় কিঞ্চিৎ ব্যয়সংক্ষেপ করিয়া চলিতে হইতেছে। কিন্তু তাহা বলিয়া কোনও অঙ্গের হানি হয় নাই। নিষ্ঠা এমনি একটা জিনিষ, ইহা যাহাকে স্পর্শ করে, তাহাকেই সুন্দর করে; ইহাতে মানবের কার্যের মধ্যে এমন এক আশ্চর্য্য প্রভাব উৎপন্ন করে, যাহা লোকের হৃদয়মনকে মুগ্ধ করিয়া সমুদায় কার্য্যকে সুশৃঙ্খল ও সুদম্পন্ন করিয়া দেয়। তর্কভূষণ মহাশয়ের তায় নিষ্ঠাবান্ আন্তরিক শাক্তের ভবনে ছুর্গোৎসব বর্দি সুচারুরূপে সম্পন্ন না হয়, তবে কোথায় হইবে? পূজার এক মাস পূর্ব্ব হইতেই পটুয়াগণ দেবা-মূর্তি গড়িতে আরম্ভ করিল। দিন দিন একটু একটু করিয়া অগ্রসর হইতে লাগিল, আর পাড়ার বালক বালিকাদিগের দেখিবার একটা জিনিষ হইল। এদিকে বিজয়ার ভাঁড়ারে পূজার উপকরণসামগ্রী সকল সংগৃহীত হইতে লাগিল। ক্রমে পূজা উপস্থিত। আশ্বিনের শুক্ল প্রতিপদ হইতে পূজার বোধন বসিল। তর্কভূষণ মহাশয় অগ্রেই পাড়ার একজন অনুগত নিষ্ঠাবান্ ব্রাহ্মণকে পূজার ভার দিয়াছিলেন; মনের কথা এই দরিদ্র ব্রাহ্মণ দক্ষিণাদি হিসাবে কিছু পাউক। শঙ্কর নিজে তত্ত্বধারকতা করিতে গাগিলেন। তর্কভূষণ মহাশয় বিশেষ কিছু করিলেন না, কিন্তু সকলই করিলেন! তিনি পূজার কন্নাদন পূজক ও তত্ত্বধারকদিগের সঙ্গে সমস্ত

দিন উপবাসী রহিলেন। পরিধানে একখানি শুভ্রবর্ণ গরদ, গলে কুদ্রাক্ষের মালা, গাত্রে নামাবলী, ভক্তিতে উজ্জ্বল মুখ, উৎসাহে ও মানবপ্রীতিতে উজ্জ্বল চক্ষুদ্বয়, সে কয়দিন সে আকৃতি কি অপূর্ণ ভাবই ধারণ করিল! যে হৃদয়ে পবিত্রতা ও নিঃস্বার্থতা আছে, তাহাতে ভক্তির আবির্ভাব হইলে কি সুন্দরই দেখায়! এই কয় দিন তর্কভূষণ মহাশয় অতি প্রত্যুষে উঠিয়া স্নানাহ্নিক সারিয়া লইতেন। তৎপরে সেই শুভ্রবর্ণ গরদখানি পরিয়া ও নামাবলীখানি গায়ে দিয়া সমুদায় কার্যের মধ্যে অবতীর্ণ হইতেন; ওদিকে বিজয়ার ভাঁড়ার হইতে এদিকে পূজার ক্ষুদ্র ক্ষুদ্র সামগ্রী পর্যাস্ত প্রত্যেক বিষয়ের তত্ত্বাবধান করিতেন; চণ্ডীপাঠের সময় ব্রাহ্মণদিগের সহিত সমবেত হইয়া কয়েক রূপ চণ্ডীপাঠ করিতেন; তৎপরে নৈবেদ্য সমুদায় বিভাগ করিয়া গ্রামস্থ ব্রাহ্মণদিগের ভবনে ভবনে প্রেরণ করা, লোকজন আসিলে আদর অভ্যর্থনা করা, প্রভৃতি কার্যে ব্যাপৃত হইতেন। ঠাকুরদের ভোগ হইয়া গেলে যখন ব্রাহ্মণ-ভোজনের সময় হইত, তখন তিনি আহারস্থানে গিয়া দণ্ডায়মান হইতেন ও প্রত্যেকের পাতের তত্ত্বাবধান করিতেন; ছাত্রগণ তাঁহার আদেশক্রমে পরিবেশন করিত। ব্রাহ্মণ-ভোজন হইয়া গেলে, বাহির বাড়ীর প্রাঙ্গণে চাষা লোকদিগের পাত হইত। তর্কভূষণ মহাশয় তখনও গিয়া দণ্ডায়মান হইতেন ও প্রত্যেক পাতের তত্ত্বাবধান করিতেন। তিনি সর্বদা বলিয়া থাকেন, “আহা, ওদের কেউ বন্ধ করে পাওয়ায় না,” সুতরাং তাঁহার ভবনে চাষালোকদিগের কিরূপ যত্নের সম্ভাবনা, তাহা সহজেই অনুমান করিতে পারেন। তিনি ব্রাহ্মণ কায়স্থ প্রভৃতি ভদ্রলোকদিগকে খাওয়ান অপেক্ষা নিম্নশ্রেণীর লোকদিগকে খাওয়াইয়া বরং অধিক সুখী হন। একপে সমস্ত দিনের পর রাত্রিকালের আরতি শেষ হইলে তবে আহার করিতেন।

আরতির সময় তাঁহার সেই পবিত্র মুখশ্রী ভক্তিতে বিকশিত হইয়া কি ভাব ধারণ করিত, তাহার বর্ণনা হয় না। ধূপ-ধূনার গন্ধে দিক আমোদিত হইয়া যাইতেছে; চণ্ডীমণ্ডপখানি আলোক-মণ্ডিত হইয়া অপূৰ্ণ-শ্রী ধারণ করিয়াছে; প্রতিমার উভয় পার্শ্বে দুইজন ছাত্র ভক্তিসহকারে চামর চুলাইতেছে; আরতির পঞ্চপ্রদীপের আলোকমালা দেবীর নবরাগরঞ্জিত, উজ্জ্বল, চিত্রিত মুখের উপরে পড়িয়া অপূৰ্ণ শ্রী ধারণ করিতেছে; যেন জগদম্বা ভক্তগণের ভক্তি দেওয়া ভাবে গদগদ হইতেছেন। ঢাক, ঢোল, কাড়া, কঁাসর, বঁটা ও শঙ্খের ধ্বনিতে পাড়া কাপিয়া যাইতেছে। সেই ভক্তদলের মধ্যে তর্কভূষণ মহাশয় গলে নামাবলী দিয়া গলবন্ধে ও করযোড়ে দণ্ডায়মান; মুখে শব্দ নাই, নেত্রদ্বয় নিম্নলিখিত; তৎপ্রাপ্ত দিয়া ভক্তি-অশ্রুধারা প্রবাহিত হইতেছে অনেক লোকে সন্ধ্যাকালে আরতি দেখা যত না হউক, তাঁহার সেই প্রেমোজ্জ্বল মুখ দেখিবার জন্য আসিত। অতিথি, অভ্যাগত, চাষাভূষা সকলেই তর্কভূষণ মহাশয়ের আতিথা, সৌজন্ত ও আদর যত্নে আপ্যায়িত হইয়া যাইত।

এইরূপে পূজার বাপার সমাধা হইয়া গেল। ক্রমে বথাসময়ে গ্রামাপূজা এবং জগদ্ধাত্রীপূজাও হইয়া গেল। পৌষমাস সমাগতপ্রায়; হৈমন্তিক ষষ্ঠ বরে আনিবার সময়। চাষার আনিবার দিন, জমিদারের খাজনা পাইবার দিন, মহাজনের ঋণ আদায়ের দিন, বিধবা বেওয়া ছুঁখিনীর ধান ভানিয়া ছুঁ পয়সা উপার্জন করিবার দিন দরিদ্র অনাথা, যে সম্বৎসর ভগ্ন বরে রৌদ্রবৃষ্টি ভোগ করিয়াছে, তাহার বরের চালে খড় দ্বিবার দিন, ছেলেদের পৌষসংক্রান্তির পিঠেপুলির দিন, সকল দিন সন্নিগট হইতেছে। এ বৎসর ঈশ্বর-কৃপায় ফসল অতি উত্তম হইয়াছে। গ্রামে বাহার সহিত সাক্ষাৎ হয়, তাহারই মুখ প্রফুল্ল।

সকলেই বলে, “ভাই এবারে ফসলটা যে হয়েছে, কি আর বলবো?” চাষা-গ্রামে কি বাস্তবতাই লাগিয়াছে! মাঠের দিকে চাও, চক্ষু জুড়াইয়া বাইবে। কোনও ক্ষেত্রে পীতাম্ব সুপরিপক ধাতু সকল চতুর্দিক ব্যাপিয়া রহিয়াছে; কোনও ক্ষেত্রে ধান কাটিয়া রাখিয়াছে; কোনও ক্ষেত্রে কাটা ধান গোছ বাঁধিতেছে; কোনও ক্ষেত্রে চাষারা গান করিতেছে, আর ধান কাটিতেছে; কোথাও বা ধান বহন করিতেছে।

এখন গ্রামে একটি মজুর পাওয়া ভার। সকলেই বলে—“আর মশাই ধান কাটা পড়িয়াছে।” চাষাগ্রামের পাঠশালা বন্ধ, ধানকাটা পড়িয়াছে। অল্পবয়স্ক বালকবালিকারা আবার ক্ষেত্রে কি করিবে? কেন, তাহাদের কি কাজ নাই? বাড়ীর বৃদ্ধাদের সহিত তাহারা কাটা ক্ষেত্রে পরিত্যক্ত ধানের শিশ সমুদায় কুড়াইতেছে। ইন্দুরদিগের সঙ্গে এ বিষয়ে মানুষের বিবাদ। ইন্দুরেরা সমস্ত রাত্রি শিশ বহন করিয়া গর্তের মধ্যে লইয়া যাইতেছে; বালকবালিকারা দিবাভাগে সেই গর্ত খুঁড়িয়া সেই শিশ বাহির করিয়া আনিতেছে। দরিদ্রদের নিকট এক একটি শিশের কি আদর! রাজারা বোধ হয় এত ব্যগ্রতা সহকারে হীরকের খনি খোঁড়ে না। বৃদ্ধারা বালকবালিকাদিগকে বলিতেছে—“দেখিস্, ভাল করে খুঁজিস্; এক একটি শিশ এক একটি নক্ষি।” বাস্তবিক ধাতুর সহিত লক্ষ্মীর কিছু নিকট সম্বন্ধ আছে; পোষমাসে বোধ হয় লক্ষ্মী ধাতু-বাহনে জগতে আসেন; এবার ত আসিয়াছেন; তাহাতে আর সন্দেহ নাই।

এদিকে তর্কভূষণ মহাশয়ের বাড়ীর পশ্চিম দিকের গোলায় প্রাক্‌গণে স্তূপাকার ধান আসিয়া পড়িয়াছে ও প্রতি ঘণ্টাতে আসিতেছে। একদিন প্রাতে তর্কভূষণ মহাশয় ছাত্রদিগকে পড়াইতে বসিবার পূর্বে গোয়ালবাড়ীতে একবার প্রবেশ করিয়াছেন। একটি ভৃত্য কয়েকদিন হইতে পৌড়িত। কল্যাণ মহাশয়ের মুখে প্রকাশ নাই, কিন্তু ভৃত্যগুলিকে অতিশয়

স্নেহ করেন। মাহিনার চাকর, মাহিনা দিলেই তাহার সঙ্গে সম্বন্ধ ফুরাইল, এভাবে তাহাদের প্রতি দৃষ্টি করেন না। তাহারাও মানুষ, তাহাদেরও সুখ দুঃখ আছে, কেবল দারিদ্র্যবশতঃ পরমুখাপেক্ষী, এটী তাঁহার সর্বদা স্মরণ থাকে। এইজন্য তিনি তাহাদিগকে বাড়ীর পরিবারের মধ্যে গণনা করিয়া থাকেন। তাহাদের ঘরগুলি সুপরিস্ফুট ও স্বাস্থ্যকর, আহাৰাদির ক্লেস নাই; একটু অসুখ হইয়াছে জানিতে পারিলেই অমনি তাহার কাজ বন্ধ করিয়া দেন ও পথ্যাদির বন্দোবস্ত করেন। তাহাদের পারিবারিক বিপদ আপদে কর্তা সর্বদাই মুক্তহস্ত। যে ভবেন্দ্ররৌর বিবাহে, ভিন্ন গ্রামের দরিদ্রলোক পারিতুষ্ট হইয়া গিয়াছে, তাহাতে ভৃত্যগণ যে প্রচুর পরিমাণে পারিতোষিক পাইয়াছে, তাহা বলাই নিম্প্রয়োজন। তর্কভূষণ মহাশয় তাহাদের স্ত্রীপুত্রদিগকে আনাইয়া সকলকে নুতন বস্ত্র দিয়াছেন এবং পিতল ও কাঁসার বাসন বিতরণ করিয়াছেন। যেমন কর্তা তেমনি গৃহিণী; ভবেণ যে তাঁহাকে মিছরির কুঁদো বলিয়াছিল, তাহা প্রকৃত কথা। এত প্রেম ও এত মেহ কি বিধাতা নারীহৃদয়ে দিয়াছেন; দাসদাসীগুলির আহাৰ করিবার সময় একটু অতীত হইলেই কর্ত্রী ঠাকুরাণী টিক্‌টিক্‌ করিতে থাকেন,—“ওরে তোরা খা, ওরে তোরা খা।” তখন যদি কেহ তাহাদিগকে কোন কাজ করিতে বলে, তবে তিনি রাগিয়া উঠেন; বলেন—“তোমরা মানুষের মুখের দিকে চাও না, কেবল কাজটাই বোঝ।” সূতরাং এ বাড়ীতে ভৃত্যদিগের কি সুখ তাহা সকলে বুঝিতেই পারিতেছেন।

এই যে ভৃত্যটী পৌড়িত হইয়া পড়িয়া রহিয়াছে, অন্তঃপুর হইতে ঘন ঘন সংবাদ লওয়া হইতেছে; কর্ত্রী এবং বিজয়া অনেকবার আসিয়া দেখিয়া বাইতেছেন। কর্তাও প্রতিদিন ছুইবার দেখিতেছেন। আজ প্রাতে আসিয়া তাহার হাত দেখিয়া তাহার মাথার হাত দিয়া জিজ্ঞাসা

কবিলেন ;—“কেমন রাম কেমন ‘আছ?’” সে বেচারী সমস্ত রাত্রি রোগযাতনায় ছট ফট করিতেছে, নিদ্রা হয় নাই, বড় যাতনা পাইয়াছে ; তাঁহার এই স্নেহ সম্ভাষণ শুনিয়া কাঁদিয়া ফেলিল। কিন্তু চক্ষুজল তিনি দেখিতে না পান, এইজন্ত একটু মুখ ফিরাইয়া বালল, “কতী ! রাত্রে ভাল ঘুম হয় নাই।” তর্কভূষণ মহাশয় বলিলেন, “ঘুম না হবারই কথা, তোমার জ্বর যে বেড়েছে। আজ তোমাকে বাহির বাড়ীর পাশের ঘরে নিয়ে যেতে হবে।” এই বলিয়া বাহিরে আসিয়া মধুকে ডাকিয়া রাম চাকরকে সরাইবার বন্দোবস্ত করিতেছেন, এমন সময় নবোত্তম ভট্টাচার্য্য নামক একজন প্রতিবেশী ব্রাহ্মণ আসিয়া তথায় উপস্থিত হইলেন। তর্কভূষণ মহাশয় বলিলেন,—“এস হে নরু ঠাকুর (নবোত্তম ভট্টাচার্য্য পাড়াতে নরু ঠাকুর বলিয়া প্রসিদ্ধ, তর্কভূষণ মহাশয়ও আমোদ করিয়া তাঁহাকে নরু ঠাকুর বলিয়া ডাকিয়া থাকেন) খপর কি? অনেক দিন যে এদিকে এস নাই।”

নরু ঠাকুর। খপর আর কি, চিমে ঘোষের দৌরাখো গ্রামে বাস করা তার।

তর্কভূষণ। কেন, হয়েছে কি?

নরু ঠাকুর। সে দিন ক’টা ভাঙয়ে পড়ে আমার ছেলেটাকে মেরেছে, শুনেছেন? বেটার এমন অহঙ্কার, ব্রাহ্মণের ছেলের গায়ে হাত তুলে।

তর্কভূষণ। আরে সে কথা এখন রেখে দাও; হাত তোলা ত সামান্য কথা, যে দিন কাল দাড়াচ্ছে, কবে শূদ্রেরা ব্রাহ্মণের মাথায় পা তুলবে, তাই দেখ। হাঁ হাঁ শুনেছি বটে; তোমার ছেলেকে মারলে কেন?

নরু ঠাকুর। আরে মশাই অতি সামান্য কারণ। ছেলেটা তাকে চিমে ঘোষ বন্দোজল বলে, রাগ করে ভাই দুটোকে মারতে জুম দিলে।

তর্কভূষণ। তার নাম ত চিমু, তবে রাগ করে কেন ?

নরু ঠাকুর। আজ্ঞে না, চিমে বললে হবে না। এদিকে ত পাতা-কুড়ুনীর ছেলে, হাতে ছোটো টাকা হয়েছে কিনা, তাই ধরাকে সরা জ্ঞান হচ্ছে। আর এখন চিমু বললে হবে না, শ্রীল শ্রীযুক্ত বাবু কেদারেখর ঘোষ বলতে হবে।

তর্কভূষণ। ( দ্বিষং হস্ত করিয়া ) চিমুটা বুঝি ওর ডাকনাম ?

নরু ঠাকুর। আজ্ঞে হাঁ ; আরে আঁটকুড়ার পুত, তুই আজ হাতে ছোটো টাকা পেয়ে বৃট জুতো পায়ে দিয়ে, টেরি কেটে দাঁড়ালেই কি সেই চিরদিনের চিমে ঘুচে যাবি ?

তর্কভূষণ। যেন সে দিনের কথা মনে হচ্ছে, ওর মা ঐ ছেলে কয়টা নিয়ে অতি দৈন্ত দশায় দিন কাটাতো। যা হোক, কষ্টে সৃষ্টে ছেলে কাটাকে একটু লেখাপড়া শেখালে, ছোটাকা আনতে শিখলো, ভালই হ'ল ; লোকের উপর এত উপদ্রব কেন ? ওদের বাপ হর ঘোষ ত মন্দ লোক ছিল না।

নরু ঠাকুর। সে বেঁচে থাকলে ঘোষ হয় এমনটা হয়ে উঠতো না। নিমন্তক হলেই অনেক দোষ ঘটে। ওদের লেখা পড়ার মুখে ছাই। যেমন চিমে, তেমনি তার ছোটো ভাই, যেন ছোটো অশ্বর। লেখা পড়ার কল ত এই দোখ, বামন দেবতা মানে না ; ছটপাট করে বেড়ায়, যা এ খায়, দেশে যখন আসে, তখন জমিদার বাবুর বড় ছেলে জহরলালের সঙ্গে জুটে মদ খায় ; ও যে কাণ্ডটা করে, তা যদি শোনেন কাণে হাত দিতে হয়।

তর্কভূষণ। এই শুন্তে পাই। রামহরি ( জমিদার বাবুর নাম ) ছেলেটাকে হিন্দু কালেজে না কোথায় পাড়িয়ে কৃত্তী করে এনেছে ; বিষয় কর্ম তাকে বুঝিয়ে দেবে ; তার স্বভাব চরিত্র বুঝি এই ! আর সে



যে ছেলে মানুষ, আমাদের হরের বয়সী হবে, চিমু তার সঙ্গে ইয়ারকী দেয় ?

নরু ঠাকুর। সে লজ্জার কথা বলেন কেন ? বয়সে বাপের বয়সী ; বোধ হয়, পরের ছেলের মাথা খাওয়াতে একটা আমোদ আছে। বৈকালে চিমের দরজা দিয়ে কোনও দিন যদি যান, দেখতে পাবেন জহরলাল এসে ঘুটেছে।

তর্কভূষণ। জহরলাল এখানে এসে বোটে যে ? রামহরির ভয়ে বাড়ীতে ইয়ারকীটা বৃষ্টি ভাল চলে না ?

নরু ঠাকুর। আপনার রামহরিরও মুখে আগুন ; দেখেও দেখে না। সে কি জানে না, তার বাহির বাড়ীর বৈঠকখানায় কি কাণ্ড হয় ?

তর্কভূষণ। জমিদার বাবুদের আশ্রয় পেয়ে বৃষ্টি চিমুর এত প্রতাপ ?

নরু ঠাকুর। তা বৈ কি ? একে হাতে টাকা হয়েছে, তাতে বাবুবা সহায়, এখন হাতে মাথা কাটতে চায়। আরে বাপু টাকা পেয়েছিস্, পায়ের উপর পা দিয়ে বসে থা, কেউ ত আর তোর টাকা কেড়ে খাবে না ; লোকের উপর অত্যাচার কেন ? কেবল যে আমার ছেলেটাকে মেরেছে, তা নয় ; সেদিন একটা মেছুনী স্ত্রীলোককে মাছের দর নিয়ে তকরার করে, এমন মারলে। অপরাধের মধ্যে সে বলেছিল,—“মাছ আর কিনে খেতে হয় না। অমন ঢের ঢের বাবু দেখেছি ; বাও, আমার মাছ দাও, আমি তোমাদের কাছে মাছ বেচব না।” অমনি তার মাছের চুবড়ী উটে ফেলে দিয়ে গলাধাক্কা দিতে দিতে ক’টা ভেয়ে তাকে প্রায় ছ তিন রসি পথ নিয়ে গেল।

তর্কভূষণ। জেলের মেয়েদের মুখটা কিন্তু বড় খারাপ, কিন্তু তা বলে অবলা স্ত্রীলোকের গায়ে হাত তোলা কি উচিত ? সে ত কাপুরুষের কাজ।

নরু ঠাকুর। আরে মশাই, হিঁদুর চামড়া গায়ে থাকলে ত তা বুঝবে। ওদের হিঁদুর চামড়া বদলে গিয়েছে। ওদের মত কাপুরুষ আর ত দেখিনি।

তর্কভূষণ। তাই ত দেখছি। আচ্ছা, চিমু যে হঠাৎ কেঁপে উঠলো? অনেক টাকা কড়ি পাশ্ব বুঝি? কাজটা করে কি? শুন্তে পাই, বেশী লেখা পড়া ত শেখেনি।

নরু ঠাকুর। শুন্তে পাই, পল্টনদের রসদ যোগাবার কাজ পেয়েছে। তাতে নাকি দেদার চুরি। চুরি চামারি ক'রে কিছু টাকা করে আর কি?

তর্কভূষণ। কাজেই, তার ফল লোকের উপর উপদ্রব করা। যেমন বজ্র তার দক্ষিণা ত সেইরূপ হওয়া উচিত।

নরু ঠাকুর। উপদ্রব ব'লে উপদ্রব; বাবু তিন মাসের ছুটি নিয়ে বাড়িতে এসেছেন, বাড়ার মধ্যে ছুটি বর গাঁথাবেন ও বাগানের পাঁচল দেওয়াবেন এই আভিপ্রায়। এসেই বেচারি নবে গোয়ালার এক কাঠা জমি কেড়ে নেবার বোগাড় করেছে। তাকি শুনে নিন?

তর্কভূষণ। হাঁ, শুনেছি, বাগানের পাঁচলের ভিত কাটবার সময় নবের সঙ্গে ঝগড়া হয়েছে; জোরে নাকি নবের জমি বাগানের ভিতর নিয়ে পাঁচলের ভিত ফেলেছে। শঙ্কর নিজে দেখে এসে বলেছে, যে নবের প্রায় এক কাঠা জমি ঘিরে নিয়েছে। নীচ লোকের কি প্রবৃত্তি! এত টাকা পাচ্ছস, না হয় গরিবের এক কাঠা জমি কিনে নে। না বেচতে চায়, না হয় বাগানটা একটু বাকাই হলো। একি অত্যাচার!

নরু ঠাকুর। তেমনই হয়েছে; এই যে আসবার সময় শুনে এলেম নবের মা প্রাতে উঠে উদ্দেশে গালাগালি দিচ্ছে; নির্বংশ করছে। প্রাতঃকালে বেশ স্বস্তিবাচন চলেছে।

তর্কভূষণ। চলবে না! তারা গরিব লোক, আইন আদালত করে এমন সাধ্য নাই, কাজেই গায়ের জালায় গালাগালি করে। মানুষটা অতি নচ্ছার! এদিকে দেখি বেশ ভিজ়ে বেয়ালটীর মত। সেদিন পথে আমাকে চুক করে প্রণামটা করলে। আমি দাঁড়িয়ে ছু চারিটা কথা জিজ্ঞাসা করলাম। শেষে কথায় কথায় ঐ জমির উল্লেখ ক'রে বললাম, “ঈশ্বর ভাল দিন দিয়েছেন, লোকের উপর উপদ্রব করো না; তা হলে ধর্ম্মে সবে না। গরিবের জমিটুকু ছেড়ে দিও।” তখন ত বেশ শিষ্ট শাস্ত লোকের মত বললে—“মশাই যা শুনেছেন তা ঠিক নয়।”

নরু ঠাকুর। চোরা না শোনে ধর্ম্মের কাহিনী; আপনার উপদেশ ও পাষণ্ডের প্রাণে লাগবে কেন?

এইরূপ কথোপকথন হইতেছে, ইতিমধ্যে একজন পাড়ার লোক দোড়িয়া আসিয়া বলিল,—“কর্ত্তী শীগ্গির লোক পাঠিয়ে দিন; চিমে ঘোষ সদলে নব গোয়ালার বাড়ীতে চুকে, নবের মাকে মেরে ফেললে; নবে ঘরে নেই, ধান কাটতে গেছে।”

এই কথা যেন শোনা, অমনি তর্কভূষণ মহাশয়, “শঙ্কর একবার আয় তো” বলিয়া একটা ডাক দিয়া, নবের ঘরের দিকে ছুটিলেন। পশ্চাৎ পশ্চাৎ শঙ্কর, নরু ঠাকুর, ভূতা কয়জন ও ৩৪ জন ছাত্রও ছুটিল। তর্কভূষণ মহাশয় নবের মার প্রাঙ্গণে পদার্পণ করিয়াই দেখেন, চিমে ঘোষ বামহস্তে নবের মার চুলের মুটি ধরিয়া দক্ষিণ হস্তে নিজের পায়ের চটিজুতা লইয়া বলিতেছে,—“হারামজাদি! আর গালাগালি দিবি? বল্ হয়েছে কি না? এখনি জুতিয়ে হাড় গুঁড়ো ক'রে দেব। চিমের দুটা ভ্রাতা যেন দুটা যমদূত! তাদের একজন নবের মার দুই হাত ধরিয়া রাখিয়াছে, ও তাহাকে লাথি মারিতেছে; আর একজন এই অসহায় স্ত্রীলোকের রক্ষার্থ সমাগত এক প্রতিবেশীর সহিত ঠেলাঠেলি করিতেছে। নবের

মা প্রথম আত্মরক্ষার প্রয়াস পাইয়াছিল ; যে হাত ধরিয়াছে তাহাকে দংশন করিবার চেষ্টা করিয়াছিল ; কিন্তু অবশেষে প্রহারে অবসন্ন হইয়া পড়িয়াছে ; এবং “বাবা গো, গেলাম গো ! মলাম গো ! কে কোথা আছ, বাচাও গো !” বলিয়া কাদিতেছে। তর্কভূষণ মহাশয় প্রবেশ করিয়াই সিংহ-বিক্রমে নবের মার চুলের মুটি হইতে চিমের হাত ছাড়াইয়া, তাহাকে এমন এক গলাধাক্কা দিলেন, যে, সে ৪৫ হাত হটিয়া দেয়ালের গায়ে আঘাত প্রাপ্ত হইল। ওদিকে শঙ্কর অপর ভ্রাতাকে এমন সজোরে এক চপেটাঘাত করিয়াছেন যে, সে “বাবা রে গিছি” বলিয়া অন্ধকার দেখিয়া বসিয়া পড়িয়াছে। আর দুইজন ছাত্র তৃতীয় ভ্রাতাকে বলপূর্বক প্রাচীরের সঙ্গে চাপিয়া ধরিয়াছে।

তর্কভূষণ মহাশয় নবের মাকে ধরিয়া দাবাতে তুলিলেন। যেই তাহার হাত ধরিয়া তুলিতে যাইবেন, অমনি তাঁহার হস্তে রুধিরের ধারা পড়িল। জুতার আঘাতে তাহার মস্তক ফুটিয়া গিয়াছে। ইহা দেখিয়া বৃদ্ধ ব্রাহ্মণ ক্রোধে আগুন হইয়া গেলেন ; বলিলেন, “এরা আবার লেখা পড়া শিখেছে ! এরা আবার ভদ্র-সন্তান ! কাপুরুষ ! অসহায়। শ্রীলোকের সঙ্গে এই প্রহার !”

ওদিকে একটা ছোট খাট দাঙ্গা বাধিয়াছে। চিমে ঘোষ তর্কভূষণ মহাশয়ের অর্দ্ধচন্দ্রের ধাক্কাতে প্রথমে একটু হতবুদ্ধি হইয়া গিয়াছিল ; কিন্তু সামলাইয়া, “হতভাগা বেটা বামন, এতবড় আশ্পর্দা, আমার গায়ে হাত,” বলিয়া তাঁহার দিকে অগ্রসর হইবার উপক্রম করিয়াছিল ; কিন্তু অমনি শঙ্করের সিংহ-গর্জ্জন শুনিয়া ও চারিদিকের লোকের, “কি, এত বড় যোগ্যতা ? মার, মার, পুতে ফেল,” প্রভৃতি শব্দ শুনিয়া সে সাহস টুকু অস্তহিত হইয়া গিয়াছে। স্নতবাং পরে শঙ্কর যখন \* আবার অর্দ্ধচন্দ্র দিয়া নবের মায়ের বাড়ী হইতে তাহাকে বাহির করিয়া দিলেন, তখন

আর বড় বিক্রম প্রকাশ করিতে পারিল না। কেবল মুখে বলিল, “আচ্ছা দেখ্‌বো।” শঙ্কর বলিলেন, “দেখিস্।”

ক্রমে কর্তা মহাশয় নবের মাকে স্তম্ভ করিয়া বীথ ভবনে প্রতিনিবৃত্ত হইলেন। আজ প্রাতে ছাত্রদের অনধ্যায় গেল। তর্কভূষণ মহাশয় বাড়ীতে আসিয়া আর কিছুই বলিলেন না; যেন বিশেষ কিছু ঘটে নাই। দৈনিক গৃহকার্য্যে মনোযোগী হইলেন। কেবল মাত্র একবার বলিলেন, —“গুনেছিলাম ওরা লেখা পড়া শিখেছে, এই কি ওদের লেখা পড়া শেখার ফল?” এই বলিয়া তিনি বামা চাকরের পরিচর্যাতে নিবৃত্ত হইলেন। চিমে ঘোষ ও তাহার ভ্রাতৃদ্বয় কয়েক দিন শাসাইয়া বেড়াইতে লাগিল, যে, তর্কভূষণ মহাশয়কে ও তাঁহার পুত্রদ্বয়কে মারিবে। সে কথায় এবাড়ীর কেহ কণপাতও করিলেন না।

নবে গোয়ালী তর্কভূষণ মহাশয়ের নিকটে পরামর্শ জানিতে আসিলে, তিনি বলিলেন, “বাপু! তুমি গরিব মানুষ, তুমি কি আইন আদালত করতে পারবে? শালিসিতে মেটাতে পারলে ভাল হয়; কিন্তু ওরা যে অকাল-কুদ্রাণ্ড, ওরা যে শালিসি গ্রাহ্য করে, এমন বোধ হয় না। কাজেই তোমাকে নালিশ করতে হবে। তা না হলে ওদের অত্যাচার থামবে না। যাও নালিশ কর গিয়ে।” পরামর্শ দিয়াই ভাবিলেন, নালিস করতে যে পরামর্শ দিলেন, তার বার নিব্বাহ কিপ্রকারে হইবে? চিন্তাস্র করিলেন, “খরচ পত্রের কি করবে?”

নবে। তাই ত ভাবনা।

তর্কভূষণ। তোমার মায়ের গহনাপত্র কিছু নেই? তাই বেচে ও ভদ্রলোকের কাছে ভিক্ষে শিক্ষে করে চালাও গে। আমি বাপু, তোমার এ সামান্য মোকদ্দমার খরচ দিতে পার্তাম; কিন্তু তাতে তোমারই অনিষ্ট হবে। ওদের সঙ্গে আমাদের একটা মারামারি হয়েছে,

আবার আদালতে যদি এ কথা প্রকাশ পায়, যে আমরা সমুদায় খরচ পত্র দিয়ে মামলা চালাচ্ছি, তা হলে হাকিমদের ধারণা হবে এটা তোমার মোকদ্দমা নয়, আমাদেরই মোকদ্দমা। সে কথাটা ভাল নয়। তবে দশজন ভদ্রলোকে যেমন সাহায্য করবেন, তেমনি আমরাও সাহায্য করবো ; তাতে কোন কথা হবে না।

ক্রমে ফৌজদারী আদালতে প্রথমে বাড়ী চড়াও হইয়া মারপিটের মোকদ্দমা উঠিল। চিমে ঘোষ কয়েক দিন বলিয়া বেড়াইল, যে তর্কভূষণ মহাশয়ের নামে ফৌজদারিতে মারপিটের নালিশ উপস্থিত করিবে। কিন্তু নালিস করিলেই, কোথায় মারপিট হইয়াছিল, কেন মারপিট হইয়াছিল, এই সকল কথা প্রকাশ হইয়া পড়িবে, এই ভয়ে তাহা পারিল না। শেষে নিজেরাই আসামী হইয়া আদালতে উপস্থিত হইল। প্রথম প্রথম তাহারা কম ভ্রাতাতে অনেক সাক্ষাৎ করিয়াছিল ;—“কি হবে ? মোকদ্দমা ফাঁসাইয়া দিব,” ইত্যাদি। একস্থ মোকদ্দমাটি যখন পাকিয়া দাড়াইল, তখন চিমু তর্কভূষণ মহাশয়ের সহিত সাক্ষাৎ করিবার জন্য ব্যর্থ হইয়া উঠিল ; যাহাতে রফা হইয়া যায়। তর্কভূষণ মহাশয় বলিয়া পাঠাইলেন, আমার সহিত সাক্ষাৎ করিবার প্রয়োজন নাই, যাহাদের মোকদ্দমা, রফা করিতে হয় তাহারা করিবে। এদিকে তিনি, শঙ্কর ও অপরাপর সাক্ষ্যদিগকে বলিয়া দিলেন, “তোমরা সত্য বলিতে কিছুমাত্র কুণ্ঠিত হইও না ; এমন কি আমি যে চিমুকে গলাধাক্কা দিয়াছি, তোমরা যে তাহার ভাইদিগকে মারিয়াছ, তাহাও সমুদায় স্বীকার করিবে।” একজন বিষয়-বুদ্ধি-বিশিষ্ট লোক সেখানে উপস্থিত ছিলেন ; তিনি বলিলেন,—“বদি চিমে আপনার নামে নালিশ করে, তা হলে তাই সব কথা প্রমাণ বলে গণ্য হবে।” শুনিয়া কণ্ঠী বিরক্ত হইয়া বলিলেন ;—“তা হোক, না হয় আমাদের কিছু সাজাই হবে, এমন

কাজে কিছু সাজা হওয়াতে দুঃখ নেই ; সত্যটা ঠিক বলা উচিত ।” যথা সময়ে চিমে ঘোষের ১০০ একশত টাকা ও ভ্রাতৃত্বের পঞ্চাশ পঞ্চাশ টাকা করিয়া জরিমানা হইল। ভবিষ্যতে ভাল ব্যবহারের জন্য চিমে ১০০০ টাকা ও অপর দুইজনে ৫০০ শত টাকা করিয়া জামিন ও মুছলকা লিখিয়া দিয়া অব্যাহতি পাইল। চিমে ঘোষ বড় অপমানিত হইয়া বিষন্ন অন্তরে গ্রামে ফিরিয়া আসিল।

ফৌজদারি মোকদ্দমার নিষ্পত্তি হইলে, দেওয়ানীতে জমিকাড়ার মোকদ্দমা উঠিল। তাহাতেও চিমে পরাস্ত হইল। যে প্রাচীর গাঁথিয়াছিল, তাহা ভাঙ্গিয়া লইতে হইল। এই সকল কারণে চিমে ঘোষ তর্কভূষণ মহাশয় ও তাঁহার পরিবারদিগের প্রতি জাতক্রোধ হইয়া রহিল।

•

---

## অষ্টম পরিচ্ছেদ

দেখিতে দেখিতে আর কয়েক মাস অতিবাহিত হইয়া গেল। ১৮৫৩ সালের বৈশাখ মাস পড়িলেই বাড়ীতে কথা বসিল; এবং সমুদায় মাস কথা চলিল। ক্রমে জ্যৈষ্ঠ মাস উপস্থিত। ভুবনেশ্বরীর শ্বশুরবাড়ী হইতে পত্র লইয়া লোক আসিয়াছে; ভুবনকে শ্বশুরঘর করিবার জ্ঞপ্তি পাঠাইতে হইবে। তর্কভূষণ মহাশয় উলোর রামরতন মুখ্যের তৃতীয় পুত্রের সহিত ভুবনেশ্বরীর বিবাহ দিয়াছেন। রামরতন নিজে পণ্ডিত মানুষ নহেন, তবে সংস্কৃতে কিঞ্চিৎ জ্ঞান আছে। তাঁহার পুত্রটির বয়স ১৭।২৮র অধিক হইবে না। সে গ্রামের এক চতুষ্পাঠীতে পড়িতেছে। অধ্যয়নে যে তার অধিক মনোযোগ আছে, বা কালে যে সে একজন কৃতী ও প্রতিষ্ঠাভাজন ব্যক্তি হইবে এরূপ লক্ষণ নহে। তথাপি তর্কভূষণ মহাশয় কৌলান্তের অনুরোধে এবং প্রথম দুই পুত্র উপযুক্ত ও কর্মক্ষম হইয়াছে শুনিয়া মুখ্যো মহাশয়ের তৃতীয় পুত্র শ্রীমান্ জ্ঞানেন্দ্রনাথকে কল্যাণী সম্প্রদান করিয়াছেন। রামরতনের প্রথম দুই পুত্র, কাজচালানরূপ ইংরাজী শিখিয়া, কলিকাতাতে বিষয়কর্মে নিযুক্ত হইয়াছে। তন্মধ্যে প্রথম, রাজেন্দ্রনাথ, কিছু অধিক কৃতবিদ্য এবং অপেক্ষাকৃত বড় বেতনের চাকুরী করে। মধ্যমটী, ব্রজেন্দ্রনাথ অধিক লেখা পড়া শিখিতে পারে নাই; সে সামান্য একটা শিপ-সরকারী কর্মে নিযুক্ত আছে; এবং তাহাতে তাহার দুই দশ টাকা উপরি লাভও হইয়া থাকে; উভয় ভ্রাতাতে কলিকাতায় এক বাসাতে থাকে; এবং তাহাদের আয়ের দ্বারা মুখ্যো মহাশয়ের সংসার এক প্রকার সুখেই চলিয়া যায়। ব্রাহ্মণ বাস্তবিক অতিশয় ভাল মানুষ; এবং স্বভাবতঃ কিঞ্চিৎ ভীক। বাড়ীর মধ্যে তিনি নামে কর্তা; যে যাহা ইচ্ছা করে



তাহাই করে; তিনি বাধা দিতে পারেন না। তাঁহার সংসারে, এক গৃহিণী, চারিটি পুত্র ও তিনটি কন্যা ও দুই পুত্র-বধূ; তাহার মধ্যে দুইটি পুত্র কলিকাতায় থাকে; একটি কন্যা যে ছোট পুত্রের পরেই হইয়াছে, সে বিবাহিতা হইয়া পতিগৃহে আছে; অপর দুইটি কন্যা ও চতুর্থ পুত্রটি গৃহেই আছে; প্রথম দুইটি পুত্রের বধূ গৃহেই আছে; এবং তৃতীয় পুত্র জ্ঞানেন্দ্রনাথের বধূকে আনিতে লোক পাঠান হইয়াছে।

দুই দিন হইল, ভুবনেশ্বরীকে লইবার জন্য লোক আসিয়াছে। ভুবনেশ্বরী সর্বকনিষ্ঠা কন্যা ও তাঁহার বৃদ্ধাবস্থার সন্তান বলিয়া শাপে ও লোকাচারে যতদিন অবিবাহিত রাখিতে দেয়, তর্কভূষণ মহাশয় ততদিন তাহাকে অবিবাহিত রাখিয়াছিলেন। গৃহিণী সর্বদা বলিতেন, —“মেয়ে বিয়ে দিলেই ত পরের ঘরে যাবে, যতদিন কোলের কাছে থাকে থাক।” তিনিও সেই কথা মজুর করিয়া ভুবনকে দশম বর্ষের শেষ পর্য্যন্ত বিবাহ দেন নাই। দশম বর্ষের শেষে বিবাহ হয়, সুতরাং এখন তাহার বয়স্ক্রম একাদশ বর্ষ পার হইয়া দ্বাদশ বর্ষে পড়িতে যাইতেছে। এইবার ভুবনকে স্বস্তুরঘর করিবার জন্য পাঠাইতে হইবে। বস্তুতঃ এখনও তাহাকে পতিগৃহে প্রেরণ করিবার ইচ্ছা ছিল না। তর্কভূষণ মহাশয় সন্তানগুলিকে অতিশয় মেহ করেন; বিশেষ, ভুবন তাঁহার শেষ অবস্থার কন্যা। তাঁহার মনের ভাবটা এই, “তাড়াতাড়ি বৌ বাড়াতে লইয়া যাবার প্রয়োজন কি? ছেলে একটু কুতী হইলে ও বৌ একটু বড় হইলে আনাই ভাল।” এই কারণেই প্রায় দুই বৎসরের অধিক কাল ভবেন্দ্রের বিবাহ হইয়াছে, তথাপি তিনি সর্বকনিষ্ঠ বধূটিকে নিজ ভবনে আনিতেছেন না। বাটীর মেয়েরা আনিবার প্রস্তাব করিলেই বলিয়া থাকেন, “আহা, থাক্, যতদিন মা বাপের কাছে থাকে থাক। একদিন আসবেই ত, এত তাড়াতাড়ি কেন?” ভুবনের স্বস্তুরের পত্র পাইয়া

তর্কভূষণ মহাশয় পথমে প্রস্তাব করিয়াছিলেন যে তাহাকে অন্ততঃ আর এক বৎসর পাঠাইবেন না ; এবং বৈবাহিককে সেই মর্মে পত্রোত্তর লিখিয়াছিলেন। কিন্তু তাঁহারা সে প্রস্তাব গ্রাহ্য না করিয়া লোক পাঠাইয়াছেন। রামরতন মুখুযো মহাশয় পত্রে লিখিয়াছেন, তর্কভূষণ মহাশয়ের প্রস্তাবানুসারে কার্য্য করিতে তাঁহার নিজের অসম্মতি ছিল না ; কিন্তু বাড়ীর মেয়েরা অর্থাৎ গৃহিণী কোনরূপেই সম্মত হইলেন না। সেজন্য লোক প্রেরণ করা হইল।

ভুবনের যাওয়ার বিষয়ে তাঁহার মনের মধ্যে একটা কিছু স্থির না থাকাতে তর্কভূষণ মহাশয় এতদিন তরুণযোগী কোনও আয়োজন করেন নাই। এখনও এক এক বার ভাবিতেন লোক ফিরাইয়া দিবেন। কিন্তু এখন তাঁহার একজন পরামর্শ দিবার লোক হইয়াছে। বিজয়ার বৃদ্ধি বিবেচনার উপরে তাহার এমনি আস্থা, যে, বিজয়া নশিপুরে প্রতিষ্ঠিত হওয়া অবধি তাহার পরামর্শ না লইয়া তিনি গৃহস্থালীর কোন কাজই করেন না। এজন্য তাঁহার স্বন্ধের ভার যেন অনেকটা কমিয়াছে। দুই একদিন ইতস্ততঃ করিয়া কর্ত্তা অবশেষে ভাবিলেন বিজয়া যেরূপ পরামর্শ দিবেন তদনুরূপ কাজ করিবেন। তদনুসারে একদিন মাধ্যাহ্নিক আহারের পর, নিজের শয়নগৃহে বিজয়াকে ডাকাইয়া, দুই ভ্রাতা ভাগিনীতে পরামর্শ করিতে লাগিলেন।

তর্কভূষণ। বিজয়া ! ভুবনকে নিতে ত লোক এল, কি করি বল দেখি। এত তাড়াতাড়ি নিয়ে যাওয়া কেন ? আর কিছুদিন থাক্লে ভাল হতো না ?

বিজয়া। সে ত আমরা বুঝি, তারা ত বোঝে না।

তর্কভূষণ। আমাদের সে কালে বেশ নিয়ম ছিল, পঠদশাতে বিবাহ ফস্বার রীতি ছিল না, সকলকে ব্রহ্মচর্য্যে থাকতে হত। এখন আমরা

লোকাচারের বশবর্তী হয়ে পড়েছি। লোকাচারের অনুরোধে বালাকালেই ছেলেদের বিবাহ দিতে হয়, তাই না হয় দেও, তাড়াতাড়ি বৌগলিকে বাড়ীতে আনা কেন? বিশেষ ভুবন কখনও একটী দিনের জন্তে বাড়ী ছেড়ে থাকে নাই। আমি বৈবাহিক মহাশয়কে লিখলাম, কিন্তু কৈ তা ত শুনলেন না।

বিজয়া। লোকের মুখে শুনি তোমার বেয়াইটী সাক্ষীগোপাল; গিন্নীটী নাকি বড় দুর্দান্ত, এটা গিন্নীবই কাজ।

তর্কভূষণ। এখন কি করা উচিত? এক একবার ভাবছি লোকটা ফিরিয়ে দি।

বিজয়া। তা হয় না, ভুবনের শাপুড়ী বড় সহজ লোক নন; তা হলে গোড়া হতেই একটা বিবাদ বাধলো। যদি গোড়া হতেই একটা মনান্তর আরম্ভ হয়, তা হলে ভুবনের আর কষ্টের অবশি থাকবে না। আমাদের কি, আমরা ত দেখতে শুনতে যাব না; কিন্তু ও বেচারির প্রাণটা যাবে।

তর্কভূষণ। ঠিক বলেছ, এ যাত্রা না পাঠালে একটা মনান্তর আরম্ভ হবে। দূর হোক, পাঠানই যাক। কিন্তু তার মত আয়োজন ত কিছু করি নাই।

বিজয়া। আয়োজন করতে কদিন লাগে? তুমি একটা ভাল দিন দেখ, আয়োজনের সবই ত প্রায় ষরে আছে; অবশিষ্ট যা দরকার যোগাড় করে দেওয়া যাচ্ছে।

চুই ভ্রাতা ভগিনীতে পরামর্শ করিয়া ভুবনের যাত্রার আয়োজন করিতে লাগিলেন। উলোর লোককে ৪৫ দিন বসাইয়া রাখা হইল। তর্কভূষণ মহাশয় পঞ্জিকা দেখিয়া একটা শুভদিন স্থির করিলেন। এ দিকে নতুন সংসারে প্রবেশ করিতে যে কিছু জ্বাদামগ্নীর প্রয়োজন হয়,

তাহার সমুদায় সংগৃহীত হইল। তর্কভূষণ মহাশয় বিবাহের সময় যে বরসজ্জা দিয়াছিলেন তাহা ত স্বতন্ত্র; আবার নূতন করিয়া থালা, ঘটী, বাটী, গাড়ু, ডাবর, সিঁদুক, পেটরা, ইস্তক শিল, নোড়া যাতা পর্য্যন্ত সংগ্রহ করিতে ক্রটি করিলেন না। আর ত তাঁহাকে পতিগৃহে কত প্রেরণ করিতে হইবে না! ভুবনকে দিয়াই শেষ! তন্নিম্ন তাঁহার মনে মনে একটা সংকল্প আছে, তাহা এখনও কাহাকেও ভাস্কিয়া বলেন নাই; সেটা এই, ভুবনকে সংসারধর্ম্মে প্রবৃত্ত দেখিয়া এবং গ্রামের দরিদ্র লোকদের হিতার্থে গ্রামের পার্শ্বে একটা পুষ্করিণী প্রতিষ্ঠা করিয়া, তিনি কশীবাসী হইবেন। সুতরাং ভুবনকে পতিগৃহে পাঠাইবার সময় মনের সাধ মিটাইয়া জিনিষ-পত্র দিবেন, তাহার মত আয়োজন করিতেছেন। আয়োজন করিতেছেন এবং মনে মনে কালিদাসের অভিজ্ঞানশকুন্তলের সেই কবিতার শেষ চরণটা স্মরণ করিতেছেন;—“পীডান্তে গৃহিণঃ কথং নু তনয়্যাবিল্লষজ্জৈঠর্নবৈঃ।”

ক্রমে ভুবনের যাত্রার আয়োজন সাঙ্গ হইল। মায়ের কোল ছাড়িয়া বাইতে হইবে, এই চিন্তায় ভুবনেশ্বরী, লোক আসিবার দিন হইতে, কাঁদিতেছে। অন্নজল এক প্রকার পরিত্যাগ করিয়াছে। বাড়ীর বৃদ্ধারা কত বুঝাইতেছেন! বলিতেছেন,—“মেয়েছেলে হলেই পরের ঘরে যেতে হয়। ওই দেখ্ অমুক শস্তুর ঘর করে পুরোণো হয়ে এল, অমুক তোর সঙ্গে কাল খেলা করেছে, সে শস্তুরঘর করতে গেল; ভয় কি আবার পূজার সময় আসবি,” ইত্যাদি ইত্যাদি। কিন্তু কোনও উপদেশে, কোন দৃষ্টান্তে, ভুবনেশ্বরীর প্রাণে শান্তি আসিতেছে না। দর দর ধারে তাহার মুখে শতধারা বহিতেছে! তাহার মুখখানি বাসি ফুলের ত্রায় দান হইয়া গিয়াছে। কয়েক দিন আর মায়ের অঞ্চল ছাড়িতেছে না। জননী যেখানে যান সেখানেই সঙ্গে আছে। গৃহিণী বুঝাইবেন কি,

তনয়া-বিচ্ছেদ-শোকে তাঁহার প্রাণ অধীর হইয়া যাইতেছে। কোনও কাজেই বেন তাঁহার হাত উঠিতেছে না।

ক্রমে ভুবনের যাত্রার দিন উপস্থিত। ভুবনের বাকুলতা ও রোদন দেখিয়া সকলের বুক ফাটিয়া যাইতে লাগিল। তর্কভূষণ মহাশয় ত্রয়া দিবস জন্ত আসিলেন; ভুবন তাঁহার চরণে পড়িয়া অধিক কিছুই বলিতে পারিল না; কেবল “বাবা! বাবা! ও বাবা গো!” বলিয়া কাঁদিতে লাগিল। তনয়ার সেই ভাব দর্শনে তর্কভূষণ মহাশয়ের অন্তরে প্রবল শোকাবেগ উথলিয়া উঠিল; কিন্তু “তারা ছুর্গে! ছুর্গতিহারিণি!” বলিয়া সে আবেগটা চাপিয়া ফেলিলেন; ভুবনকে তুলিয়া বক্ষে চাপিয়া ধরিয়া বার বার মন্তক আঘাত করিতে লাগিলেন; এবং বলিলেন, “না কেন্দ না, যাও, পূজার সময়ে তোমাকে আনবো।”

ভুবন জননার, বিজয়ার, বিদ্বাদিগের ও বধূদিগের চরণে পাড়িয়া কতই কাঁদিল! তৎপরে কাঁদিতে কাঁদিতে পতিগৃহের অভিমুখে যাত্রা করিল; ৫১৭ জন ভারি সমুদায় দ্রব্যসামগ্রী লইয়া সঙ্গে যাত্রা করিল; গৃহিণী ডাক ছাড়িয়া কাঁদিতে লাগিলেন! ভুবন চলিয়া গেল, তর্কভূষণ মহাশয়ের গৃহে বিষন্নতা পাড়িয়া রহিল।

এদিকে উলোর বাড়ীতে, রামরতন মুখুয্যে মহাশয়ের ভবনে, সকলে নূতন বৌএর জন্ত অপেক্ষা করিতেছেন। ক্রমে নূতন বৌ আসিয়া উপস্থিত। মুখুয্যে ঠাকুরাণী দ্বার হইতে বৌকে আদর পূর্বক লইয়া গেলেন; কোলে বসাইলেন; অবগুষ্ঠন উন্মোচন পূর্বক মুখ দেখিলেন; এক বৎসরে কিরূপ হইয়াছে দেখিলেন; রূপগুণের অনেক প্রশংসা করিলেন; সমাগতা প্রতিবেশিনী বৃদ্ধাদিগকে প্রণাম করাইলেন; এবং মহা আনন্দ প্রকাশ করিতে লাগিলেন। কেবল দুই জনের সে আনন্দ ভাল লাগিল না। গৃহের প্রথম দুইটি বধু দুই ভাবে এই আনন্দের প্রতি

## অষ্টম পারিচ্ছেদ

দৃষ্টপাত করিল। বড় বো মনে মনে হাসিয়া বলি  
দিন !” মেজবো শান্তুড়ীর প্রিয়, তাঁহার অনুগ্রহ  
জন্ম সর্বদা আত্ম-গোপন করিয়া তাঁহার মন  
প্রকারে তোষামোদ করে। সে দেখিল  
একজন অংশী আসিয়া যুটিল। তাহার  
লাগিতেছে না। তাহার যেন মন  
ছুটিল। যাহা হউক, এ সল  
মহাশয়ের গৃহের কাজকর্ম

তাই দিনের মধ্যে

হইয়াছে, যে প

সহিত এ প

মধ্যেই এক

হইল। এ

মহাশয়

কটুক্তি

মুখবো

বাগ কর

দিন আ

লাই ; এ

কথা বল

বলেন ন

কত দেখ

বলিতে স

বলিবারই

## যুগান্তর

তার কর্ণে তুলিয়া দিল। তখন বড়বো রন্ধনশালাতে  
শুড়ী শুনিয়া তাড়াতাড়ি বস্ত্র পরিবর্তন করিয়াই  
ইলেন; এবং বলিলেন;—“ও অসতের ঝাড়,  
তার মাথাটী খাবার জন্তে লেগেছ? তার  
যতদিন বালিকা ছিল ততদিন অনেক  
শিলের মা, তাহার পতি উপার্জক,  
সে ফিরিয়া বলিল, “কি

ভয় দেখান হয়েছে

শঙ্কসের মুখে

করেছি?

...পুত্র

স ভাই

ও, তাই

টো ঘষে

নেই যে

শাশা মোদ

হাতি

সস্তাবনা ; কাজেই ততদূর অগ্রসর হইতে সাহসী হইলেন না। বলিলেন—  
“বা, তোরে আর পিণ্ডী রাঁধতে হবে না! এই ত ছেদাভক্তি, আবার  
পিণ্ডী রাঁধতে বসেছেন।”

বড়বো। বয়েই গেল! ছেদাভক্তির কাজ করলেই ছেদাভক্তি পায়।

গৃহিণী জোষ্ঠা বধূর হাত হইতে ভাতের কাটিটী কাড়িয়া লইলেন।  
বোটা বাহিরে আসিয়া মেজবোকে দেখিয়া বলিল—“অমনি কথাটি কুট  
করে লাগিয়েছ? কি লাভটা হলো?” এই বলিয়া নিজ গৃহে গিয়া  
নিজ সন্তানকে স্তন্য দান করিতে বসিল। ভুবনেশ্বরী একেবারে অবাচ্!  
সে একবার মেজবোকে বলিল,—“ছি ছি! তোমার প্রকৃতি ত বড় মন্দ;  
তুমি কথাটা ঠাক্করণের কাণে তুললে কেন?” মেজবো কিছু বলিল না;  
কেবল গোচোরের মত চাহিয়া রহিল। কিয়ৎপরে পরে ভুবন বড়  
বোএর দ্বারে গিয়া দাঁড়াইল। বড়বোএর মন তখনও গরম। সে বলিল

“যাও তুমি বোন! আমার কাছে এস না।” সে বেচারী অপ্রস্তুত  
হইয়া চলিয়া আসিল। একবার ভাবিল বলি, “আমি ত লাগাই নাই,”  
আবার সে ইচ্ছাকে দমন করিল। আত্মপক্ষ-সমর্থনের জন্ত কিছু বলা  
তাহার প্রকৃতি-বিরুদ্ধ! ক্রমে পাকশাক সমাধা হইল; সকলেই  
আহার করিল; বড়বো আহার করিল না। গৃহিণী তাহার অন্ন ব্যঞ্জন  
বাড়িয়া, চাপা দিয়া রাখিয়া, মুখে তামাকপোড়া গুল দিয়া, নিজ গৃহে  
গিয়া শয়ন করিলেন।

শাণ্ডী বোএর যে বিবাদ একটু দেখা গেল, এক্রপ বাপার প্রায়  
প্রতিদিন হইত। প্রাতে, মধ্যাহ্নে, সন্ধ্যাতে, গৃহিণীর ক্ষুরধারসমান  
রসনার আর বিশ্রাম ছিল না। সর্বদাই চলিতেছে! হয় কর্তার প্রতি,  
না হয় প্রতিবেশীর প্রতি, না হয় বধূদিগের প্রতি, সর্বদাই অগ্নি উল্লসরণ  
করিতেছে।



ভুবনেশ্বরী এ গৃহে বড় ভয়ে ভয়ে বাস করিতে লাগিল। সে অল্পখ হইলে বলে না; মুখটা মুদিয়া সকল কাজ করে; সর্বদা আজ্রাবহ থাকে; অথচ স্বর্গের তোষামোদ করে না, বা মনস্তৃষ্টি সাধনার্থে কিছু বলে না বা করে না। স্বর্গ তাহার বড় একটা কিছু অপরাধ পান না। কিন্তু মেজবৌটা তাহারও নামে লাগাইতে ছাড়ে না। স্বর্গ সে সকল কথাতে কর্ণপাত করেন না, বরং এক এক দিন বিরক্ত হইয়া বলেন— “যা, যা, তোর চরকায় গিয়ে তুই তেল দে; অত্বে কে কি করে না করে তা তোকে দেখতে হবে না।”

এইরূপে দুই তিন মাস কাটিয়া গেল। মেজবৌ দেখিল, ছোটবৌএর প্রশংসা শাশুড়ীর মুখে ধরে না; সর্বদা বলেন, “কেমন লোকের মেয়ে, হবে না? মুখে কথাটা নেই।” এই সকল প্রশংসাতে মেজবৌএর গায়ে বেন তপ্ত জলের ছড়া দেয়। অবশেষে মেজবৌ নিজ উদ্দেশ্য সিদ্ধ করিবার জন্য এক অদ্ভুত উপায় উদ্ভাবন করিল। মেয়েটির বয়ঃক্রম চতুর্দশ কি পঞ্চদশের অধিক হইবে না; কিন্তু ইতিমধ্যে জুষ্টামিতে পারিপক্ব হইয়াছে। চুরিবিত্তিতে বেশ দক্ষ। ভুবনেশ্বরীর আঁসিবার কিছুদিন পূর্বে কয়েকবার স্বপ্নের ও বড়বৌএর শয্যার তল হইতে টাকা পরস্যা চুরি করিয়াছিল। সে জন্ত অনেক অনুসন্ধান হয়। কিন্তু মেজবৌ শাশুড়ীর প্রিয়পাত্র; কাহার সাধ্য তাহাকে সন্দেহ করে? সে সময়ে কিছু দিনের জন্ত বাড়ীতে একটা বি ছিল, সকলের সন্দেহ তাহার উপরেই পড়িল; সুতরাং তাহাকে পালাগালি দিয়া, অপমান করিয়া, তাড়াইয়া দেওয়া হইল।

এবার মেজবৌ আর এক খেলা খেলিয়াছে। একদিন মুখুযো মহাশয় অসাবধানতা বশতঃ বাকুসের চাবিটি ফেলিয়া ন্মান করিতে গিয়াছেন, ইত্যবসরে মেজবৌ তাঁহার বাকুস খুলিয়া তখনটা টাকা চুরি করিল।

এবার চুরি করিয়া আর নিজের বাক্সে রাখিল না ; ভাবিল, সে চুরি ভুবনেশ্বরীর স্বন্ধে চাপাইয়া তাহাকে স্বশ্রীর বিশ্বাস ও স্নেহ হইতে বঞ্চিত করিবে। এই পরামর্শ করিয়া ছপূরবেলা আহ্বারের পর, একটা কি দেখিবার ছল করিয়া, ভুবনেশ্বরীর নিকট হইতে তাহার বাক্সের চাবি চাহিয়া লইল। বাক্সটা খুলিয়া টাকা তিনটা রাখিয়া আবার চাবিটা ফিরাইয়া দিল। ভুবনের মনে কোনও সন্দেহ নাই ; সুতরাং সমস্ত দিনের মধ্যে আর বাক্স খোলে নাই। সন্ধ্যার কিঞ্চিৎ পূর্বে মুখ্যো মহাশয় নিজের বাক্স খুলিয়া দেখেন, টাকা তিনটা নাই। অমনি বলিয়া উঠিলেন—“আমার বাক্স থেকে তিনটে টাকা নিলে কে ?” গৃহিণী প্রথমে বলিয়া উঠিলেন,—“দেখ ওখানেই আছে।”

কর্তা। না গো, থাক্লে আর আমি বলি ?

গৃহিণী। বাঃ, তোমার কাছে রৈল চাবি, টাকা নেবে কে ?

কর্তা। না গো, স্নান করতে যাবার সময় চাবিটা ভুলে তক্তার উপরে ফেলে গিয়েছিলাম।

গৃহিণী। তাই যেন গেলে, নেবে কে ? আর ত পুঁটীর মা নেই, যে, সন্দেহ করবে ; তবে দেখ কিসে বুঝি খরচ করে ফেলেছ।

কর্তা। ( কিঞ্চিৎ বিরক্ত ভাবে ) না না, খরচ করিনি ! এই সকালে টাকা তিনটে রাখলাম, কোথায় গেল ?

ভুবনেশ্বরী সরলা বালিকা। সে কিছুই জানে না ; স্বশ্রকে কাণে কাণে বলিল,—“উনি বালিশের তলাতে মাঝে মাঝে টাকা পয়সা রাখেন, বালিশের তলাটা দেখতে বল দেখি।

গৃহিণী। ওগো, তোমার বালিশের তলাটা দেখ দেখি।

কর্তা। ( দেখিয়া ) কৈ না, এখানেও নেই ; বালিশের তলাতে ক্বে কেন ? আমার বেশ মনে আছে, বাক্সে ছিল।

ইতিমধ্যে ভুবনেশ্বরী শিশুগণনারত হইয়া স্বপ্নের কাগজপত্রের হাত-বাক্সটী তন্ন তন্ন করিয়া খুজিতে গেল। ইত্যবসরে মেজবৌ শামুড়ীর কাণে কাণে বলিল,—“আমি ছোট বোএর বাক্স আজ খুলেছিলাম, তাতে তিনটে টাকা দেখেছি।” শামুড়ী চুপে চুপে বলিলেন,—“দূর, ও বড় বরের মেয়ে, ওর অমন বুদ্ধি হবে কেন? তোর দেখবার ভুল হয়েছে?”

মেজবৌ। না গো, তোমার দিবি, আমি টাকা দেখেছি। তুমি বরং চাবিটা চেয়ে খুলে দেখ।

গৃহিণী ভাবিতে লাগিলেন, হঠাৎ কিরূপে সন্দেহটা করেন ও বাক্সের চাবি চান। অবশেষে একটু হাসিয়া বলিলেন,—“তবে এই বৌ বেটীদের বাক্স আমার দেখতে হচে।” প্রথমে মেজবৌএর বাক্স খুলিয়া দেখিলেন। ভুবনেশ্বরী উৎসুকচিত্তে অপেক্ষা করিতেছে, তাহার চাবি চাহিলে দিবে; কারণ সে নিশ্চয় জানে, তাহার বাক্সে গুটিকতক পরস্রা ভিন্ন আর কিছুই নাই। অবশেষে স্বশ্রু যখন চাবি চাহিলেন, তখন সে ব্যগ্রতা সহকারে চাবি দিল, এবং স্বশ্রু যখন খুলিতেছেন, তখন ঈষৎ হাসিয়া বলিল;—“কি দেখবে, গোটাকত পরস্রা বই আর কিছু নাই।” গৃহিণী খুলিয়াই তিনটী টাকা দেখিলেন। দেখিয়া আশ্চর্য্যান্বিত হইয়া গেলেন, এবং কিয়ৎক্ষণ অবাক হইয়া ভুবনের মুখের দিকে চাহিয়া রহিলেন; পরে জিজ্ঞাসা করিলেন,—“একি গো?” ভুবনও বিশেষ বিস্মিত হইল; কিছুই বলিল না।

গৃহিণী। একি তোমার বাপের বাড়ীর টাকা?

ভুবন। (ধীর ভাবে) না, বাপের বাড়ীর কোনও টাকা ছিল না।

গৃহিণী। তবে তোমার বাবো এ টাকা কোথা হতে এল?

ভুবন। জানি না।

গৃহিণী। ( কিঞ্চিৎ কুপিত হইয়া ) তোমার বাস, তোমার হাতে চাৰি, তুমি জান না, সে কি রকম ?

ভুবনের একবার ইচ্ছা হইল, বলে, যে মেজবো তাহার চাৰি নিয়ে বাস খুলেছিল, সেত রাখিতে পারে ; কিন্তু এমন কথা বলিতে বা ভাবিতে তাহার সাহস হইল না। সে নিশ্চয় জানিত, তাহার বাক্সে টাকা ছিল না, তথাপি টাকা কি প্রকারে আসিল ? তবে কি ছিল অথচ সে জানিত না ? তিনটা টাকা কি প্রকারে আসিল ? যাহা হারাইয়াছে, সেই টাকাই কেন তাহার বাক্সে পাওয়া গেল ? তবে কি মেজবোএর কর্ম ? না না, তাইবা কেন হবে ? এইরূপ নানা চিন্তায় আন্দোলিত হইয়া ভুবনেশ্বরী আর কিছুই বলিতে পারিল না।

গৃহিণী। কথা কচো না যে ? ওমা এইটুকু মেয়ের এত চালাকি ! বাক্সের মধ্যে টাকাগুলি রেখে, শব্বরের মন রাখবার জন্তে কেমন পাঁচ জায়গায় খুঁজ ছিল দেখ ! হা কপাল ! আমি ভাবছিলাম, মেয়েটা ভাল, যুগটি বুজিয়ে থাকে ; এ যে দেখি মুখ বুজিয়ে লঙ্কায় আগুন দিতে পারে ! আমি বলছিলাম, বড়ঘরের মেয়ে, ওর কি এমন প্রবৃত্তি হয় ? এ যে দেখি বড় ঘরের মেয়ের প্রবৃত্তি বেশ !

ভুবনের কথা কহিবার যে কিছু সম্ভাবনা ছিল, তাহা একবারেই গেল। তাহার প্রকৃতির মধ্যে এমন একটা কিছু আছে, যাহাতে কেহ কিছু অপমানের কথা বলিলে বা তাহার চরিত্রের প্রতি সন্দেহ করিলে, সে একবারে পাষাণের মত হইয়া যায়। তার পর, মার, কাট, রক্তপাত কর, অস্থিমাংস পিষিয়া দেও ; না রাম না গঙ্গা। পিত্রালায়ে কেহ কিছু অপমান করিলে অনেক সময় এই ভাব দেখা যাইত। সে কখনও মিথ্যা বলিত না, কিন্তু আত্ম-পক্ষ-সমর্থনের জন্ত একটা কথাও বলিত না, অপরাধ স্বীকারও করিত না। নশিপুরে থাকিতে একদিন শঙ্কর ক্রোধ করিয়া

তাহাকে একটা ঘরে বন্ধ করিয়াছিলেন; সে সমস্ত দিন বন্ধ ছিল; একবার কাঁদিলও না, ডাকিলও না; দ্বার খুলিতে অস্বীকারও করিল না। সন্ধ্যার সময় শব্দর দ্বার খুলিয়া জিজ্ঞাসা করিলেন, “আর করবি?” উত্তর নাই, কেবল তাঁহার মুখের দিকে তাকাইয়া রহিল; বেন পাষাণের মূর্তি! শব্দর বলিলেন, “বাপরে, ধন্তি মেয়ে!”

আজ আবার ভুবনেশ্বরী পাষাণের মূর্তি হইয়া গেল। গৃহিণী বার বার জিজ্ঞাসা করিতে লাগিলেন, কোনও উত্তর নাই; উত্তর যাহা দিবার তাহা ত দিয়াছে—“জানি না,” আবার কি বলিবে? অবশেষে কত্রী অতিশয় বিরক্ত হইয়া অনেক গালাগালি দিতে দিতে বাহির হইয়া গেলেন। মেজবো তাহার ইষ্ট সিদ্ধি হইয়াছে ভাবিয়া মনে মনে আনন্দ করিতে লাগিল। কিন্তু ভুবনের সাজা এখানেই শেষ হইল না। রাত্রে জ্ঞানেন্দ্র বাড়ী আসিলে গৃহিণী চুরির বিবরণ তাহাকে অবগত করিলেন। সে গোয়ার, অশিক্ষিত বালক, সে আবার বেচারিকে অনেক নিগ্রহ করিল। সে যদি মাতার কথাতে হঠাৎ বিশ্বাস না করিয়া একটু ভালবাসার সহিত বৃত্তান্তটা জানিবার জন্ত চেষ্টা করিত, তাহা হইলে বোধ হয় হুটা একটা কথা পাইত; হয় ত মেজবোএর চাবি লওয়ার ও বাক্স খোলার বৃত্তান্তটা শুনিতে পাইত, হয় ত সমস্তটার প্রকৃত উত্তর ধরিতে পারিত, কিন্তু তাহার হৃদয়ে ঐ বালিকাটার প্রতি প্রেম থাকিলে ত সেরূপ করিবে? সে, সে পথেই গেল না; একেবারে ভুবনকে দোষী করিয়া অনেক তিরস্কার আরম্ভ করিল। অবশেষে কারণ জিজ্ঞাসা করিলে ভুবন তাহার প্রকৃতি অমুসারে নিরুত্তর। সকলেই বলে, মৌনঃ সন্মতি লক্ষণ; কিছু বলিবার নাই কাজেই মৌনী; চুরির ইহা অপেক্ষা অধিক প্রমাণ কি? জ্ঞানেন্দ্র পাষণ-প্রতিমার সেই মৌনভাব দেখিয়া বড়ই বিরক্ত হইয়া গেল; এবং তাহার গলা টিপিয়া, তাহাকে স্বর হইতে

বাহির করিয়া দিয়া, দ্বার বন্ধ করিল। অল্প বালিকা হইলে ক্রন্দন করিত, ভয় পাইত, শান্তভীর দ্বারে গিয়া ঠেলিত, অন্ততঃ জ্যেষ্ঠা বধূর ঘরে গিয়া ডাকিত, কিন্তু এ বালিকা সে শ্রেণীর নয়; কাঁদিল না, ডাকিল না, নড়িল না; সমস্ত রাত্রি দাবার এক পার্শ্বে অন্ধকারে বসিয়া রহিল; পরদিন কাহাকে কিছু বলিল না; কেহ কিছু জানিতেও পারিল না।

এই সময় হইতে ভুবনেশ্বরী স্বশ্রীর বিষনয়নে পড়িয়া গেল। নড়িতে চড়িতে কাজের একটু ক্রটি হইলেই গালাগালি খায়; এবং ঠোনাটা ঠানাটাও চলে; কিন্তু ভুবনের মুখেও রব নাই, উচ্চৈঃস্বরে ক্রন্দন নাই; সুতরাং পাড়ার কেহ জানিতে পারে না। সে মুখটি মুদিয়া, যাহা আদেশ হয়, পালন করিয়া যায়। এতদ্ভিন্ন প্রতিদিন প্রায় রাত্রে জ্ঞানেন্দ্রের নিকট তিরস্কার সহ করে। জ্ঞানেন্দ্র বালক বটে, কিন্তু যখন শয়ন-ঘরে যায়, তখন আর বালক থাকে না; তখন কর্তাব্যক্তি হইয়া পড়ে; এবং মনে করে যে, মেয়ে মানুষকে শাসন না করিলে ভাল থাকে না; সুতরাং তখন সেই বালিকাকে তিরস্কার করে ও শাসন করে। ভুবনের মুখে রব নাই; ভিতরে সিংহীর বিক্রম আছে; কিন্তু মুখে পাষণ চাপা। সে তিরস্কার, কাণমলা, গলাধাক্কা প্রভৃতি সহ করিয়া থাকে; মনে মনে ভাবে স্বীলোকের বিবাহ হওয়া ভাল নয়; এবং এবার পিত্রালায়ে গেলে আর আসিব না।

পূজার পূর্বে আর দুইবার টাকা পরস্যা চুরি গেল। দ্বিতীয়বার শান্তভী ভুবনের বাক্স খুলিলেন, টাকা পাইলেন না; বলিলেন,—“একবার ঠেকেচে আর কি রাখে?” এইবারেও ভুবনেশ্বরী পাষণ-প্রতিমা। এবারে শান্তভী ক্রোধ করিয়া তাহার বাড় ধরিয়া মাটিতে মুখ ঘষিয়া দিলেন; ভুবন কাঁদিল না; বা, উঃ আঃ করিল না। তৃতীয় বারের চুরির সময়ে ভুবন অনেক নিগ্রহ সহ করিল; জ্ঞানেন্দ্রের হস্তে প্রহার

খইল ; কিন্তু নিকন্তর । ভুবনের উপর দিয়া যে এত ব্যাপার বাইতেছে, তাহা কেহ জানে না । পূজার সময় ভবেশ আসিয়া ভুবনকে বাড়ীতে লইয়া গেল । ভবেশ ভুবনের শান্তুড়ীর নিকট হইতে ভুবনের চোর অপবাদেয় কথা শুনিয়া গেল, কিন্তু নশিপূরের কেহই তাহা বিশ্বাস করিল না । সকলেই বলিল ঐ মেজবোটারই কথ্য । ভিতরে আর যে সমুদায় শিশুহের দৃষ্টান্ত রহিল, তাহা তখন কাহাকেও বলিল না ; কেবল গোপনে মাতাকে ও বিজয়াকে বলিয়াছিল :

.

---

## নবম পরিচ্ছেদ

একজন দয়ালু ও পরোপকারী ব্যক্তি একবার তাঁহার বন্ধুদিগকে জিজ্ঞাসা করিলেন, “বল দেখি, ভগতে সৰ্ব্বাপেক্ষা দুঃখী কে?” কেহ বলিলেন, “যাহার ভাৰ্য্যা মনোমত নহে, সেই সৰ্ব্বাপেক্ষা দুঃখী;” কেহ বলিলেন, “যে পুত্রকন্টার উদরে যথাসময়ে অন্ন দিতে পারে না, সেই সৰ্ব্বাপেক্ষা দুঃখী;” কেহ বলিলেন, “যে পরের আশ্রিত ও পরমুখাপেক্ষী, সেই দুঃখী।” অবশেষে প্রশ্নকর্তা বলিলেন, “যাহার দয়া আছে, তিনি সৰ্ব্বাপেক্ষা দুঃখী; কারণ সকলের দুঃখ তাঁহাকে ভোগ করিতে হয়।” এ কথা সত্য। ইহার আর একটা নিদর্শন আবার উপস্থিত। নবে গোয়ালার মোকদ্দমার শেষ হইতে না হইতে, একদিন তর্কভূষণ মহাশয় সাংসদগণ সমাপনাতে চণ্ডীমণ্ডপের পাশের ঘরে একাকী বসিয়া আছেন, এমন সময়ে কৈলাস চক্রবর্তী নামক একজন ব্রাহ্মণ আসিলেন। তর্কভূষণ মহাশয় একাকী ছিলেন, কথা কহিবার একটা লোক পাইয়া প্রীত হইলেন; বলিলেন—“এস হে কৈলাস, এ কম দিন দেখিনি যে।” কৈলাসের মুখ অতি বিষন্ন; যেন কোনও গুরুতর ক্লেশ মনের মধ্যে রহিয়াছে। তর্কভূষণ মহাশয় প্রথম প্রথম ততদূর লক্ষ্য করেন নাই; কিন্তু পরেই বলিলেন,—“কেন হে, তোমার মুখটা যেন মলিন মলিন দেখছি; ব্যাপারটা কি?”

কৈলাস। একটু নিরাশয়ে কথা আছে।

তর্কভূষণ। এই ত নিরাশয়, কেউ ত নাই; বল না; কেউ আসে যদি, বারণ করে দেব।



কৈলাস বলিবার উপক্রমেই কাঁদিয়া অধীর হইলেন ; এবং আপনার দুই হস্তে মুখ আবরণ করিয়া বাগকের ত্রায় ফুলিতে লাগিলেন। কৰ্ত্তা প্রথমে কিঞ্চিৎ বিস্মিত হইয়া ক্ষণকাল মৌন থাকিলেন ; পরিশেষে স্বীয় আসন হইতে উঠিয়া আসিয়া কৈলাসের স্বন্ধে হাত দিয়া দাঁড়াইয়া মিষ্টবাক্যে অনেক সান্ত্বনা করিতে লাগিলেন, “একি ! হয়েছে কি ? কাঁদ কেন, স্থির হও, স্থির হও।” কিম্বৎক্ষণ রোদনের পর কৈলাস বলিলেন—“কৰ্ত্তা, আমার সর্বনাশ হয়েছে।”

তর্কভূষণ। সে কি, কি হয়েছে ?

কৈলাস। মেয়েটা আমার মুখ ডুবিয়েছে ! আর দেশে থাকতে দিলে না। ( আবার ফুলিয়া ক্রন্দন )

তর্কভূষণ। রসো, কেঁদনা, আমি আগে বুঝি ; তোমার সেই বিধবা মেয়ে নিষ্ঠারিণী ? তার বয়স হলো কত ?

কৈলাস। আজ্ঞে, উনিশ বিশ বৎসর হবে।

তর্কভূষণ। তার এমন দুর্ন্যতি হলো কেন ?

কৈলাস। আজ্ঞে, কি করে জানবো ?

তর্কভূষণ। কার সঙ্গে ?

কৈলাস। আজ্ঞে, জমিদার বাবুর বড় ছেলে জহরলালের সঙ্গে !

তর্কভূষণ এই না শুন্লাম, কল্কেতার হাটখোলার দস্তদের বাড়ীতে তার দ্বিতীয় বার বিবাহের কথা হচ্ছে।

কৈলাস। আজ্ঞে হাঁ।

তর্কভূষণ। এরূপ ঘটনা ঘটলো কি করে ? ( কিঞ্চিৎ বিরক্ত ভাবে ) এ তোমার পরিবারের দোষ। মায়ে মেয়ে সামলাতে পারে না ?

কৈলাস। আজ্ঞে, আমরা বুঝবো কেমন করে ? আমরা মনে করতাম, আমাদের যত্ন তার একবয়সি, যত্ন সঙ্গে বন্ধুতা আছে, তাই

বুঝি আমাদের উপর এত টান; বাটাতে প্রায় আসে, যত্নকে সর্বদা ডেকে নিয়ে যায়।

তর্কভূষণ। (অতিশয় বিরক্তির সহিত), ওঃ এত দূর গড়িয়েছিল! সংসারে এতদিন বাস করলে, বুড়ো হয়ে গেলে, এটা মনে যোগালো না, যে, তোমরা হলে গরিব, তারা হলো বড় মানুষ, তোমরা বামন পণ্ডিত মানুষ, তারা বিষয়ী লোক, তোমাদের সঙ্গে তাদের এত আত্মীয়তা কেন? আর তুমিই যেন আহাম্মোক, তোমার গিন্নীটী কিরূপ? তিনি কি বুঝতে পারলেন না?

কৈলাস। আজ্ঞে, ছুটলোকে কত মায়া ধরে, সব কি বোঝা যায়? ছিদেমের ভগ্নী কামিনী প্রায় প্রতিদিন বেড়াতে আসতো; নিস্তারের চুল বেঁধে দিত; বলতো,—“জেঠাই মা, নিস্তারকে একটু আমাদের বাড়ীতে নিয়ে যাই, সন্ধ্যা হলে গল্প গাছা করে আবার রেখে যাব”; বলে নিস্তারকে নিয়ে যেত।

তর্কভূষণ। (বিস্মিত ভাবে) তবেই বুঝতে পারা গেছে; আরে সে কামিনী যে একটা বিখ্যাত মেয়ে, সকলের মুখে তার নিন্দা শুনি। তোমাদের কাণে কি সে সব কথা গুঠেনি? এরূপ সঙ্গে কি মেয়ে ছেড়ে দিতে হয়?

কৈলাস। আজ্ঞে, উঠেছিল বৈ কি? তবে কি করা যায়, জ্ঞাত, এক পাড়াতে বাস, এক ঘর বললেই হয়, কি করে বারণ করা যায়।

তর্কভূষণ। হলোই বা জ্ঞাত,—‘না আমাদের নিস্তার যাবে না’ বললে কি মাথাটা কেটে ফেলতো? না হয় তাদের সঙ্গে একটু মনান্তর হতো; এ জ্ঞানটা ত পোহাতে হতো না। আর বলবে কি, অসৎ সঙ্গেয় যা দোষ তাই ঘটেছে? তবে ত এ কথা গ্রামে রাষ্ট্র হলো বলে। আমার খুব সন্দেহ হচ্ছে, তোমার স্ত্রীর জ্ঞাতসারে এ সব কাজ হয়েছে।

গরিব হলে অনেক দুশ্চিন্তাই ঘটে থাকে ! কিছু প্রাপ্তি টাপ্তির লোভে পড়েছিলে বুঝি ।

কৈলাস । আজ্ঞে না, স্বরূপতঃ বলছি আমার পরিবার কিছু জানতো না । তবে প্রাপ্তির কথা যদি বললেন, তবে একটা কথা বলা উচিত ; ঐ জহরলাল আমাদের যত্নে সঙ্গে বন্ধুতার ছল করে আজ মাছটা, কাল ছুঁকাদি কলা, পরশু ফলটা পাকড়টা পাঠাত ; আমরা ত ভিতরের কথা জান্তাম না, কাজেই নিতাম ।

তর্কভূষণ । তবে আর বাকি কি ছিল ? এতেও চক্ষু ফুটলো না ? ( বিরক্তির সহিত ) যাও যাও, মিছে কেন আর পরামর্শ নিতে এসেছ ? যেমন কর্ম তেমনি ফল ! যাও আম কাঁঠাল খাওগে, এবং কর্মফল ভোগ করগে ।

ভাঁহার ক্রোধ দেখিয়া কৈলাস ক্ষণকাল নিস্তব্ধ । তর্কভূষণ মহাশয় এক নিমিষের মধ্যে শান্ত হইলেন । বড় শক্ত কথাটা বলিয়াছেন বলিয়া একটু দুঃখ হইল । আবার স্নেহে কৈলাসের স্বন্ধে হাত দিয়া জিজ্ঞাসা করিলেন, “লোক জানাজানি হয় নি ত ?”

কৈলাস । আজ্ঞে না ; গৃহিণী জানেন, আমি জানি, আর আপনাকে বললাম ।

তর্কভূষণ । এখন কি করবে মনে করছ ?

কৈলাস । সেই পরামর্শ জানতেই ত আপনার কাছে এসেছি । তবে, গৃহিণী বলেন, ছরকম হতে পারে ; এক মেয়েটাকে কাশীতে দিয়ে আসা, সেখানে ভিক্ষে শিক্ষে করে কোনও প্রকারে চালাবে ; দ্বিতীয়, অ্যা—অ্যা—অ্যা—সকলে একুপ হলে যা করে ।

তর্কভূষণ ! ছি ছি ! অমন কথা যদি মুখে উচ্চারণ কর, তবে আমার এখানে আর এসনা । ওরূপ কিছু করেছ যদি শুনেত পাই, এ জীবনে

আর তোমার মুখ দর্শন করবো না। তোমার গিন্নীর এমন বুদ্ধি না হলে এ দশা হবে কেন? পাপ দিয়ে পাপ ঢাকা! তারপর তোমার মেয়েটা দক্ষিণ পাড়ার সন্নীর মত দেশের একটা কলঙ্ক, ও দেশের ছেলে নষ্ট করবার একটা গুরুমশাই হয়ে থাক। তুমি বুড়ো দশায় ঐহিক পারত্রিক উভয় সদগতি হতে বঞ্চিত হও। ওরূপ কথা আর দ্বিতীয়বার মুখে এম না।

কৈলাস। কাশীতে দিয়ে এলে হয় না?

তর্কভূষণ। কাশীতে কোথায় দিয়ে আসবে? সেখানে কি তোমাদের আত্মীয় কেউ আছে? তারা কি দয়া করে মেয়েটাকে জায়গা দেবে?

কৈলাস। তা ত কেউ মাই। কত কত বিধবা ত সেখানে পড়ে থাকে; কোথাও এক জায়গায় পড়ে থাকবে, আর ভিক্ষে মেগে খাবে।

তর্কভূষণ। সোজা কথায় বল না কেন, বাজারে দাঁড়াবে।

কৈলাস। আজ্ঞে, তা বৈ কি?

তর্কভূষণ। তুমি মুখ দিয়ে এমন কথা বললে কি করে! তুমি কি ও মেয়েটার জন্মদাতা নও? ওকে কি কোলে পিঠে করে মানুষ কর নি? এমন কথাটা বল কোন প্রাণে? তুমি জন্মদাতা পিতা হয়ে, মেয়েটাকে বাজারে দাঁড় করিয়ে দিয়ে আসবে? তোমার মেয়ে বাজারে ঘর করবে, রাস্তায় দাঁড়াবে, পিতা হয়ে সেটা প্রাণেই বা সবে কিরূপে? কাণেই বা শুনে কিরূপে?

কৈলাস। আজ্ঞে, তা ত সত্যি! তবে কিনা সে বাজারে দাঁড়াতে আর বাকি কি রেখেছে?

তর্কভূষণ। এমন করে কথাগুলো বলছো, যেন আর কারু মেয়ে! তার অপরাধ কি? জান ত বাপু “বলবানিঙ্গ্রিয়গ্রামো বিদ্যাংসমপি কর্ষতি।”

সে অজ্ঞ অল্পমতি বালিকা, তাতে আবার তোমাদের মত অকর্মণ্য মা বাপ, দুই লোকের চক্রান্তে পড়লে ওরূপ শিশুর ঠিক থাকা কি সহজ ? কাজটা করেছে মহাপাপ, তাতে সন্দেহ নাই ; তবে কিনা সাজাটা দেবার সময় একটু দয়ার চোখেও ত দেখতে হবে।

কৈলাস। তা বৈ কি ? তবে মহাশয়ের পরামর্শ কি ?

তর্কভূষণ। ( ক্রিষ্ণ চিন্তা করিয়া ) আমার পরামর্শ যদি শোন, তুমি ও তোমার গৃহিণী মেয়েটাকে নিয়ে তীর্থযাত্রাতে বাহির হও। বৌ বেটা ঘরে থাক। তীর্থ পর্যাটনে অনেকের মন ফিরে যান্ন ; মেয়েটারও মন ফিরে যেতে পারে। তারপর যথাসময়ে তার শরীরটা শুদ্ধ করে নেবার জন্ত একটা প্রায়শ্চিত্তের ব্যবস্থা দেওয়া যাবে।

কৈলাস। আর একটার ভাবনা যে আছে।

তর্কভূষণ। তাকে কোনও অস্বাভাবিক জাতির লোকের হাতে দেওয়া যাবে, কিছু কিছু খরচ দিলেই পালন করবে।

কৈলাস। তা যেন বুঝলাম, খরচ দেবে কে ? আমার দশা ত মশাইএর অবদিত নেই।

তর্কভূষণ। সেই ত শক্ত কথা। তার একটা উপায় ভেবে বার করতে হবে।

কৈলাস। প্রায়শ্চিত্তের দ্বারা মেয়েটার শরীরশুদ্ধির কথা যে বললেন, সে শরীরশুদ্ধির ফল কি ? তাকে নিয়ে কি আর চলা যাবে ?

তর্কভূষণ। নাই বা চলে, ক্রিয়াকর্মের সময় তার হাতে তাতের খালাটা নাই বা দিলে, বেঁধে দুমুটো তোমাঙ্গিকে নাই বা দিল ? পাপ হতে ত বাঁচল, চক্ষের উপরে ত রইল, সেই ঢের। তবে বোধ হয় এর পরে আর তাকে এখানে রাখা ভাল হবে না ; তার পর বরং তাকে অগ্নি

কোনও স্থানে কাহারও আশ্রয়ে দিয়ে এস। তাকে একটু আশ্রয় দিতে পারে, হাঁড়ি কলসির বাইরে রেখেও একমুটো ভাত দিয়ে পালন করতে পারে, এমন কি কোনও আত্মীয় নেই ?

কৈলাস। কৈ কারকে ত মনে হয় না।

তর্কভূষণ। যা হোক সেটা পরে ভেবো; ভাব্বার অনেক সময় আছে। এখন তীর্থযাত্রাটা যাতে হয়, তার যোগাড় কর।

কৈলাস। সে যে প্রচুর ব্যয়সাধ্য।

তর্কভূষণ। ঐ ত মুক্লি! আমার শক্তি থাকলে আমি এমন বিপদের সময় তোমার সাহায্য করতে পারতাম, কিন্তু সে শক্তি নাই; তবে সামান্য কিছু সাহায্য করতে পারি। (কিঞ্চিত চিন্তার পর) আচ্ছা, আজ তুমি যাও, আমি রাত্রে ভেবে দেখি কি করা যেতে পারে।

কৈলাস বিদায় হইলেন। তিনি অকুল নিরাশ-সমুদ্রে পড়িয়াছিলেন, একটু আশা হইল, যে একটা গতি হইতে পারে। তীর্থদর্শনের সাধ অনেক দিন ছিল, এই উপলক্ষে সে সাধটাও পূর্ণ হইবে, ইহা ভাবিয়াও কিঞ্চিৎ আনন্দ হইল। কত্যাটী যে চির-পক্ষে ডুবিল, সে জগৎ যাতনাটা আর প্রবল রহিল না। কোন কোনও প্রকৃতির উপরে চিন্তা গাঢ়রূপে বসে না; বোধ হয় চক্রবর্তী মহাশয়ের প্রকৃতিটা সেইরূপ হইবে। কত্য়ার চিন্তা যদি পূর্বাবধি গাঢ়রূপে বসিত, তাহা হইলে বোধ হয় এরূপ ঘটনাটি ঘটিত না। কৈলাস প্রসন্নচিত্তে ঘরে যাইতেছেন, কিন্তু এদিকে তর্কভূষণ মহাশয়ের মন চিন্তার ভারে ভাঙ্গিয়া পড়িতেছে।

কর্ত্তামহাশয় কোনও দিন আহার কালে পুস্তককথাদিগের সহিত গল্প-গাছা বা আমোদ প্রমোদ করেন না; সেটা তাঁহার স্বভাব নয়। আজ আবার তাঁহার মুখ বিশেষ ভাবে গাভীর্ঘো পূর্ণ ও চিন্তাস্থিত। আজ আর কেহ সাহস করিয়া একটাও কথা কহিতে পারিতেছে না। সকলেই

নিঃশব্দে, নিস্তব্ধে আহার করিতেছে। এমন কি গৃহিণী, যিনি চিন্তায় বড় ধার ধারেন না, এবং কৰ্ত্তার সহিত কথা কহিতে সৰ্ব্বাপেক্ষা সাহসী, তিনিও যেন আজ অধিক কথা কহিতে সাহসী হইতেছেন না। একবার জিজ্ঞাসা করিলেন, “হাঁ গা, তুমি কি ভাবছ?” কৰ্ত্তা বলিলেন, “সকল কথাই কি বলতে হবে?” আর গৃহিণীর দ্বিতীয় প্রশ্ন করিতে সাহস হইল না। আহারান্তে তর্কভূষণ মহাশয় শয়নগৃহে গেলেন। কিন্তু রাত্রে ভাল নিদ্রা হইল না। প্রাতে উঠিয়া কৰ্ত্তা ঠাকুরাণী বিজ্ঞানকে বলিলেন, “কাল কৰ্ত্তা ভাল ঘুমান নাই। মধ্যে মধ্যে উঃ আঃ করেছেন, ঘুমের মধ্যে বলেছেন,—‘আর দেশে থাকতে দি’ল না, পাপাচারে দেশে ডোবালে; কি পাষণ্ড, গরিব ব্রাহ্মণকে ধনে প্রাণে সারা করলে।’” কেহই কিছুই বুঝিতে পারিলেন না; প্রাতে উঠিয়া কৰ্ত্তা মহাশয় নিয়মিত সকল কার্য্য সমাধা করিলেন; মনোভাব কিছুই বুঝিতে পারা গেল না। মাধ্যাহ্নিক আহারান্তে কিঞ্চিৎ বিশ্রামান্তে শঙ্করকে ছাত্রদিগকে পড়াইবার আদেশ করিয়া, চাদরখানি স্বন্ধে লইয়া বাহির হইলেন। গৃহিণী জিজ্ঞাসা করিতে বলিলেন, “একটু কাজে জমিদার বাবুদের বাড়ীতে একবার যাচ্চি।” এই বলিয়া বাহির হইয়া গেলেন।

এদিকে জমিদার বাবু, রামহরি মিত্র, আহারান্তে তাঁহার বাহির বাড়ীর খাস কামরাতে শয়ন করিয়াছিলেন। নিদ্রান্তে উঠিয়া হরে চাকরকে ডাকিতেছেন, “হরে, তামাক দেবে।” হরে তামাক লইয়া আসিতেছে, এমন সময়ে খপর আসিল যে, তর্কভূষণ মহাশয় সাক্ষাৎ করিতে নীচে উপস্থিত। একরূপ ঘটনা প্রায় হয় না; সে ভবনে তর্কভূষণ মহাশয়ের দিখুলি প্রায় পড়ে না। তিনি ত আর তোষামোদজীবী ব্রাহ্মণ পণ্ডিত হেন, যে ধনীদের গৃহে সর্বদা গত্যাত করিবেন। জমিদার বাবু

তর্কভূষণ মহাশয়ের আগমনবার্তা শ্রবণে, ব্যস্তসমস্ত ভাবে হাঁকাতে ছুই একটা টান দিয়া ও হাঁকাটা সরাইতে ইঙ্গিত করিয়া, কাপড় চোপড় সামলাইতে সামলাইতে তর্কভূষণ মহাশয়ের অভ্যর্থনার জন্ত নীচে নামিয়া গেলেন, এবং তাঁহার চরণে প্রণত হইয়া পদধূলি লইয়া বলিলেন, “আজ আমার কি সৌভাগ্য, যে এ বাড়ীতে মহাশয়ের পদধূলি পাইলাম।”

তর্কভূষণ। (সর্বাস্থানীন কুশলপ্রশ্নানন্তর) —তোমার সঙ্গে আমার গোপনে একটু বিশেষ কথা আছে।

রামহরি। যে আজ্ঞা, উপরে আসুন; আমার খাস কামরাতে আসুন।

এই বলিয়া তর্কভূষণ মহাশয়কে খাস কামরাতে ডাকিয়া লইয়া গেলেন; এবং ভৃত্যদিগকে বলিয়া দিলেন যে কেহ যেন বিনা হুকুমে উপরে না যায়।

উভয়ে স্ব স্ব আসনে উপবিষ্ট হইলে, তর্কভূষণ মহাশয় বলিতে আরম্ভ করিলেন, “যে জন্ত এসেছি, সে কথাটা একেবারেই উপস্থিত করা ভাল। তোমরা জ্যেষ্ঠ পুত্রটি অতি অসৎ; সে একজন দরিদ্র ব্রাহ্মণের সর্বনাশ করেছে।”

রামহরি। সে কিরূপ?

তর্কভূষণ। ও পাড়ার কৈলাস চক্রবর্তীকে জান?

রামহরি। আজ্ঞে হাঁ, জানি।

তর্কভূষণ। নিস্তারিণী নামে তার একটা বিধবা কন্যা আছে। তোমার জ্যেষ্ঠ পুত্র সেই মেয়েটিকে চিরকলঙ্কে মগ্ন করেছে। এখন ব্রাহ্মণের জাতি কুল যায়, ধনে প্রাণে সারা হবার উপক্রম।

রামহরি। আমার পুত্র যে করেছে তার প্রমাণ?

তর্কভূষণ। প্রমাণ না থাকলে আর আমি তোমার কাছে এসেছি?



এমন জঘন্য ব্যাপারে কি হাত দিতে আছে? আমি কি এমন কাজে কখনও আস্তাম? কি করি, ব্রাহ্মণ আমার অতি অনুগত, বিশেষতঃ বিষয়টা গোপন থাকা উচিত বলেই নিজে আসা।

রামহরি। (একটু হাসিয়া) আজ কালকের ছেলেরা কোথায় কি না করে, আপনার আমার কি ও সব কথায় কাণ দেওয়া উচিত?

তর্কভূষণ। (বিরক্তি-কর্কশ স্বরে) সে কি রামহরি! তুমি বল কি? এটা কি হেসে উড়িয়ে দিবার মত কথা? ওই জঘন্যই ত তোমাদের ঘরে ছেলে পিলে ভাল হয় না। ব্রাহ্মণের কি সর্বনাশটা হতে চলেছে, একবার ভেবে দেখ দেখি।

রামহরি। মেনে নিলাম আমার ছেলের দ্বারা এই দুর্কার্য হয়েছে, মেনে নিলাম মহাশয় যা বলছেন সমুদায় সত্য, কিন্তু তা হলেও মশাইকে এত মাথা ভাবাতে হবে না; কিছুই সর্বনাশ হবে না; ঘরে ঘরে কত বিশ্বাসের একপ দশা ঘটছে, কার সর্বনাশ হয় না।

তর্কভূষণ। কি কথাটা বলছো, আমি বুঝতে পারছি না।

রামহরি। আপনি নিতান্ত নির্বিষয়ী লোক, সাধু পুরুষ, কেবল শাস্ত্রচর্চাতেই থাকেন, আপনার এ সকল বিষয় না বোঝবারই কথা; আমরা দেখে দেখে বুড়ো হলাম! আমার তাৎপর্যটা এই, যদি কিছু গোলযোগ হয়ে থাকে, তার বাপ মা সেরে নেবে।

তর্কভূষণ। ছি ছি! এমন কথা বলতেও তোমার লজ্জা হলো না?

রামহরি। হামেশা যা ঘটছে, তা বলতে লজ্জা কি?

তর্কভূষণ। এ স্থলে সেটা হচ্ছে না। কৈলাস আমার পরামর্শ যদি মা নিত, তা হলে কি হতো বলতে পারি না; আমি সে পথ বন্ধ করেছি।

রামহরি। তবে মহাশয় কি পরামর্শ দিয়েছেন?

তর্কভূষণ মহাশয় কৈলাসকে যে পরামর্শ দিয়াছিলেন, আত্মপূর্বিক সমুদায় বর্ণন করিলেন ।

রামহরি । উত্তম পরামর্শই দিগেছেন । এখন সেই অনুসারে কার্য করতে বলুন ।

তর্কভূষণ । এ সম্বন্ধে একটু কথা আছে ।

রামহরি । কি কথা ?

তর্কভূষণ । কৈলাস অতি দরিদ্র লোক, অতি কষ্টে তার দিন চলে ; এত ব্যয় সে কিরূপে করবে ?

রামহরি । তবে কি মহাশয়ের ইচ্ছা আমি সে ব্যয়টা বহন করি ?

তর্কভূষণ । কাজেই, তোমার ছেলেরই বহন করবার কথা । তা সে ত এখনও বিষয়ের অধিকারী হয় নি, সুতরাং তোমারই দেওয়া উচিত ।

রামহরি । ( উচ্চৈঃস্বরে হাস্য করিয়া ) এ মন্দ কথা নয় ; বাড়ীর ছেলেরা কে কোথায় ইয়ারকী দিগে বেড়াবে, আর আমরা জরিমানা দিগে বেড়াব । আপনি ব্রাহ্মণ পণ্ডিত না হলে এমন বুদ্ধি যোগাত না ।

তর্কভূষণ । ( অতিশয় ক্রুদ্ধ ভাবে ) বিধাতা জন্মভ্রমাস্তরে ব্রাহ্মণ পণ্ডিত করুন ; তোমাদের মত বিষয়বুদ্ধি যেন না ঘটে । যে দুস্ত্রবৃত্তির বশবর্তী হয়ে একটা পরিবারকে জন্মের মত কলকে ডোবালে, সে আরামে বেড়াবে, আর সাজা ভুগ্বে অন্ত লোকে ! এই বুঝি তোমার বিচার ? পরপ্রবঞ্চনা করে তোমাদের ধর্ম্মাধর্ম্ম-জ্ঞান বিলুপ্ত হয়েছে ; তা না হলে এমন বিচার ঘটে না ।

রামহরি । মহাশয় নৈয়ামিক পণ্ডিত, গুরুত্বলা ব্যক্তি, আপনার সঙ্গে আমার তর্ক করা শোভা পায় না । স্পষ্ট কথা এই, আমি টাকা কড়ি কিছু দিতে পারবো না ।

তর্কভূষণ। (উঠিয়া দণ্ডায়মান) তুমি যে এ কথা বলবে, তা আমি জান্তাম। তোমরা বিষয়ী লোক কিনা, ধর্ম-জ্ঞানে তোমাদের টাকা বাহির হয় না। ছেলের বিয়ে আস্চে, কাল বাইনাচের জন্ত হয় ত হাজার হাজার টাকা যাবে, একটা মকদ্দমার দাবা খেলাতে হয় ত শত শত টাকা ব্যয় হবে, আর নিজের ছেলের পাপাচারে এক ব্রাহ্মণ পরিবার উৎসন্ন যায়, তাদের রক্ষার জন্ত টাকা দিতে ইচ্ছে হয় না। আচ্ছা, আমি চললাম! আমি যে এজন্ত এসেছিলাম, তা কারকে বলো না।

রামহরি। মহাশয় ক্রোধ করে যাবেন না। একবার ভেবে দেখুন এ দণ্ডটা কি আমার দেওয়া উচিত?

তর্কভূষণ। (অতিশয় কোপন ভাবে) ওগো ভেবে দেখেছি গো দেখেছি! তোমাদের কেমন স্বভাব, পায়দার লাঠির গুঁতা না হলে সিন্দুকের চাবি খোলে না। আচ্ছা, সেই পায়দার লাঠির গুঁতাই আস্বে।

এই বলিয়া তর্কভূষণ মহাশয় দ্রুতপদে চলিয়া গেলেন।

পায়দার লাঠির গুঁতার উল্লেখ করাতে জমিদার বাবুর আত্মনির্যাসাদাতে বড় আঘাত লাগিয়াছিল; তিনি ক্ষণকালের জন্ত কুপিত হইয়া উঠিয়াছিলেন; তর্কভূষণ মহাশয়কে দুই কথা শুনাইয়া দিবেন ভাবিয়াছিলেন; কিন্তু বৃদ্ধ ব্রাহ্মণ কুপিত ফণীর হায়া মনে মনে গর্জন করিতে করিতে চলিয়া গেলেন, কিছুই বলিবার অবসর পাইলেন না। বাবুটা একাকী বসিয়া ভাবিতে লাগিলেন। পায়দার লাঠির গুঁতার অর্থ কি? তবে কি নালিস করিবার অভিপ্রায়? তাও কি হয়? লোকে এমন বিষয়ে কি নালিস করে? ও বৃথা ভয় দেখান। পিতা মাতা গোপনে বিপদ্রুদ্ধার করিয়া লইবে। ওরূপ সকলেই করে। অমনি স্মরণ হইল যে, কিছুদিন পূর্বে তর্কভূষণ মহাশয় চিমে ঘোষের জরিমানা

করাইয়াছেন। ব্রাহ্মণ পণ্ডিত লোক কুপিত হইলে জ্ঞান থাকে না। যদিই নালিস করে? করলেই বা কি? উভয়ের সম্মতিতে কাজ! না না, খোরাকপোষাকের খরচ বোধ হয় ধরিয়া লইতে পারে। ছি! ছেলেটা কি কাণ্ড বাধাইল! একবার ইচ্ছা হইল তাহাকে ধরিয়া জুতাপেটা করেন। অমনি মনে হইল, তিনিও যৌবনকালে একরূপ অনেক ইয়ারকী দিয়াছেন। আবার ভাবিলেন, আচ্ছা দেখা যাউক না, কি ব্যাপারটা দাঁড়ায়। অমনি মনে হইল, যে বড়ঘরে ছেলেটার বিবাহের প্রস্তাব\* হইতেছে, যদি এখন একটা গোলযোগ উঠে, বিবাহটা ভাঙ্গিয়া যাইবে। কি করা যায়? দূর হোক, কিছু টাকা দিয়া মিটাইয়া ফেলা যাক্। এইরূপ নানা প্রকার চিন্তায় জমিদার বাবুর সেদিনকার অপরাহ্ন ও রাত্রি অতিবাহিত হইয়া গেল।

পরদিন প্রাতঃকালে উঠিয়াই তর্কভূষণ মহাশয় কৈলাসকে ডাকাইলেন। কৈলাস আসিলে বলিলেন, "কৈলাস! একটা কথা জিজ্ঞাসা করি, বেশ করে ভেবে চিন্তে উত্তর দেও। তোমার যে সর্বনাশ ঘটবার ঘটেছে, মেয়েটার যে সর্বনাশ হবার হয়েছে; আজ না হোক কাল লোক-জানাজানি হবে; পাপ কখনও গোপন থাকে না; যদি একটু লোক-জানাজানির কষ্টটা সহিতে পার, তা হলে একবার ঐ দুর্বৃত্তদিগকে একটু শিক্ষা দেওয়া যায়।" এই বলিয়া রামহরি মিত্রের সহিত তাঁহার যে কথাবার্তা হইয়াছিল, আত্মপূর্ব্বক সমুদায় বর্ণন করিলেন।

কৈলাস। মহাশয় আমার অভিভাবক, আপনি যা ভাল বোঝেন করবেন; তবে কিনা তা হলে আমি আর গ্রামে থাকতে পারবো না।

তর্কভূষণ। আরে সে কষ্ট ত আছেই। মেয়েটাকে অগ্রস্থানে পাঠালে আর কি? কত লোকের মেয়ে ত বাজারে দাঁড়ায়, তারা কিরূপে গ্রামে থাকে?

কৈলাস। তা আমি আর কি বলবো? মহাশয় যা ভাল বোঝেন করবেন।

এই বলিয়া কৈলাস চলিয়া গেলেন।

কৈলাস চলিয়া গেলে, কর্তা মহাশয় হরচন্দ্রকে ডাকিয়া বলিলেন—  
“হয়, আজ রবিয়ার; কৃষ্ণনগরের উকীল ভূবন মিত্র বাড়ীতে এসেছে কিনা দেখে আয় ত। শুনেছি সে মধ্যো মধ্যো রবিবার বাড়ীতে আসে; যদি এসে থাকে, ডেকে নিয়ে আয়, বলিস্ বিশেষ কথা আছে।”

উকীল ভূবন মিত্র তর্কভূষণ মহাশয়ের বিষয়কর্মসংক্রান্ত সমুদায় মামলা মকদ্দমার তদারক করিতেন; সুতরাং আহ্বান মাত্র আসিয়া উপস্থিত হইলেন। কর্তা তাঁহাকে এক নির্জন ঘরে লইয়া নাম ধাম না দিয়া, বিষয়টা বুঝাইয়া দিলেন, এবং মকদ্দমা চলিতে পারে কিনা জিজ্ঞাসা করিলেন। যখন শুনিলেন যে নালিস চলিতে পারে, তখন প্রীত হইলেন।

ওদিকে জমিদার বাবু পূর্ব দিবসের কথোপকথনের পর স্থির নহেন। তর্কভূষণ মহাশয়ের ক্রোধ দেখিয়া তাঁহার চিত্তে ভয় জন্মিয়াছে। তিনি গোপনে গোপনে সংবাদ লইতেছেন। যখন শুনিলেন উকীল ডাকান হইয়াছিল, তখন একেবারে অস্থির হইয়া পড়িলেন। প্রথমে তর্কভূষণ মহাশয়কে ডাকাইয়া, কিছু টাকা দিয়া মিটাইয়া ফেলবার ইচ্ছা করিলেন। আহারান্তে অপরাহ্নে একজন ভৃত্য আসিয়া তর্কভূষণ মহাশয়কে বড় বাবুর প্রণাম জানাইয়া বলিল, যে একবার রাজবাড়ীতে পদধূলি দিলে বাবু বড় বাধিত হন। তর্কভূষণ মহাশয়ের মন তখনও গরম ছিল। তিনি ভৃত্যকে বলিলেন, “বল গিয়ে আমার অনেক কাজ, যাইবার অবসর নাই।”

জমিদার বাবু বুঝিলেন, গতিক ভাল নয়। ওদিকে তাঁহার পুত্রের বিবাহ সন্নিহিত, গোলমাল নিবারণ করিতে হয় ত আর একদিনও বিলম্ব

করা কর্তব্য নয়। অবশেষে নিরুপায় হইয়া এক ভৃত্যসমভিব্যাহারে সন্ধ্যার পর বাতি জালিয়া নিজে তর্কভূষণ মহাশয়ের ভবনে উপস্থিত হইলেন। তর্কভূষণ মহাশয় সমুচিত সৌজ্ঞ্য সহকারে বাহিরের ঘরে বসিতে আসন দিয়া, অপর সকলকে বাহিরে যাইতে আদেশ করিলেন।

রামহরি। মহাশয় চলে আসবার পর ভেবে দেখলাম যে, আমাদের কিছু দণ্ড দেওয়া কর্তব্য; কারণ ব্রাহ্মণ বাস্তবিক ধনে প্রাণে সারা হছেন।

তর্কভূষণ। যা হোক, এ গুত বুদ্ধিটা যে তোমার ঘটেছে, ইহাই সুখের বিষয়।

রামহরি। মহাশয় আমাকে কত টাকা দেবার জ্ঞ আদেশ করেন?

তর্কভূষণ। আমি এ বিষয়ে অনেক ভেবে দেখেছি; তোমার সম্মুখে একটা প্রকাণ্ড ব্যয় আসছে; অপরদিকে মেয়েটারও রক্ষার উপায় হওয়া চাই; সকল দিক দেখে আমি স্থির করেছি, যে উহাদের তীর্থযাত্রার জ্ঞ পাঁচশত টাকা দেও; এবং উহাদের প্রতিপালনের জ্ঞ দেড় হাজার টাকা দেও। যদিও দেড় হাজার টাকা অল্প হলো, তথাপি ঐ টাকা তাহারা সুদে দিগ্নে কোনও প্রকারে চালাতে পারবে।

রামহরির এত টাকা দেবার ইচ্ছা ছিল না। কিন্তু বুঝিলেন, যে, ব্রাহ্মণ ইহার কমে সন্তুষ্ট হইবার লোক নহেন। মনে মনে ভাবিলেন, দূর হোক ছেলেটার বিবাহে কত হাজার হাজার টাকা যাবে, এ নয় তার একটা ব্যয় মনে করা গেল। (প্রকাশ্যে) “যে আজ্ঞা, আপনি যখন আদেশ করছেন, তখন তাহাই দেওয়া যাবে। কল্যা প্রাতে আমার লোক এসে মহাশয়ের হাতে ঐ টাকা দিবে যাবে। মহাশয় একটু রসিদ লিখে দিবেন।”—এই বলিয়া প্রণাম করিয়া পদগুলি লইয়া বিদায় হইলেন।

পূর্বরাতে তর্কভূষণ মহাশয়ের নিদ্রা হয় নাই, কিন্তু অস্ত্র তিনি নিরুদ্বেগে নিদ্রা গেলেন। প্রাতে উঠিয়া কৈলাসকে বলিলেন,—“তীর্থযাত্রার আয়োজন কর, আবশ্যকমত টাকা আমার নিকট হতে লয়ে যেও।” তাহাকে ঐ দুই হাজার টাকার কথা বলিলেন না; কারণ, ভাবিলেন, দরিদ্র ব্রাহ্মণ, টাকার সন্ধান পাইলেই এটা ওটা করিয়া খরচ করিয়া ফেলিবে। তিনি গোপনে ঐ সমুদায় টাকা কৈলাসের নামে একজন বিশ্বাসী মহাজনের নিকট জমা দিয়া রাখিলেন। মনে মনে রহিল, তীর্থযাত্রা হইতে আসিলে কৈলাসকে বলিবেন ও নিস্তারিণীর দেড় হাজার টাকা তাহাকে দিবেন।

কৈলাস যথাসম্ভব সতর্কতার সহিত আপনাদের হঠাৎ তীর্থযাত্রার প্রকৃত কারণ গোপন রাখিয়া, তীর্থযাত্রার সমুদায় আয়োজন করিতে লাগিলেন। পুত্র ও বধূকে যথাযোগ্য উপদেশ দিলেন। তাহাদের পুত্রকত্তা অধিক হয় নাই; এক পুত্র ও দুই কন্যা, তন্মধ্যে নিস্তারিণী সর্বকনিষ্ঠা, জ্যেষ্ঠা কন্যা পতিগৃহে গৃহধর্মের রত আছে। শুভদিনে নিস্তারিণীকে লইয়া তাহারা তীর্থযাত্রাতে বহির্গত হইলেন। তর্কভূষণ মহাশয় কৈলাসের হাতে ২০০ দুই শত টাকা দিয়া বলিলেন,—“পথে অধিক টাকা সঙ্গে থাকা ভাল নয়, আবশ্যক হইলে লিখিও, হুণ্ডী করিয়া পাঠান যাইবে।”

কৈলাস চক্রবর্তী সপরিপারে তীর্থ-যাত্রাতে বহির্গত হওয়ার প্রায় দশ দিন পরে এক দিন রাত্রি ৯টার সময়ে গ্রামে এই জনরব রাষ্ট্র হইল, যে জামদার বাবুর জ্যেষ্ঠ পুত্র জহরলালের মৃত দেহ কৈবর্ত পাড়ায় বাগানের পাশে, রাস্তার উপরে, পাওয়া গিয়াছে। মথুর কৈবর্ত বাড়ীতে আসিবার সময় দেখিতে পায়, ও জমিদার বাবুকে খবর দেয়। বাবু লোকজন সঙ্গে স্বয়ং আসিয়া ঐ দেহ তুলিয়া ঘরে লইয়া গিয়াছেন। কে এ কাজ

করিয়াছে, তাহার কিছুই উদ্দেশ্য পাওয়া যায় নাই। এই সংবাদ গ্রামে প্রচার হইলে, যাহারা তখনও জাগ্রত ছিল, তাহারা সকলেই এক প্রকার ভীতি অনুভব করিতে লাগিল। কি ভয়ঙ্কর কথা! গ্রামের জমিদারের ছেলেকে মারিয়া ফেলিয়া গেল, কে এমন কাজ করিল জানিতে পারা গেল না! এই উপলক্ষে নানা প্রকার জল্পনা ও সমালোচনা চলিতে লাগিল। কেহ বা বলিল,—“আজ কালকার ছেলেরা মদের ঘাস ধরতে শিখেছে; কুসঙ্গীরও অপ্রতুল নাই, মাতালে মাতালে বগড়া হয়ে মারামারি হয়েছে বোধ হয়;” কেহ বা বলিল “কোথায় কার বাড়ীতে বোধ হয় যাতায়াত করতো, একলা পেয়ে সাজা দিয়েছে;” কেহ কেহ বলিল,—“হাঁসের দল ত ইহার তলে নেই?” গুনিয়া অপরে বলিল,—“তা হতেও পারে।”

এদিকে জমিদার রামহরি মিত্র মহাশয়ের অবস্থা কিরূপ তাহার বর্ণনা নিম্নয়োজন। তিনি যখন গুনিলেন যে তাহার কৃতী পুত্র জহরলালের মৃত দেহ পথের পার্শ্বে পাওয়া গিয়াছে, তখন—“অ্যা বল কি?” বলিয়া কিছুক্ষণ আর মুখে কথা সরে না। যে পুত্রকে তিনি শিক্ষিত ও কৃতী করিয়া বিষয় রক্ষার জন্ত আনিয়াছেন, যাহার হস্তে অচির কালের মধ্যেই সমুদায় কার্যভার গুস্ত হইবে, যাহার স্বন্ধে সমুদায় ভার অর্পণ করিয়া তিনি বহুদিনের আকাঙ্ক্ষিত নিদ্রাসুখ অনুভব করিবেন বলিয়া আশা করিতেছেন, আর দুই দিন পরেই যাহাকে লইয়া বিবাহ দিবার জন্ত কলিকাতা যাত্রা করিতে হইবে, সেই কুলের প্রদীপ পুত্রের অকাল-মৃত্যু! ইহাতে বিষয়ী লোকের মন কি প্রকার হইতে পারে, তাহা সহজেই অনুমান করা যায়। তিনি অবিলম্বে লোকজনসহ কৈবর্ত পাড়ার দিকে ধাবিত হইলেন। গিয়া দেখেন, পাড়ার কতকগুলি লোক আলো জালিয়া জহরলালকে ঘিরিয়া রহিয়াছে; মুখে জলের ছাট দিতে দিতে



তাহার চেতনার সঞ্চার হইয়াছে ; সে চক্ষু খুলিয়া চাহিয়াছে ; কিন্তু কথা কহিতে পারিতেছে না । দেখিয়া জমিদার বাবুর দেহে প্রাণ আসিল । তৎক্ষণাৎ তাহাকে পালকীতে তুলিয়া গৃহে লইয়া যাওয়া হইল ; এবং একঘণ্টা অতিবাহিত হইতে না হইতেই ডাক্তার ও ঔষধের সাহায্যে জহরলাল উঠিয়া বসিল ও কথা কহিতে আরম্ভ করিল । কিন্তু কে যে তাহাকে প্রহার করিয়াছে, তাহার কিছুই বলিতে পারিল না । এই মাত্র বলিল, সে একাকী আসিতোছিল, হঠাৎ করেকজন লোক দোড়িয়া আসিয়া তাহার গলে বস্ত্র দিয়া ও মুখে কাপড় বাঁধিয়া প্রহার করিতে আরম্ভ করিল । সে তাহাদের হাত হইতে নিষ্কৃতি পাইবার জন্ত চেষ্টা করিতে, গলার কাপড় এমন করিয়া কষিয়া ধরিল, যে সে অস্ত্রহীন হইয়া পড়িল ; এই মাত্র তাহার স্মরণ আছে, আর অধিক মনে নাই । ডাক্তার বাবু পরীক্ষা করিয়া বলিলেন, কোনও অঙ্গের কোনও গুরুতর হানি হয় নাই । দুই তিন দিন পরেই কলিকাতা যাত্রা করা যাইবে । তখন জমিদার বাবু অনেকটা নিশ্চিন্ত হইলেন ; এবং স্বীয় শয়ন গৃহে গিয়া কে এ প্রকার কাজ করিল তাহা চিন্তা করিতে লাগিলেন । একদার ভাবিলেন, কৈলাস চক্রবর্তীর কাজ ; আবার স্মরণ হইল, সে ব্রাহ্মণ সপরিবারে তীর্থযাত্রা করিয়াছে । আবার ভাবিলেন, তাহার পুত্রের কাজ, পুনরায় মনে করিলেন, ইহা একাকী তাহার কন্ম নহে, দলে অল্প লোক নিশ্চয়ই আছে । শেষে স্থির করিলেন, আর কাহারও কাজ নহে, ঐ বিশ্বনাথ তর্কভূষণের কাজ । ব্রাহ্মণ বড়ই গর্বিত, কোমরে টাকার জোরও আছে, বাড়ীতে যমদূতের মত কতকগুলো ছাত্রও আছে, সেই ব্রাহ্মণই নিজের পুত্র ও ছাত্রদিগের দ্বারা এই কাজ করিয়াছে । আচ্ছা, বিবাহটা হয়ে যাক্, একবার দেখুবো কত ধানে কত চাউল ! ঐ ভিটেতে ঘুঘু না চরাই ত আমার নাম রামহরি মিত্র নয় । এইরূপ ভাবিতে

ভাবিতে বাবু নিদ্রাগত হইলেন। ওদিকে তর্কভূষণ মহাশয় সে রাতে ইহার বিন্দু বিসর্গ কিছুই জানেন না। প্রাতে উঠিয়া সমুদায় বিবরণ শুনিয়া ধীরভাবে বলিলেন,—“পাপের শাস্তি হাতে হাতে, দরিদ্রের উপর অত্যাচার করলে ধর্ম্মে সবে কেন?” রামহরি মিত্র দুই দিবস পরে স্বীয় পুত্রকে কলিকাতায় লইয়া গিয়া বিবাহ দিয়া আনিলেন।

---

## দশম পরিচ্ছেদ

প্রকৃতি যাহাদিগকে স্মক্ৰু দিয়াছেন, এবং তাহার পরিচয় যাহারা পাইয়াছে, তাহাদের পক্ষে গাইতে না পারা একটা বিশেষ ক্লেশ। পূর্বেই বলিয়াছি, তর্কভূষণ মহাশয়ের স্বর্গীয় পিতা ৬ তারাদাস বিজ্ঞাবাচস্পতি মহাশয় একজন শান্তি সাধক ও সুগায়ক লোক ছিলেন। অনেক দিন রাত্রি দ্বিপ্রহরের সময় কালী-মন্দির হইতে তাঁহার সুমধুর কণ্ঠ-নিঃসৃত শ্রোতাবিষয়ক সঙ্গীত শ্রুত হইত। ঐ সকল সঙ্গীত তাঁহার সাধনের অঙ্গস্বরূপ ছিল। তাঁহার স্বরচিত অনেক সঙ্গীত এই গ্রামে, বিশেষতঃ এই পরিবার মধ্যে প্রচলিত আছে। তাহার একটা নিম্নে উদ্ধৃত করা যাইতেছে। এই সঙ্গীতটি শঙ্কর মধ্যে মধ্যে গাইয়া লোককে শুনাইয়া থাকেন।

সঙ্গীত।

দুর্গতিহারিণি ! দুর্গে ! তার এ দীনে ;

ভকতি-প্রণতি-স্তুতি-মতি-গতি-বহীনে।

ক্ষেমঙ্কর ক্ষেমঙ্করি

আত্মশক্তি পরেশ্বর,

চরণ-সরোজ-রজ দেও পাপী মলিনে।

শৈশব, যৌবন, জরা

বিফলে যে যায় তারা,

না ভজিহু না পূজিহু ও চরণ-নলিনে।

তারাদাসে ও শ্রীপদে,

বিনয়ে পড়িয়ে কাঁদে,

দেখগো শঙ্করি ! যেন ভবান্নবে ডুবিনে।

বিজ্ঞাবাচস্পতি মহাশয়ের স্মক্ৰু এই পরিবারে অবতীর্ণ হইয়াছে। কিন্তু সকলি বৃথা ! এক হরচন্দ্র বাতীত আর কাহারও সে চর্চা নাই।

এই পরিবারের শিশু কণ্ঠাগুলি যখন কোন যাত্রা বা রামায়ণাদি গান শুনিতে যায়, তখন হয়ত কোন গানের একটা কলি একবার শুনিয়াই এমনি শিথিয়া আসে, যে বাড়ীতে আসিয়া অবিকল নকল করিয়া ও অঙ্গভঙ্গী সহকারে নাচিয়া দেখায়। তর্কভূষণ মহাশয় কতবার সেইরূপ গান শুনিয়া ও নৃত্য দেখিয়া কৌতুক করিয়াছেন। কিন্তু যতদিন তাহাদের লজ্জা না থাকে ততদিন নাচিয়া গাইয়া বেড়ায়; একটু বড় হইলেই বৃদ্ধা রমণীরা “দূর হ পোড়ার মুখী” বলিয়া লজ্জা আনিয়া দেন; অমনি সে সঙ্গীত শক্তি লুকাইয়া যায়। পূর্বেই বলিয়াছি, শঙ্কর ও গৌরীপতি উভয়েই বাল্যকালে বেশ গাইতে পারিতেন; কিন্তু অনেক দিন হইল সে পাট সাঙ্গ হইয়াছে। কত বৎসর হইল আর তাঁহারা মুখ খোলেন নাই। তাঁহাদের যে সে শক্তি আছে, তাহার কিছুই প্রমাণ নাই। তবে শঙ্কর মধ্যে মধ্যে যখন সনাগত লোকদিগের অনুরোধে পিতামহ মহাশয়ের স্মরণিত হই একটি সঙ্গীত গাইয়া শুনাইয়া থাকেন, তখন তাঁহার স্বাভাবিক শক্তি দেখিয়া লোকে আশ্চর্যান্বিত হয়। ভবেশ বালক, তাহার এখনও জ্যেষ্ঠদিগের হ্রাস বিজ্ঞতা জন্মে নাই; স্মরণ্য সে সঙ্গীত-প্রবৃত্তিকে একেবারে সংযত করিয়া রাখিতে পারে না। বাড়ীতে কর্তার ও জ্যেষ্ঠদিগের ভয়ে ছাঁঁ করিবার সাধ্য নাই; স্মরণ্য স্কুলে টেবিল চাপড়াইয়া সমাধ্যায়ীদিগের নিকট গাইয়া থাকে। কিন্তু গৃহে আত্মীয় স্বজনের নিকটে গাইলে গানগুলি যেরূপ নির্দোষ হইত, সে সকল গান সেক্ষেপ নির্দোষ থাকে না। হরচন্দ্র নিষ্কণ্ট লোক, তিনি এ বিষয়ে কিছু অগ্রসর! তিনি কেবল সুগায়ক নহেন, গোপনে একজন ওস্তাদের নিকট বেশ বাজাইতেও শিখিয়াছেন। কিন্তু এই সঙ্গীতপ্রিয়তার জন্ত তিনি অনেক নিষিদ্ধ কার্য্যও করিয়া থাকেন। যে সকল দলের প্রতি তর্কভূষণ মহাশয়ের অতিশয় ঘৃণা, তিনি আমোদপ্রিয়তার

অনুরোধে গোপনে সে সকল দলেও মিশিয়া থাকেন। চিমু ঘোষ এবং জহরলাল মিত্রের বিবরণ সকলেই কিছু কিছু জানিয়াছেন; হরচন্দ্র গোপনে তাহাদেরও সঙ্গে মিশিতে ক্রটি করেন না। তবে এ কথাটা বলা আবশ্যিক যে, অত্য়াপি তিনি কোনও প্রকার গুরুতর পাপে পতিত হন নাই। তিনি সুরাপায়ীদিগের মধ্যে থাকেন, কিন্তু সুরা স্পর্শ করেন না; কেবলমাত্র তামাক খাইতে শিখিয়াছেন; এতদ্ব্যতীত তাঁহার কোনও প্রকার নেশা নাই। সপ্তাহের অধিকাংশ দিন রাত্রে হরচন্দ্র বাড়ীর লোকের সঙ্গে আশারে ঘুটিতে পারেন না। তিনি সেই যে বৈকালে বাহির হন, একেবারে রাত্রি ৯:৩০টা, কোনও দিন বা ১১টার সময় গৃহে ফিরিয়া আসেন। কষ্ঠী এক একদিন জিজ্ঞাসা করেন, “কৈ হর কোথায়?” গৃহিণী বলেন, “সে পবে থাকে; এখন তোমরা খাও।” কষ্ঠী আর সে বিষয়ে অধিক প্রশ্ন করেন না। কারণ পুত্রেরা প্রায় স্বতন্ত্র ঘরে আহাৰ করিয়া থাকে। হরচন্দ্রের আর একটা বাতিক আছে। তিনি দাবা খেলিতে অতিশয় ভালবাসেন। প্রায় প্রত্যহ বৈকালে পাড়ার একটা নিমন্তক বালকের বাড়ীতে দাবা খেলিতে যান। তিনি এমনি পাকা খেলোয়াড়, যে বৃদ্ধেরাও অনেক সময় তাঁহাকে পীড়াপীড়ি করিয়া তাঁহার সঙ্গে খেলিয়া থাকেন। দাবা খেলা সাজ হইলে, সন্ধ্যার পর হরচন্দ্র আর এক পাড়ায় ঐক্লপ আর এক নিমন্তক বাড়ীতে গান বাজনার জন্ত গমন করেন। ঐ গৃহের অভিভাবক তাঁহার নমবয়স্ক এক যুবক। তাহাকে নিবারণ করিবার কেহ নাই; এক বৃদ্ধা বিধবা মাতা; তিনি নিবারণ করিয়া রাখিতে পারেন না। গান বাজনার সখটা খুব আছে। বাহিরের ঘরে বিবিধ বাত্মজ্ঞ সর্বদা পড়িয়া আছে; এবং প্রাতঃকাল নাই, মধ্যাহ্ন নাই, সর্বদাই আমোদপ্রিয়দের কেহ নাকি কেহ আসিয়া সেগুলি চাপড়াইতেছে। চিমু ঘোষ ও জহরলাল এই আমোদ-প্রিয়

দলের অগ্রণী ; সুতরাং এই ভবনে সর্বদা তাহাদেরও গুভাগমন হইয়া থাকে । হরচন্দ্র লুকাইয়া মধ্যে মধ্যে জহরলালের বৈঠকখানাতেও গিয়া থাকেন ।

এইরূপ গ্রামের আমোদ-প্রিয় দলের সহিত হরচন্দ্রের একটা ঘনিষ্ঠ সংস্ক দাঁড়াইয়াছে । এই দল মধ্যে মধ্যে পার্শ্ববর্তী গ্রাম সকলে নিমজ্জিত হইয়া আমোদ করিতে যায় । তখন হরচন্দ্রকে তাহাদের সহচর হইবার জন্ত নানাপ্রকার ছল ও প্রতারণা উদ্ভাবন করিতে হয় । অনেক কৌশলে বাড়ীর লোককে প্রতারণা করিয়া, এক রাত্রির জন্ত বিদায় লইয়া যান, আবার পরদিন প্রাতেই ফিরিয়া আনেন ; সুতরাং বিশেষ কিছু অনুসন্ধানের প্রয়োজন হয় না । শঙ্কর বড় চতুর লোক, তিনি কিছুদিন হইতে এইরূপ প্রতারণার কিছু কিছু প্রমাণ পাইয়াছেন ; এবং কর্তাকে না জানাইয়া গোপনে হরচন্দ্রকে কয়েকবার সতর্ক করিয়া দিয়াছেন । কিন্তু হরচন্দ্র কোন ক্রমেই সঙ্গীদের অনুরোধ ছাড়াইতে পারেন না । কর্তা এত সংবাদ কিছুই জানেন না, কিন্তু শিবচন্দ্র, শঙ্কর, বিজয়া প্রভৃতি পরিবারস্থ অপর সকলেই এজন্ত বিশেষ দুঃখিত । পরিবারের লোকে তাঁহার উপরে বিশ্বাস রাখিতে পারিতেছে না, ইহা মনে করিয়া হরচন্দ্র সময়ে সময়ে লজ্জিত ও দুঃখিত হয় ; এবং এক একবার অনুতাপের উদয় হয় ; ও তৎসঙ্গে কুসঙ্গীদিগের সঙ্গ পরিত্যাগ করিবার সঙ্কল্পও হৃদয়ে প্রবল হয়, কিন্তু কার্যকালে অভ্যাস-দোষটাই প্রবল থাকিয়া যায় ।

এবারে শীতের অন্তে গ্রামের আমোদ-প্রিয় দল স্থির করিল, যে সিংহঘোড়ের প্রসিদ্ধ মুস্তফী বাবুদিগের ভবনে চৈত্র মাসের রাস দেখিতে যাইবে । সিংহঘোড় গ্রাম নশিপুর হইতে প্রায় বিশ পঁচিশ ক্রোশ অন্তরে । ইচ্ছামতী নদী দিয়া নৌকাতে গেলে প্রায় দুই দিন লাগে ।

তাহাদের পরামর্শ এই যে, তাহারা দলবদ্ধ হইয়া যাইবে, পথে নৌকাতে আমোদ চলিবে; তৎপরে সিংহঘোড়ে গিয়া বাবুদের এক বাগানে থাকিবে; জহরলাল অগ্রে পত্র দ্বারা সিংহঘোড়ের বাবুদের সহিত সে প্রকার বন্দোবস্ত করিয়াছে। চিমু ঘোষ কলিকাতা হইতে আসিয়া জুটিবে। তাহারা পাঁচ সাত দিন আমোদ প্রমোদে কাটাইয়া গ্রামে ফিরিয়া আসিবে। কিন্তু হরচন্দ্র সঙ্গী না হইলে তাহাদের সকল পরামর্শই বৃথা হয়; কারণ তাহা না হইলে তাহাদের আমোদ জন্মিবে না। হরচন্দ্র প্রথমে অস্বীকার করিলেন। তিনি অনেকবার বাড়ীর লোককে প্রতারণা করিয়াছেন; এবারে অপেক্ষাকৃত দীর্ঘকালের জ্ঞাত স্থানান্তরে যাইতে হইবে, তাহার উপযুক্ত একটা ছল উদ্ভাবন করাই কঠিন। বাড়ীতে কি বলিয়া যাইবেন, তাহা তাঁহার বুদ্ধিতে যোগাইতেছে না। আমোদপ্রিয় দল তর্কভূষণ মহাশয়ের প্রকৃতি ও তাঁহার পারিবারিক বন্দোবস্তের কথা বিশেষ জানে না, এবং সম্ভানেরা তাঁহাকে কি প্রকার ভয় ও ভক্তি করে, তাহাও সম্পূর্ণ অবগত নহে; সুতরাং তাহারা হরচন্দ্রের ইতস্ততঃ দেখিয়া অসহিষ্ণু হইয়া উঠিতেছে; বলিতেছে—“ছল আবার কি, বাড়ীতে বল যে আমি সিংহঘোড়ে রাস দেখতে যাই।” এ পরামর্শ অনুসারে কার্য্য করা হরচন্দ্রের পক্ষে সম্ভব নহে।

দৈবের কি ঘটনা! যখন হরচন্দ্রের মন এইরূপে দোলায়িত, তখন তাঁহার স্বগুরালয় হইতে পত্র আসিল যে, বৈশাখের প্রারম্ভেই তাঁহার একটা শ্রালীর বিবাহ। বৈশাখের ১লা কি ২রা তাঁহার স্ত্রী পুত্রকে লইবার জ্ঞাত লোক আসিবে; এবং সেই সঙ্গে হরচন্দ্রকেও যাইতে হইবে। হরচন্দ্র বিধি সদয় বলিয়া আনন্দে করতালি দিয়া উঠিলেন। তাঁহার স্বগুরালয় সিংহঘোড় হইতে তিন চারি ক্রোশ অন্তরে। এই সংবাদ

পাইবামাত্র তিনি স্থির করিলেন যে, বাড়ীতে এই কথা বলিয়া যাইবেন যে, সিংহঘোড়ের রাস দেখিয়া স্বপ্তুরালয়ে গমন করিবেন; ভিতরকার কথাটা গোপন থাকিবে। তর্কভূষণ মহাশয় ভিতরকার কথা কিছুই জানেন না; সুতরাং হরচন্দ্র যখন প্রস্তাব করিলেন যে, এই উপলক্ষে তাঁহার সিংহঘোড়ের রাস দেখিবার ইচ্ছা, অতএব তিনি কয়েক দিন পূর্বে যাত্রা করিয়া রাস দেখিয়া স্বপ্তুরালয়ে যাইবেন, তখন তিনি তাঁহার প্রাভাবিক স্নেহপ্রবণতা বশতঃ সে প্রস্তাবে সম্মত হইলেন। যথাসময়ে হরচন্দ্র গ্রাম হইতে যাত্রা করিলেন।

প্রথমে শঙ্করের মনেও কোনও সন্দেহ হয় নাই; তিনি সরল ভাবেই ভাবিয়াছিলেন, যে শ্রালীর বিবাহে স্বপ্তুরালয়ে যাওয়াই হরচন্দ্রের মুখ্য উদ্দেশ্য, রাস দেখাটা গোণ মাত্র; কিন্তু যখন শুনিলেন যে, সেই দিনে গ্রামের আমোদ-প্রিয় দলও সিংহঘোড়ের রাস দেখিতে বাহির হইয়াছে, তখন তাঁহার মনে কিঞ্চিৎ শঙ্কার ও সেই সঙ্গে হরচন্দ্রের প্রতি ক্রোধেরও উদয় হইল। কিন্তু সে কথা-তিনি কাহারও নিকট কিছু ভাঙ্গিলেন না। কেবল মাত্র বিজয়াকে একবার বলিলেন, “ছোট পিসি! হর যে রাস দেখতে গেল, এটা ভাল হলো না; গুন্‌ছি হতভাগা গুলো না কি সেই সঙ্গে গিয়েছে।” বিজয়া শুনিয়া অতিশয় চিন্তিত হইলেন; কিন্তু কাহাকেও কিছু বলিলেন না।

ওদিকে যুবকদল এই পরামর্শ করিয়া রাখিয়াছে যে, গ্রাম হইতে বাহির হইবার সময়ে সকলে একত্রে যুটবে না। একজন আগে গিয়া গ্রামের বাহিরে একখান নৌকা করিয়া রাখিবে, সেখানে সকলে নানা দিক দিয়া আসিয়া যুটবে। চিমু ঘোষ কলিকাতা হইতে আসিয়া পথে তাহাদের সঙ্গ লইবে। তদনুসারেই কার্য্য হইল। বন্ধনমুক্ত বিহঙ্গমের ত্রায় যুবকদলের আনন্দের সীমা নাই। নৌকাতে এক বেলার পথ একদিনে



যাওয়া হইতেছে! দিন রাত্রি কেবল গান বাজনা, হাস্ত পরিহাস চলিয়াছে। চিমু ষোষ বুড়ো শালিকের ঘাড়ের রোয়া ছিঁড়িয়া বাচ্ছা হইয়া এই দলে মিশিয়াছে। সে ও জহরলাল বলিল, শাদা চোখে আমোদ করিতে পারিবে না! কিন্তু হরচন্দ্র আসিবার অগ্রে সকলকে সন্তা-বদ্ধ করিয়া আনিয়াছিলেন, যে, পথে মাতলামি করা হবে না; সুতরাং চিমু ও জহরলাল যখন পূর্বোক্ত প্রস্তাব করিল, তখন অপর সকলে সেই প্রতিশ্রুতি শ্রবণ করাইয়া দিল। কিন্তু চিমু শুনিবার লোক নয়; সে বলিল, “রেখে দেও তোমাদের প্রতিজ্ঞা, এক্রূপ কথা দেওয়াই ত অগ্নায়। তাই বলে কি আমোদটা মাটি করবো? আমি বাপু কথা দিই নাই, আমার উপর দাবী দাওয়া নাই।” এই বলিয়া নাজের ব্যাগ হইতে সুরার বোতল ও গ্লাসটা বাহির করিয়া ঢালিয়া পান করিতে প্রবৃত্ত হইল। হরচন্দ্র মাঝিকে নৌকা ধরিতে আদেশ করিয়া, লক্ষ দিয়া তীরে উঠিলেন; এবং বলিলেন, “আমি তোমাদের সঙ্গে যাব না; আমি একলাই যাব।” আর একজন ক্রোধ করিয়া চিমুর বোতলটা জলে ফেলিয়া দিল;—“তিনশ বার বারণ করলাম, একটা দিন ঐ ছাই না খেলেই নয়।” চিমু বলিল, “হতভাগা বেটা বামন! আমার বোতল ফেলে দিলি যে।” এবং এই বলিয়া উক্ত ব্রাহ্মণ-যুবককে প্রহার করিতে উদ্বৃত্ত হইল। সেও ছাড়িবে কেন; দুই জনে হাতাহাতি। অপরেরা উঠিয়া থামাইতে ব্যস্ত; ওদিকে মাঝি চোঁচাইতেছে, নৌক ডুবিয়া যায়! সকলে পড়িয়া দুইজনকে থামাইয়া দিল। হরচন্দ্র কিছুক্ষণ আর নৌকাতে উঠিলেন না; তীরে তীরে পদব্রজে চলিলেন; নৌকাস্থ অপরাপর যুবকগণ অনেক সাধ্য সাধনা করাতে কিয়ৎক্ষণ পরে আবার নৌকাতে আসিলেন। ক্রমে আমোদ-প্রিয় দল সিংহবোড়ে গিয়া উপস্থিত।

জহরলাল একজন জমিদারের সন্তান ও নিমজ্জিত ব্যক্তি, সুতরাং

পূর্ব হইতেই তাহার ও তাহার বন্ধুগণের জন্ত একটি বাগান বাড়ীতে দোতালায় দুইটা বৈঠকখানা ঘর নির্দিষ্ট হইয়াছিল, সকলে তাহাতেই আশ্রয় পাইল। হরচন্দ্র সিংহবোড়ে পৌছিয়া এক কুটুম্বের বাড়ীতে অবস্থিতি করিতে লাগিলেন।

এদিকে মুস্তফা বাবুদের বাড়ীতে রাসের আমোদটা ভরপুর রকম চলিয়াছে। যাত্রা, কবি, রামায়ণ গান, বাইনাচ, কিছুই আর বাকি নাই। বাবুদের বাড়ীর পশ্চাতে এক প্রকাণ্ড দীঘি; তাহাতে প্রতাহ সন্ধ্যার পূর্বে নৌকাতে ময়ূর-পঙ্খী ও খেমটার নাচ হইয়া থাকে। সে যে কি জবজ্বল, কি কুৎসিত, কি ব্রীড়াজনক ব্যাপার, তাহা প্রত্যক্ষ না করিলে ধারণা হয় না। সে সময়ে যে নৃত্য ও যে সঙ্গীত হয়, তাহার বর্ণনা করা দূরে থাক, শ্রবণেও লজ্জার উদয় হয়। তাহা এমনি অশ্রাব্য, যে পতিপত্নীতে এক সঙ্গে শুনিতে লজ্জা পায়। অথচ স্কুলের ছাত্র ও শিক্ষক, পিতা ও পুত্র, মাতা ও সন্তান, এবং কুলের কুলবধু প্রভৃতি সহস্র সহস্র লোকে প্রতিদিন এই দৃশ্য দেখিতেছে ও শুনিতেছে।

নশিপুরের আমোদ-প্রিয় দল রোজ এদিকে আসে না; তাহারা রামায়ণ গানের ধারেও যায় না; যাত্রাহুলে দুই একবার বসে; কিন্তু তাহারা প্রধানতঃ আর এক কার্য্যে ব্যস্ত আছে। এতদুপলক্ষে কলিকাতা হইতে চারিটা প্রসিদ্ধ বাই আনা হইয়াছে। অপর একটি বাগানে তাহাদের বাসা। চিমু ঘোষ প্রভৃতি তাহাদের পরিচর্য্যার জন্ত সর্বদা ব্যস্ত। সে স্ত্রীলোকগুলির আদর কি! তর্কভূষণ মহাশয় শিষ্যবাড়ীতে কখনও এত আদর পাইয়াছেন কিনা সন্দেহ! সেখানকার আসর সর্বদাই গরম। অবশ্য, হরচন্দ্রের প্রতি স্মৃতিচারণ করিয়া এ কথাটা বলিতে হইবে, যে তিনি ইহার ভিতরে নাই। তিনি রাস দেখিয়া বেড়াইতেছেন,

রামায়ণ গান ও কবি গুনিতোছেন, যে দুই চারিজন নূতন লোকের সহিত আলাপ হইয়াছে, তাহাদের সঙ্গে বক্তৃতা করিতেছেন।

বাবুদের বাড়ীতে দুই দিন বাইনাচ হইয়া গেল। দ্বিতীয় দিবস চিমু ঘোষ ও জহরলাল উদ্যোগী হইয়া মুস্তফী বাবুকে বলিল, “আমাদের সঙ্গে একজন ভাল বাজিয়ে লোক আছেন, তিনি অত্যাশ্চর্য আসরে বাজাইবেন।” মুস্তফী বাবু অতীব সন্তুষ্ট হইয়া সে কথা প্রচার করিয়া দিলেন। চিমু ও জহরলাল আশা করিয়াছিল যে, হরচন্দ্রকে সে আসরে বাজাইতে সম্মত করিতে পারিবে। কিন্তু হরচন্দ্র কোন প্রকারেই সম্মত হইলেন না। চিমু ও জহরলাল অনেক পীড়াপীড়ির পর অকৃতকার্য হইয়া বলিল, “আচ্ছা, আজ আমাদের বৈঠকখানাতে বাইজীদের গান ও নাচ হবার কথা হচ্ছে, তাতে তোমাকে বাজাতে হবে, তখন না বলতে পারবে না।” হরচন্দ্র মনে মনে স্থির করিয়া রাখিলেন তাহাতেও না বলিবেন, কিন্তু মুখে কিছু বলিলেন না।

পরদিন বৈকালে নশিপুরের দলের বৈঠকখানাতে বাইদের আসর হইল। আজ বহুজনসমাগম নয়; কতিপয় গণ্য মান্য সঙ্গীত-বিদ্যায় রসজ্ঞ ব্যক্তির সমাগম। কেবল চিমু ও জহরলাল নয়, দলস্থ লোকেরা সকলেই হরচন্দ্রকে ধরিয়া বসিল, বাজাইতেই হইবে। হরচন্দ্র একবার ভাবিলেন, “বারাঙ্গনার সঙ্গে বাজান, ছিঃ! তর্কভূষণের বংশের ছেলের কি এই কাজ? বিশেষতঃ শ্বশুরালয়ের এত নিকটে; না বাজাব না।” আবার ভাবিলেন, “সাধ করে বাজনাটা শিখলাম, এই ত সে বিদ্যাটা দেখাবার উপযুক্ত সময়।” আবার ভাবিলেন—“না, না, বাপ্পে এ কথা যদি বাবার কাণে উঠে?” পুনরায় মনে কলিলেন, “কে বা দেখতে এসেছে, কারই বা এত গরজ পড়েছে, যে সংবাদটা আবার দিতে

যাবে?" এইরূপ পাঁচ সাত প্রকার চিন্তাতে তাঁহার প্রথম চিন্তাটা চাপা পড়িয়া গেল। তিনি সম্পূর্ণ কর্তব্য নিষ্কারণ করিতে না করিতে, যুবকদল তাঁহাকে ঠেলিয়া বসাইয়া, তাঁহার হাতে পাখোয়াজ দিয়া আরম্ভ করাইয়া দিল।

হরচন্দ্র প্রথম প্রথম লজ্জাতে একটু সংকোচের সহিত বাজাইতে লাগিলেন; কিন্তু অবশেষে নারীকণ্ঠের তানলয়শুদ্ধ হিন্দী সঙ্গীত, ও সভাস্থগণের আনন্দমুচক সাধুবাদ যখন আসরকে জমাইয়া তুলিল, তখন তিনি আত্মহারা হইয়া সেই স্বধা-হৃদে মগ্ন হইয়া গেলেন। বাইগণ তাঁহার বিজ্ঞার দোড় দেখিবার জ্ঞাত আপনাদের বিজ্ঞা সাধ্য ব্যয় করিতে ক্রটি করিল না, কিন্তু হরচন্দ্র সমুদায় পরীক্ষায় উত্তীর্ণ হইয়া চারিদিক হইতে শত ধন্যবাদ প্রাপ্ত হইলেন। সকলেই জিজ্ঞাসা করিতে লাগিল, মানুষটা কে? সঙ্গীদের অনেকে হরচন্দ্রের ভাব জানিত; তাহারা কেবলমাত্র বলিল, “আমাদের গ্রামের একটা লোক।” কিন্তু চিমু ঘোষ অসাবধানতাবশতঃই হউক, আর তর্কভূষণ মহাশয়কে অপমানিত করিবার উদ্দেশ্যেই হউক, বলিল, “নশিপুর গ্রামের সুপ্রসিদ্ধ বিশ্বনাথ তর্কভূষণের চতুর্থ পুত্র। উহার নাম হরচন্দ্র।”

যাঃ! সর্বনাশ হইয়া গেল; হরচন্দ্র যে ভয় করিয়াছিল, তাহাই বুঝি ঘটিল। একথা বুঝি নশিপুরে চলিল। সভা ভাঙিয়া গেলে হরচন্দ্রকে বিযক্ত দেখিয়া জহরলাল বলিল, “তুমি যেমন পাগল, একথা আবার নশিপুরে বলতে গেল কে?” কিন্তু কিছুতেই হরচন্দ্রের মুখ প্রসন্ন হইল না। তাঁহার যেন মনে হইতে লাগিল, যে, দেশ ব্যাপিয়া যে পিতার যশ, তাঁহাকে আজ তিনি লোকসমাজে হীন করিয়া গেলেন। সে দিন রাত্রি অন্ততাপযন্ত্রণায় তাঁহার নিদ্রা হইল না। শয্যাতে পার্শ্ব পরিবর্তন করিয়া রাত্রি কাটাইলেন। অন্ততাপের মুহূর্ত্তে কৃত কথাই

মনে হইতে লাগিল। কুম্ভের অনেক দোষ, কেন বা তাই গাইতে বাজাইতে শিখিয়াছিলাম, সেইজন্তেই ত এত জালা। লেখা পড়া কিছু শিখলাম না। তাই না হোক, ভদ্রলোকের ছেলে, বাপের নামটা আছে, তার মত কাজ কি এই করিলাম। ভাবিতে ভাবিতে রাত্রি পোহাইয়া গেল। হরচন্দ্র প্রত্যুষে এই প্রতিজ্ঞা করিয়া গাত্রোত্থান করিলেন, যে সে প্রকার অনুরোধ আর রক্ষা করিবেন না।

হায়! মানবের পতনের গূঢ়তত্ত্ব যাহারা জানিয়াছেন, তাঁহারা ইহা জানিয়াছেন, যে সকল শৃঙ্খল অপেক্ষা আদর্শ ও অভ্যাসের শৃঙ্খল সর্বাপেক্ষা দুশ্ছেদ্য। যে পাপের সহিত মিষ্টতার যোগ আছে, যাহা আমাদিগকে মুখী করিয়া পতিত করে, তাহার হস্তকে অতিক্রম করা অতীব দুষ্কর। ইহার উপরে যদি সে পাপ অভ্যাস হয়, সে মুখ যদি বার বার ভোগ করিয়া থাকি, তাহা হইলে ত কথাই নাই। তখন যদি তাহার হস্ত হইতে নিষ্কৃতি লাভ করিবার জন্ত বার বারও চেষ্টা করি, দেখিতে পাই, বালুকারাশি-নির্ম্মিত দেতুর দ্বায় কোন প্রতিজ্ঞাই ধীর থাকে না। বার বার প্রতিজ্ঞা, বার বার ভঙ্গ! বার বার উত্থান, বার বার পতন! মন যাতনা পায়, ক্রন্দন করে, অনুতপ্ত হয়, তথাপি পতনের দ্বায় পুরাতন অনলেই পতিত হয়।

হরচন্দ্র প্রত্যুষে প্রতিজ্ঞা করিয়া উঠিলেন যে, ও প্রকার অনুরোধ আর রক্ষা করিবেন না, কিন্তু সেদিনকার সূর্য্য অস্তাচলশিখরে যাইতে না যাইতে প্রতিজ্ঞা ভঙ্গ হইল। সেদিন বাইদিগের নিজ বাসাতে গীতবাণের আসর হইল। বাইগণ পূর্ব্ব দিনের বাজনাতে এত প্রীত হইয়াছিল, যে সেদিন আপনারাই নিজেদের বাসায় গীতবাণের আয়োজন করিল। তাহাদের অনুরোধক্রমে চিনু যখন আসিয়া আবার হরচন্দ্রকে বাজাইবার জন্ত অনুরোধ করিল, তখন হরচন্দ্র প্রথমে অস্বীকৃত হইলেন

কিন্তু যখন গুনিলেন, যে বাইগণ তাঁহার বাজনাতে মুগ্ধ হইয়া এইরূপ স্থির করিয়াছে, তখন প্রশংসা-প্রিয়তার গূঢ় শাস্তিতে আপত্তিটাকে অনেক পরিমাণে মন্দীভূত করিয়া ফেলিল। পূর্বদিনের সেই আসর ও তাহার উত্তেজনা, বামাকণ্ঠের সেই চিত্ত-দ্রবকারী সঙ্গীত, সমবেত ব্যক্তিগণের সেই প্রশংসা-ধ্বনি সমুদায় তাঁহার স্মৃতিপথে উদ্ভিত হইতে লাগিল। এইরূপ দোলায়মান-চিত্তে অবশেষে মৌনাত্মক সম্মতি প্রদান করিলেন।

চিমু চত্বর ও যুবক মজাইবার বিজ্ঞাতে পরিপক্ক লোক। সে ইহার অধিক আর কিছু চায় না। সে ঐ প্রকার সম্মতির লক্ষণ দেখিয়াই সন্তুষ্ট হইল; বলিয়া গেল, “কাল রাত্রে যারা ছিল, তারা সকলেও আজ থাকিবে না; গুটিকত বাছা বাছা লোক; একথা প্রকাশ হবার কোনও ভয় নাই।”

সন্ধ্যাকালে চিমু ও জহরলাল হরচন্দ্রকে ধরিয়া বাইদিগের বাড়ীতে লইয়া গেল। বাইগণ হরচন্দ্রকে যথেষ্ট প্রশংসা করিয়া আসরের মধ্যে বসাইল; এবং পূর্ব দিনের বিবরণ বলিয়া নবসমাগত ব্যক্তিদিগের সহিত পরিচয় কারয়া দিল। যথাসময়ে নৃত্যগীত আরম্ভ হইল। প্রথমে হরচন্দ্রের মনে যে কিছু সংকোচ ছিল, পূর্বদিনের গ্রাম বাজাইতে বাজাইতে সেটুকু চলিয়া গেল। অজ্ঞাত তিন সকলের প্রশংসাভাজন হইলেন।

রাত্রে শয়ন করিবার সময় আবার হরচন্দ্রের মনে অনুতাপের উদয় হইল। কিন্তু মনে হইল, সেদিনকার কথা অতি অল্প লোকেই জানে। আর তাঁহার অপরাধই বা কি এত গুরুতর? তিনি কেবল বাজাইয়াছেন, এই মাত্র, কোনও অসাধু আচরণে ত লিপ্ত হন নাই। ইহাতে কেহ যদি তাঁহার প্রতি বিরক্ত হয়, তবে তিনি নাচার। একটু আশো

প্রমোদ করাতেই কি এত অপরাধ ? ইত্যাদি। মনে মনে এরূপ বিচার করিবার সময় হরচন্দ্র বোধ হয় অনুভব করিতে পারিলেন না, যে এই আত্ম-প্রবঞ্চনার পথ অতি পিচ্ছিল ! পতনের অগ্রে লোকে আপনার অপরাধকে এইরূপেই লঘু করিয়া থাকে। যাহা হোক অল্প রাতে অনুতাপের বেগটা পূর্বদিনের ছায় প্রবল রহিল না।

পরদিন প্রাতে চিমু ও জহরলাল পরামর্শ করিল, যে সেদিন রাতে বাইদিগকে তাহাদের বৈঠকখানাতে আনিয়া আমোদ করিতে হইবে। সেখানে নশিপুরের দলটি ব্যতীত বাহিরের লোক কেহ থাকিবে না। কারণ, বাহিরের লোক থাকিলে অসংকোচে আমোদ করিতে পারা যায় না। তদনুসারে বাইদিগের সহিত সেইরূপ বন্দোবস্ত হইল।

অপরাত্নে এই কথা হরচন্দ্রের কর্ণগোচর হইল। তিনি একবার মনে করিলেন, সে দিন আর বাজাইবেন না। আবার ভাবিলেন, তৎপর দিবস ত তাঁহার শশুরালয়ে যাইবার কথা আছে ; আর এক রাত্রি বই ত নয়। যাহা হইবার তাহা ত হইয়া গিয়াছে। বিশেষতঃ অগ্নিকার রাতে বাহিরের লোক কেহ থাকিবে না। এই সকল ভাবিয়া বাজাইবার বিষয়ে তাঁহার মনে আর আপত্তি রহিল না।

সন্ধ্যার পরে বাইদিগের দুই জন নশিপুরের বৈঠকখানাতে আসিল। পাছে বাহিরের কোনও লোক আসে, এজন্ত চিমু বৈঠকখানা বাড়ীর প্রবেশের দ্বার বন্ধ করিয়া দিয়া আসিল। ক্রমে নৃত্যগীত আরম্ভ হইল। হরচন্দ্র বাজাইতেছেন ; ক্রিষ্ট অগ্নিকার মজলিসে নৃত্যগীতের আয়োজন করা বুঝা ! চিমু ও জহরলালের উদ্দেশ্য আমোদ করা, অর্থাৎ মাতলামি করা ; সুতরাং নৃত্যগীতে তাহাদের মন নাই। সন্ধ্যা না হইতেই তাহারা একটু একটু সুরা পান করিতেছে ; এবং বাইদ্বয় আসিবামাত্র তাহাদিগকে সুরা পান করাইয়াছে। কিয়ৎক্ষণ পরেই সুরার

মাত্রা বাড়িয়া গীতবাণ্ড থামিয়া গেল ; এবং তৎস্থানে সুরা ও তরুণযোগী  
খাণ্ডদ্রব্য আসরে অবতীর্ণ হইল। যতই সুরার মাত্রা বৃদ্ধি হইতে  
লাগিল, ততই আমোদ প্রমোদ আর এক আকার ধারণ করিতে আরম্ভ  
করিল ! অবশেষে এমন সকল অশ্রাব্য, অকথ্য, অচিন্ত্য ও নীচজনোচিত  
হাস্য পরিহাস, শ্লেষোক্তি ও আমোদ প্রমোদ চলিতে লাগিল, যে  
হরচন্দ্র আর সে মজলিসে তিষ্ঠিতে পারিলেন না ; সে-ঘর হইতে বাহির  
হইয়া পড়িলেন। তাঁহার সঙ্গে আরও একটা যুবক বাহির হইয়া  
আসিল। তাঁহারা উভয়ে সমস্ত রাত্রি বাগানে বেড়াইয়া এবং চিমু  
ও জহরলালের নিন্দা করিয়া কাটাইলেন। আজ আবার হরচন্দ্রের  
হৃদয়ে অনুপাতের অগ্নি প্রবল ভাবে জ্বলিয়া উঠিল। তিনি এই  
আমোদ-প্রিয় দলের সহিত অনেক মজলিসে থাকিয়াছেন। কিন্তু এমন  
জঘণ্ড ব্যাপার কখনও দেখেন নাই। তাঁহার বোধ হইল যে, সেই দিন  
তিনি নিজ পিতার নাম বাস্তবিক পক্ষে ডুবাইলেন। গভীর মনস্তাপে  
শেষ রাত্রিটুকু কাটিয়া গেল। রজনৌ প্রভাত না হইতে তিনি সঙ্গী  
যুবকটিকে বলিলেন, “আর আমি তোমাদের সঙ্গে থাকিব না ;  
সকলকে বলিও, আমি শ্মশুরালায়ে চলিলাম।” এই বলিয়া শ্মশুরালায়ে  
চলিয়া গেলেন।

.



## একাদশ পরিচ্ছেদ

হরচন্দ্র যে আশঙ্কা করিয়াছিলেন তাহাই ঘটিয়াছে। তিনি শ্বশুরালয় হইতে গৃহে ফিরিবার পূর্বেই সংক্ৰোধের রাসের আমাদের বিবরণ নশিপুরে পৌঁছিয়াছে। বাকি যাহা ছিল, তাহা চিনু ঘোষ ও জহরলাল গ্রামে আসিয়া প্রকাশ করিয়া দিয়াছে। এখন সে সকল কথা বালক বৃদ্ধ সকলেরই মুখে। তর্কভূষণ মহাশয়ের পরিবারস্থ সকলেই শুনিয়াছেন; শঙ্কর শুনিয়া লজ্জা, ক্ষোভ ও ক্রোধে পূর্ণ হইয়া রহিয়াছেন; বিজয়া মন্বাত্তিক দুঃখিত হইয়াছেন; গৃহিণী নিজ অদৃষ্টকে অনেক নিন্দা করিয়াছেন। কেবল তর্কভূষণ মহাশয় শুনিতে বাকি আছেন; কেহই তাঁহাকে শুনাইতে সাহসী হয় নাই। তর্কভূষণ মহাশয়ের সংকল্পানুসারে বৈশাখের প্রথম হইতেই কালী-বাড়ীতে কথকতা বসিয়াছে। কর্তা এই সকল ব্যাপারেই আছেন। হরচন্দ্রের গৃহে ফিরিবার দিন সন্নিহিত।

হরচন্দ্র গৃহে ফিরিয়া কি দেখিলেন ও কি শুনিলেন, তাহা বর্ণন করিবার পূর্বে আর একটা বিষয় বর্ণনীয় আছে। বিগত দুই বৎসর কালের মধ্যে বিজয়ার শরীর ও মনের উপর দিয়া যে পরিবর্তন-স্রোত বহিয়া গিয়াছে, তাহার কিঞ্চিৎ উল্লেখ করা আবশ্যিক। ১৮৫২ সালের জ্যৈষ্ঠমাসের কথকতার সময়ে তাঁহার মনে যে চিন্তা-তরঙ্গ উঠিয়াছিল, তাহা ত্রায় নিবৃত্ত হয় নাই। তৎসঙ্গে সঙ্গে তাঁহার অন্তরে দুইটা প্রতিজ্ঞার উদয় হইল। প্রথম, তিনি ভাবিলেন যে, আর অপর সাধারণ স্ত্রীলোকের তায় অন্ধ ভাবে ধর্মের সেবা করিবেন না; একবার তলাইয়া দেখিবেন, ধর্মের তত্ত্ব কোন্‌ গুহাতে নিহিত

আছে। দ্বিতীয়, তিনি মনে করিলেন যে, আরও কঠোরতর তপস্রাতে আপনাকে নিষ্কেপ করিবেন। কারণ, তাঁহার বিশ্বাস, যে যদি দেবতা থাকেন, তিনি যে প্রকারেই হউন, অর্থাৎ তাঁহার পিতা ও জ্যেষ্ঠের আরাধিতা তারাই হউন, আর তাঁহার পতির নির্দিষ্ট পরব্রহ্মই হউন, তপস্রা দ্বারা তাঁহাকে লাভ করা যাইবেই যাইবে। এ প্রতিজ্ঞা সাধক-শ্রেষ্ঠ তারাদাস বিদ্যাবাচস্পতির কণ্ঠ্যই উপযুক্ত হইয়াছিল, তাহাতে সন্দেহ কি? প্রথম প্রতিজ্ঞানুসারে ঈশ্বর ও পরকাল বিষয়ে তলাইয়া দেখিতে গিয়াই, তিনি অকূল সমুদ্রে পতিত হইলেন। কিন্তু ভয় পাইলেন না; বরং চিন্তা, পাঠ ও আলোচনার দ্বারা প্রকৃত তত্ত্ব নির্ণয়ের জন্ত প্রতিজ্ঞাক্রূত হইলেন। বৃত্তিতে পারিলেন, যে স্বীয় পতির নিকটে তিনি যে জ্ঞান লাভ করিয়াছিলেন, তাহা তাঁহার নিজস্ব নহে; তাহা পরের ক্ষেত্র হইতে সিঞ্চন করিয়া আনা জলের তায়; তাহার সিঞ্চকারিতা অল্পক্ষণস্থায়ী; বিচারের উদ্ভাপেই তাহা শুষ্ক হইয়া যায়। তখন তিনি নিজে পাঠ ও চিন্তা আরম্ভ করিলেন। গিরিশচন্দ্রকে অনুরোধ করিয়া তাঁহাদের পাঠ্য গ্রন্থে ঈশ্বর ও পরকাল বিষয়ে যাহা আছে, তাহা শুনিলেন। তৎপরে এ সম্বন্ধে যেখানে যাহা কিছু দেখিতে পান, তাহা আগ্রহসহকারে পাঠ করেন। এতদিন নিজেও অনেক চিন্তা করিতে লাগিলেন। সমস্ত দিন গৃহকাধ্যে ব্যস্ত থাকিতে হইত; নির্জ্জনে বসিয়া চিন্তা করিবার সময় পাইতেন না। এই কারণে, তৃতীয় প্রহর রাত্রে উঠিয়া চিন্তা ও ঈশ্বর-চরণে প্রার্থনা করিবার নিয়ম প্রবর্তিত করিলেন। একে একাহার ও ঘন ঘন উপবাস, তাহার উপরে রাত্রি-জাগরণ, তাঁহার শরীর দিন দিন ক্লশ ও দুর্বল হইয়া পড়িতে লাগিল; মানসিক সংগ্রামে মুখের প্রসন্নতা চলিয়া গেল; এবং তাঁহার প্রকৃতির গান্ধীর্ঘ্য যেন পূর্বাপেক্ষা বৃদ্ধি পাইল।

পরিবারস্থ সকলেই এই পরিবর্তন লক্ষ্য করিলেন। গৃহিণী সর্বদা বলিতে লাগিলেন, “বিজয়ী কি হয়েছে কে জানে; খায় না দায় না, ভাল করে হেসে কথা কয় না; শরীরটা একেবারে পাত করবার জগ্গে যেন লেগেছে।” তর্কভূষণ মহাশয় ভগিনীর কঠোর তপস্যা দর্শনে একটু চিন্তিত হইলেন; কিন্তু মনে মনে শ্রদ্ধা করিতে লাগিলেন। এইরূপে এক বৎসর কাটিয়া গেল। দ্বিতীয় বৎসর, গ্রীষ্মকালে গিরিশচন্দ্র আবার কতকগুলি ইংরাজী বই আনিয়া জৈশ্বর ও পরকাল বিষয়ে অনেক কথা পড়িয়া শুনাইলেন। বিজয়া তখনও যেন দাঁড়াইবার ভূমি পাইলেন না। তাহার অনেক কথা যেন ঢেঁকির কচকচি বলিয়া বোধ হইল! তাঁহার হৃদয়ের শূন্যতা গেল না। তাঁহার ব্যাকুলতা এবং তপস্যার কঠোরতা দিন দিন বর্দ্ধিত হইতে লাগিল। অবশেষে গ্ৰীষ্মাবকাশের পরেই গোবিন্দ তাঁহার জন্ম, শ্রীমদ্ভাগবতের কয়েক স্কন্ধ, গীতা ও মহানির্দোষ তন্ত্র এই তিন খানি গ্রন্থ সংগ্রহ করিয়া পাঠাইল। ক্ষুধিত ব্যাক্ত যেমন আমিষথণ্ডের উপরে পড়ে, বিজয়া উক্ত গ্রন্থত্রয়কে সেই ভাবে গ্রহণ করিলেন। গভীর রাত্রে অভিনিবেশপূর্ব্বক অনুবাদগুলি পাঠ করিতে লাগিলেন। চিন্তা ও প্রার্থনা সহকারে পাঠ করিতে করিতে যেন ঘনান্ধকারের মধ্যে আলোকের রেখা দেখিতে পাইলেন। তিনটি বিশ্বাস তাঁহার হৃদয়ে জাগিয়া উঠিল।

প্রথমতঃ, ইহা তাঁহার প্রতীতি হইল যে, তাঁহার পিতা ও জ্যেষ্ঠ সহোদর “তারা” নামে বাঁহাকে লক্ষ্য করেন, ভাগবতে বাঁহাকে “কৃষ্ণ” শব্দে অভিহিত করেন, এবং তাঁহার পরলোকগত পতি বাঁহাকে “পরব্রহ্ম” রূপে অর্চনা করিতেন, তাহা একই বস্তু। এই পরম বস্তু বা পরম পুরুষই সার, জগৎ তাঁহার আবরণ মাত্র; এবং সমুদায় প্রকৃতি ও মানব-জীবন তাঁহারই লীলা-ক্ষেত্র।

দ্বিতীয়তঃ, বিমুক্ত প্রীতি বা ভক্তি দ্বারাই এই পরম পুরুষকে লাভ করা যায়। “হে ভারত, সর্বভাবের সহিত তাঁহার শরণাপন্ন হও”। গীতার এই উপদেশ তাঁহার চক্ষে সকল উপদেশের সার বলিয়া বোধ হইল।

তৃতীয়তঃ, সেই পরম পুরুষকে লাভ করিবার জন্ত তপস্যা বা আত্মপ্রভাব অপেক্ষা, ভগবৎ-রূপা বা দেব-প্রসাদের উপরে নির্ভর করাই শ্রেয়। কারণ, আত্ম-প্রভাবে অহঙ্কারের উৎপত্তি ; দেব-প্রসাদে স্বর্গীয় বিনয়ের আবির্ভাব।

সংক্ষেপে বলিতে গেলে, বিজয়া শান্তগৃহে বাস করিয়াও কিয়ৎপরিমাণে বৈষ্ণব-ভাবাপন্ন হইয়া পড়িলেন। এই ভাবের আবির্ভাবের সঙ্গে সঙ্গে তাঁহার অন্তরে শান্তি ফিরিয়া আসিল। দরিদ্র গুণধন আবিষ্কার করিলে ঘেরূপ আনন্দিত হয়, তিনিও সেই প্রকার আনন্দিত হইলেন। ধর্মসম্প্রদায় সকলের পরস্পর বিবাদ যেন তাঁহার দৃষ্টি হইতে অস্তিত্ব হইয়া গেল। তিনি সকলের মধ্যে এক অপূর্ব সামঞ্জস্য দর্শন করিতে লাগিলেন ; এবং নিজে সর্বান্তঃকরণের সহিত সেই পরম পুরুষের রূপার উপরে নির্ভর করিতে লাগিলেন। এই নির্ভরের ভাব তাঁহার জীবনকে মধুময় করিয়া তুলিল। সেই সঙ্গে সঙ্গে তাঁহার বহিরাবৃত্তিতেও পরিবর্তন লক্ষিত হইল। অন্তরে প্রেমের ক্ষুধা হওয়াতে তাঁহার নিরবচ্ছিন্ন গৌরবাস্তির উপরে কি এক পবিত্র আভা পড়িল, যাহাতে তাঁহাকে যেন কোনও উন্নততর লোকের অধিবাসী বলিয়া বোধ হইতে লাগিল। যে বৈশাখে হরচন্দ্র অনুতপ্ত চিত্তে গৃহে ফিরিয়া আসিতেছেন, সে বৈশাখে বিজয়া এ নব আলোকের মধ্যে বাস করিতেছেন।

হরচন্দ্র এখনও নশিপূরে ফিরেন নাই। শঙ্কর রাসের আমোদের বিবরণ শ্রবণ করা অবধি অতিশয় বিষন্ন হইয়া আছেন ; এবং কর্তা

শুনিলে কি বলিবেন, মনে মনে কেবল এই আশঙ্কা করিতেছেন। তিনি পূর্বের ভ্রায় লোকের সঙ্গে বড় একটা কথাবার্তা কহিতেছেন না; এবং সকল কাজই যেন একটু অনামনস্ক ভাবে করিতেছেন। কর্তা মহাশয় এই ভাব লক্ষ্য করিয়া এক দিন জিজ্ঞাসা করিলেন, “শঙ্কর! তোমাকে কয়েকদিন হতে কিছু বিমর্ষ দেখছি কেন?” শঙ্কর উত্তর করিলেন, “একটা অশুভ সংবাদ পেয়ে কিঞ্চিৎ উদ্বিগ্ন আছি।” কর্তা পুনরায় জিজ্ঞাসা করিলেন, “কি অশুভ সংবাদ?” শঙ্কর বলিলেন, “সেটা আপনার শুনে কাজ নাই।”

কর্তা আর দ্বিতীয় প্রশ্ন করিলেন না। ভাবিলেন, এমন কিছু গোপনীয় কথা হইবে, যাহা তাঁহাকে বলিবার নয়। এই কথোপকথনের দুই তিন দিন পরে, একদিন অপরাহ্নে তর্কভূষণ মহাশয় কথকতার আসরে একজন প্রতিবেশী ব্রাহ্মণের মুখে সিংহবোড়ের আমোদের বিবরণ শুনিলেন। ব্রাহ্মণ বলিলেন, “হরচন্দ্র সে সঙ্গে ছিল ও বাইনাচে প্রকাশ্য স্থানে বসিয়া বাজাইয়াছে।” শুনিয়া তর্কভূষণ মহাশয় অতিশয় বিস্ময়াপন্ন হইলেন। প্রথমে দীরভাবে উত্তর করিলেন, “না, তা কি হয়; হয় এমন কাজ করবে কেন?” সংবাদদাতা বলিলেন, “সেই চিমে বোষ ও জহরলাল গ্রামে এসে থাকে তাকে এই সব কথা বলছে। গ্রামের বালক বৃদ্ধ যুবা সকলের মুখে এই কথা শুন্বেন।”

শুনিতে শুনিতে তর্কভূষণ মহাশয়ের হৃদয় ভূগর্ভকর্তী আশ্রয়ে গিরির দ্রব-ধাতু-পুঞ্জের ভ্রায় আন্দোলিত হইতে লাগিল। হরচন্দ্র যে সিংহবোড়ের রাস দেখিব বলিয়া গিয়াছে, তাহা তিনি জানেন। সে কি এমন প্রতারক! শঙ্কর অদূরে বসিয়া এই সমুদায় কথোপকথন শ্রবণ করিতেছিলেন, এবং ভাবিতেছিলেন, এই বারেই বিপদ বাধিল। ইতিমধ্যে তর্কভূষণ মহাশয় ডাকিলেন, “শঙ্কর!” শঙ্কর সর্বিনয়ে নিকটস্থ

হইলেন। তর্কভূষণ মহাশয় জিজ্ঞাসা করিলেন, “এই যে হরের বিষয়ে কি শুনিতেছি, তুমি কি কিছু জান?” শঙ্কর আর গোপন রাখিতে পারিলেন না; বলিলেন, “আপনি যা শুনেছেন সত্য! আমি দুই তিন জায়গা হতে পত্র পেয়েছি, সকলেই এক কথা বলেন। সে দিন যে আপনি আমাকে এক অন্তঃসংবাদের বিষয়ে জিজ্ঞাসা করেছিলেন, আর আমি বলেছিলাম এ সংবাদ আপনার শুনে কাজ নাই; সে এই সংবাদ।”

তর্কভূষণ মহাশয়ের স্বভাবটা এইরূপ ছিল, যে অল্প ক্রোধের কারণে হইলে অনেক সময়ে তিরস্কার করিতেন, গালি দিতেন, ও কর্কশ কথা বলিতেন, কিন্তু ক্রোধটা যখন আতঃগতীর হইত, তখন একেবারে মৌন হইয়া যাইতেন; এবং প্রসুপ্তমীন হ্রদের তায় ঘোর গম্ভীর ভাব ধারণ করিতেন। তখন তাহার দিকে তাকাইতেও কাহারও সাহস হইত না। আতঃ সেও ব্যাপার হইল। তিনি কথকতা-স্থান হইতে উঠিয়া আপনার বিশ্রামগৃহে একাকী গিয়া বসিলেন; এবং কথকতা ভাঙ্গিবামাত্র কালীমন্দিরে বহুক্ষণ সন্ধ্যানন্দনাতে যাপন করিয়া, অন্তঃপুরে আসিয়া গৃহিণীকে বলিলেন, “আমি আজ আহার করব না। আমাকে কেহ ডাকিও না। হর যদি রাত্রে আসে আমার সম্মুখে আসিতে বারণ করিয়া দিও।”

অন্তঃপুরে মহিলারা অগ্রেই কর্তার ক্রোধের সংবাদ পাইয়াছিলেন, সুতরাং সকলেই নিস্তব্ধ। এমন কি, গৃহিণীও সাহস করিয়া কিছু বলিতে পারিলেন না; একবার কি দুইবার বলিয়াছিলেন, “ভাতটা খেতে হতো না।” কিন্তু বিরক্তি দেখিয়া সে অনুরোধ ত্যাগ করিয়াছেন।

তর্কভূষণ মহাশয়ের পরিবার মধ্যে এইরূপ ঘনঘটাচ্ছন্ন ভাব দুই তিন দিন চলিয়াছে। আমোদ প্রমোদের সাজা শব্দ নাই! শিশুরাও যে

কর্তার ক্রোধের ভয়ে প্রাণ খুলিয়া খেল করিতে পারিতেছে না! যখন তর্কভূষণ মহাশয় বাড়ীর মধ্যে থাকেন, তখন বধূগণ পায়ের মল টানিয়া তুলিয়া গত্যাভ্যাস করেন, যেন মলের শব্দ কারিতেও শঙ্কিত! সকলের মন জ্বাস-যুক্ত, কি হয় কি হয়! এমন সময়ে একদিন সংবাদ আসিল যে, সেইদিন অপরাহ্নে হরচন্দ্র বাড়ীতে পৌঁছিবেন। অমনি শঙ্কর পথে পথে পাহারা দিবার জন্য লোক বসাইয়া দিলেন; যেন হরচন্দ্র হঠাৎ কর্তার সম্মুখে আসিয়া না পড়ে। বাড়ীতে আসিবার যত পথ ছিল, সকল পথে লোক রহিল। অপরাহ্নে হরচন্দ্র বাড়ীর সম্মুখে উপস্থিত। অমনি একজন লোক কর্তার ক্রোধের কথা তাঁহাকে অবগত করিল। হরচন্দ্রের পা আর উঠে না। একবার মনে করিলেন, “যে গৃহকে কলঙ্কিত করিয়াছি, তাহাতে আর প্রবেশ করিব না।” কিন্তু অবশেষে সকলের পরামর্শে খিড়কীর দ্বার দিয়া অন্তঃপুরে প্রবেশ করিলেন। দেখিলেন, সকলেরই মুখ ভার; কেহই তাঁহার সহিত ভাল করিয়া কথা কহিল না। কেবল শিবচন্দ্র ও শঙ্করের শিশু সন্তানেরা “ন কাকা এসেছে, ন কাকা এসেছে” বলিয়া একবার একটু কোলাহল করিবার উপক্রম করিল; তাহাও দ্রুত নিবারণ করা হইল।

হরচন্দ্রের আগমনের সংবাদ পাইয়া শঙ্কর অন্তঃপুরে আসিলেন; এবং ক্রোধে অগ্নি-প্রায় হইয়া বৎপরোনাস্তি তিরস্কার করিতে লাগিলেন। হরচন্দ্রের মুখে একটী কথা নাই। তিনি আপনার ঘরের মেঝেতে বসিয়া বাম করতলে গাওঁস্থল রাখিয়া, দক্ষিণ হস্ত দ্বারা মাটিতে আঁক কাটিতেছেন ও মধ্যে মধ্যে বস্ত্রাঞ্চলে চক্ষের জল মুঁছতেছেন। অনেক ভাবনার পর শঙ্কর বলিলেন, “উত্তর দিসনে যে?”

হর। মেজ-দা! উত্তর দিবার থাকলে দিতাম; তুমি যা বলচো তার চেয়ে বেশী বলা উচিত; আমার আর কিছু বলবার নাই।

শঙ্কর। তবে এমন কাজ করলি কেন ?

হর। কি আর বলবো, সঙ্গ-দোষে।

শঙ্কর। তোকে ছ'শবার বলেছি, সাবধান করেছি, তা কোন ক্রমেই গুনিস্ না। যত অসৎ লোকের সঙ্গেই বেড়াস্; আমাদের বংশে জন্মে তোর এরূপ নতি হয় কি রূপে ? তুই কার ছেলে তাকি তোর মনে থাকে না ?

হর। মনে থাকুলে আর এরূপ করতে পারি ?

শঙ্কর। গুণ্ডিতে লজ্জা হয়, বলতে লজ্জা হয়, ভদ্রলোকের ছেলে হয়ে বাজারের কতকগুলো স্ত্রীলোকের সঙ্গে ইয়ারকী দেওয়া—ছি ! ছি ! ছি ! তুই গলায় দড়ি দিয়ে মর ।

হর। মেজ দা ! আমি তাদের সঙ্গে ইয়ারকী দিই নাই ; আমি কেবল বাজিরোছি।

শঙ্কর। ইয়ারকী আবার কাকে বলে ? তারা কি তোর সঙ্গে মেশবার উপযুক্ত লোক ? সে জায়গাটা আমাদের কুটুম্বস্থল, লোকে কি মনে করলে ? বাবার নামটা একেবারে ডুবিয়ে এলি।

হর। আমি আর কি বলবো, বাবার নামটা ডুবিয়ে এসেছি, তাতে কি আর সন্দেহ আছে ?

শঙ্কর। এখন কি হবে ? বাবা ত গুনেছেন।

হর। বাবা যুঁসাজা দেবেন মাথা পেতে নেব ; আমি তাঁর কুলান্ধার সম্ভানের কাজ করেছি ; এখন যদি বাড়ী হতে তাড়িয়ে দেন, দূর হয়ে যাব ; সেই আমার উপযুক্ত সাজা।

শঙ্কর দেখিলেন, হরচন্দ্র যথার্থ অন্ততপ্ত ; এ অবস্থায় তাকে আর অধিক তিরস্কার করা কর্তব্য নয়। বলিয়া গেলেন, “একটু সাবধানে থাকিস্, বাবার সম্মুখে হঠাৎ যাস্নে।”



বিজয়া নিকটে দণ্ডায়মান থাকিয়া ভ্রাতৃদ্বয়ের কথোপকথন শুনিতেছিলেন। হরচন্দ্র তাঁহার অপেক্ষা তিন বৎসরের ছোট; তাঁহাকে তিনি বালক কাল হইতে ভালবাসেন। তাঁহার স্বভাব চরিত্রের কথা শুনিয়া কিছু দিন হইতে তাঁহার প্রতি অতিশয় অশ্রদ্ধা জন্মিয়াছিল; কিন্তু তাঁহার চক্ষে জল দেখিয়া ও তাঁহার প্রকৃত অনুতাপের লক্ষণ দেখিয়া যেন তাঁহার প্রতি দ্বিগুণ স্নেহ উপস্থিত হইল; তিনি হরচন্দ্রের তরুণপোষে বসিয়া অনেকক্ষণ নানা কথা কহিয়া তাঁহাকে একটু শান্ত করিবার চেষ্টা করিতে লাগিলেন। গৃহিণী আসিয়া কতক তিরস্কার, কতক স্নেহ, কতক দুঃখ, মিশাইয়া অনেক কথা বলিলেন। হরচন্দ্র কেবল কাঁদিলেন, কোনও উত্তর করিলেন না।

হরচন্দ্রের বাটীতে আগমনের কথা কর্ত্তা মহাশয় বোধ হয় গৃহিণীর মুখে শুনিয়া থাকিবেন; কিন্তু তাঁহার ব্যবহারে তাহার কিছুই প্রমাণ পাওয়া গেল না। পূর্বের ত্যায় সকল কাজ কারতে লাগিলেন; গৃহের পারবার পরিজনদের তত্ত্বাবধান, পাঠনা, অতিথি অভ্যাগতের পরিচর্যা, সমাগত প্রতিবেশীদিগের সহিত আলাপ, আহার, বিশ্রাম, সকলি পূর্ববৎ চলিল; কেবল তাঁহার মুখের উপরে একটু বিষাদের মেঘ পড়িয়া রহিল। হরচন্দ্রের দুর্দশার কথা আর কি বলিব! ঐ মেঘটুকু তাঁহার পক্ষে দুঃসহনীয় বোধ হইতে লাগিল। ইহা অপেক্ষা পিতা কেন তাঁহাকে খড়মপেটা করিয়া গৃহ হইতে বাহির করিয়া দিলেন না! তিনি দিন-রাতি নেত্রজলে ভাসিতে লাগিলেন। এমন সময়ে স্ত্রীপুত্র নিকটে নাই। তাঁহার পত্নী আরও কয়েক মাস পিতৃহারায়ে থাকিবেন; সুতরাং হরচন্দ্র এক্ষণে ঘোর একাকী। তিনি বাড়ীর বাহির হন না; গ্রামের কাহারও সহিত সাক্ষাৎ করেন না; সবদাই নিজ শয়ন-গৃহে বসিয়া থাকেন। অপরাহ্নে একবার গিয়া কথকতার নিকটে বসেন, তাহাও গোপন ভাবে। যখন কথকঠাকুর

ভগবানের কল্পনার বিষয় বর্ণন করেন, তখন তাঁহার নয়নে নয় নয় ধারা বহিতে থাকে।

বিজ্ঞানকে গৃহকার্যে সমস্ত দিন ব্যস্ত থাকিতে হয়, স্তত্রাং দিনের বেলা তিনি অধিকক্ষণ হরচন্দ্রের নিকটে বসিতে পান না। তথাপি সকল কাজের মধ্যে এক একবার আসিয়া তাঁহার সহিত দুই চারিটা কথা কহিয়া যান, ও সর্বদাই তাঁহাকে উৎসাহিত করিবার চেষ্টা করেন। তিনি আর একটা কাজ করিয়াছেন। ভাগবত ও গীতার মধ্যে যে যে স্থান তাঁহার নিজের ভাল লাগিয়াছিল, সেই সকল স্থল হরচন্দ্রকে পড়িতে দিয়াছেন। হরচন্দ্র সমস্ত দিন মনোযোগ সহকারে সেই সকল স্থল পাঠ করেন; সন্ধ্যার পর বিজ্ঞানের অবসর হইলেই দুইজনে রাত্রি প্রায় ১১টা পর্যন্ত সেই সকল বিষয়ে নানা প্রকার কথাবার্তা হয়। সময়ে সময়ে দেখিয়াছি কোনও গ্রন্থ পাঠ করিয়া সমাপ্ত করিলে তাহার একটা কি দুইটা বিশেষ উক্তি আমাদের স্মৃতিতে বিশেষরূপে লাগিয়া থাকে। তৎপরে কিছুদিন সেই উক্তিগুলি আমাদের মনে ঘুরিতে থাকে; আমরা যেখানে যাই, যাহা করি, মধ্যে মধ্যে সেই শব্দগুলি উচ্চারণ করিয়া থাকি। হরচন্দ্রেরও সেই দশা ঘটিল। ভাগবতের প্রথম স্কন্ধের দ্বিতীয় অধ্যায়ের নিম্নলিখিত শ্লোকটা তাঁহার স্মৃতিতে লাগিয়া রহিল;—

বদন্তি তত্ত্ববিদ স্তম্ভং বজ্জ্ঞানমদয়ং ।

ব্রহ্মেতি পরমাশ্বেতি ভগবানিতি শব্দযতে ॥

অর্থ—“তত্ত্ববিদগণ সেই অদ্বিতীয় জ্ঞানস্বরূপকেই পরম তত্ত্ব বলিয়া জ্ঞানেন; ইনিই সম্রাট্যভেদে ব্রহ্ম, পরমাশ্বেতি ভগবান, প্রভৃতি বিবিধ নামে অভিহিত হইয়া থাকেন।”

হরচন্দ্র সংস্কৃতে তাঁহার পিতা ও জ্যেষ্ঠদিগের ভাষা ব্যুৎপন্ন না হইলেও ব্যাকরণ ও কাব্যের যজ্ঞরূপ পড়িয়াছিলেন, তাহাতে সামান্য সংস্কৃতের অর্থ-

গ্রহণের শক্তি জন্মিয়াছিল; অতএব বিজয়ার ত্রায় কেবলমাত্র অনুবাদ তাঁহার ভরসা নহে। তিনি পূর্বোক্ত শ্লোকটী কণ্ঠস্থ করিলেন। যখন তখন উহা উচ্চারণ করেন; এবং আপনার মনে মনে বলেন, “ঠিক, ঠিক, এই ত কথা।” বস্তু ত একই, নামভেদ মাত্র; লোকে না জানিয়া ক্ষুদ্র করিয়া ফেলে ও বিবাদে সময় পর্য্যবসান করে।

ইহা শুনিয়া সকলেই বোধ হয় ব্যবহিতে পারিতেছেন, যে যেমন টিকা কি গুলের আগুন অজ্ঞাতসারে একটী হইতে আর একটীতে লাগিয়া যায়, তেমনি বিজয়ার হৃদয়ের বিশ্বাসের অগ্নি ইতিমধ্যেই হরচন্দ্রের হৃদয়ে লাগিয়া গিয়াছে। কেনই বা লাগিবে না? বিজয়া প্রতিদিন দিবা দ্বিপ্রহরের সময়ে ও রাত্রি ১১টা ১২টা পর্য্যন্ত হরচন্দ্রের সহিত যাপন করেন। দুইজনে কেবল ঐ কথা। স্বর্ণরৌপ্যাদি কষ্টিন ধাতু সকল অনলের উত্তাপে যখন দ্রবীভূত হয়, তখন তাহাদ্বিগকে পিটয়া মনোমত করিয়া গড়িতে পারা যায়। তেমনি মানব-মন অনুতাপানলে যখন তরলতা-প্রাপ্ত, তখন তাহাকে গড়িতে পারা যায়। সুতরাং বিজয়ার হৃদয়ের ভাব অতি সহজেই হরচন্দ্রের অন্তরে মুদ্রিত হইয়া গেল। তিনি বিজয়ার সহিত একভাবাপন্ন হইয়া পড়িলেন। আধ্যাত্মিক সাহচর্য্যের এমনি গুণ যে অন্তরে অন্তরে বিজয়ার প্রতি হরচন্দ্রের প্রগাঢ় শ্রদ্ধা ও অনুরাগ জন্মিল। তাঁহার বোধ হইতে লাগিল যে ঐ নারীমূর্ত্তি তাঁহার উদ্ধার সাধনের জন্ত প্রেরিত দেবকণ্ঠাস্বরূপ। বিজয়ারও হৃদয়ের গভীর স্নেহ হরচন্দ্রের উপরে হস্ত হইল। পূর্বে তিনি অপরাপর ভ্রাতুষ্পুত্রদিগকে যেরূপ সাধারণ প্রীতির চক্ষে দেখিতেন, তেমনি তাঁগকেও দেখিতেন। মধ্যে তাঁহার স্বভাব চরিত্রের বিষয় শুনিয়া বরং অশ্রদ্ধাই জন্মিয়াছিল; কিন্তু এক্ষণে তাঁহার অকৃত্রিম অনুতাপ ও নবজীবনের সঞ্চার দেখিয়া

তাঁহার উপরে প্রগাঢ় ভালবাসা জন্মিল ; এবং সেই ভালবাসা, চিন্তা ও ভাবের বিনিময় দ্বারা, দিন দিন বর্দ্ধিত হইতে লাগিল। রাত্রে তাঁহারা উভয়ে যখন ধর্ম্মতত্ত্বের আলোচনাতে ও শাস্ত্রচর্চাতে নিযুক্ত থাকেন, তখন কোথা দিয়া ঘণ্টার পর ঘণ্টা অতিবাহিত হইয়া যায় তাহা বুঝিতেও পারেন না।

ভাগবতের পূর্বোক্ত শ্লোকটির গায় গীতার কয়েকটা শ্লোকও হরচন্দ্রের স্মৃতিতে লাগিয়া গেল। যথা :—

অপিচেৎ সূহৃদাচারো ভজতে মামনন্ত্যভাক্।

সাদুরেব স মন্তব্যঃ সমাগ্ ব্যবসিতো হি সঃ ॥

ক্ষিপ্ৰং ভবতি ধর্ম্মাত্মা শাস্ত্রচ্ছান্তিং নিগচ্ছতি।

কৌন্তেয় প্রীঃ জানীহি ন মে ভক্তঃ প্রণশ্রুতি ॥

অর্থ :—“মানুষ যদি ছুরাচারদিগের অগ্রগণ্য ব্যক্তিও হয়, তথাপি যদি আমাকে অনন্তমনা হইয়া ভজনা করে, তবে সেই একাগ্রচিন্ত্ত ব্যক্তিকে সাধু বলিয়া জানিও ; কারণ সে ত্বরায় ধর্ম্মাত্মা হয় ; এবং নিত্য শান্তি লাভ করে। হে অর্জুন ! নিশ্চয় জানিও, আমার ভক্ত কখনও বিনষ্ট হয় না।” গীতা, ২ম অধ্যায় ৩০।৩১ শ্লোক।

হরচন্দ্র আপনার মনে মনে এই শ্লোকদ্বয় যখন উচ্চারণ করিতেন, তখন চক্ষের জল রাখিতে পারিতেন না। তাঁহার বোধ হইত স্বয়ং ভগবান তাঁহাকে এই প্রতিজ্ঞা জানাইতেছেন। তিনি চক্ষের জলে ভাসিয়া বলিতেন, “ভগবান ! তোমার ভক্ত কখনও বিনাশ পাইবে না ? তবে কৃপা কর যেন আমি অনন্তগতি হইয়া তোমাকে ভজনা করিতে পারি।”

এইরূপে কথকতা শ্রবণ, ভাগবত ও গীতা পাঠ, এবং সর্বোপরি বিজয়ার পবিত্র সাহচর্য্য, এই ত্রিবিধ কারণে এক মাস অতীত না হইতেই

হরচন্দ্রের মনে গুরুতর পরিবর্তন ঘটয়া গেল। পূর্বের হরচন্দ্র আর রহিল না। তিনি যতই একান্ত মনে ঈশ্বর-চরণে পড়িয়া প্রার্থনা করিতে লাগিলেন, ততই তাঁহার অন্তরে বল, আশা ও আনন্দের সঞ্চার হইতে লাগিল। তিনি অগ্রে আপনার উন্নতি বিষয়ে এক প্রকার নিরাশ হইয়াছিলেন; এক মাসের মধ্যেই সে নিরাশা বিদূরিত হইয়া আত্মোন্নতির প্রবল আকাঙ্ক্ষা আশ্বিনের ত্রায় হৃদয়ে জলিয়া উঠিল। বিজয়া এই অগ্নিতে ঘুতাহুতি দিতে লাগিলেন। একদিন রাত্রে হরচন্দ্র বিজয়াকে জিজ্ঞাসা করিলেন,—“ছোট পিসি! তুমি আমাকে কি পরামর্শ দেও?”

বিজয়া। প্রথম পরামর্শ—তোমাকে কুসঙ্গগুলি বিষের ত্রায় বর্জন করিতে হবে!

হরচন্দ্র। সে ত করেছি। আর কি সে পথে যাই? তৎপরে কি করা কর্তব্য?

বিজয়া। তৎপরে, আত্মোন্নতির জন্ত চেষ্টা করিতে হবে। লেখা পড়া যে ছেড়ে দিয়েছ, তা দিলে চলবে না। তোমার ত খাবার পরবার ভাবনা নেই; আবার পড়াশুনা আরম্ভ কর।

হরচন্দ্র। এত বয়সে কি আর লেখাপড়া হবে?

বিজয়া। কেন হবে না? যত্নের অসাধ্য কি আছে? রামমোহন রায় ২২ বৎসর বয়সের সময় ঘরে বসে ইংরাজী পড়তে আরম্ভ করে নিজের চেষ্টায় এমন ইংরাজী শিখেছিলেন যে, তাঁর ইংরাজী লেখা দেখে এখন বড় বড় ইংরাজীওয়ালাদের তাক লেগে যায়।

ইংরাজীর নাম শুনিয়াই হরচন্দ্রের মনের একটা গুঁড় সংকল্প প্রকাশ হইয়া পড়িল। তিনি বলিলেন,—“ছোট পিসি! ইংরাজী পড়ার কথা যদি বললে, তবে আমার একটা মনের কথা বলি। আমি ভেবেছি,

ইংরাজী শিখে, ও হাতের লেখাটা তৈরী করে একটা কাজ কর্ণের চেষ্টা দেখবো; কারণ সংস্কৃত শিখে বামন পণ্ডিতী কর্ণ করতে বিশেষ উন্নতির আশা নাই। একটা কাজও করতে হবে, আলস্তে বসে থাকলে ত চলবে না।”

বিজয়া। তোমার যে এমন সন্মতি হয়েছে, এটা বড় সুখের বিষয়। কিন্তু তাহলে তোমাকে খুব পরিশ্রম করতে হবে, এবং মন প্রাণ দিয়ে লাগতে হবে।

হরচন্দ্র। এত অন্তবিধার ভিতর গাওনা বাজনা যদি শিখতে পেরে থাকি, ইংরাজীটা আর শিখেনিতে পারবো না? তবে কিনা বাড়ীতে থাকলে শেখা হবে না; আমাকে কলকাতায় রত্নদার বাসাতে গিয়ে থাকতে হবে।

বিজয়া। বেশ কথা, তোমার এ পরামর্শ আমার বড় ভাল লাগছে। আমি দাদাকে বলে তোমায় কলকাতায় যাবার যোগাড় করে দিচ্ছি। যাও তুমি কলকাতায় যাও; ভগবান তোমার শুভ সঙ্কল্প সাধনের সহায় হউন।

হরচন্দ্র। কিন্তু ছোট পিসি! তোমাকে সঙ্গে যেতে হবে; তোমার মুখের উৎসাহ-বাণী না শুনলে আমি এ ছকর ব্রত রাখতে পারবো না। তোমার মত আমাকে কেউ ভালবাসবে না। (এই কথা বলিতে হরচন্দ্রের চক্ষে জল আসিল।)

বিজয়া। আমার যাওয়া কি করে ঘটে?

হরচন্দ্র। কেন, কঠিনটা কি? সে ত ভালই হবে, ইন্দু, বিন্দু সেখানকার স্কুলে পড়বে; আর তুমি বাড়ীর গিন্নী থাকলে বড়লা নির্ভরনাতেই থাকবেন। থাকবার জায়গার ত অপ্রতুল নাই; না হয় পঞ্চ ও গোবিন্দ ঝাড়িরের ঘরে থাকবে।

ইন্দু ও বিন্দুর কলিকাতার স্কুলে পড়ার প্রস্তাবে বিজয়ার মন এক নূতন চিন্তাপথে ধাবিত হইল। তিনি মনে মনে ভাবিতে লাগিলেন, তাহা হইলে মন্দ হয় না। কিন্তু তাহার সম্ভাবনা কি? জ্যেষ্ঠের কি সে বিষয়ে সম্মতি হইবে? তাঁহার চিন্তার শেষ হইতে না হইতে হরচন্দ্র সরিয়া আসিয়া বিজয়ার হস্তদ্বয় নিজ করপুটের মধ্যে লইয়া বলিলেন,— “ছোট পিসি! আমার মাথার দিবি; বল, যাবে? তোমার ছুটি পায়ে পড়ি; তুমি কাছে না থাকলে কি জানি কোন্ বিপদে পড়ে যাই।”

বিজয়া। ও কি হর! মাথার দিবি দেও কেন? আমার কি যেতে অনিচ্ছা? আমি কেবল ভাবছিলাম আমার উপরে সকল ভার, আমি গেলে চলে না; সে বিষয়ে দাদারও মত হবে না।

হর। তুমি যদি আমার যাবার বিষয়ে মতটা করতে পার, আমি তোমার যাবার বিষয়ে মতটা করে নেব। তুমি গেলে এ বাড়ী বিশৃঙ্খল হবে জানি; তা বলে কি করবে? তুমি যতদিন এসনি ততদিন কি চলে নি? সেহ রকম চলবে। আমার খাতিরে তোমাকে যেতে হবে।

বিজয়া মনে মনে ভাবিলেন,—“কেবল যে তোমার খাতিরে যাইব তাহা নহে, আমারও খাতির আছে।” বাস্তবিক হরচন্দ্রের প্রতি বিজয়ার এমন একটু প্রীতি জান্নাম্মাছে, যে তাহাকে একাকী যাইতে দিতে আর ইচ্ছা করে না। এই একমাস কালের মধ্যে তিনি চিন্তা ও ভাবের বিনিময় করিয়া যে সুখ পাইয়াছেন, দুই বৎসরে তাহা পান নাই। হরচন্দ্র এখন তাঁর সম-ভাবাপন্ন এবং ওদিকে প্রায় সমবয়স্ক। এক্রূপ ব্যক্তির সংসর্গ হইতে বঞ্চিত হওয়া অতীব ক্লেশকর। বিজয়া ভাবিলেন, হরচন্দ্রকে ত যাইতে বলিতেছি, কিন্তু ও গেলে আমি কিরূপে থাকিব? কিয়ৎক্ষণ চিন্তার পর বলিলেন, “তোমার যে ভারি সাহস দেখছি।

তুমি আমার যাবার বিষয়ে দাদার মত করে নেবে! তিনি কি তোমার কথা শুনবেন? বিশেষ, এখন তোমার উপরে চটে আছেন।”

হর। তুমি দেখো, তুমি তবে বাবাকে চেন না; বাবা বিজ্ঞ মানুষ, এমন কথা বলবো যে একেবারে তলিয়ে বুঝতে পারবেন, ও মত দেবেন! তিনি হাজার চট্টন, অল্প বাপেই ছেলে মেয়েকে এত ভালবাসে। তিনি আমার কথা নিশ্চয়ই রাখবেন।

বিজয়া। আমার যাওয়াটা বড় সহজ কথা নয়; আমি ভেবে দেখব। এ বিষয়ে অনেক ভাববার আছে।

এই কথোপকথনের পর বিজয়া নির্জনে অনেক ভাবিয়া দেখিলেন। দুই দিন পরে একদিন প্রাতে হরচন্দ্রকে বলিলেন, “আমি ঠিক করেছি, আজ দাদাকে তোমার বিষয় বলবো।” সেই দিন মধ্যাহ্নে অহারান্তে তর্কভূষণ মহাশয় নিজ শয়নগৃহে বিশ্রাম করিয়া উঠিয়া বসিয়াছেন, এমন সময়ে বিজয়া তথায় উপস্থিত হইলেন। তর্কভূষণ মহাশয় জিজ্ঞাসা করিলেন, “কি বিজয়া, কোনও কথা আছে নাকি?”

বিজয়া। এক মাসের অধিক কাল হয়ে গেল, হর বড় ক্রোধ পাচ্ছে; বাড়ীর বাহির হয় না; কেবল ঘরে বিষন্ন হয়ে বসে থাকে, মধ্যে মধ্যে কাঁদে; তোমার সম্মুখে আসতে সাহস করে না। তুমি মাপ না করলে ত সে বাঁচে না।

তর্কভূষণ। আর মাপ কি? কাজটা অতি গর্হিত করেছিল, শুনেছি সেজন্য অন্ততপ্ত হয়েছে। জগদম্মা তাকে ক্ষমতি দিয়েছেন, সৌভাগ্যের বিষয়; চুকেই গেছে; এখন ভাল হয়ে চলুক।

বিজয়া। তার মনে ত একটা প্রতিজ্ঞা হয়েছে, যে সে কল্কেশতায় বড় কর্তার কাছে গিয়ে থাকবে ও যেকোনো হোক আপনার অবস্থার উন্নতি করবার চেষ্টা করবে।



তর্কভূষণ। (ঈষৎ হাস্য করিয়া) পড়া শুনা কিছুই করলে না, অবস্থার উন্নতি করবে কি করে ?

বিজয়া। সে ঘরে পড়ে একটু ইংরেজী শিখে নিলে, হাতের লেখাটা তৈয়ার করে, একটা কাজ কর্তব্য যোগাড় করে নেবে।

তর্কভূষণ। নিজে কিছু করবার বুদ্ধি যে হয়েছে এটা শুভ বুদ্ধি বলতে হবে। তবে এ বয়সে আর কি ঘরে বসে লেখা পড়া হওয়া সম্ভব ? সংস্কৃত বিদ্যা আমাদের কুল-ক্রমাগত ; তাই ভাল করে শিখলে না, ইংরাজী ত বিদেশীয় ভাষা।

বিজয়া। সে ত বলে পারবে।

তর্কভূষণ। তারপর আর একটা কথা আছে। দেশে আমাদের চোখের উপরে থাকে ; তাতেই ওর কুসঙ্গ ঘোটে ; আর কল্কেতা ত সর্বানুশে স্থান, সেখানে ওকে দেখবে কে ? আবার কি শিবকে একটা বিপদে ফেলবে ?

বিজয়া। বল যদি, তাকে ডাকি। তার মুখেই কেন শোন না ?

তর্কভূষণ। আচ্ছা ডাক।

বিজয়া হরচন্দ্রকে সঙ্গে করিয়া আনিলেন। হরচন্দ্র আসিয়াই সর্বাগ্রে পিতার চরণদ্বয়ের উপরে মস্তক রাখিয়া অনেকক্ষণ ক্রন্দন করিলেন। অবশেষে বিজয়া ধরিয়া তুলিলেন। ক্রমে একটু শান্ত হইলে, তর্কভূষণ মহাশয় তাঁহার প্রস্থাপ্ত তাঁহার প্রস্তাব শ্রবণ করিলেন, এবং তাঁহার অকপট অহুতাপ ও আত্মোন্নতির জন্য একান্ত ব্যগ্রতা দর্শন করিয়া অতিশয় প্রীত হইলেন। সন্তান-বৎসল পিতা এক মুহূর্তের জন্য সর্বশেষোন্নিখিত হৃদয়স্তার বিষয়টা ভুলিয়া গেলেন ; সঙ্গতি দিবার সময়ে মনে হইল না সহরের প্রলোভনের মধ্যে কে তাহাকে দেখিবে ! বলিলেন,—“তা যেতে চাও, যেও।” হরচন্দ্র যখন দেখিলেন যে,

বিজয়ার ষাণ্মাস্যে সম্রাট হইল, তখন বলিলেন,—“কিন্তু আমার যদিও দৃঢ় প্রতিজ্ঞা হইয়াছে, যে আপনার নামকে আর কলঙ্কিত করবো না, তথাপি স্মরণ বড় ভয়ানক স্থান, চতুর্দিকে প্রলোভন, যদি দয়া করে ছোট পিসীকে যেতে দেন, তা হলে আপনি নিশ্চিন্ত থাকিতে পারবেন যে, আমাকে দেখবার একজন লোক আছেন।” হরচন্দ্রের এই কথাতে তর্কভূষণ মহাশয় আরও প্রীত হইলেন। ইহা তাঁহারই হৃদয়ের চিন্তার অনুরূপ কথা। কিন্তু বিজয়াকে দূরে প্রেরণ করা একটা নূতন বিষয়! এ বিষয়ে অনেক ভাবিবার আছে; সুতরাং তিনি একেবারে উত্তর দিতে পারিলেন না। বলিলেন—“সেটা ভেবে দেখিতে হবে।” কিন্তু মনে মনে অনুভব করিলেন, তাঁহার সম্ভানদের উপরে বিজয়ার যে শক্তি, তাহাতে হরচন্দ্রকে এ অবস্থায় কেহ যদি ঠিক রাখিতে পারে, তবে সে এক বিজয়া। ভাবিতে ভাবিতে বাহিরে গেলেন।

বিজয়ার কলিকাতাতে গিয়া থাকিবার প্রশ্নটা হরচন্দ্র যত সহজ বিবেচনা করিয়াছিলেন তত সহজ নহে। তাঁহার এক দেবর কলিকাতাতে রহিয়াছেন। বিজয়া কলিকাতাতে থাকিবেন অথচ তাঁহার নিকটে থাকিবেন না, ইহা কিরূপ দেখায়? তৎপরে বিজয়া পুত্রকন্যা-সহ থাকিতে গেলে শিবচন্দ্র সে ভার বহন করিতে পারিবেন কি না? যদি নশিপুর হইতে শিবচন্দ্রের সাহায্যের জন্ত অর্থ প্রেরণ করিতে হয়, কি পরিমাণে প্রেরণ করিতে হইবে? যদি বিজয়াকে কলিকাতাতে গিয়া থাকিতে হয়, তবে জ্যোষ্ঠা বধূকেও সেই সঙ্গে প্রেরণ করা কর্তব্য; ইত্যাদি অনেক কথা ভাবিবার আছে। তর্কভূষণ মহাশয় কয়েকদিন মনে মনে সেই সকল প্রশ্নের আলোচনা করিলেন। কয়েকদিন চিন্তার পর স্থির হইল যে, গ্রীষ্মের ছুটির পর, জ্যোষ্ঠা বধূ, তাঁহার পুত্রকন্যাগণ, বিজয়া, ইন্দু, বিন্দু, হরচন্দ্র ও ভবেন্দ্র কলিকাতার বাড়ীতে গিয়া

থাকিবেন। ভবেশের আর আনন্দের সীমা নাই; বিজয়ার কণ্ঠালিঙ্গন করিয়া যে কতবার আদর করিল, তাহা বলা যায় না, কারণ তাহার যাওয়ার বিষয়টা বিজয়াই উপস্থিত করিয়াছিগেন। কলিকাতার ভাল স্কুলে পড়িবে এই তাহার মহা আনন্দ। তর্কভূষণ মহাশয় পত্রদ্বারা শিবচন্দ্রের সহিত সমুদায় বন্দোবস্ত স্থির করিয়া রাখিলেন।

---

## দ্বাদশ পরিচ্ছেদ

গ্রীষ্মের অবকাশ শেষ হইলেই পুত্রকন্যাসহ জ্যোষ্ঠা বধূ, ইন্দুভূষণ ও বিদ্যাবাসিনীসহ বিজয়া, হরচন্দ্র ও ভবেশ, কলিকাতার হাতীবাগানে, শিবচন্দ্রের বাসা বাটীতে আসিয়া অধিষ্ঠিত হইলেন। অবশ্য বলা বাহুল্য, যে তাঁহারা আসাতে বিদ্যারত্ন মহাশয়কে বাটীর পুরাতন ব্যবস্থার কিঞ্চিৎ পরিবর্তন করিতে হইল। দুই একটা আশ্রিত উপরি লোককে বাধ্য হইয়া অগ্রত থাকিবার জন্ত অনুরোধ করিতে হইল; এবং গোবিন্দ ও পঞ্চ বাড়ীর ভিতর হইতে তাড়িত হইয়া বাহিরের ঘর আশ্রয় করিল। ষষ্ঠাসময়ে ভবেশ, ইন্দুভূষণ ও বিদ্যাবাসিনীকে স্কুলে ভর্তি করিয়া দেওয়া হইল; এবং এই নূতন গৃহস্থের গৃহস্থালি নূতন ভাবেই আরম্ভ হইল।

সকলেরই চিত্ত প্রসন্ন দেখা যাইতেছে। জ্যোষ্ঠা বধূ, নশিপুরে পাঁচ জনের একজন ছিলেন, অনেক পরিমাণে কর্তা ও কর্ত্রীর অধীন থাকিতেন। এখানে তিনি গৃহের কর্ত্রী, আপনার মনোমত সমুদায় কাজ করিতে পারেন। ইহা একটা সামান্য সুখের বিষয় নহে; সুতরাং তিনি প্রসন্ন। দ্বিতীয়, ভবেশের মন প্রসন্ন। সে কলিকাতাতে আসিয়াছে, ভাল স্কুলে পড়িতে আরম্ভ করিয়াছে, আজ মনুস্মেট, কাল কেব্লা, পরশু ষাটঘর, কত কি নূতন নূতন বিষয় দেখিতেছে; তাহার চিত্ত প্রসন্ন হইবে না কেন? তৃতীয়, বিজয়ার মন প্রসন্ন। কলিকাতাতে আসিয়া তাঁহার নিজের জ্ঞানোন্নতির ও পুত্রকন্যার সুশিক্ষার আশা হইয়াছে। চতুর্থ, গোবিন্দ ও পঞ্চর মন প্রসন্ন; তাহাদিগকে উৎসাহ দিবার, সাহায্য করিবার ও ভালবাসিবার একজন লোক আসিয়াছেন। পঞ্চম, বিদ্যারত্ন মহাশয়ও নিতান্ত অপ্রসন্ন নহেন। যদিও শিশুগুলি আসাতে তাঁহার

হাতীবাগানের বাড়ীর বহুদিনের নিস্করতা ভগ্ন হইয়াছে, সেজন্য তিনি কক্ষিং বিরক্ত; তথাপি স্ত্রী পুত্র পার্শ্বে আসিলে কোন্ ধার্মিক গৃহস্থ না সুখী হন? সুতরাং তাঁহারও সুখ অনিবার্য। কিন্তু সর্বাপেক্ষা সুখী হরচন্দ্র। অনুতাপাগ্নি এখনও তাঁহার হৃদয়ে জ্বলিতেছে; এবং সেই অগ্নি এক দুর্দ্দমনীয় আত্মোন্নতির বাসনার আকাঙ্ক্ষা ধারণ করিয়াছে। উন্নতির উপায় হাতের নিকট আসিয়াছে, এজন্য তিনি প্রসন্ন। অতএব প্রসন্নচিত্তেই হাতীবাগানের বাড়ীর সমুদায় কাজকর্ম আরম্ভ হইল। বিজয়াকে এখানে আসিয়া আর ভাঁড়ারের ভার লইতে হয় নাই; কর্তার হস্তেই সে ভার রহিল; সুতরাং বিজয়া নিজ সম্ভানদিগের পড়া-শুনার তত্ত্বাবধান করিবার অনেক সময় পাইতেছেন। পঞ্চ, ইন্দুভূষণ ভবেশ ও হরচন্দ্রকে ইংরাজী পড়াইতে লাগিলেন, এবং গোবিন্দ বিদ্যাবাসিনীকে পড়া বলিয়া দিবার ভার লইল। হরচন্দ্র যাহা বলিয়াছিলেন, তাহা সত্য। সঙ্গীতশিক্ষা বিষয়ে তাঁহার যে অভিনিবেশ ও দৃঢ়প্রতিজ্ঞা দৃষ্ট হইয়াছিল, ইংরাজীশিক্ষা বিষয়েও সেই অভিনিবেশ দেখা গেল। বালকেরা সচরাচর দশ দিনে যাহা পড়ে, তিনি একদিনে তাহা পড়িয়া ফেলিতে লাগিলেন।

পঞ্চর বিষয় এখন একটু বলা আবশ্যক হইতেছে। পঞ্চ গিরিশচন্দ্রের মাতৃসদার পুত্র, সম্পূর্ণ নাম পঞ্চানন চট্টোপাধ্যায়। দরিদ্রের সম্ভান, বিত্তারহ মহাশয়ের ভবনে থাকিয়া কোনও প্রকারে বিত্তাশিক্ষা করিয়াছেন। বালককালে তিনি ডক সাহেবের স্কুলে পড়িতেন। সেই সময়ে মিশনারি সাহেবেরা তাঁহাকে খ্রীষ্টান করিবার জন্য বিবিধমতে লাগিয়াছিলেন। ১৮৪৫ সালে তাঁহার সমাধারীও সুহৃদ্ গুরুদাস মৈত্র যখন খ্রীষ্টধর্মে দীক্ষিত হন, পঞ্চর বয়স্ক্রম তখন ১৬ কি ১৭। তখন বাস্তবিক সহরে জনরব উঠিয়াছিল, যে পঞ্চও সেই সঙ্গে খ্রীষ্টধর্ম আশ্রয়

করিবেন। কিন্তু বাস্তবিক সে জনরব অমূলক। পক্ষু কোনও দিন খ্রীষ্টধর্মে বিশ্বাস স্থাপন করেন নাই। তবে যীশুর চরিত্রের প্রতি ও বাইবেল গ্রন্থের প্রতি তাঁহার প্রগাঢ় ভক্তি, এই মাত্র। ইহার অতিরিক্ত আর একটু আছে। সে সময়ের অপরাপর শিক্ষিত যুবকের ত্যায় পক্ষুও বিশ্বাস করেন, এদেশে ভাল কিছুই নাই এবং পশ্চিম হইতে যাহা কিছু আসে সকলি ভাল। ৩৪ বৎসর হইল, পক্ষু ব্রাহ্মসমাজের উপাসনানিতে যাইতেছেন। পক্ষুর একটু বিশেষ শক্তি আছে; তিনি মানুষের মন বদলাইয়া দিতে পারেন। গোবিন্দকে প্রায় নিজভাবাপন্ন করিয়া তুলিয়াছেন। যেখানে পক্ষু সেই থানেই গোবিন্দ। এমন কি এক জনকে দেখিলেই অপরকে মনে হয়। পক্ষু নিজে যাহা বিশ্বাস করেন তাহা প্রচার না করিয়া থাকিতে পারেন না। তাঁহার সহিত সকল মতে মিলুক না মিলুক, সকলেই অমুভব করে, যে মানুষটা অতিশয় বিশ্বাসী, শ্রদ্ধাবান, আন্তরিক, সরল ও পবিত্র-চেতা। এই জন্য যে ব্যক্তি দুই দিন তাঁহার সঙ্গে মেশে, সেই তাঁহাকে শ্রদ্ধা না করিয়া থাকিতে পারে না। পক্ষুর একটা বিশেষ গুণ এই, তিনি বিবেচন-বুদ্ধি কাহাকে বলে জানেন না; যীশুর ত্যায় ক্ষমাশীল ও সরল-চিত্ত। আজ যে ঘোর শত্রু ও মহা অনিষ্টকারী, কল্যাণে ব্যক্তির বিপদের সময় পক্ষু প্রাণ-মন দিয়া তাহার সাহায্য করিতে পারেন। এমন পর-দুঃখকাতির লোক প্রায় দেখা যায় না। ঈশ্বরের প্রতিও তাঁহার প্রগাঢ় প্রেম। ভক্তি-ভাবে কেহ ঈশ্বরের নাম করিলেই তাঁহার চক্ষে জলধারা বহে। তাঁহার গাইবার শক্তি নাই; কিন্তু তাঁহার কণ্ঠে ঈশ্বর-ব্যয়ক সঙ্গীত অতি মধুর লাগে। ভক্তির এমন গুণ।

বিজয়া হাতীখানানের বাসাতে প্রতিষ্ঠিত হইলেই, এই যুবকসমাজের উপরে তাঁহার শক্তি বিস্তৃত হইতে লাগিল। হরচরিত্রের ত কথাই নাই,

বিজয়ার পরামর্শ ভিন্ন তিনি কোনও কাজ করেন না ; কোনও স্থানে যান না। পঞ্চু এবং গোবিন্দও তাঁহাকে প্রগাঢ় শ্রদ্ধার চক্ষে দেখিতে আরম্ভ করিলেন। যে কিছু উৎকৃষ্ট গ্রন্থ মুদ্রিত হয়, পঞ্চু আনিয়া উপস্থিত করেন এবং বিজয়া ও হরচন্দ্র মনোযোগ পূর্বক তাহা পাঠ করেন ; এবং প্রায় প্রত্যহ সায়ংকালে সেই সকল বিষয়ে কথোপকথন হয়।

এইরূপে সাহিত্যালোচনা ও জ্ঞান-চর্চার দ্বারা সকলেরই জ্ঞান-পিপাসা দিন দিন বাড়িতে লাগিল। স্বীয় প্রকৃতি অনুসারে পঞ্চু বিজয়াকে স্বীয়ভাবাপন্ন করিবার প্রয়াস পাইতে লাগিলেন। কিন্তু বিজয়া স্বাধীন প্রকৃতির জ্ঞীলোক। সংসারে অনেক আঘাত পাইয়াছেন, অনেক চিন্তা ও সংগ্রাম করিয়াছেন, এবং সংগ্রামে জয়লাভ করিয়া দৃঢ় ও স্বাবলম্বন-শালিনী হইয়াছেন ; তিনি শ্রোতে ভাসিবার, বা কথাতে ভুলিবার, বা কাহারও পশ্চাতে দৌড়িবার লোক নহেন। তাঁহার হৃদয় বিনয়ে পরিপূর্ণ কিন্তু তাহা বলিয়া বিচারশক্তি ম্লান নহে। বরং তিনিই পঞ্চুকে গড়িয়া তুলিতে লাগিলেন।

এ পর্য্যন্ত সকলে বিজয়ার বিষয়ে যাহা জানিয়াছেন, তাহাতে তাঁহার একটু অসাধারণত্ব দেখিতে পাইতেছেন। বাস্তবিক তাঁহার একটু অসাধারণত্ব আছে। বিশ্বনাথ তর্কভূষণকে কি অসাধারণ লোক বোধ হয় নাই ? একরূপ ব্রাহ্মণ পণ্ডিত দেশে কয়জন পাওয়া যায় ? সেই ভ্রাতার ভগিনী, সূত্রাং বিজয়ারও অসাধারণত্ব স্বাভাবিক। সে সময়ে যে কতিপয় মহিলা সুশিক্ষিতা বলিয়া গণ্য ছিলেন, বিজয়া তাঁহাদের মধ্যে একজন। তাহাতে আবার তাঁহার স্বাভাবিক প্রতিভা সহায়, সূত্রাং তাঁহাতে যাহা দেখা যাইতেছে, অপর সাধারণ জ্ঞীলোকে তাহা দেখা যায় না।

পূর্বেই বলা হইয়াছে যে, বাইবেলের প্রতি পক্ষের অগাধ ভক্তি। তিনি মধ্যে মধ্যে বিজয়াকে বলেন,—“আপনি ধর্ম বিষয়ে এত চিন্তা করেন, এত বই পড়েন, বাইবেলখানা একবার পড়ুন না। বাইবেলের প্রতি লোকের যে বিদ্বেষ আছে, আপনার তা থাকা উচিত নয়।” বারবার এইরূপ অনুরোধ করাতে একদিন বিজয়া বলিলেন,—“আচ্ছা, একখানা বাঙ্গালা বাইবেল আমাকে এনে দিও, আমি পড়ে দেখব।” তদনুসারে পক্ষ একবার একখানা বাঙ্গালা বাইবেল আনিয়া দিলেন। বিজয়া মনোযোগ পূর্বক সমুদায় পাঠ করিলেন। যীশুর চরিত্র দেখিয়া অতিশয় মুগ্ধ হইলেন; কিন্তু অলৌকিক ক্রিয়া সকল এবং অপরাপর অনেক কথা তাঁহার তৃপ্তি-প্রদ হইল না। একদিন সায়ংকালে পক্ষ জিজ্ঞাসা করিলেন,—“বাইবেল পড়িয়া আপনার কেমন লাগিল?”

বিজয়া। ভালই, ইহাতে অনেক সত্বপদেশ আছে।

পক্ষ। যীশুর চরিত্র কিরূপ দেখিলেন?

বিজয়া। অতি উৎকৃষ্ট; কিন্তু আমাদের পুরাণের গ্রন্থ ইহাতে অনেক আঘাতে গল্ল আছে।

পক্ষ। ওগুলো ছেড়ে দিন; ওগুলো বোকা যায় না। কিন্তু ধর্মের আদর্শটা কেমন? অতি উচ্চ বোধ হয় না?

বিজয়া। এমত মহৎ বিষয়ে আমাদের কথা কহিতেই নাই; বিশেষ সাধু মহাত্মাদের চরিত্র আলোচনা ভয়ে ভয়েই করিতে হয়; কিন্তু ধর্মের আদর্শের কথাটা যখন বল্লে, তখন বাধা হয়ে বল্তে হচ্ছে, আদর্শটা বড় উচ্চ বোধ হলো না।

পক্ষ। কেন, উচ্চ নয়?

বিজয়া। আমি ত ভাগবতে ও গীতাতে ইহা অপেক্ষা উচ্চ আদর্শ দেখতে পাই।



পঞ্চ। সে কি! বাইবেলের কাছে কি আপনার ভাগবত-কি গীতা লাগে?

বিজয়া। আমি ত দেখলাম বাইবেলে যে ভক্তির উপদেশ দেওয়া হয়েছে, ত সকাম ভক্তি।

পঞ্চ। আপনি কোথায় সকাম ভক্তি দেখলেন?

বিজয়া। সর্বত্রই, কেন বীণুরই উক্তির ভিতরে।

পঞ্চ। কৈ কোন্ জায়গায় বলুন দেখি?

বিজয়া। রোগে, ভোমাকে পড়ে শোনাচ্ছি।

এই বলিয়া বিজয়া বাজালা বাইবেল আনিয়া কতকগুলি স্থান পড়িয়া শুনাইতে লাগিলেন।

পঞ্চ পূর্বে এত অনুধাবন করিয়া পড়েন নাই। এখন দেখিলেন যে, এক্ষণে একস্থান দিলে স্বর্গে দশস্থান পাইবে, একস্থান ভাবটা অনেক স্থানেই রহিয়াছে। পাঠ সাদ্র হইলে বিজয়া বলিলেন, “তুমি কেন ভেবে দেখ না, এখানে একস্থান দিলে আর একস্থানে দশস্থান পাবে, এটা কি ধর্ম, না, বাণিজ্য-ব্যাপার? বিমুক্ত প্রেম ভিন্ন কি ধর্ম হয়?”

পঞ্চ। ওগুলো সে সময়কার অজ্ঞ মানুষদের প্রবৃত্তি-লগ্নাবার জন্ত বলা হয়েছিল।

হর। এখন যদি কেউ বলে যে আমাদের প্রাচীন ধর্ম যে স্বর্গ নন্দক, বা দণ্ড পুরস্কারের কথা আছে, সে সব তামসিক লোকদের প্রবৃত্তি-লগ্নাবার জন্ত, তা হলে আমরা লক্ষিয়ে উঠ কেন? চুই ত একই কথা।

পঞ্চ। আমাদের স্বর্গ আর বাইবেলের স্বর্গ কি এক?

হর। এক বৈ কি? আমাদের স্বর্গে না স্বর্গ ছোটো, বিভাধরী আছে; তাদের স্বর্গে না স্বর্গ কতকগুলো পরী আছে; উনিশ-বিশ করে আর কল কি?

বিজয়া। স্বর্গের জন্ত ধর্ম, এই ভাবটাই ভাল নয়। দেখ দেখি এ বিষয়ে ভাগবত ও গীতার উপদেশ কি চমৎকার।

এই বলিয়া বিজয়া গীতা আনিলেন। হরচন্দ্র নিম্নলিখিত দুই শ্লোক ও তাহার অর্থ পড়িয়া শুনাইলেন :—

কামাআনঃ স্বর্গপরাঃ জন্মকর্মফলপ্রদাঃ।

ক্রিয়াবিশেষবহুলাং ভোগৈশ্বর্য্যগতিং প্রতি ॥

ভোগৈশ্বর্য্যপ্রসক্তানাং তয়াপহৃতচেতসাং।

বাবসায়্যাত্মিকা বুদ্ধিঃ সমাধৌ ন বিধীয়তে ॥

অর্থ—যাহারা কামাআ ও স্বর্গবাসলোলুপ, তাহারাই জন্মকর্মফলপ্রদ এবং ভোগৈশ্বর্য্যের সাধনীভূত বহুল ক্রিয়াতে রত হয়; যাহাদের চিত্ত ভোগৈশ্বর্য্যে রত ও তদ্বারা অপহৃত, তাহাদের যোগে বা ধর্ম্মে একাগ্র বুদ্ধি হয় না।

বিজয়া। কেমন কথা? ঠিক কি না? তোমরা স্বর্গকে যেমন সুন্দর করেই চিত্রিত কর না কেন, যে স্বর্গ চায় সে ধর্ম্ম চায় না; সে না জানিয়া ভোগৈশ্বর্য্য চাহিতেছে।

পঞ্চ। সে ত ঠিক কথা; ঈশ্বরকে আর-কিছুর জন্ত ভালবাসিলে সে ভালবাসা ভালবাসাই নয়। এ ত সহজ কথা! বাঃ, গীতাতে এমন ভাল কথা আছে? ওঃ। ঐ জন্মই বুঝি নবীন সংস্কৃত পড়তে এত ভালবাসে?

হর। কেন থাকবে না? তোমরা ত ঘরে কি আছে তা দেখবে না, কেবল পশ্চিম দিকেই মুখ ফিরিয়ে আছ।

পঞ্চ। আমাকে তবে গীতা একবার পড়ে দেখতে হচ্ছে।

বিজয়া। বেশ কথা, পড়ে দেখ।

অন্ত সায়ংকালে যেরূপ কথোপকথন দেখা গেল, প্রায় প্রত্যহই

এই প্রকার ধর্ম, নীতি ও সমাজসংক্রান্ত বিষয়ে কথোপকথন হইত। বিদ্যারত্ন মহাশয় অনেক বিষয়ে তাঁহার পিতার অপেক্ষা অনুদার লোক, কিন্তু দোষই বলুন আর গুণই বলুন, তাঁহার একটা স্বভাব আছে। তিনি গৃহের তত্ত্বাবধান বিষয়ে অতি উদাসীন। কে কি করিতেছে, সেদিকে তাঁহার বড় একটা দৃষ্টি নাই। বিশেষতঃ, তিনি গৃহে অল্প সময়ই থাকেন। প্রাতে গঙ্গাস্নানে বাহির হইয়া যান, স্নানান্তে রাজবাড়ী হইয়া পূজাদি সারিয়া প্রায় ১২টার সময় গৃহে প্রত্যাগত হন। আহারান্তে বিশ্রাম করিয়া কিয়ৎকাল দুই একজন ছাত্রকে একটু পড়াইয়া রাজবাড়ীতে গমন করেন। অনেক দিন সায়ংসন্ধ্যা সেইখানেই সমাধা করেন। তৎপরে রাত্রি প্রায় ৯টা ৯।০ টার সময়ে আসিয়া আহারান্তে শয়ন করেন। সূতরাং ভবনের মধ্যে যে নূতন চিন্তা ও ভাবের স্রোত প্রবাহিত হইতেছে, তাহা তিনি অনেক দিন লক্ষ্য করিতে পারেন নাই। কেবল তাঁহার জ্যেষ্ঠ পুত্র গিরিশচন্দ্র অনুভব করিতে লাগিলেন, যে গৃহের মধ্যে যেন কি একটা হাওয়া বহিতেছে; এবং পরিবারস্থ সকলকেই যেন উদারভাবাপন্ন করিয়া তুলিতেছে। গিরিশচন্দ্র ভাবিতে লাগিলেন, কালে ইহার ফল না জানি কিরূপ দাঁড়ায়।

বিজয়া কলিকাতায় আসিয়া কয়েকবার তাঁহার কনিষ্ঠ দেবরের গৃহে গিয়াছিলেন। তাঁহার দেবরের ভবনের সংলগ্ন বাড়ীতে মৃত নরোত্তম ঘোষের পরিবারগণ বাস করেন। ঐ নরোত্তম ঘোষের প্রথম পুত্রের নাম ব্রজরাজ ঘোষ। তাঁহাদেরই ভবনে পূর্বোক্তাখিত নবরত্ন সভার আধিবেশন হয়। বিজয়া পক্ষের মুখে ঐ সভার বিবরণ অগ্রেই শুনিয়াছিলেন। একবার দেবরের ভবনে অবস্থানকালে ব্রজরাজের ভগিনী কৃষ্ণকামিনী ও তাঁহার মাতৃদাসা মাতঙ্গিনীর সহিত তাঁহার পরিচয় হয়। দেখিলেন, উভয়েই লেখা পড়া জানেন, এবং উভয়েই নবরত্ন সভার

গোড়া। সেইবারেই তিনি উক্ত সভার সভাপতি নবীনচন্দ্র বসুকেও দূর হইতে দোঁধিয়াছিলেন। তিনি হাতীবাগানে ফিরিয়া আসিয়া পক্ষকে বলিলেন, “কৃষ্ণকামিনী মেয়েটা ভাল বটে, বিনম্র, ধীরবুদ্ধিমতী ও ভদ্র, দেখলেই বোধ হয় ভিতরে সার বস্তু কিছু আছে। কিন্তু বাপু! তোমার মাতঙ্গিনীটা কোনও কর্মের মেয়ে নয়; ব্যাপিকা, হালকা ও অসার; ওটী যেন মাকাল ফণ, বাহিরে রূপটা খুব আছে, ভিতরটা তেমন নয়। হাঁ, নবীন বাবুকে দেখলে বোধ হয় বটে মাতৃষটার মধ্যে কিছু অসাধারণত্ব আছে; আকৃতিতে যেমন সুপুরুষ, প্রকৃতিতেও বোধ হয় তেমনি সংলোক হবেন।”

পক্ষ। নবীন ত একটা দেবতা!

এইরূপ জ্ঞানচর্চা, শাস্ত্রালোচনা ও সংপ্রসঙ্গে হাতীবাগানের যুবকদের দিন কাটিয়া যাইতে লাগিল। ১৮৫৪ সাল অতীত হইয়া ১৮৫৫ সালের কিয়দংশ অতীত হইল। এই দেড় বৎসরের মধ্যে হরচন্দ্র কি আশ্চর্য্য উন্নতি লাভ করিলেন। অধ্যবসায়ের কি গুণ! স্বাবলম্বনের কি মহীয়সী শক্তি! সচরাচর বালকেরা ৫৬ বৎসরে যতদূর শিক্ষা করে, হরচন্দ্র দেড় বৎসরে ততদূর শিক্ষা ফেলিলেন। হাতের লেখা এক প্রকার গুছাইয়া লইলেন। কেবল ত্রুটি নহে, অঙ্কবিজ্ঞাতে আশ্চর্য্য দক্ষতা দেখাইতে লাগিলেন। সংগীত-বিজ্ঞার সহিত, অঙ্কবিজ্ঞার কি কোনও গূঢ় জ্ঞাতিসম্বন্ধ আছে? জানি না; হরচন্দ্রের যে অঙ্কবিজ্ঞাতে এত প্রতিভা খুলিবে তাহা কে অগ্রে জানিত? উক্ত বিজ্ঞার দ্বারা একবার তাঁহার সমক্ষে উদ্ঘাটিত হইবামাত্র, তিনি এক এক দিনে এক একটা বিষয় শিক্ষা ফেলিতে লাগিলেন। বিজ্ঞারও উন্নতি স্পষ্ট লক্ষ্য করিতে পারা গেল। একদিকে যেমন ধর্ম্মশাস্ত্র ও চিন্তার দ্বারা তাঁহার অন্তরের ভক্তিভাব দিন দিন বাড়িতে লাগিল, অপর দিকে তেমনি

সর্বদা জ্ঞানালোচনা দ্বারা চিন্তের প্রশস্ততা ও জ্ঞানস্পৃহা বৃদ্ধি পাইতে লাগিল।

এইরূপে একপ্রকার সুখেই দিন কাটিয়া যাইতেছে এমন সময়ে বঙ্গদেশে এক তুমুল আন্দোলন উপস্থিত হইল। খ্যাতনামা ঈশ্বরচন্দ্র বিদ্যাসাগর মহাশয় তাঁহার বিধবা-বিবাহ-বিষয়ক পুস্তক প্রচার করিলেন। মধ্যরাত্রে শ্রুণু পল্লীর মধ্যে প্রকাণ্ড কামানের গোলা পড়িলে, লোকে যেমন চমকিয়া উঠে, ও দিশাহারা হয়, তেমনি ঐ পুস্তক নিদ্রিত বঙ্গবাসীর চিন্তাক্ষেত্রে পতিত হইল। যে-দেশে বিধবাদিগের প্রতি এত কঠিন শাসন, যে দেশে কিছুদিন পূর্বে বিধবাদিগকে মৃত পতির সহিত জলস্ত চিতানলে নিক্ষেপ করা হইত; যে-দেশে একাদশীর দিন প্রাণ গেলেও বিধবাদিগকে একবিন্দু জল পান করিতে দেয় না, সে দেশের বিধবাদিগের পুনর্বিবাহের প্রস্তাব! এ সৃষ্টি ছাড়া কথা কোথা হইতে আসিল! কে এ বিদ্যাসাগর? এ কিরূপ ব্রাহ্মণ পণ্ডিত? এ ব্যক্তি এতদিন কোথায় লুকাইয়া ছিল? সংবাদ পত্রে, পথে, বাটে, যথায় তথায় এইরূপ চর্চা চলিল। ভট্টাচার্য্য মহাশয়দিগের টোল চতুষ্পাঠীতে এই বিচার বিশেষরূপে উঠিল। কারণ বিদ্যাসাগর মহাশয় শাস্ত্রীয় বচন উদ্ধৃত করিয়া, শাস্ত্রানুগত মীমাংসার দ্বারাই, বিধবার পুনর্বিবাহ স্থাপন করিবার প্রয়াস পাঠিয়াছিলেন। নশিপুরে তর্কভূষণ মহাশয়ের চতুষ্পাঠীতে এই প্রসঙ্গ উঠিলে, তিনি যে যে বচন উদ্ধৃত হইয়াছে ও যেরূপ মীমাংসা করা হইয়াছে, তাহা ধীরভাবে গুনিয়া বলিলেন, “যে সকল বচন উদ্ধৃত করেছেন তা ঠিক; আর যে মীমাংসা করেছেন, তাও প্রশংসনীয়। মাতৃঘটা বড় বুদ্ধিমান দেখছি; কিন্তু এ সকল বিষয়ে শাস্ত্রীয় বিচারে ফল কি? কোন্ কাজটা আমরা শাস্ত্রানুসারে করি? এ সকল বিষয়ে দেশাচারই বলবৎ। বিশেষতঃ বিধবাদের অন্তরে এরূপ প্রবৃত্তির উদয় না

করে বৈরাগ্যের উপদেশ দেওয়াই ত ভাল ; তাহারা ব্রহ্মচর্যা ও কুলধর্ম লয়ে থাকে ইহাই ত ধর্ম-সঙ্গত ।”

বিদ্যারত্ন মহাশয় কিন্তু অন্য প্রকার ভাব ধারণ করিলেন । তিনি বিদ্যাসাগর মহাশয়কে ব্রাহ্মণাধম, অকাল-কুস্মাণ্ড, ভ্রষ্টাচার, নাস্তিক প্রভৃতি শব্দে অভিহিত করিলেন ; এবং গিরিশচন্দ্রকে বলিয়া দিলেন ঐ পুস্তক যেন কেহ বাড়ীতে না আনে ।

বিধবা বিবাহ-বিষয়ক পুস্তক প্রচার হইবামাত্র পঞ্চু বিধবা-বিবাহের একজন প্রধান পাণ্ডা হইয়া উঠিলেন ; এবং প্রতিদিন সায়ংকালে বিজ্ঞার সহিত ঐ বিষয়ে তর্ক বিতর্ক করিতে আরম্ভ করিলেন । একদিন বিজ্ঞা পঞ্চুকে বলিলেন, “তোমার কথা শুনলে বোধ হয় যে বিধবার পক্ষে বিবাহ করাটা যেন পরম ধর্ম !”

পঞ্চু । ধর্ম বৈ কি ? দেশাচারের যে অত্যাচার, তাতে দৃষ্টান্ত দেখান ত উচিত ।

বিজ্ঞা । ( হাসিয়া ) দৃষ্টান্ত দেখাবার জন্তে বিবাহ ? এ কথা মন্দ নয় । বিবাহ করা না করা মানুষের ইচ্ছাধীন । বিধবারা বিবাহ না করে বৈরাগ্যধর্ম ও ব্রহ্মচর্যা অবলম্বন করে থাকে, সেই ত ভাল । দেশে বিবাহের কি অপ্রতুল আছে ? বিবাহ করবার লোক ঢের আছে । বিধবাগণ পর-সেবাতেই থাকুক ।

পঞ্চু । আপনি এমন কথা বললেন ? এ দেশের কোটি কোটি বিধবা কি হুংখে দিন যাপন করছে, একবার ভাবলেন না ।

বিজ্ঞা । হুংখ হুংখ করে রব তুললে হবে না, বিবাহ না করাটাই কি এত হুংখ ? বিধবারা বিবাহ করতে পারে না, এটা হুংখের কারণ নয় ; কিন্তু অধিকাংশ বিধবার করবার কিছুই নেই, সর্বদা পরমুখাপেক্ষী ও পরাধীন হয়ে থাকতে হয়, এটাই হুংখের বিষয় । যারা আত্মীয় স্বজনের

সেবাতে নিযুক্ত আছে, করবার কাজ যথেষ্ট আছে, আদর যত্ন আছে, তাদের বিবাহের দরকার কি ? তোমরা স্ত্রীলোককে এত হীন মনে কর কেন যে তারা বিবাহের অভাবে ক্রোধে মরে যায় ? আত্মস্থানবেশণ অপেক্ষা পরসেবা কি ভাল নয় ?

পঞ্চু। তা সত্য হলেও একটা ভাবতে হবে ; আপনা হতে পরের সেবা করা এক কথা, আর হাত পা বেঁধে করান আর এক কথা ।

বিজয়া। হাত পা আবার কে কার বাঁধলো ?

পঞ্চু। বিধবাকে জোর করে ব্রহ্মচর্য্য করালে কি হাত পা বাঁধা হলো না ? আপনা হতে ব্রহ্মচর্য্য করা ভাল, না জোর করে করান ভাল ?

বিজয়া। এ কথাটা ঠিক বটে, জোর করে ব্রহ্মচর্য্য করা ভাল নয় । আমার বোধ হয় এমন নিয়ম থাকা উচিত কোনও বিধবা ইচ্ছা করলে বিবাহ করতে পারবে কিন্তু তা বলে বিধবার পুনর্বিবাহটাকে একটা ধর্ম্মকর্ম্মের মধ্যে করে তোলা ভাল নয় ; বরং যাতে বিধবাদের বৈরাগ্য ও ব্রহ্মচর্য্যের প্রবৃত্তি বাড়ে এমন উপদেশ দেওয়াই ভাল ।

পঞ্চু। আপনি যা বললেন বিদ্যাসাগর তাই করবার চেষ্টা করছেন ; ঐ ‘রকম আইন করবার চেষ্টায় আছেন ।

বিজয়া। সে ভাল । আমার কিন্তু বিধবাদের তপস্বী ও ব্রহ্মচর্য্য দেখতে ভাল লাগে ; ইচ্ছা হয়, বিধবাদের জন্তে এমন একটা জায়গা করি, যেখানে তারা কিছু কিছু লেখা পড়া শিখতে পারে ও পাঁচ রকম কাজ শিখে, করে খেতে পারে ।

পঞ্চু। ও বাবা ! সে এখনও অনেক দিনের কথা ।

এই কথোপকথনের পর দিনেই পঞ্চু একখানা বিধবা-বিবাহ-বিষয়ক পুস্তক আনিয়া বিজয়াকে পড়িতে দিলেন । তিনি জানিতেন না যে বিদ্যারত্ন মহাশয় উক্ত পুস্তক বাড়ীতে আনিতে নিষেধ করিয়াছেন । বাহা হোক

পুস্তকখানি যখন আসে, তখন বড় বৌ সেখানে ছিলেন। তিনি রাত্রে সরলভাবেই স্বয়ং পতিকে ঐ পুস্তকের কথা বলিলেন। বিদ্যারত্ন মহাশয় যখন শুনিলেন যে পঞ্চ ঐ সৰ্ব্বনেশে পুস্তক আনিয়াছে ও বিজয়াকে পড়িতে দিয়াছে, তখন তাঁহার এতঃ ক্রোধের আবির্ভাব হইল যে একবার মনে করিলেন সেই রাত্রেই উঠিয়া গিয়া পঞ্চকে তাড়াইয়া দেন; কিন্তু সে রাত্রে কিছুই বলিলেন না। কোনও প্রকারে ধৈর্য্যাবলম্বন করিয়া থাকিলেন। পরদিন প্রাতে উঠিয়াই প্রথম কৰ্ম্ম পঞ্চ ও গোবিন্দকে তাড়াইয়া দেওয়া। প্রাতে উঠিয়া দুইজনকে ডাকিয়া বলিলেন, “এখানে জায়গার বড় অপূৰ্ণ; অতিথি অভাগত আসিলে থাকবার বড় অসুবিধা হয়, অতএব তোমরা দুদিনের মধ্যে একটা জায়গা দেখে নেও। এখানে থাকবার সুবিধা হবে না।” কাহারই বুঝিতে বাকি থাকিল না যে, বিধবাবিবাহ বিষয়ক পুস্তকই এই অনর্থের মূল। বিদ্যারত্ন মহাশয় বাহিরে গেলেই বিজয়া হাসিয়া বড় বৌকে বলিলেন, “বড় কর্তার এত রাগ কেন? তাঁর কি ভয় হয় পাছে আমার মন বিগড়ে যায়?” হাসিলেন বটে, কিন্তু আত্ম-মৰ্য্যাদাতে কিঞ্চিৎ আঘাত লাগিল; এবং পঞ্চ ও গোবিন্দ চলিয়া যাইবে ইহা ভাবিয়া মনে ক্রেশ হইল।

পঞ্চ ও গোবিন্দ অত্র স্থানে বাসা করিল বটে, কিন্তু প্রতিদিন সন্ধ্যার সময় আসিত। পঞ্চ, হরচন্দ্র, ইন্দুভূষণ, ও ভবেশকে ইংরাজী পড়া বলিয়া দিত, গোবিন্দ বিদ্যাবাসিনীকে পড়াইত, এবং পূৰ্ব্ববৎ নানাবিষয়ে কথোপকথন চলিত। বিদ্যারত্ন মহাশয় পঞ্চ ও গোবিন্দকে তাড়াইয়া নিশ্চিন্ত হইয়াছিলেন, জানিতেন না যে তাহারা প্রতিদিন আসে। ১৮৫৬ সালের বৈশাখের প্রারম্ভে আবার তাহাদিগকে বাটীতে আসিতে পর্য্যন্ত নিষেধ করিলেন। ইহার ফল এই হইল যে বিজয়া তাহাদিগের সহিত সাক্ষাৎ করিবার মানসে ঘন ঘন দেবরের বাটীতে যাইতে আরম্ভ



করিলেন। এইরূপে নরোত্তম বোম্বের পরিবারদিগের সহিত তাঁহার আত্মীয়তা জন্মিয়া গেল; এবং নবরত্ন সভার উৎসাহী সভ্যদিগের সহিতও একটা সম্পর্ক দাঁড়াইল। বিদ্যারত্ন মহাশয় পঞ্চ ও গোবিন্দকে তাড়াইবার হেতু প্রদর্শন করিয়া নশিপুরে যে পত্র লিখিয়াছিলেন তাহাতে বিজয়ার নামেও কিঞ্চিৎ অভিযোগ ছিল। সেই পত্র পাওয়া অবধি তর্কভূষণ মহাশয় চিন্তিত রহিলেন। মনে মনে ভাবিতে লাগিলেন, যে ভয় করিয়াছিলাম, তাহাই কি ঘটিল?

## ত্রয়োদশ পরিচ্ছেদ

১৮৪৫ সালে হিন্দু কালেক্টরের প্রথম শ্রেণীতে নবীনচন্দ্র বসু নামে একটা যুবক পড়িত। ঐ যুবকটী শোভাবাজারনিবাসী, সুপ্রীমকোর্টের প্রসিদ্ধ মোক্তার শ্রীযুক্ত হলধর বসুর ভ্রাতৃপুত্র। নবীনের কিছু অসাধারণত্ব আছে, তাহা ক্রমেই প্রকাশিত হইবে। নবীন স্বভাবতঃ চিন্তাশীল, বিনয়ী, সৎ ও আত্মোন্নতিতে মনোযোগী। স্বশ্রেণীস্থ ও সমবয়স্ক যুবকদিগের নাস্তিকতা, উচ্ছৃঙ্খলতা, সুরাপানাসক্তি তাঁহার ভাল লাগে না; একারণ নবীন একপ্রকার সমবয়স্কদিগের সঙ্গে মেশা পরিত্যাগ করিয়াছেন। তাহারা যখন আমোদ প্রমোদ করে, তখন তিনি এক কোণে বসিয়া নানা গ্রন্থ অধ্যয়ন করেন। সেই সময়েই উক্ত কালেক্টরের দ্বিতীয় শ্রেণীতে বজরাজ ঘোষ ও সুরেন্দ্রলাল গুপ্ত নামে দুইটা বালক পাঠ করিত। তাহারা উভয়ে বয়সে নবীনের অপেক্ষা দুই তিন বৎসরের ছোট। এই দুইটা বালক সর্বদা এক সঙ্গে বেড়াইত, যেন হরিহরাণ্ডা। ঘটনাক্রমে নবীনের সহিত ইহাদের পরিচয় হওয়াতে নবীন দেখিলেন, ইহারাও তাঁহার সমভাবাপন্ন; ইহারাও শিক্ষিত যুবকগণের উচ্ছৃঙ্খলতা ভালবাসে না; এবং সেইজন্তই দুই জনে একত্রে দূরে দূরে বেড়ায়। তিনজনে স্বভাবতঃ বন্ধুতা জন্মিল। নবীনের মনে তখন আত্মোন্নতির বাসনা আশ্রয়ের মত জলিতেছিল। তিনি সে অগ্নি অপর যুবকদ্বয়ের হৃদয়ে লাগাইয়া দিলেন। তিন জনে স্থির করিলেন যে, প্রতিদিন কালেক্টরের ছুটির পর, কালেক্টরের ঘরে এক ঘণ্টা কি দুই ঘণ্টা বসিয়া সাধু ও

মহাজনগণের জীবনচরিত গ্রন্থ সকল পড়িবেন। এইরূপ পাঠ কিছুদিন চলিল। ক্রমে কালেজ হইতে আসিতে বিলম্ব হয় বলিয়া তাঁহাদের অভিভাবকগণ বিরক্তি প্রকাশ করিতে লাগিলেন। সুতরাং প্রতিদিন কালেজের ছুটির পর বাসা পরিত্যাগ করিয়া, সপ্তাহে তিন দিন ব্রজরাজদিগের ভবনে, সন্ধ্যার সময় এক ঘণ্টা করিয়া পড়িবার নিয়ম করা হইল। প্রত্যেকে কালেজের ছুটির পর বাড়ীতে গিয়া পরিশ্রমাস্তে বায়ুসেবনের জন্ত বাহির হইয়া, ব্রজরাজদিগের বাটীতে আসিয়া ষুটতেন; এবং প্রায় এক ঘণ্টাকাল একত্রে কোন উৎকৃষ্ট গ্রন্থ অধ্যয়ন করিতেন।

অধ্যয়ন ও প্রাণ খুলিয়া আলোচনা করিতে করিতে এই যুবকত্রয়ের মধ্যে এক অপূর্ব ভাবের উদয় হইল। তাহারা পরস্পরের সহিত স্মৃষ্টি বন্ধুত্বস্বত্রে বদ্ধ হইল। প্রথমতঃ, তাহাদের অন্তরে ধর্ম ও নীতির প্রতি আস্থা দিন দিন বাড়িতে লাগিল। এই সময়কার শিক্ষিত যুবক মাঝেই ইংরাজী ভাষার গোঁড়া ছিল। তাহারা ইংরাজীতে পরস্পরের সহিত কথোপকথন করিত, ইংরাজীতে চিঠি পত্র লিখিত; ইংরাজী সাহিত্য পড়িতে ভালবাসিত; এবং তৎসঙ্গে বাঙ্গালা ভাষার প্রতি অনুরাগ-বিহীন ছিল। কিন্তু এই তিন জন যুবক ইংরাজীর ত্রায় বাঙ্গালা সাহিত্যেরও অনুরাগী। সে সময়ে যে কিছু উৎকৃষ্ট বাঙ্গালা পুস্তক মুদ্রিত হইয়াছিল, ইহারা সে সকলই মনোযোগ পূর্বক পড়িয়াছিল, এবং পরস্পরে কথোপকথন করিবার ও চিঠি পত্র লিখিবার সময় বাঙ্গালা ভাষা ব্যবহার করিত। দ্বিতীয়তঃ, অগ্রাগ্র ইংরাজীশিক্ষিত যুবকদিগের অনেকে সুরাপানের পক্ষপাতী, ইহারা সুরাপানের ঘোর বিরোধী; তাহারা অনেকে নাস্তিক, ইহারা আস্তিক। এতদ্ব্যতীত অপরাপর বিষয়ে তদানীন্তন শিক্ষিত দলের সহিত ইহাদের সম্পূর্ণ মিল ছিল; অর্থাৎ

তাহাদের ছায় ইহারাও প্রাচীন ধর্ম ও প্রাচীন রীতিনীতির প্রতি আস্থাশীল এবং ইহারাও সমাজসংস্কারপ্রয়াসী ; অর্থাৎ পৌত্তলিকতা, বালাবিবাহ প্রভৃতির বিরোধী এবং জ্ঞানীশিক্ষার পক্ষপাতী ।

এইরূপে কিছুদিন অতীত হইলে, ব্রজরাজের কনিষ্ঠ সহোদর মথুরেশ ঘোষ ও তাঁহার স্নহৃদ পঞ্চানন চট্টোপাধ্যায় আসিয়া, ইহাদের সঙ্গে যোগ দিল । এই পাঁচ জনে কিছুদিন একত্রে পাঠ, ও আলোচনাদি চলিল । তখনও কোনও প্রকার বাধাবাধ নিয়ম প্রণয়ন করা হয় নাই । কে সভাপতি, কে সম্পাদক, সভার উদ্দেশ্য কি, কে সভ্য হইবার উপযুক্ত, ইহার কিছুই স্থির হয় নাই । দল বাড়াইবার জন্ত ইহাদের কিছুই ব্যগ্রতা ছিল না ; বরং পূর্বাবধি নবীনের মনে দল না বাড়াইবার দিকেই ইচ্ছা ছিল । আয়োজনতিই ইহাদের উদ্দেশ্য, সুতরাং সংখ্যাবৃদ্ধিতে সে কার্যের ব্যাঘাত হইবার সম্ভাবনা । এজন্য আপনাদের সংখ্যাবৃদ্ধির জন্ত ইহাদের উৎসাহ ছিল না । ১৮৫০ সালে আপনা আপনি ইহাদের সংখ্যা ২ জন হইল ; তখন সভার নাম “আয়োজনতিবিধানিনী” করা হইল ; এবং কর্মচারী নিয়োগ আবশ্যক হইল । তদনুসারে নবীনচন্দ্র বসু সভাপতি, এবং ব্রজরাজ ঘোষ সম্পাদক হইলেন । সপ্তাহে তিন দিন সম্মিলিত হইবার নিয়ম রহিত করিয়া প্রতি শনিবার সন্ধ্যার পর সম্মিলিত হইবার নিয়ম করা হইল । এক শনিবার কোনও গ্রন্থ পাঠ করা হইত, এবং তৎপর-বর্তী শনিবার একজন সভ্য বাঙ্গালাতে একটী প্রবন্ধ লিখিয়া আনিতেন, তাহা পাঠ ও তদ্বিষয়ে আলোচনা হইত । নবীন নিয়ম করিলেন যে, জৈশ্বরের নিকট প্রার্থনা করিয়া কার্য্যারম্ভ হইবে । তদনুসারে হয় পঞ্চমুখে একটু প্রার্থনা করিয়া কার্য্যারম্ভ করিতেন, না হয় একটী লিখিত প্রার্থনা সকলে ভক্তিভাবে পাঠ করিয়া কার্য্যারম্ভ করিতেন । ১৮৫৪ পর্য্যন্ত ইহাদের সভ্যসংখ্যা ২ জন ছিল ; ইহারা নূতন লোক লইতে

চান নাই। উক্ত বর্ষে স্থির হইল যে, নয় জনের অধিক সভা লওয়া হইবে।

সেই সঙ্গে সঙ্গেই আরও কয়েকটি নিয়ম প্রবর্তিত হইল। প্রথম, সর্ববাদিসম্মত না হইলে কেহ সভার সভা হইতে পারিবে না ; দ্বিতীয়, যিনি সভা হইতে চাহিবেন, তাঁহাকে ‘জীবনে কখনও সুরাপান করিব না’, বলিয়া একটি প্রতিজ্ঞাপত্রে স্বাক্ষর করিতে হইবে ; তৃতীয়, প্রতিজ্ঞা করিতে হইবে যে, সভাতে যাহা কর্তব্য বলিয়া স্থির হইবে, তাহা প্রাণপণে পালন করিবার চেষ্টা করিব। সভাস্থ কাহারও আপত্তি না থাকিলে বিশেষ বিশেষ ব্যক্তিকে সভার আলোচনাতে উপস্থিত থাকিতে দেওয়া হইবে, কিন্তু তাঁহারা আলোচনাতে যোগ দিতে পারিবেন না। এইরূপ নিয়ম হওয়ার পর আরও কয়েকটি উৎসাহী যুবক ইহাদের সভার সভা-শ্রেণীভুক্ত হইল।

ইহাদের সভাসংখ্যা বাড়িল বটে, কিন্তু ব্রজরাজের মাতা ইহাদের সভার যে নবরত্ন নাম দিয়াছিলেন, সেই নবরত্ন নামটা রহিয়া গেল। সচরাচর সভা কথাটা উচ্চারণ করিলে মনের সমক্ষে যেরূপ ছবিটা উপস্থিত হয়, ইহাদের সভা সেরূপ নহে। অর্থাৎ এখানে বক্তৃতা ও বাদানুবাদ হয় না ; অথবা সভার কার্যবিবরণ লিখিয়া সংবাদপত্রে মুদ্রিত করা হয় না ; কিন্তু ইহাতে যাহা হয় তাহা কোনও সভাতে হয় না। এখানে আত্মোন্নতির প্রবল আকাঙ্ক্ষা অগ্নির মত প্রাণে প্রজ্জ্বলিত হয় ; চরিত্র গঠনের প্রবৃত্তি প্রবল হয় ; চরিত্র গঠনের সহায়তা হয় ; পার্থনাশের বাসনা উদীপ্ত হয় ; জ্ঞান মার্জিত ও উন্নত হয় ; সভাদিগের মধ্যে এক অদ্ভুত ভ্রাতৃত্বাব বর্দ্ধিত হয় ; এবং সর্বোপরি ঈশ্বর-প্ৰীতি ও মানব-প্ৰীতির অদ্ভুত উদ্বীপনা হইয়া থাকে। এখানে প্রেমিক হৃদয়ের সহিত প্রেমিক হৃদয়ের সংস্পর্শ ; জ্ঞান-স্পৃহার দ্বারা জ্ঞান-স্পৃহার

উদ্রেক ; চরিত্রের সংস্পর্শে চরিত্রের উৎকর্ষ এবং ভক্তের সংস্রবে ভক্তির বৃদ্ধি ! ইহাদের সংবাদ দেশের লোক কেহ জানে না ; কিন্তু কলিকাতার এক নিভৃত কোণে বসিয়া ইহারা এক অদ্ভুত শক্তি জাগাইতেছে ! এক অপূর্ব সাধনাতে নিযুক্ত হইয়াছে ! তাহার ফল ক্রমেই দৃষ্ট হইবে ।

সভাসংসৃষ্ট সকল ব্যক্তির বিশেষ পরিচয় দিবার অবসর নাই ; কাহারও কাহারও পরিচয় ক্রমে জানা যাইবে । এক্ষণে কেবল এই সভার সভাপতি ও ইহার আত্মা ও প্রাণ স্বরূপ নবীনচন্দ্র বসুর কিঞ্চিৎ পরিচয় দেওয়া আবশ্যিক বোধ হইতেছে ।

পূর্বেই বলা হইয়াছে, নবীন শোভাবাজারনিবাসী সূত্রীমকোটের মোক্তার হলধর বসুর ভ্রাতৃপুত্র । জ্যেষ্ঠর নাম সুরেশচন্দ্র বসু । তাঁহাদের পিতা গোপীমোহন বসু হিজলী কাঁথীতে নিমক নহলে কি কাজ করিতেন, যাহাতে বিলক্ষণ উপার্জন ছিল । কিন্তু প্রাচীন রীতি অনুসারে গোপীমোহন সমুদায় টাকা নিজ জ্যেষ্ঠ হলধরের হস্তে অর্পণ করিতেন ; এবং নিজ কর্মস্থানে পরিবার লইয়া যাইতেন না । কালে গোপীমোহনের দুই পুত্র ও এক কন্যা জন্মে । সকলে আশা করিয়াছিলেন, যে গোপীমোহনের ধনে এই শোভাবাজারহ বসু পরিবার দ্বরায় কলিকাতার ধনী পরিবারদিগের মধ্যে পারিগণিত হইবে । কিন্তু কয়েক বৎসর কর্ম করিতে না করিতে গোপীমোহন কালগ্রাসে পতিত হইলেন । তখন সন্তানেরা নাবালক । তদবধি জ্যেষ্ঠ হলধর বসু ইহাদের পালনের ভার লইলেন । তিনি নিজে অপুত্রক, স্তবরাং তাঁহার পত্নী পুত্রনির্কিশেষে ইহাদিগকে পালন করিতে লাগিলেন । ক্রমে সুরেশচন্দ্র ও নবীনচন্দ্র বয়ঃপ্রাপ্ত হইলেন এবং গিরিবারার বিবাহ হইয়া গেল । যথাসময়ে সুরেশচন্দ্র বিষয় কর্মে নিযুক্ত হইলেন । গবর্ণমেন্ট তোষাখানায় একটী

উত্তম চাকুরী পাইলেন। কিন্তু তাঁহার চাল চলন বৃদ্ধ হলধর বৎসর ভাল লাগিত না। তিনি আপনার বেতনের সমগ্র জ্যেষ্ঠতাতের হস্তে অর্পণ করিতেন না; কিয়দংশ দিয়া অবশিষ্ট নিজ হস্তে রাখিতেন ও তদ্বারা বাবুগিরি করিতেন; ইণ্ডা রূপণস্বভাব বৃদ্ধের মনঃপূত হইত না। সে জন্ম তিনি সুরেশচন্দ্রকে মধ্যে মধ্যে তিরস্কার করিতেন। প্রায় তিন বৎসর গত হইল সুরেশচন্দ্র একজন বন্ধুর সহিত পরামর্শ করিয়া একটা বাবসায়ে কিছু টাকা লাগাইবার ইচ্ছা করিলেন। তিনি জানিতেন, তাঁহার পিতার উপার্জিত অনেক সহস্র টাকা তাঁহার জ্যেষ্ঠা মহাশয়ের নিকট আছে। তদনুসারে বৃদ্ধ হলধর বৎসর নিকট দুই হাজার টাকা চাহিলেন। বৃদ্ধ বলিলেন,—“টাকা কোথায় পাব।”

সুরেশ। কেন, আমাদের পিতা যাহা কিছু উপার্জন করতেন, তাহা ত আপনার হস্তেই সমর্পণ করতেন। শুনতে পাই, তিনি ত্রিশ চল্লিশ হাজার টাকা রেখে গেছেন। তা’হতে আমাকে দু হাজার টাকা দিতে পারেন না?

হলধর। কে বলিল ত্রিশ চল্লিশ হাজার টাকা রেখে গেছে? ষৎসামান্য যা কিছু রেখে গিয়েছিল; তা তোমরা এত বৎসর ধরে খাওনি? তোমাদের বিয়ে খাওয়া হলো কিসে? সে কি অক্ষয় ভাণ্ডার যে চিরদিন থাকবে?

সুরেশ। আমি এত কথা জানি না। আমার দুই হাজার টাকার দরকার; আপনি দেবেন কি না?

হলধর। কোথা হতে দেব?

সুরেশ। তবে আপনার অন্তঃআমি আর খেতে চাই না। আমার দিন এক প্রকার চলে যাবে।

এই বাদানুবাদের পরেই সুরেশচন্দ্র পৈতৃক ভবন পরিত্যাগ করিয়া

স্বতন্ত্র বাসা করিলেন; এবং বুদ্ধ হলধর বহুর নামে নালিশ করিবার চেষ্টায় বেড়াইতে লাগিলেন। কিন্তু নালিশ করিবেন কি অবলম্বনে? গোপীমোহন কোনও উইল রাখিয়া যান নাই। জ্যেষ্ঠের নিকট কোন দিন কত টাকা পাঠাইয়াছেন, তাহারও কোনও নিদর্শন নাই। একটা কিম্বদন্তী আছে মাত্র। নিদর্শনের মধ্যে একখানা পুরাতন খাতাতে কয়েক সহস্র টাকার উল্লেখ আছে। তাহাও কাহার টাকা, কোন উদ্দেশ্যে পাঠাইয়াছেন, তাহার কিছু নির্দেশ নাই। সুরেশচন্দ্র তদবলম্বনেই নালিশ করিতে প্রস্তুত, কেবল নবীনের জ্ঞাত পারিয়া উঠিতেছেন না। তিনি পৈতৃক ভবন পরিত্যাগ করিয়া গেলে, নবীন তাহার সমভিব্যাহারী হন নাই। হলধর বহুর পত্নীকে তিনি “রাজা মা” বলিয়া ডাকিয়া থাকেন। রাজা মাই নবীনকে প্রতিপালন করিয়াছেন। গোপীমোহনের মৃত্যুর পূর্বেই নবীনের মাতার মৃত্যু হয়, সুতরাং জননার কথা নবীনের কিছুমাত্র স্মরণ নাই। তিনি রাজা মাকেই মা বলিয়া জানেন, তাঁহারই ক্রোড়ে প্রতিপালিত হইয়াছেন। রাজা মাও নবীনকে পুত্রাধিক স্নেহ করিয়া থাকেন। নবীনের দোষ তিনি দেখিতে পান না। নবীন যাহা করে, তাহা তাঁহার ভাল লাগে; একজ্ঞ স্বীয় পতির সহিত তাঁহার সর্বদা বিবাদ হয়। সুরেশচন্দ্র যখন পৈতৃক ভবন পরিত্যাগ করিয়া গেলেন, তখন নবীন রাজা মার মুখ চাহিয়া জ্যেষ্ঠের সঙ্গী হইতে পারিলেন না; বুদ্ধ হলধর বহুর বিকৃত মুখভঙ্গী সহ করিয়াও শোভাবাজারের বাড়ীতে পড়িয়া রহিলেন। সুরেশচন্দ্র নালিশ করিতে উদ্বৃত্ত হইলে নবীন বলিলেন,—“প্রাণ থাক্তে তা পারবো না। পিতৃহীন অবস্থায় যিনি পালন করেছেন, তিনিই পিতা। পিতার নামে আদালতে নালিশ! তা হবে না; সর্বস্ব যায় যাক।” কাজেই নালিশটা হইয়া উঠিল না।



ইহার পর নবীনকেও শোভাবাজারের বাড়ী ত্যাগ করিতে হইয়াছিল।  
তাহার বিবরণ পরে আসিতেছে।

১৮৫৬ সালের বৈশাখের প্রারম্ভে একদিন নবরত্ন সভার অধিবেশন।  
কিঞ্চিং পূর্বে নবীনচন্দ্র, ব্রজরাজ ও মথুরেশ তিনজনে বসিয়া কথোপকথন  
করিতেছেন, এমন সময়ে পঞ্চ উপস্থিত।

নবীন। এস হে পঞ্চ, তোমারও যে দেখি আমার দশা ঘটলো।  
বিভারত্ব মহাশয় নাকি তোমাকে বাড়ীতে যেতে নিষেধ করেছেন?

পঞ্চ। (ঈষৎ হাস্য করিয়া) হাঁ করেছেন।

নবীন। আমি মনে করেছিলাম বাড়ী হতে বহিষ্কৃত হবার গৌরবটা  
বুঝি আমার একলারই হলো, তা নয়, তুনি আবার আমার অংশী হলে।

পঞ্চ। আমাকে ত আর গলাধাক্কা খেতে হয় নি?

নবীন। (উঠেঃস্বরে হাস্য করিয়া) ঠিক বলেছ। আমার গৌরবটার  
অংশী হবার যো নাই; গলাধাক্কাটা আমার বেশী।

ব্রজরাজ। আচ্ছা নবীন! তোমার জোঠার কাণ্ডটা কি ভাই?  
বুড়োর ত ছেলে পিলে কিছুই হলো না; তোমরাই বংশধর; একরূপ  
স্থলে ত তোমাদের উপরেই টান হবার কথা, কিন্তু কি অস্বাভাবিক  
ব্যাপার! তোমাদের উপরেই যত বিদ্বেষ। লোকের মুখে শুনি বুড়োর  
খুব টাকা আছে। টাকাগুলি নিয়ে করবেন কি? মরবার সময়ে কি  
গলায় বেঁধে মরবেন?

নবীন। বিদ্বেষের অপরাধ কি ভাই? আমরা ত বিধিমতে জালাতন  
করতে ছাড়ি নাই। আমাদের দিক দিয়ে তাঁদের বিচার করলে  
চলবে না। তাঁদের দিক দিয়ে আমাদের বিচার কর্ত্তে হবে।  
প্রথমতঃ দেখ, কতদিন ধরে আমার বিয়ের জন্ত পীড়াপীড়ি করছেন,  
আমি কোনক্রমেই মত দিই না। গত বৎসর একেবারে কথা দেখে,

ঠিক করে, সে ভদ্রলোকদিগকে আনিবে, আমাকে ধরে বসলেন, সে সব কথা ত শুনেছ। আমি অসম্মত হওয়াতে তাঁর কি প্রকার অপমান বোধ হলো, তা একবার বিবেচনা কর। সেই অবধি কতদিন ত আমার সঙ্গে কথাই কইলেন না। তার পরে আবার গত বৎসর বাসন্তী পূজার সময়ে কৌশল করে পালিলাম, ঠাকুর প্রণাম করাটা এড়িলাম, সেটা কি তিনি বুঝতে পারলেন না? তার পর আবার এ বৎসর পূজার সময় এক বিবাহ উপস্থিত করলেন, তাও ভঙ্গ করে দিলাম। বুঝতেই ত পার, একরূপ করলে কিরূপ বিরক্তি জন্মাবার কথা।

ব্রজরাজ। যাই বল, তোমার মত এত বড় ভাইপোর গলায় হাত দিয়ে বাড়া হতে বার করে দেওয়াটা কিছু অতিরিক্ত।

নবীন। (হাসিয়া) রাগটা বড় বেশী হয়েছিল; তা না হলে কি গলায় হাত দিতেন?

মথুরেশ। তুমি তখন কি করলে?

নবীন। কি আর করবো? মুখটী বুজিয়ে বাড়ী হতে চলে এলাম। ব্যাপারটা কি হয়েছিল বলি শোন। চিরদিন ত বৎসরের মধ্যে এক কৰ্ম্ম বাসন্তী পূজা হয়ে থাকে। এবার কোন্ ব্যক্তির পরামর্শে জানি না, জগদ্ধাত্রী পূজা করলেন। আমি ত পূর্বে হতেই সরে পড়বার পরামর্শ করে রেখেছি, কিন্তু পূজার দিন প্রাতে উঠে আমাকে আদেশ করলেন, “তুমি কোথাও যেও না, লোকজন আসবে, তাহাদিগকে আদর অভ্যর্থনা করবে, বাড়ীতে থাকবে।” কি করি বাধ্য হয়ে রইলাম। পূজা শেষ হলে আমাকে ঠাকুর প্রণামের জন্ত ডাকলেন। আমি বিনয় করে বললাম, “আমি তা পারবো না।” দেখলাম বড়ই ক্রোধ হলো, কিন্তু তখন কিছু বললেন না। পর দিন ঠাকুর ভাসাতে নিয়ে গেলো। আমি কোথা হতে বেড়িয়ে এসে দোঁধি বাহিরবাড়ীতে জ্যোতা

মহাশয় চাকরের সঙ্গে কি কথা বলছেন। আমাকে দেখেই বল্লেন, “তোমার যেখানে জায়গা থাকে যাও, আমার বাড়ীতে তোমার স্থান নেই।” শুনে আমি কিছুক্ষণ দাঁড়িয়ে রইলাম। তার পর মনে করলাম একবার রাঙ্গা মাকে বলে আসি; এই ভেবে যেমন বাড়ীর ভিতরের দিকে যাচ্ছি, অমনি জোঁঠা মহাশয় গর্জন করে আমার দিকে ছুটে এলেন, “আবার বাড়ীর ভিতরে যাস্ যে?” আমি বললাম, “রাঙ্গা মার সঙ্গে দেখা করে আসি।” তিনি বল্লেন, “আর রাঙ্গা মার সঙ্গে দেখা করে না।” এই বলেই একেবারে আমার গলা ধরে ঠেলে বাড়ীর বাহির করে দিলেন। আমি আর কি করবো, রাস্তাতে দাঁড়িয়ে একটু ভাবলাম, তারপর দাদার বাসাতে গেলাম।

ব্রজরাজ। তার পর আর কি বাড়ীতে যাওনি?

নবীন। না, রাঙ্গা মার জন্তে বড় মন কেমন করে, চাকর এসে বলে তিনি দিন রাত্রি কেবল কাঁদেন, আমার জন্তে সর্ব্বদাই খাবার পাঠান, যেতে অনুরোধ করেন, কিন্তু কি করি আমি যেতে পারিনে।

পঞ্চ। সুরেশ বাবুর বাসাতে তোমার সব সুবিধা মত হয়েছে ত?

নবীন। সে চুৎখের কথা বল কেন? সে দাদা আর নাই। তিনি কি এক ব্যবসা খুলেছেন, তাতে আর কিছু হোক না হোক কুসঙ্গী কতকগুলো জুটেছে; খুব মদ খেতে আরম্ভ করেছেন; রাত্রে বাড়ীতে এসে এত উৎপাত করেন যে আমার পড়াশুনা কিছুই হয় না; মেজাজ এমনি খারাপ হয়েছে, যে ঘরের লোকের টেকা ভার। সে এক যন্ত্রণা হয়েছে। আমি স্থির করেছি স্বতন্ত্র বাসা করবো। কেবল বৌদিদির জন্তে পারিনে। সে ভদ্রলোকের মেয়ে যে আমাকে কি ভালবাসেন তা বলতে পারিনে। একদিন না দেখলে অস্থির হন। এখন আমি কাছে থাকতে তিনি একটু স্থখে আছেন। আমি চলে এলে তিনি

অঙ্ককার দেখবেন। সেই জন্তেই এত দিন কোথাও যেতে পারিনে। কিন্তু আর চলে না; এইবার পালাতে হবে।

ব্রজরাজ। নবীন, তুমি কেন আমাদের বাড়ীতে এসে থাক না। ওপাশের ঐ ঘরটা ত পড়েই থাকে; তুমি ত বেশ থাকতে পার; আমি তোমি এলে মা খুব আনন্দিত হবেন; তুমি ত আমাদের ঘরের শোক হয়ে গেছ।

মথুরেশ। তা বৈ কি, তুমি কাল তোমার জিনিষপত্র নিয়ে এখানে এস।

নবীন। রসো, হঠাৎ কি এলেই হয়, অনেক ভেবে দেখতে হবে।

এইরূপ কথোপকথন চলিতেছে, ইত্যবসরে সুরেন্দ্রলাল গুপ্ত ও তৎপরে অপরাপর সভাগণ আসিয়া উপস্থিত হইলেন। তখন সুরেন্দ্রলাল গুপ্তের স্ততিবাদ-সহকারে সভার কার্য আরম্ভ হইল। অঙ্ককার সভাতে দুইটা গুরুতর বিষয়ের আলোচনা হইবে। প্রথম, বিধবা বিবাহের যে আন্দোলন উঠিয়াছে, তৎসম্বন্ধে তাঁহাদের সভার কর্তব্য কি? দ্বিতীয়, সুরেন্দ্রলাল গুপ্ত পূর্ব সভাতে প্রস্তাব করিয়াছেন যে তাঁহাদের সভার অবলম্বিত সত্য সকল প্রচারের জন্ত একখানি মাসিক পত্রিকা বাহির করিলে ভাল হয়; সে প্রস্তাব কার্যে পরিণত করা হইবে কিনা?

প্রথম প্রশ্ন সম্বন্ধে পক্ষ বলিলেন, “বিজ্ঞানাগরের সহিত আমাদের বিশেষভাবে যোগ দেওয়া কর্তব্য। তিনি যে মহৎ কার্যে ব্রতী হইয়াছেন, আমাদের সভার সহাতে যোগ দেওয়া উচিত।”

নবীন। বিজ্ঞানাগর মহাশয়ের কার্যের সঙ্গে আমার হৃদয়ের সম্পূর্ণ যোগ আছে। তিনি এই প্রস্তাব উপস্থিত করে যে দেশের অসংখ্য স্ত্রীলোকের চিরকৃতজ্ঞতা উপার্জন করেছেন, তাতেও সন্দেহ নাই; এবং আমরা ব্যক্তিগত ভাবে সে বিষয়ে প্রত্যেকে সাহায্য করবো;

কিন্তু আমাদের সভাটিকে এই আন্দোলনের স্রোতের মধ্যে নামান ভাল বোধ হয় না। আয়োজিত আমাদের সভার প্রধান উদ্দেশ্য ; সেটা ভুললে হবে না। ভাঙ্গা অপেক্ষা গড়ার দিকে আমাদের দৃষ্টি। এস আমরা এমন একটা মন্তব্য প্রকাশ করি, যাহাতে বিজ্ঞাসাগর মহাশয়ের কার্যের সঙ্গে আমাদের হৃদয়ের যোগ প্রকাশ পায়। তৎপরে আমাদের কাজ যেক্ষণ চলিতেছে চলুক ; আমরা যদি এই আন্দোলনে সকলে মাতিয়া যাই, তা হলে আমাদের প্রধান কাজটাতে অমনোযোগ হবে।

অনেক বাদানুবাদের পর নবীনের পরামর্শানুসারে কার্য্য করাই কর্তব্য বলিয়া নির্দ্ধারিত হইল। তৎপরে সুরেন্দ্রলাল গুপ্তের প্রস্তাব উঠিল। সে বিষয়ে স্থির হইল, যে জুন মাস হইতে “হিতৈষী” নামে একখানি মাসিক পত্রিকা প্রকাশিত হইবে। তাহাতে ইংরাজী ও বঙ্গালা উভয় ভাষাতেই প্রবন্ধ থাকিবে। নবীন তাহার সম্পাদক ও সুরেন্দ্রলাল গুপ্ত সহকারী সম্পাদক এবং ব্রজরাজ কন্দ্যাদাক্ষ থাকিবেন। নবীন ও সুরেন্দ্র ইংরাজী প্রবন্ধ এবং পঞ্চ, ব্রজরাজ ও মথুরেশ বঙ্গালা প্রবন্ধ লিখিবেন। সুরাপার্ন নিবারণের চেষ্টা এই পত্রিকার একটি প্রধান কার্য্য হইবে।

এই পত্রিকার ব্যয় কি প্রকারে চলিবে, এই প্রশ্ন উঠিলে সুরেন্দ্রলাল গুপ্ত বাললেন, যে তিনি একই সংস্থান করিয়াছেন। তন্মধ্যে এক আবশ্যকমত গ্রাহক সংখ্যা হইবে না ? এই সম্বন্ধে সভাস্থ সকলে কর্তৃক দ্বারা আপনাদের মনের আনন্দ প্রকাশ করিতে লাগিলেন।

সভাভঙ্গ হইলে যখন সকলে চলিয়া গেলেন, তখন ব্রজরাজের মাতা আসিয়া নবীনকে তাঁহাদের বাড়ীতে থাকিবার জন্য বিশেষ অনুরোধ করিতে লাগিলেন। নবীনের সহিত তাঁহার বহুদিন পূর্বে পরিচয়

হইয়াছে। নবীন কতদিন রাত্রে তাঁহাদের বাড়ীতে থাকিয়াছেন, এবং ব্রজরাজের মাতার স্নেহের অংশী হইয়াছেন। তাঁহাকে তিনি মাসী বলিয়া সম্বোধন করেন। স্মৃতরাং মাসীর বিশেষ আগ্রহ ও অনুরোধে নবানের মনটা ব্রজরাজদিগের ভবনে থাকিবার জন্ত একটু খুঁকিল। তিনিও তৎসম্বন্ধে কর্তব্য কি তাহা চিন্তা করিতে করিতে জ্যেষ্ঠের বাসাতে প্রতিনিবৃত্ত হইলেন।

.

---

## চতুর্দশ পরিচ্ছেদ

নবীনচন্দ্র ব্রজরাজদিগের ভবনে বাস করিতে আসিবার পর যে সকল গুরুতর ঘটনা ঘটিয়াছিল, তাহা বর্ণন করিবার পূর্বে পরলোকগত নরোত্তম ঘোষের পরিবারদিগের বিবরণ একটু দেওয়া আবশ্যিক বোধ হইতেছে। ইঁহারা কলিকাতার বানিয়াদো ঘর। সহরে কয় পুরুষ বাস তাহা ঠিক বলা যায় না। তবে তিন পুরুষের সংবাদ আমরা জানি। পরলোকগত নরোত্তম ঘোষের পিতা শ্রীধর ঘোষ সেকালের ইংরাজী জানা লোকদের মধ্যে একজন ছিলেন। তিনি ঊনবিংশ শতাব্দীর প্রারম্ভে মিরাটে একটা চাকুরীতে নিযুক্ত ছিলেন। বৃদ্ধাবস্থাতে সে কাজ হইতে অবসর লইয়া প্রায় ৭০ বৎসর পর্য্যন্ত জীবিত ছিলেন। তাঁহার দুই পুত্রের মধ্যে নরোত্তম জীবিত ছিলেন, কনিষ্ঠ পুত্র, বালা-কালে গত হয়। একমাত্র সন্তান নরোত্তমের দুই পুত্র ও দুই কন্যা—ব্রজরাজ, মথুরেশ, রাধারাণী ও কৃষ্ণকামিনী। বিশ্বনাথ তর্কভূষণ মহাশয়ের সন্তানদিগের ছায়া ইহাদিগেরও নামের একটা ইতিবৃত্ত আছে। এই ঘোষ পরিবার বৈষ্ণব পরিবার; গোঁসাইএর শিষ্য। শ্রীধর ঘোষ মহাশয় অতি সাদৃশ্য প্রকৃতির লোক ছিলেন। উদরান্নের জন্ত স্নেহের অধীনে কাজ করিতেন বটে, কিন্তু নিষ্ঠার বিন্দুমাত্র ব্যাঘাত হইত না। আপীসে যখন কর্ম করিতেন, তখন তাঁহার নামাতে তিলক ও সর্সাপে হরিনামের ছাপ দৃষ্ট হইত। সকলেই তাঁহাকে সত্যবাদী, বিনয়ী, কর্তব্য-পরায়ণ সাধুলোক বলিয়া জানিত। এমন কি এজ্ঞাত তাঁহার ইংরাজ প্রভুগণও তাঁহাকে যথেষ্ট শ্রদ্ধা করিতেন; এবং যাহাতে তিনি দু পয়সা পান সে বিষয়ে সর্বদা দৃষ্টি রাখিতেন। মাহুঘটা শ্রামবর্ণ, সুস্থ ও সবল-

দেহ ছিলেন, মুখটা সদ্ভাবে ও ভক্তিতে যেন গদগদ, সে মুখ দেখিলেই কেমন হৃদয় স্বভাবতঃ তাঁহার দিকে আকৃষ্ট হইত। ঘোষজা মহাশয় আপীসে প্রবেশের দ্বারের পার্শ্বের ঘরেই বসিতেন; এবং যত গাড়ি মাল আমদানী ও রপ্তানী হইত তাহার হিসাব রাখিতেন। স্নাতরাং তাঁহাকে প্রতিদিন প্রাতঃকালে আপীসে প্রবেশের সময়ে অনেকবার এই প্রশ্ন শুনিতে হইত,—“কি ঘোষজা মশাই, খবর কি? সব কুশল তা?” অমনি ঘোষজার উত্তর,—“আজ্ঞে গোবিন্দের কুপাতে সবই কুশল।” ঘোষজা দোলার সময় কিছু ব্যয় করিতেন; লোক জনকে শ্রদ্ধাসহকারে আহ্বান করিয়া উত্তমরূপে খাওয়াইতেন। এই জন্ত আপীসের লোকে মাঘ মাস পাড়িলেই জিজ্ঞাসা করিত,—“কি ঘোষজা মশাই, এবার দোল করবেন তা?” অমনি উত্তর,—“আজ্ঞে কি জানি, যা গোবিন্দের ইচ্ছা।” গোবিন্দের প্রতি নির্ভরের ভাব তাঁহার এমন স্বাভাবিক ছিল, যে ৮ বৎসর বয়সে ওলাওটা রোগে তাঁহার দ্বিতীয় পুত্রটির কাল হইলে, তাহারই তিন চারিদিন পরে আপীসের একজন লোক জিজ্ঞাসা করিলেন,—“কি ঘোষজা মশাই, ছেলে দুটো মানুষ হচ্ছে তা?” ঘোষজা উত্তর করিলেন,—“আজ্ঞে দুটো আর কৈ? এখন তা একটা; কেবল বড়টাই আছে।” প্রশ্নকর্তা বিস্মিত হইয়া বলিলেন,—“সে কি, ছোটটির কি হলো?” ঘোষজা উত্তর করিলেন,—“আজ্ঞে, গোবিন্দ সেটাকে নিয়েছেন।” ঈশ্বরের প্রতি এই নির্ভর তাঁহার চরিত্রের একটা প্রধান শক্তি ছিল। তিনি প্রতিদিন আপীস হইতে আসিয়া স্নেহ-সংস্পর্শজনিত পাপ ক্ষালনের জন্ত নান করিতেন; এবং হাজার কৃষ্ণ নাম জপ করিতেন। তদনন্তর পাড়ার এক প্রতিবেশীর গৃহে চৈতন্ত-চরিতামৃত পাঠ শুনিতে যাইতেন। সেখানে তাঁহার সমবয়স্ক আরও দুই একটা বৃদ্ধ মিলিত হইয়া চৈতন্ত-চরিতামৃত পাঠ করিলেন। তৎপরে বাড়ীতে আসিয়া আহালাদি করিতেন। বিষয়



কর্ম হইতে অবসৃত হওয়ার পর ধর্মচিন্তা ও ধর্ম্যালোচনা ভিন্ন ঘোষজা মহাশয়ের অন্ত কাজ ছিল না।

তিনি সাধ করিয়া নাতি নাতিনৌদিগের নাম রাখিয়াছিলেন। পুত্রের সর্ব-জ্যোষ্ঠা কন্যা হইলে তাহার নাম রাধারানী রাখিলেন। তৎপরে ব্রজরাজ মথুরেশ ও কৃষ্ণকামিনী। কৃষ্ণকামিনীকে তিনি ৬৭ বৎসরের বালিকা দেখিয়া গিয়াছেন, তাহার বয়স্ক্রম এখন ২১ বৎসর। সর্বজ্যোষ্ঠা রাধারানী, তাঁহার প্রথম আদরের ধন ছিল। “রাধে! রাজনন্দিনী! গরবিনী! শ্রামসোহাগিনী!” বলিয়া যখন ডাকিতেন, তখন এক বৎসরের বালিকা রাধারানী অচিরোদ্যত-দন্তাবলী-শোভিত মুখ-চক্রে একটু হাসিয়া ঝাঁপাইয়া, তাঁহার ক্রোড়ে গিয়া পড়িত। তাহাকে বুকে চাপিয়া বলিতেন, —“রাখালের সনে প্রেম করিস নে রাই!” অমনি চক্ষে জলধারা বহিত। কৃষ্ণকামিনী যখন হাঁটিতে শিখিল, তিনি তখন বৃদ্ধ ও পুত্রশোকে জর্জরিত, কারণ তৎপূর্বে নরোত্তম ঘোষ পরলোক-গমন করেন। তথাপি কৃষ্ণকামিনীকে বুকে ধরিয়া বৃন্দাবনলীলা স্মরণ করিতেন; এবং দুই চক্ষু অবিরল জলধারা বহিত। নরোত্তমের মৃত্যুর কয়েক বৎসর পরেই ঘোষজা মহাশয়ের পরলোক হয়। তখন রাধারানী ব্যতীত আর সকলগুলিই নাবালক। তাহাদের রক্ষণাবেক্ষণের ভার ব্রজরাজের মাতুল, বাগবাজারের শ্রামচাঁদ মিত্র মহাশয়ের উপরে পড়ে। ব্রজরাজ ও মথুরেশ বয়ঃপ্রাপ্ত না হওয়া পর্য্যন্ত তিনি ভগিনী ও ভাগিনেয়দিগকে রক্ষা ও প্রতিপালন করিয়াছেন; তাহাদের পৈতৃক বাটী ভাড়া দিয়া, সেই ভাড়ার দ্বারা ও নরোত্তমের পরিত্যক্ত টাকা স্তুদে লাগাইয়া সেই টাকা এবং নিজের দত্ত সাহায্যে ক্লেশে তাহাদের ব্যয় নির্বাহ করিয়াছেন। ব্রজরাজের বয়স্ক্রম এখন ১৫ বৎসর। এক বৎসর হইতে তিনি একজন উকীলের বাড়ীতে একটা চাকুরী পাইয়াছেন। বেতন ৬০ টাকা। আর

মথুরেশের বয়ঃক্রম যদিও ২৩ বৎসর মাত্র, তথাপি তাঁহাকেও বিষয় কৰ্ম্মে নিযুক্ত হইতে হইয়াছে। তিনি চল্লিশ টাকা বেতনের একটা চাকুরী যোগাড় করিয়াছেন। সে কালে অল্প একটু ইংরাজী শিখিলেই লোকে চাকুরীর চেষ্টা করিত। কৃষ্ণকামিনী শৈশবে বিধবা হইয়া পিতৃগৃহে ভ্রাতাদের আশ্রয়েই আছে। রাধারণী পতিগৃহ-বাসিনী। ভাগিনেয়দ্বয় বয়ঃপ্রাপ্ত হওয়ার পর শ্রামচাঁদ মিত্র মহাশয়কে আর সর্বদা ইহাদের তত্ত্বাবধান করিতে হয় না। মধ্যে মধ্যে আসিয়া থাকেন।

পূর্বোক্ত কথোপকথনের দুই দিন পরেই নবীনচন্দ্র ব্রজরাজদিগের ভবনে বাস করিবার জন্ত আসিলেন। সকলেরই আনন্দ। নবীনচন্দ্র ৫০ টাকা বেতনে ওরিএন্টাল সেমিনারিতে তৃতীয় শিক্ষকের কাজে নিযুক্ত আছেন। সে পদ তাঁহার বিজ্ঞাবুদ্ধির উপযুক্ত নহে। তিনি কেবলমাত্র ইংরাজীতে সুশিক্ষিত নহেন; পাড়ার একজন পাণ্ডিতকে কিছু কিছু দিয়া কয়েক বৎসর হইতে সংস্কৃত শিখিতেছেন। ইতিমধ্যেই উক্ত ভাষাতে তাঁহার একটু ব্যুৎপত্তি জন্মিয়াছে। সুতরাং তিনি চেষ্টা করিলেই অধিক টাকা বেতনের একটা কৰ্ম্ম যোগাড় করিতে পারিতেন। কিন্তু মনে দারপরিগ্রহ করিবার সংকল্প না থাকাতে এবং অর্থের অধিক প্রয়াস নাই বলিয়া ঐ ৫০ টাকা বেতনেই সন্তুষ্ট হইয়া রহিয়াছেন। জ্ঞানচর্চাতেই আনন্দ, সেই জন্তই সহর ছাড়িতে অনিচ্ছুক।

তিনি এ বাড়ীতে আসার পরদিন অপরাহ্নে ব্রজরাজের মাতা বাহরের ঘরে আসিয়া বলিলেন, “নবীন, বাড়ীর ভিতর এস, কিছু জল খাবে।” নবীনচন্দ্র উঠিয়া সঙ্গে সঙ্গে চলিলেন। গৃহিণী নবীনকে লইয়া গিয়া ব্রজরাজের বাসবার ঘরে বসাইলেন। বসাইয়া পুত্রবধুদিগকে ও কন্যাকে ডাকিলেন। পুত্রবধুদিগকে বলিলেন, “মা তোমরা প্রণাম কর; উনি যে ভাস্কর হন।” এই বলিয়া ব্রজরাজের কনিষ্ঠা কন্যাটিকে লইয়া

নবীনের ক্রোড়ে দিলেন। নবীন তাহাকে পাইয়া বড় আনন্দিত হইয়া বলিলেন,—“বাঃ যেন মোমের পুতুলটা।” টেবিলের উপর একটা কাগজ চাপা পাথরের কুকুর ছিল, তুলিয়া তাহার হস্তে দিলেন; সে সেইটাকে লালারসপ্লাবিত করিতে লাগিল। ইতিমধ্যে কৃষ্ণকামিনী বিনম্রভাবে উপস্থিত। গৃহিণী বলিলেন,—“লজ্জা কি, ভাই হয় যে। নবীন এই আমার ছোটমেয়ে কেটে।” নবীনচন্দ্র পূর্বেই কৃষ্ণকামিনীর নাম শুনিয়াছিলেন। জানিতেন যে কৃষ্ণকামিনী নবরত্ন সভার প্রাত বিশেষ অনুরাগিণী এবং এতদ্ব্যতীত তিনি তাঁহার বিজ্ঞাবুদ্ধিরও কিছু কিছু পরিচয় পাইয়াছিলেন। তিনি পূর্বে কত দিন তাঁহাদের বাড়ীতে থাকিয়াছেন; কিন্তু কখনও তাঁহাকে চক্ষে দেখেন নাই; সুতরাং কৃষ্ণকামিনী যখন তাঁহার সমক্ষে আসিয়া দাঁড়াইলেন, তখন স্বাভাবিক লজ্জাশীলতা বশতঃ তিনি যেন ভাল করিয়া তাঁহার মুখের দিকে চাহিতে পারিলেন না; উঠিয়া দাঁড়াইলেন। ওদিকে কৃষ্ণকামিনীর চক্ষের উপর তাঁহার চক্ষু পড়িবামাত্র, বিনয় ও হ্রীদ্বারা জড়িত কি এক অপূর্ব ভাব কৃষ্ণকামিনীর মুখের উপর দিয়া বহিয়া গেল; এবং তাঁহার দৃষ্টি আপনা হইতেই নিম্নাভিমুখিনী হইল। নবীনচন্দ্র জিজ্ঞাসা করিলেন, “আপনি গতবারের সভার দিন ছিলেন?”

কৃষ্ণ। ছিপাম।

গৃহিণী। ও বাবা! ও তোনাদের নবরত্নের যে গোড়া, ও আবার থাকবে না!

নবীন। (স্বয়ং হাসিয়া) মাসি! ভাল আপনি আমাদের সভাটার নাম নবরত্ন তুলে দিয়েছেন; আর কেউ আসল নামে ডাকে না।

গৃহিণী। তা মন্দ নাম কি দিয়েছি? তোমরা নয়টী ছেলে যেন নয়টী রত্ন। ঠিক নাম ত হয়েছে।

নবীন। (হাসিয়া) এখন ত আর আমরা নয় জন নই। তা হলেও সকলে নবরত্নই বলে। আপনার নামে আমাদের প্রিয় নামটাকে চাপা দিয়ে ফেলেছে।

গৃহিণী। অত বড় বিদকুটে নাম কি রাখতে আছে? মানুষ বা বলতে পারে না। কি, কিরে কেণ্টো কি নামটা! বলত।

কৃষ্ণ। (হাসিয়া) আত্মোন্নতি-বিধায়িনী-সভা।

গৃহিণী। ও বাবা! ও ছন্নতি-ধানী সভা কি কেউ বলতে পারে? (নবীনের ও কৃষ্ণকামিনীর হাত) কে জানে এক পোড়া ইংরেজী দেশে এসে যত বিদকুটে নাম হয়েছে।

নবীন। মাসি! ওটা ত ইংরাজী নাম নয়; ও যে বাঙ্গলা।

গৃহিণী। হাঁ, তা বই কি; বাঙ্গলা হলে আর আমরা বুঝতে পারিনি।

নবীন। মাসী, ঠিক বলেছেন; ওটা সংস্কৃত।

গৃহিণী। তাই বল।

ইতিমধ্যে একজন চাকরাণী আসিয়া সংবাদ দিল, যে শোভাবাজারের বাড়ীর রাজা মার নিকট হতে লোক এসেছে, বাবুকে ডাকছে। নবীনচন্দ্র সকলকে অপেক্ষা করিতে বলিয়া নামিয়া গেলেন; এবং তাঁহার রাজা মার প্রেরিত লোককে বিদায় করিয়া কিঞ্চিৎ পরেই ফিরিয়া আসিলেন। আবার কণোপকণন আরম্ভ করিল।

গৃহিণী। রাজা মার খবর কি?

নবীন। খবর ভাল, আমাকে বাড়ীতে নে যাবার জন্তে পীড়াপীড়ি করছেন।

গৃহিণী। মাথেকো ছেলে মানুষ করেছেন, প্রাণটা কাঁদবে না? একবার দেখা দিলে এস না কেন?

নবীন। জ্যেষ্ঠা মশাইএর অনুমতি না হলে, তাঁর অনিচ্ছাতে, গোপনে যেতে পারিনে। অন্ত কোথাও দেখা হবে।

গৃহিণী। আজ লোক কি বলতে এসেছিল।

নবীন। আজ কিছু বলতে আসেনি। রাঙ্গা মা কিছু খাবার পাঠিয়েছেন, ওই পাশের ঘরে আছে। সকলকে দেবেন।

এই কথা বলিতে নবীনের চক্ষু অশ্রু-সিক্ত হইল।

গৃহিণী। আহা কি মায়া, ঠিক যেন মায়ের মত।

নবীন। মাসি, মায়ের মত বলেন কি? রাঙ্গা মা আমাদের জন্তে যা করেছেন, অতি কম মায়ে তা করে।

ইতাবসরে ব্রজরাজ আপীস হইতে আসিলেন; দেখিলেন, মাতা, বধু ও ভাগিনী এই সকলের দ্বারা পরিবেষ্টিত হইয়া নবীন কথাবার্তা করিতেছেন; দেখিয়া বলিলেন,—“এই ঠিক হয়েছে। মা এ কাজটা বেশ করেছে; নবীন ত আর বাহিরের লোক নয়।” তার পর হই বন্ধুতে আলাপ আরম্ভ হইল; রমণীরা গৃহকার্য্যে গেলেন।

ব্রজরাজদিগের গৃহে নবীনের দিন একপ্রকার সুখেই কাটিয়া যাইতেছে। ক্রমে ঘরের ছেলের মত হইয়া গিয়াছেন; যখন ইচ্ছা বাড়ীর মধ্যে প্রবেশ করিতেছেন; ছেলেদের সঙ্গে খেলা করিতেছেন; ব্রজরাজের কনিষ্ঠা কন্যা, মোমের পু তুলটীকে লইয়া আকাশে লুফিতেছেন; বুকে চাপিতেছেন; চুষন করিতেছেন। নবীন বড় শিশু-ভক্ত। ব্রজরাজের বড় কন্যা ‘টিমী’ আড়াই বৎসরের বালিকা, সর্বদাই নবীনের নিকটে আছে; সঙ্গে সঙ্গে বেড়াইতেছে। নবীন একদিন বলিলেন,—“মাসি, এ কি করেছেন, এমন সুন্দর মেয়ের টিমী নাম দিলেন কেন? ঐ টিমীই থেকে যাবে।” ঘোষ গৃহিণী বলিলেন,—“ও নাম ওর মামার বাড়ী থেকে এনেছে; ওর দিদিমা দিয়েছে। আমাদের দোষ কি?” বাহা

হোক টিমী সর্বদাই নবীনের সঙ্গী। নবীন আহাৰ কৰিতে বসিলেই টিমী উপস্থিত, “আমি চৰ্কে থাৰ।” নবীন হাসিয়া বলেন, “তুমি চৰ্কে থাকে বৈ কি ;” অমনি তাহাকে কোলে বসাইয়া অগ্ৰে তাহার মুখে অন্ন দিয়া পৰে নিজে অন্ন গ্ৰহণ করেন। টিমী যে কোন্ ব্যাকৰণ অনুসারে পদ সিদ্ধ কৰে, এবং শব্দ-শাস্ত্ৰের কোন্ নিয়মালুসারে কথা কয়, কিছু বলিতে পাৰা যায় না। বৰ্ণমালার অনেক শব্দ উচ্চাৰণ কৰে না ; সূতৰাং পৰিবার পৰিজনৰ চিৰাভ্যস্ত কৰ্ণ ভিন্ন টিমীৰ ব্যাকৰণ কেহ বুঝিতে পাৰে না। নবীনচন্দ্ৰ অনেক লক্ষ্য কৰিয়া গুনিয়া গুনিয়া টিমীৰ ব্যাকৰণের তিনটা নিয়ম ধৰিতে পাৰিয়াছেন। প্ৰথম, সে কবৰ্গকে তবৰ্গ কৰিয়া উচ্চাৰণ কৰে ; দ্বিতীয়, শ, ষ, স, সমুদায়কে এক ‘চ’এৰ দ্বাৰা উচ্চাৰণ কৰে ; তৃতীয় “ৰ ও ড’কে ‘ল’এৰ দ্বাৰা উচ্চাৰণ কৰে। এইটী আবিষ্কাৰ কৰাৰ পৰ নবীনের আমোদ কৰিবার একটা জিনিস হইয়াছে।

এইৰূপে নবীন অসঙ্কোচে নিজ গৃহের গ্ৰাম এই গৃহে বাস কৰিতেছেন। কৃষ্ণকামিনী আবশ্যক মত তাঁহার নিকট আসেন ; আবশ্যকমত কথা কহেন ; কখনও কখনও কোনও পুস্তকের দুই এক পংক্তির অৰ্থ জানিয়া লন ; কিন্তু তদ্বিষয় বড় একটা মেশেন না ; বরং একটু দূৰেই থাকেন। কৃষ্ণকামিনী স্বভাবতঃই ধীৰ ; ধীৰে ধীৰে কথা কন ; ধীৰে চলেন ; ধীৰে ধীৰে সব কাজ করেন। নিঃশব্দে গৃহের কত কাজ করেন, যাহারা লক্ষ্য কৰিয়া দেখে, তাহাৰাই আশ্চৰ্য্যান্বিত হয়। নবীনচন্দ্ৰ দূৰ হইতে কৃষ্ণকামিনীৰ প্ৰশংসাই গুনিয়াছিলেন, একৰূপ নিকটে কখনও দেখেন নাই ; যতই দেখিতেছেন, মন মুগ্ধ হইয়া যাইতেছে।

একদিন নবীনচন্দ্ৰ স্কুল হইতে আসিয়া কাপড় ছাড়িয়া বাড়ীর ভিতৰ

আসিবামাত্র টিমী তাঁহার স্বন্ধে উঠিল; যেন তিনি টিমীর চিরক্রীত বাহন। গৃহিণীর অনেক অনুরোধে টিমীকে নামাইয়া তাহার সঙ্গে একত্রে জলযোগ করিলেন। তৎপরে টিমীর সঙ্গে আলাপ আরম্ভ হইল।

নবীন। টিমুমণি! বল দেখি—ঘরে।

টিমী। ধলে।

নবীন। বল দেখি—ঘোঁড়ার গাড়ি।

টিমী। ধোঁলাল দালি।

নবীন। বল দেখি, কোন থানে।

টিমী। তোন থানে।

টিমী নিজের ব্যাকরণের ভুল কখনই করে না। নবীনচন্দ্র হাসিয়া টিমীকে কোলে তুলিয়া লইলেন, ও নিজ বাম বাহুর উপর বসাইয়া জিজ্ঞাসা করিলেন—“তোমার ‘থুতী’ কোথায়?” এ প্রশ্নটা টিমীর মনঃপূত হইল না। সে বলিল—“‘থুতী’ তেন? থুতী নয়, থু-উ-উ-তী।” ইহার একটু ঢাকা চাই। টিমী নিজের ক বর্ণের স্থানে ত বর্ণ উচ্চারণ করে, কিন্তু তার এই বিশ্বাস আছে যে সে ঠিক উচ্চারণ করে; সুতরাং কেহ যদি তাহার অনুকরণ করিয়া ক বর্ণ স্থানে ত বর্ণ উচ্চারণ করে, তবে টিমীর মনে হয় যে সে ব্যাক্তর ভুল হইল, অমনি সংশোধন করে, কিন্তু ছুঁভাগ্যের বিষয়, সংশোধিত উচ্চারণটাও তার নিজের ব্যাকরণ অনুসারে হইয়া যায়। আজও টিমী সংশোধন করিয়া বলিয়াছে, “থুতী কেন? থুতী নয়,—থু-উ-উতী।” যাহা হোক টিমী নবীনচন্দ্রের উচ্চারণের সংশোধন করিয়া বলিল,—“চে ছটু!” ব্যাপারখানা এই। কয়েক দিল হইল নবীনচন্দ্র খেলিবার জন্য টিমীকে ইংরেজের দোকান হইতে একটা বড় বিলাতী পুতুল আনিয়া দিয়াছেন। সেটা উচু প্রায় টিমীরই সমান, তথাপি টিমী সেটাকে সর্বদাই কোলে করিয়া বেড়ায়।

তার পরিচর্যাতে দিন রাত্রি এমনি ব্যস্ত যে টিমীর আহার নিজা মনে থাকে না। এই খুকী সেদিন কি একটা ছুষ্ঠামির কাজ করিয়াছে, তাই বলিল—“সে ছুষ্ঠা।” বলিয়া ক্ষুদ্র অঙ্গুলির নির্দেশ দ্বারা নিজের খেলার ঘর দেখাইয়া দিল। নবীনচন্দ্র গিয়া দেখেন যে টিমী নিজে ছুষ্ঠামি করিলে, তাহার পিতা বা কাকা বাবু যেমন তাহাকে মুখ ফিরাইয়া কোণে দাঁড় করাইয়া দেন, সে আপনার খুকীকে ছুষ্ঠামির জন্ত তেমনি মুখ ফিরাইয়া কোণে দাঁড় করাইয়া দিয়া আসিয়াছে। তখন নবীনচন্দ্র—“চে ছুষ্ঠা,” কথাটার সম্পূর্ণ অর্থ বুঝিতে পারিয়া, উচ্চৈঃস্বরে হাস্ত করিয়া উঠিলেন। তাঁহার হাস্তধ্বনিতে বাড়ী কাঁপিয়া গেল। কৃষ্ণকামিনী তাঁহার ঘর হইতে ছুটিয়া আসিলেন; বধূগণ রন্ধনশালা হইতে উৎকর্ণ হইয়া শুনিতে লাগিলেন।

ইত্যবসরে রজরাঞ্জের মাতৃস্বসা মাতঙ্গিনী আসিয়া উপস্থিত। মাতঙ্গিনী বাল্যবিশ্বাস; বয়ঃক্রম ২৫।২৬ হইবে। বর্ণ তপ্তকাঞ্চনের স্তায়; শরীরে রূপ যেন ফাটিয়া পড়িতেছে। মাতঙ্গিনী বাড়ীতে প্রবেশ করিয়াই উপরে অট্টহাস্তধ্বনি শুনিতে পাইল; সিঁড়িতে উঠিতে উঠিতেই ঘোষগৃহিণীর সহিত সাক্ষাৎ হইল। তাঁহাকে জিজ্ঞাসা করিল, —“ও কে দিদি, অনন করে হাসচে? বাবারে কি হাসি; আমি চম্কে উঠেছিলাম।”

ঘোষগৃহিণী। ও যে নবীন। তুই এখানে ছিলি। তা বুঝি জানিস্নে? নবীন যে এক মাস হতে আমাদের বাড়ীতে এসে আছে।

মাতঙ্গিনী। বটে, কেন তিনি না তাঁর দাদার সঙ্গে ছিলেন।

ঘোষগৃহিণী। আর দাদার মাতলামির জ্বালায় সেখানে টেকে পাবে না।

মাতঙ্গিনী। তা বেশ হয়েছে।



ঘোষগৃহিণী। আর না, নব্বইয়ের সঙ্গে তোর দেখা করিয়ে দি।

মাতঙ্গিনী। না না, বাপু! অত বড় লোকের সঙ্গে কি হঠাৎ দেখা করা যায় ?

ঘোষগৃহিণী। তাতে দোষ কি ? ও ত বাড়ীর ছেলে, ও ত আমার ব্রজরাজ, মথুরেশ্বরই মত।

মাতঙ্গিনীর আপত্তিটা বড় শক্ত ছিল না ; সুতরাং শেষে গৃহিণী যখন দ্বিতীয়বার অনুরোধ করিলেন, তখন তাঁহার সঙ্গে নবীনচন্দ্রের সম্মুখে গিয়া উপস্থিত হইল। সেই গৌরাঙ্গী, প্রফুল্ল-বদনা, নারীমূর্তি যখন নব্বইয়ের সমক্ষে গিয়া দণ্ডায়মান হইলে, তখন তিনি বাস্তবসম্মত হইয়া নিজ আসন হইতে উঠিলেন। মাতঙ্গিনী হাসিয়া বলিল—“আপনি বসুন না, এত বাস্তব কেন ?” এই বলিয়া নিকটে স্থিত একখানি তক্তপোষের এক পার্শ্বে নিজ বসিল। নবীনচন্দ্র শুনিয়াছিলেন মাতঙ্গিনী তাঁহাদের সভার প্রতি অনুরাগিণী ও মধ্যে মধ্যে চিকের অন্তরাল হইতে তাঁহাদের কথা শুনিতে আসিয়া থাকে। সাক্ষাতে ও নিকটে কখনও দেখেন নাই। মাতঙ্গিনীও পরদার আড়াল হইতে, দূরে দূরে নবীনচন্দ্রকে দেখিয়াছিল ; এবং দেখিয়া তাঁহার রূপগুণের পক্ষপাতিনী হইয়াছিল ; একপ নিকটে কখনও দেখে নাই। আজ নিকটে পাইয়া কত কথাই আরম্ভ করিল। অধিক কথোপকথনে নবীনচন্দ্র বয়ঃ একটু সংকুচিত ; কিন্তু মাতঙ্গিনীর সংকোচ নাই ; মাতঙ্গিনী চিরপরিচিত বন্ধুর ছায়া কত প্রসন্ন করিল। হঠাৎ এতটা ঘনিষ্ঠতা নবীনচন্দ্রের ভাল লাগিল না। তিনি অধিক কথোপকথন করিতে একটু অসহিষ্ণু হইতে লাগিলেন ; ইতিমধ্যে ব্রজরাজ আপীস হইতে সমাগত। নবীন মাতঙ্গিনীর হস্ত হইতে নিষ্কৃতি পাইলেন।

ইহার দুই দিন পরেই মাতঙ্গিনী নিজ জ্যেষ্ঠের অনুমত্যায়াসারে ভগিনীর

বাড়ীতে কিছুদিন বাস করিবার জ্ঞাত আসিল। নবীন তাহা গছন্দ করিলেন না। এ বাড়ীতে আসিয়া অবধি মাতঙ্গিনী দিন দিন নবীন-চন্দ্রের প্রতি মনোযোগের মাত্রা বাড়াইতে লাগিল। দুই দিনের মধ্যেই “আপনি” ছাড়িয়া “তুমি” ধরিল; বলিল, ‘বাড়ীর লোক, তাকে আবার আপনি আপনি কি?’ আচ্ছা তাই ভাল, কিন্তু মাতঙ্গিনী তাহাতেও নিরস্ত নয়। তাড়াতাড়ি নিজের নবীনের ভাত বাড়িয়া আনে; আহারটী না হইতে হইতে পানটী লইয়া পথে দাঁড়াইয়া থাকে; রাত্রে চাকরাণী যখন নবীনের শয্যা করিতে যায়, তখন চাকরাণীর সঙ্গে গিয়া শয্যা করিবার বিষয়ে সাহায্য করে; কাপড়গুলি পাট করিয়া রাখে; নবীন স্কুলে গেলে, ছুপর বেলা তাঁহার ঘরের বই, কাগজ, কলম প্রভৃতি গুছাইয়া রাখে; নবীন আসিয়া সন্তুষ্ট হইয়া মাসীকে জিজ্ঞাসা করিলে জানিতে পারেন, মাতঙ্গিনী করিয়াছে; নবীন আহার করিতে বসিয়া কোনও একটা হাসির কথা কহিলে অগ্রে হাসুক না হাসুক, মাতঙ্গিনী হাসিয়া গড়াইয়া যায়।

নবীনচন্দ্র অতি বুদ্ধিমান বিচক্ষণ লোক। মাতঙ্গিনীকে দেখিয়া তাঁহার মনে কিছুমাত্র শ্রদ্ধার উদয় হয় নাই। তিনি বুঝিয়াছেন, লোকটী অতি অসার, ফাঁকি ভাবের উত্তেজনাতে কাজ করে ও আত্মসংযমের শক্তি নাই; এমন লোককে প্রশ্রয় দিলে সর্বনাশ! এই জ্ঞাত মাতঙ্গিনী যতই তাঁহার সহিত মিশিতে চায়, তিনি ততই দূরে দূরে সরিয়া যান। কখনও কখনও মাতঙ্গিনী যখন দেখে বাহিরে নবীনের ঘরে আর কেহ নাই, তখন একখানা পুস্তক লইয়া কিছু জ্ঞানিবার ছল করিয়া সেখানে যায়। নবীনচন্দ্র ছল বৃত্তিতে পারিয়া দুই একটা কথা বলিয়া দিয়াই সরিয়া পড়েন।

এইরূপে মাতঙ্গিনী কিছুদিনের মধ্যে নবীনচন্দ্রের লে বাড়ীতে থাকা

চুকর করিয়া ভূঙ্গিল। অথচ নবীনের প্রতি বাড়ীর সকলের এমনি বিশ্বাস ও উদ্ভাটক এমনি আশনার লোক বলিয়া জ্ঞান যে, মাতঙ্গিনী যাহাই করুক না কেন, গৃহবীর বা অপরাধহারও চক্ষে কিছুই মন্দ দেখায় না। কেবল কৃষ্ণকামিনী মনে মনে এতদূর ব্যাপকতা পছন্দ করেন না, কিন্তু কিছুই বলেন না। নবীনচন্দ্র মাতঙ্গিনীর উপদ্রব কয়েকদিন সহ্য করিয়া অবশেষে একদিন ব্রজরাজকে বলিলেন, “ওহে তোমার মাসীকে বলে দিতে পার, আমার প্রতি এতটা মনোযোগ দেওয়া ভাল দেখায় না; আমি ইহা পছন্দ করি না।” ব্রজরাজ হাসিয়া কহিলেন, “মাসীর সব কাজেই বাড়াবাড়ি। তোমার উপর একটু ভালবাসা জন্মেছে কিনা, তাই তোমাকে নিয়েই ব্যস্ত। ও দুদিন পরেই যাবে।” ইহার পর একদিন ব্রজরাজ মাতঙ্গিনীকে বলিলেন, “মাসি! নবীন যখন বাহিরের ঘরে একলা থাকে, পড়াশুনা করে, তখন তুমি সেখানে যাও কেন? সে ত ভাল নয়।” এই মাত্র।

যতই দিন যাইতে লাগিল মাতঙ্গিনী দেখিল, তাহার হাব ভাব, ইঙ্গিত, সংকেত, সেবা গুস্তাবা কিছুই নবীনকে ধরিতে পারিতেছে না। তিনি যেম সে পথ দিয়া চলিতেছেন না, অথবা বুঝিয়াও ধরা দিতেছেন না। কোশলে সর্বদাই দূরে দূরে থাকিতেছেন। অবশেষে একদিন রাত্রে নবীনচন্দ্র বাড়ীর মধ্যে আহার করিতে আসিয়াছেন, ইত্যবসরে মাতঙ্গিনী বাহিরের ঘরে গিয়া নবীনচন্দ্রের টেবিলের উপরে তাঁহার নামে একখানি চিঠি রাখিয়া আসিয়াছে। নবীন আহারের পরে ঘরে গিয়াই পত্রখানি পাইলেন। খুলিয়া পড়িয়া দেখেন, তাহা মাতঙ্গিনীর নিখিত পত্র। তাহাতে মাতঙ্গিনী নবীনকে অনেক প্রেম-সূচক সঙ্কোচন করিয়াও “প্রাণের ভালবাসা” জানাইয়া, শেষে বিজ্ঞাসাগর মহাশয়ের নতে ধিবাঙ্কের প্রস্তাব করিয়াছে। তিনি পত্রখানি পড়িয়া অতিশয় লজ্জিত ও

স্থাপিত হইলেন। একবার ভাবিলেন, যে সেই রাত্রেই ব্রজরাজকে ডাকিয়া পত্রখানি দেখাইবেন; আবার মনে করিলেন, তাহা হইলে কল্যাণী ছড়াইয়া পড়িবে; তাহাতে মাতঙ্গিনীকে অনেক নিগ্রহ সহ করিতে হইবে। বিশেষতঃ শ্রামচাঁদ মিত্র মহাশয় যে উগ্র-প্রকৃতির মানুষ, তিনি জ্ঞানিতে পারিলে একটা কথা অনর্থক বাধিবে ও মাতঙ্গিনীর ক্লেশের অবধি থাকিবে না। ওদিকে আবার বদ্ধভাবে গৃহে বাস করিয়া গোপনে বাড়ীর স্ত্রীলোকদিগের এরূপ চিঠিপত্র লওয়া অতি গর্হিত কার্য বলিয়া মনে হইতে লাগিল। অবশেষে স্থির করিলেন যে, আর সে গৃহ থাকিবেন না; স্বতন্ত্র স্থানে বাসা করিবেন, তাহা হইলে আপদ চুকিয়া যাইবে। এইরূপ নির্ধারণ করিয়া পত্রখানি ছিঁড়িয়া ফেলিলেন; ও সন্ধ্যাতরে ঈশ্বরচরণে পুষ্য, শান্তি ও বলের জন্ত প্রার্থনা করিয়া শয্যাতে গমন করিলেন। কিন্তু মনের আবেগে ও বিবিধপ্রকার চিন্তায় সে রাত্রে নিদ্রা হইল না। পরদিন উঠিয়া বাড়ীর লোকের নিকটে স্বতন্ত্র বাসা করিবার অভিপ্রায় ব্যক্ত করিলেন। সকলেই দুঃখ করিতে লাগিল। গৃহিণী সর্বোপেক্ষা দুঃখ প্রকাশ করিতে লাগিলেন। বাসা দেখিতে কয়েকদিন বিলম্ব হইতেছে, ইতিমধ্যে একদিন রাত্রে নবীনচন্দ্র গ্রীষ্মাতিশয়বশতঃ নিজ গৃহের দ্বার খুলিয়া নিদ্রা যাইতেছেন। তাঁহার ঘরটা বাড়ীর ভিতরের দিকে, মনে করিলে তাহাকে বাড়ীর ভিতরেরও করা যায়, বাহিরেরও করা যায়। সেই ঘরে একখানি খাটে তিনি শয়ন করিয়া আছেন। রাত্রি প্রায় একটা কি দুইটা, পরিজন সকলে নিদ্রিত, এমন সময়ে খাটের মশারিতে টান পড়াতে সহসা নবীনের নিদ্রাভঙ্গ হইল। তাঁহার মনে বোধ হইল যে তাঁহার মশারি গেঁটিয়া গৃহে প্রবিষ্ট হইল। নিদ্রাভঙ্গে কিঞ্চিৎ শঙ্কিত হইয়া জিজ্ঞাসা করিলেন, “কে?” উত্তর—“চৌচিঙমা, আমি মাতঙ্গিনী।” নবীনচন্দ্র অমনি ব্যস্ত-

সমস্ত হইয়া শয্যা হইতে উঠিলেন,—“আপনি এত রাতে এখানে কেন ?”

মাত। তুমি ত দুদিন পরেই চলে যাবে। জিজ্ঞাসা কর্তে এলাম, আমার পত্রের উত্তরের কি করলে ?

নবীন। একথা ত আপনি আমাকে অল্প সময়ে জিজ্ঞাসা কর্তে পারতেন; এমন সময়ে কেন ? আপনার কি কিছুই বিবেচনা শক্তি নাই ?

মাত। তোমার খাটে একটু বস্বো ?

নবীন। ( বিরক্ত ভাবে ) না, আমার খাটে আপনি বসবেন না ; আপনি এখনি বাড়ীর মধ্যে যান। এমন সময়ে এখানে আসা অতি অত্যাশ্চর্য কাজ হয়েছে। ভদ্রলোকের মেয়ের এমন ব্যবহার ত কখনও শুনি নাই।

মাতঙ্গিনী আর খাটে বসিতে সাহসী হইল না ; কিন্তু বাড়ীর মধ্যেও গেল না ; ক্ষণকাল মৌনাবলম্বন করিয়া দণ্ডায়মান রহিল। নবীনচন্দ্র আবার বলিলেন,—“ভাবছেন কি ? যান, এখনি বাড়ীর মধ্যে যান, আর এক মিনিট এখানে থাকবেন না।” মাতঙ্গিনী নিরুত্তর রহিল, কিন্তু তথাপি গেল না। অবশেষে নবীনচন্দ্র গতাস্তর না দেখিয়া একেবারে সিঁড়ির দ্বার খুলিয়া নীচে নামিয়া গেলেন। মাতঙ্গিনী রাগিয়া অন্তঃপুরের দিকে গেল ; এবং ঝনাৎ করিয়া নিজের গৃহের দ্বার বন্ধ করিল। নবীনচন্দ্র বাহির বাড়ী হইতে ঝনাৎ শব্দটা শুনিয়া ভাবিলেন আপদ বিদায় হইয়াছে। আস্তে আস্তে উপরে আসিয়া নিজ ঘরের দ্বার বন্ধ করিয়া কোনওরূপে অবশিষ্ট রাত্রিটুকু যাপন করিলেন। প্রাতে উঠিয়া গৃহিণীকে বলিলেন, “মাসি ! একটা বন্ধুর বাড়ী দুদিনের জন্ত যাচ্ছি ; তার পর আলাদা বাসাতে যাব ; আজ আর এখানে আসব না।” এই

বলিয়া তিনি চলিয়া গেলেন। নবীন চলিয়া গেলে সেই দিন অপরাহ্নেই মাতঙ্গিনী পিত্রালয়ে গমন করিল।

নবীন চলিয়া গেলে ঘোষপরিবারস্থ সকলেই বিবাদমাগরে মগ্ন হইলেন। ব্রজরাজ ও মথুরেশের ত কথাই নাই। নবীনের পবিত্র সহবাসে এই দুই মাস কাল তাঁহাদের অতি সুখেই কাটয়া গিয়াছে। তাঁহারা কত নূতন বিষয় শিখিয়াছেন। কত নূতন ভাব হৃদয়ে পাইয়াছেন। নবীনের জ্ঞানের ক্ষুধা আশ্চর্য! যে কোনও নূতন বিষয় তাঁহার সমক্ষে উপস্থিত হয়, তিনি তাহার তদন্ত না করিয়া ছাড়েন না; সে বিষয়ে কোথায় কি আছে সংগ্রহ করিয়া পাঠ না করিলে তাঁহার মনঃপূত হয় না। এই কারণে তাঁহার মনটী বিবিধ জ্ঞানের ভাণ্ডার স্বরূপ। একরূপ ব্যক্তির সহবাসে থাকিলেই শিক্ষা। সুতরাং নবীন চলিয়া গেলে ব্রজরাজ ও মথুরেশ গভীর বিবাদে পতিত হইলেন। নবীনের প্রাণে কি ক্রেশ হইল না? যে গৃহে তিনি পুত্রাধিক স্নেহ পাইয়াছেন, সহোদরের গ্রাম অকৃত্রিম সৌহার্দ্য লাভ করিয়াছেন, আপনার লোকের গ্রাম বিশ্বাস ও প্রীতি সম্ভোগ করিয়াছেন, সে গৃহ পরিত্যাগ করিতে কি তাঁহার প্রাণে বাধা লাগিল না? তাহা কি সম্ভব? তবে তিনি কেন চলিয়া গেলেন? মাতঙ্গিনীর উপদ্রবে? সে উপদ্রব কয়দিন থাকিবে? মাতঙ্গিনী ত দুই দিন পরেই পিত্রালয়ে যাইত। তবে কেন তিনি দূরে গেলেন? সম্পূর্ণ মাতঙ্গিনীর উপদ্রবেও নহে; তাঁহার চলিয়া যাইবার আর একটু কারণ ঘটয়াছে। কিছুদিন হইতে তিনি অনুভব করিতেছেন যে তাঁহার মন দিন দিন কৃষ্ণকামিনীর প্রতি কিছু অধিক পরিমাণে আকৃষ্ট হইতেছে। ইহা লক্ষ্য করা অবধি তিনি সাবধানে আপনাকে দূরে দূরে রাখিয়াছেন। কৃষ্ণকামিনীকে বা অন্ত কাহাকেও কিছু জানিতে দেন নাই। অবশেষে স্থির করিয়াছেন যে কিঞ্চিৎ দূরে থাকাই ভাল। এই ভাবিয়াই তিনি চলিয়া গিয়াছেন।

মাতঙ্গিনী যাওয়ার দুই চারি দিন পরেই ব্রজরাজের মাতুল শ্রামচাঁদ মিত্র মহাশয় একদিন সন্ধ্যার সময় ভগিনী ও ভাগিনেয়দ্বিগকে দেখিতে আসিলেন। আসিয়া ভগিনীর সহিত একথা সেকথার পর হঠাৎ জিজ্ঞাসা করিলেন, “শোভাবাজারের হলধর বোসের ভাইপো নবীন বোস নাকি এখানে থাকে?”

ঘোষ-গৃহিণী। না, থাকতো বটে, এখন আর থাকে না; স্বতন্ত্র বাসা করেছে।

শুনিয়া মিত্র মহাশয়ের হুঁতবনা কিঞ্চিৎ দূর হইল। প্রকাশে বলিলেন, “সে ভালই হয়েছে।”

ঘোষ-গৃহিণী। কেন দাদা ওকথাটা জিজ্ঞাসা করলে? তোমাকে এ খণ্ডর কে দিলে? মাতা দিয়েছে বুঝি?

শ্রাম। যেই দিক্‌না, তোমার ত কাণ্ডজ্ঞান কখনই হবে না। এত বড় বিষয়া মেয়ে নিয়ে ঘর কর, যাকে তাকে কি বাড়ীতে পুরলেই হলো?

ঘোষ-গৃহিণী। (জিব কাটিয়া) ছি! ছি! তুমি তাকে জান না, তাই অমন কথা বলচ। সে কি মানুষ? সে যে একটা দেবতা।

শ্রাম। হাঁগো হাঁ, তোমাদের দেবতা দেখতেও বিস্তর ক্ষণ নয়, আর বিপদে পড়তেও বিস্তর ক্ষণ নয়। যাক পরের ছেলে বাহিরে গেছে, সেই ভাল। এবাড়ীতে ছোঁড়াদের একটা কি সভা নাকি হয়!

ঘোষ-গৃহিণী। হাঁ ওদের নবরত্ন সভা হয়; ওরা বসে পড়া শুনা করে, কথাবার্তা কর।

শ্রাম। না, না, এ বাড়ীতে সভা টাভা হবে না! ব্রজ এলে বলো আমি বারণ করে দিচ্ছি। ফের যদি শুনি সভা টাভা এখানে হয়, তাহলে তোমাদের এ বাড়ী থেকে তুলে নেয়াব; নিজে নিজের বাড়ীতে

রাখ্বে। এই বলিয়া একটু বলিয়া, টিমির সঙ্গে একটু হাত পাকিয়াস করিয়া, চলিয়া গেলেন।

সেকালের বৃদ্ধা গৃহিণীরা বড় সরল লোক ছিলেন। ঘোষ-গৃহিণী সর্বোপায়ে গিয়া কৃষ্ণকামিনীকে বলিলেন, “শুনলি কেণ্টো, মাতীর কাণ্ড দেখলি ? কিসে কি করে তুলেছে !” বলিয়া ভ্রাতাভগিনীতে যত কথাবার্তা হইয়াছিল, সমুদায় কৃষ্ণকামিনীর কর্ণগোচর করিলেন। “এত বড় বিধবা মেয়ে নিয়ে ঘর কর, যাকে তাকে ঘরে পুরলেই হলো,” এই কথাগুলি শুনিয়া কৃষ্ণকামিনী চমকিয়া উঠিলেন। মামা কেন এরূপ কথা বলিলেন, ইহা ভাবিয়া কান্নাতে একেবারে মরিয়া গেলেন। পরিশেষে ভাবিলেন, যাক্ সভাটা এবাড়ী হইতে উঠিয়া গেল, ভালই হলো। তিনি আমাদের বন্ধু আছেন, বন্ধুই থাকুন ; দাদার মুখে তাহার কুশল সংবাদ ত আমরা শুনিব, তাহাই যথেষ্ট। তিনি সাধু, তিনি বুদ্ধিমান, তিনি প্রতিভাশালী, তিনি জগতে দাঁড়াইবেন, উঠিবেন, কত কাজ করিবেন, শুনিয়াও ত আমরা সুখী হইব, তিনি এবাড়ীতে না আসিলেন, তাহাতে কি ? এত চিন্তা যে সেই নির্দোষ সরলা বালিকার মন দিয়া বহিয়া গেল, গৃহিণী তাহার কিছুই বুঝিতে পারিলেন না। কৃষ্ণকামিনী প্রকাশ্যে বলিলেন—“মা, সেই ত বেশ, এ বাড়ীতে আর সভা করে কাজ কি ? মামা যাতে বিরক্ত হন, তা না করাই ভাল।”

গৃহিণী। বলিস কি রে, তুই সভার এত গোঁড়া, তোর মুখে এই কথা ! সভা উঠে গেলে তুই কি করে বাঁচবি ?

কৃষ্ণ। তুমি দেখো আমি বাঁচি কিনা।

ব্রজরাজ গৃহে আসিয়া সমুদায় কথা শুনিয়া প্রথমে মাতুলের প্রতি অতিশয় বিরক্ত হইলেন ; এবং মনে করিলেন যে মাতুলের আদেশ অগ্রাহ করিয়া বাড়ীতেই পূর্ববৎ সভা করিবেন। কিন্তু নবীনচন্দ্র শুনিয়া



বলিলেন,—“মামা তোমাদের অভিভাবক, এমন একটা সামান্য কারণে তাঁর অবাধ্য হবার প্রয়োজন কি ? আমাদের ত ‘হিতৈষী’ একটা আপিস ঘর করতেই হবে, সেখানেই আমাদের সভা হবে। তবে মেয়েদের আর যোগ দেবার সুবিধা হবে না। তা কি করা যায়, সকল দিক রক্ষা করতে পারা যায় না।” সকলেই বুঝিতে পারিতেছেন যে, নবীনচন্দ্র কৃষ্ণকামিনী হইতে দূরে থাকিতে চাহিতেছেন।

## পঞ্চদশ পরিচ্ছেদ

হায় ! হায় ! নবীনচন্দ্র যখন ব্রজরাজদিগের গৃহ হইতে চলিয়া আসেন, তখন নিজ মানসিক বলের প্রতি কিছু অধিক নির্ভর করিয়াছিলেন। মনে করিয়াছিলেন, ব্রজরাজদিগের ভবনের প্রতি পশ্চাৎ ফিরিলেই, সেখানকার দুই মাসের স্মৃতির প্রতিও পশ্চাৎ ফিরিতে পারিবেন। মহাকবি কালিদাসের বর্ণিত, বায়ুর প্রতিকূলে নীম্রমান কেতুর চীনাংগকের গায়, আর তাঁহার মন সে ভবনের দিকে চঞ্চল হইয়া ছুটিবে না। কিন্তু পরীক্ষাতে দেখিলেন সে স্মৃতি তাঁহাকে সহজে ছাড়িতেছে না। রাঙ্গা মাকে ছাড়িয়া আসিয়া বা নিজ সহোদরের আশ্রয় ত্যাগ করিয়া তিনি হৃদয়ের এত চঞ্চলতা অনুভব করেন নাই। মন যেন সেই ভবনে আবার যাইতে চায়, সেই সুখ আবার সম্ভোগ করিতে চায়। নবীন আজীবন আপনার অন্তরে সুখস্পৃহাকে দমন করিবার প্রয়াস পাইয়াছেন। এক্ষণে মনের এই গতিকে সুখ-লালসা-সম্মুত জ্ঞান করিয়া নিজের প্রতি অতিশয় ক্রুদ্ধ হইলেন; এবং মনে মনে সংকল্প করিলেন, সুখাসক্ত হৃদয়কে প্রশ্রয় দেওয়া হইবে না; সুতরাং অগ্রে যে সপ্তাহে প্রায় দুই তিন দিন সে ভবনে যাইতেন, তাহাও যাইবেন না। একদিকে এইরূপ সংকল্পে আপনাকে বাঁধিলেন; অপর দিকে দৃঢ়প্র তজ্জতার সহিত “হিতৈষী” পত্রিকার জগু আয়োজন করিতে লাগিলেন; সে জগু নানা গ্রন্থ সংগ্রহ করিয়া পাঠ করিতে লাগিলেন; বিলাত হইতে সুরাপান-নিবারণসম্বন্ধীয় পুস্তক ও পত্রিকাাদি আনাইবার চেষ্টাতে রত হইলেন; এবং সুরাপান সম্বন্ধে ডাক্তারদিগের ও দেশীয় বড় বড় লোকের মত

সংগ্রহ করিবার চেষ্টা করিতে লাগিলেন ; এতদ্ব্যতীত পূর্বাপেক্ষা অধিক একাগ্রতার সহিত সংস্কৃত পাঠে মনোনিবেশ করিলেন ; এবং সর্বোপরি সর্বদা একাকী নির্জনে ঈশ্বর-চিন্তাতে কালযাপন করিবার চেষ্টা করিতে লাগিলেন। কিন্তু মানসিক সংগ্রাম ও গুরুতর শ্রম বশতঃ শরীর দিন দিন শীর্ণ ও দুর্বল হইয়া পড়িতে লাগিল। দেখিয়া বন্ধুগণ সকলেই চিন্তিত হইলেন।

ওদিকে নবীনচন্দ্রের যাওয়ার দিন হইতে কৃষ্ণকামিনী বোর বিষাদ-মগ্না ও লজ্জাতে অভিভূতা। নবীনচন্দ্র চলিয়া গেলেই তিনি ভাবিতে লাগিলেন, যাহার আমাদের বাড়ীতে এতদিন থাকিবার কথা ছিল, তিনি হঠাৎ চলিয়া গেলেন কেন ? একবার ভাবিলেন, আর কিছু নয় ছোট মাসীর উপদ্রবে পলাইয়া গেলেন। আবার সরলা বালিকার বুদ্ধিটা এই পথ হইতে সরিয়া পড়িল ; ভাবিলেন,—না না, বোধ হয় আমার ব্যবহারে কিছু অসাবধানতা হইয়া থাকিবে ; নতুবা মামা এ বাড়ীতে তাঁহার আসা বন্ধ করিবেন কেন ? নিশ্চয় তিনি আমার প্রতি বিরক্ত হইয়া চলিয়া গিয়াছেন। এই ভাবিয়া একদিন পড়িয়া পড়িয়া অনেকক্ষণ কাঁদিলেন ; তীব্র আত্মনিন্দার যাতনা অকারণে সূচু করিলেন। তৎপরে দিনের পর দিন চলিয়া যাইতে লাগিল, সে ভবনে আর নবীনচন্দ্রের দেখা নাই। হিতৈষী পত্রিকা যথাসময়ে বাহির হইল ; তাহার আপিসের জন্ত একটা ঘর লওয়া হইল ; এবং সেইখানেই নবরত্ন সভার অধিবেশন হইতে লাগিল। ব্রজরাজ ও মথুরেশ নবীনকে তাঁহাদের বাড়ীতে আনিবার জন্ত মধ্যে মধ্যে টানাটানি করেন, নবীন যাব যাব করিয়া কাটাইয়া দেন ; এবং সুখস্পৃহ মনকে চারুক মারিতে থাকেন, আসিতে ইচ্ছা হইলেও এ বাড়ীতে আসেন না ! এইরূপে প্রায় দেড় মাস অতীত হইয়া গেল। একদিন ছপুর বেলা ঘোষ-গ্রহণী বলিলেন—

“নবীন সেই যে গেল, আর একবার দেখা দেয় না ; এত কঠিন হলো কি করে ? একবারে কি মায়্যাটা কাটায়ে ?” কৃষ্ণকামিনী নিরুত্তর। জ্যেষ্ঠা পুত্রবধূ বলিলেন—“তিনি মানী লোক ; বোধ হয় মামাশুভ্রর মহাশয়ের কথাগুলো তাঁর কাণে গিয়ে থাকবে, তাই লজ্জাতে আর আসেন না।”

গৃহিণী। সে কথা তাকে কে বলবে ? যা হোক কাল রাত্রে খাবার জন্তে তাকে নিমন্ত্রণ করা যাক ; ব্রজ কি মথুরেশ বললে না আসতে পারে, আমার কথা ফেলতে পারবে না। কেণ্টো. কাগজ কলম আনতো। আমি বলছি, আমার নামে নিমন্ত্রণ করে একখানা চিঠি লেখত।

কৃষ্ণকামিনী। কাজ কি মা, ভদ্রলোকের ছেলেকে এত টানাটানি করে ? তিনি কাজের মানুষ, সময় হয় না বলেই আসেন না।

গৃহিণী। তুই আননা কাগজ কলম ; না ডাকলে সে আসবে না। \*

কৃষ্ণ। আমি লিখতে পারবো না, বড় দাদা কি ছোট দাদাকে দিয়ে লিখাইও।

গৃহিণী। কেন, তোমার আবার হলো কি ? একখানা চিঠি লিখতে পার না ? যা আনগে যা।

কৃষ্ণকামিনী মাতার অনুরোধ ছাড়াইতে না পারিয়া কাগজ কলম আনিলেন ও চিঠি লিখিতে বসিলেন। এই তাঁর নবীনচন্দ্রের নিকট প্রথম পত্র লেখা, যদিও পরের নামে। অনিচ্ছাতে পত্রখানি লিখিতে তাঁহার হস্ত বার বার স্থিন্ন হইতে লাগিল ; বার বার অঞ্চল দিয়া স্থিন্ন অঙ্গুলি সকল বুদ্ধিতে লাগিলেন। কণ্ঠতালু যেন গুরু হইয়া আসিতে লাগিল। এই রূপে তিনি কোনও প্রকারে পত্রখানি সমাপ্ত করিলেন। তাহাতে এই লেখা ফইল,—“তুমি অল্প আসিয়া আমার সঙ্গে দেখা করিবে ; ও কল্য ঋত্রে এখানে আহ্বান করিবে।” পত্রখানি যথাসময়ে ভৃত্যের হস্তদ্বারা

যথাস্থানে প্রেরিত হইল। নবীনচন্দ্র স্কুল হইতে আসিয়াই পত্রখানি প্রাপ্ত হইলেন। তিনি কৃষ্ণকামিনীর হস্তাক্ষর চিনিতেন। উপরে তাঁহার হস্তাক্ষর দেখিয়াই চমকিয়া উঠিলেন। একি! কৃষ্ণকামিনী আমাকে পত্র লিখিয়াছে, ইহা ত কখনও ভাবি নাই। খুলিতে তাঁহার হস্ত কাঁপিতে লাগিল; হৃদয়স্থানে একপ্রকার ভয় ও আশাজনিত কম্পন অনুভূত হইতে লাগিল। পত্র খুলিয়া প্রথমেই স্বাক্ষরটী দেখিলেন। স্বাক্ষর “তোমার মাসী।” তখন মনের উত্তেজনাটা একটু হ্রাস হইল। পত্রখানি আত্মোপাস্ত পাঠ করিলেন; পাঠ করিয়া শয়ন করিয়া অনেকক্ষণ ভাবিতে লাগিলেন। এমন কি হইবে, কৃষ্ণকামিনীর পরামর্শক্রমে তাহার মাতা পত্র লিখিয়াছেন? আবার ভাবিলেন, না, তাহার স্বভাব একরূপ নয়। যাহা হোক নিমন্ত্ৰণটা লই কি না? নিমন্ত্ৰণ না লইয়াই বা থাকি কিরূপে? যাহারা পুত্রবৎ স্নেহে পরিচর্যা করিলেন, তাঁহাদের নিমন্ত্ৰণ অগ্রাহ্য করি কিরূপে? শয্যা পড়িয়া অনেকক্ষণ এইরূপ নানা চিন্তা করিয়া অবশেষে সন্ধ্যার পূর্বে ব্রজরাজদিগের গৃহাভিমুখে গমন করিলেন। পথে প্রতিজ্ঞা করিয়া গেলেন, দেখাইবেন যেন কিছুই ঘটে নাই। কিন্তু তিনি গিয়া দাঁড়াইবামাত্র ঘোষগৃহিণী বলিলেন—“ওমা, নবীন কি হয়ে গেছে দেখ, সেরূপ চেহারা যেন আর নাই? সোনার মুখ কালি হয়ে গেছে; কি হয়েছে বাপধন? কোনও মনের কষ্টে কি আছ?”

হায় রে! অকৃত্রিম প্রীতির এমনি গুণ, ঘোষগৃহিণীর অমৃতনিষ্যন্দসম এই কথাগুলি শুনিয়া নবীনের হৃদয়ে তেজস্বী বলবান্ পুরুষেরও চক্ষু জল আসিল। গৃহিণী কৃষ্ণকামিনীকে ডাকিয়া বলিলেন—“ও কেঠো, এসে দেখ্ নবীন একেবারে আধখানা হয়ে গেছে।” সে সময়ে স্বীয় ভ্রাতার সহপদে ও সতর্কতা স্মরণে আসিল না। কৃষ্ণকামিনী মাতার আহ্বানে অনিচ্ছাসত্ত্বেও আসিলেন। গৃহিণী নবীনের প্রতি, কঠিন-হৃদয়,

দয়া-মায়াহীন, প্রভৃতি অনেক অনুরোধ করিয়া নানা কুশলপ্রশ্নান্তে কার্যান্তরে গমন করিলেন। নবীন ও কৃষ্ণকামিনী একা এক ঘরে রহিলেন। নবীন জিজ্ঞাসা করিলেন, “পত্র তুমি লিখেছিলে ?”

কৃষ্ণ। হাঁ, আমার লেখবার ইচ্ছে ছিল না, মা কোনমতে শুনলেন না ; অনুরোধে লিখতে হলো।

নবীন। ইচ্ছে ছিল না কেন ? আমি এখানে আসি তা তুমি কি চাও না ?

কৃষ্ণ। আপনার অনেক কাজ, আপনাকে কষ্ট দেওয়ার প্রয়োজন কি ?

নবীন। ওটা ত গেল অভিমানের কথা। একটু এখানে আসতে কি এতই কষ্ট ? তুমি কি সেই জন্ত লিখতে চাওনি ?

কৃষ্ণকামিনী মুখ ফিরাইলেন, এবং বোধ হইল যেন অঞ্চলে চক্ষু মুছিলেন ; তৎপরে আর দাঁড়াইলেন না, চলিয়া গেলেন।

নবীনচন্দ্র একাকী কিয়ৎকাল বসিয়া ভাবিলেন ; তৎপরে উঠিয়া টিমিকে খুঁজিয়া বাহির করিলেন ও ব্রজরাজের আপীস হইতে ফিরিয়া আসা পর্যন্ত তাহার সঙ্গে খেলা করিতে লাগিলেন। টিমিকে স্বক্কের উপর বসাইয়া দৌড়িতে লাগিলেন—“টিমুমণি, বল ত আমি কে ?” উত্তর—ধোঁলা। ক্রমে ব্রজরাজ ও মথুরেশ আসিলে তিন বন্ধুতে আবার অনেক দিনের পর অনেক কথোপকথন হইল। তৎপরদিন রাত্রে তিনি ব্রজরাজদের বাড়ীতে আহ্বার করিলেন।

ঘটনাক্রমে নবীনচন্দ্রের নিমন্ত্রণ খাওয়ার পর দিনই মাতঙ্গিনী ভগিনীর সহিত সাক্ষাৎ করিতে আসিল। আসিয়াই বধুদিগের মুখে শুনিল, যে তৎপূর্বদিন ঘটা করিয়া নবীনচন্দ্রকে নিমন্ত্রণ খাওয়ান হইয়াছে। সে জানিত, নবীনচন্দ্র এখানে থাকেন না, এবং নবরত্ন সভা সে গৃহ হইতে

উঠিয়া গিয়াছে ; সে বাড়ীর সঙ্গে নবীনের আর সম্পর্ক নাই ; কৃষ্ণকামিনীর বিষয়ে সে যে সন্দেহ করিয়াছিল, তাহা বুচিয়াছে ; কিন্তু এই সংবাদে তাহার বুদ্ধি আর একদিকে ছুটিল। তাহার মনে হইল, নবীনচন্দ্র কৃষ্ণকামিনীকে বিবাহ করিতে চান ; এবং ব্রজরাজ ও তাহার মাতা এই পরামর্শের ভিতর প্রবেশ করিয়াছে ; তাই নিমন্ত্রণাদি চলিতেছে। সে মনে মনে শাশাইয়া গেল ; কেহই কিছু বুঝিতে পারিলেন না।

মাতঙ্গিনীর গমনের দুই দিন পরেই ব্রজরাজের মাতুল আবার একদিন সন্ধ্যার সময়ে এ বাটীতে আসিলেন। আসিয়া বলিলেন,—“কৃষ্ণ প্রায় এক বৎসর আমাদের বাড়ীতে যায় নাই। আমি তাহাকে কিছুদিন ও বাড়ীতে নিয়ে রাখতে চাই।” গৃহিণী বলিলেন,—“বেশ ত, বেশ ত।” কৃষ্ণকামিনীও বলিলেন—“মামা, চলুন আজই আপনার সঙ্গে যাই।” শ্রামচাঁদ বাবু বলিয়া গেলেন—“কলা তোমার জ্ঞাত লোক পাঠাব, যেও।” পরদিন লোক আসিয়া কৃষ্ণকামিনীকে মাতুলালয়ে লইয়া গেল। কৃষ্ণকামিনী গিয়া দেখেন, যেরূপ আশা করিয়া গিয়াছিলেন, তাহার সম্পূর্ণ বিপরীত। প্রথমতঃ, মাতঙ্গিনী তাহাকে বিধিমতে আলাতন করিতে আরম্ভ করিল। কথায় কথায় নবীনের নিন্দা করে ; এইটা কৃষ্ণকামিনীর পক্ষে সর্বাপেক্ষা অসহ্য বোধ হইতে লাগিল। সরলা বালিকা, অধিক কথা কহা তাহার অভ্যাস নয়, তর্ক করা তাহার স্বভাব নয়, চিরদিন নীরবে কাজ করিয়া আসিতেছে ; নীরব থাকিতেই ভালবাসে ; এবং চিরদিন নীরবে কাজ করিয়া যাইবে বলিয়া প্রতিজ্ঞাক্রমে আছে ; কিন্তু মাতঙ্গিনীর ব্যবহারটা তাহার প্রাণে এতই ব্যথা দিতে লাগিল যে একদিন সেই স্বভাবতঃ শান্ত-প্রকৃতি বালিকারও মনে কোপের উদয় হইল। স্বাভাবিক সরল ক্রোধে তাহার মুখ ও চক্ষু রক্তবর্ণ হইয়া উঠিল। তিনি বলিলেন—“ছোট মাসি ! তোমার ব্যবহার দেখে আমি অসহ্য

হয়েছি ; নিজের ঝাঁর এত প্রশংসা করতে, ঝাঁর চরিত্রে কেউ কোনও দোষ দেখতে পায় না, তাঁর এই নিন্দেগুলো করো, মুখে বাধে না ? লজ্জা হয় না ?”

মাতা। তুমি কোমল করে উঠবি বৈ কি ? তোর আশা আছে কিনা !

কৃষ্ণ। তুমি কি বল ? কিসের আশা আছে ?

মাতা। আমরা ! শ্রাকামি দেখ, যেন ভাজা মাছটা উল্টে খেতে পারেন না ! কিসের আশা তা বুঝতে পারলেন না ! ওলো, মরবোনা, বেঁচে থাকবো, দেখবো লো দেখবো, যেদিন দু হাত এক হবে, সেদিন বুঝবো !

এই কথা শুনিয়া কৃষ্ণকামিনীর ক্রোধ অন্তর্হিত হইল লজ্জার উদয় হইল। কারণ তাঁহার মনে পরিণয়েচ্ছার বিন্দুবিগর্ভও নাই। তিনি বলিলেন, “ছি ছোটমাসি ! আমাকে এতদিন দেখে, এতদিন জেনে, এমন কথাটা বললে ?” বলিয়া কাঁদিয়া ফেলিলেন। মাতঙ্গিনী নবীর নিকট অপমানিত হইয়া ঈর্ষা ও ক্রোধে জ্বলিতেছিল ; কিন্তু কৃষ্ণকামিনীর অশ্রু দেখিয়া একটু হাসিয়া বলিল,—“তোর আশা না থাক্, তার ত আশা আছে ; ও একই কথা।”

কৃষ্ণ। তাঁর প্রতি কেন অত্যাচার কর ? তিনি কি কারকে এমন কথা বলেছেন ? বা ভাবে প্রকাশ করেছেন ? উদ্দেশে খড়ি পেতে মানুষকে দোষী কর কেন ?

মাতা। যা যা আমি তোদের মত অন্ধ হই নি। নবীন বোসের নামে তোদের যেমন লাল পড়ে, আমার তা পড়ে না। তোদের মত আমি উপরটা দেখে ভুলিনে। ওর মত ধূর্ত লোক কি আর আছে ?

কৃষ্ণকামিনী লজ্জায়, ক্রোধে, মনের আবেগে আর কথা কহিতে পারিলেন না ; সেখান হইতে উঠিয়া বাহিরে গেলেন। মাতঙ্গিনী কহে



দস্ত ঘর্ষণ করিয়া বলিল, “মাতঙ্গিনী থাকতে আর অভীষ্ট সিদ্ধ করতে হচ্ছে না।”

একদিকে মাতঙ্গিনীর এই প্রকার বাকা-বাণ, অপরদিকে আর এক উপদ্রব উপস্থিত, যাহার অনুরূপ উপদ্রব কৃষ্ণকামিনী জন্মে কখনও ভোগ করেন নাই। গ্রামচাঁদ মিত্র মহাশয়ের শ্রালক উমাশঙ্কর দে এই ঘটনার দুই দিন পরেই পীড়িত হইয়া চিকিৎসার জন্য কলিকাতায় মিত্র মহাশয়েরই ভবনে আসিয়া উপস্থিত হইল। এস্থলে উমাশঙ্করের কিঞ্চিৎ পরিচয় দি। মিত্রজ মহাশয়ের স্বস্তুর গোপীনাথপুর গ্রামের জমিদার ছিলেন। নিজের পারিশ্রম ও মিতব্যয়িতার গুণে পৈতৃক সম্পত্তির অনেক উন্নতি করিয়া যান। তাঁহার জীবদ্দশায় বার মাসে তের পার্শ্বণ এবং ষথাসাধ্য দেবতা, ব্রাহ্মণ, অতিথির সেবাদির কিছুই ব্যতিক্রম ঘটত না; অথচ বিষয় বৃদ্ধির দিকে তাঁহার বিলক্ষণ মনোযোগ ছিল। কিন্তু বিষয় বৃদ্ধির দিকে যেক্রপ মনোযোগ ও চিন্তের একাগ্রতা ছিল, একমাত্র পুত্র উমাশঙ্করের শিক্ষা ও চরিত্রের উন্নতি বিষয়ে সেক্রপ মনোযোগ ছিল না। আর ধনিসন্তানদের শিক্ষা বিষয়ে মনোযোগ করিয়াই বা কি হইবে? কুসঙ্গ বাল্যকাল হইতেই তাহাদিগকে ঘিরিয়া থাকে। প্রথম দাসদাসীর নিকট কুশিক্ষা, তৎপরে পিতার মোসাহেবদিগের তোষামোদ, তৎপরে যৌবনের সঙ্গিগণের উদ্ভেজনা, ইহাতে ধনিসন্তানদিগের মতিগতি থির থাকিতে দেয় না। উমাশঙ্করের বেলাও এ নিয়মের ব্যতিক্রম ঘটে নাই। যৌবনের প্রারম্ভ হইতেই উমাশঙ্কর অতিশয় উচ্ছৃঙ্খল হইয়া পড়িল। এমন পাপ নাই, যাহা তাহার অজ্ঞাত আছে; এমন নেশা নাই, যাহা সে করে নাই। দুষ্ক্রিয়াসক্ত পুরুষদিগের আকৃতিতে যে এক প্রকার দুর্বলতা ও বিলাসিতার ছায়া থাকে, উমাশঙ্করের আকৃতিতে তাহা দেদীপ্যমান। মিত্রজ মহাশয় শ্রালকের

চিকিৎসার সমুচিত বন্দোবস্ত করিলেন। উপযুক্ত চিকিৎসা ও ভগিনীর শুশ্রূষার গুণে, কয়েকদিনের মধ্যেই উমাশঙ্কর আরোগ্যলাভ করিল। তৎপরে অন্নদিনের মধ্যেই কৃষ্ণকামিনী বুঝিতে পারিলেন যে উমাশঙ্করের দৃষ্টি তাঁহার উপরে পড়িয়াছে। সে যখন বাড়ীর মধ্যে আহার করিতে আসে, কৃষ্ণকামিনী তাহার ত্রিসূম্য যান না, অথচ সে যদি কোনও প্রকারে তাঁহাকে একবার দূরেও দেখিতে পায়, অমনি কি এক রকম করিয়া তাকায়, যাহা দেখিয়া কৃষ্ণকামিনীর সর্বাঙ্গ জলিয়া যায়। তিনি আরও দূরে দূরে থাকেন। কৃষ্ণকামিনী যে ঘরে শয়ন করেন, বাহির বাড়ীর দিকে তাহার একটি জানালা আছে। একদিন কৃষ্ণকামিনী শয়ন করিতে গিয়া দেখিলেন, মশারির চালের উপরে একখানি ফুলের পাখা রহিয়াছে ও তাহার গায়ে একখানি চিঠি বাঁধা আছে। তাঁহার বোধ হইল, কেহ জানালা দিয়া পাখাখানা ফেলিয়া দিয়া থাকিবে। চিঠিখানা প্রদীপের নিকট গিয়া পড়িয়া দেখিলেন, তাহা তাঁহারই উদ্দেশ্যে লিখিত। লেখকের নাম নাই; আত্মোপাস্ত অতি অভদ্র ও ব্রীড়াজনক ভাষাতে লিখিত। সেরূপ ভাষা তিনি জীবনে কখনও শুনে নাই। তাহাতে অনেক ভালবাসা-সূচক শব্দের প্রয়োগ আছে, এবং গভীর বিরহযন্ত্রণারও প্রকাশ আছে; এবং সর্বশেষে এই সঙ্কেত আছে, যে সেই রাত্রে সকলে ঘুমাইলে, সিঁড়ীর ঘরের পার্শ্বের গলিতে অপেক্ষা করিলে লেখকের সহিত সাক্ষাৎ হইবে।

লেখক যে কে, তাহা বুঝিতে আর বাকি রহিল না। কৃষ্ণকামিনী একবার মনে করিলেন, পত্রখানা মাতুলানীকে দেখান কর্তব্য। আবার ভাবিলেন, নিজে সেদিকে কর্ণপাত না করিলেই হইল। দুই চারি দিন দেখিয়া আপনিই নিবৃত্ত হইবে। এই ভাবিয়া পত্রখানি ছিঁড়িয়া পাখাখানি গুঁড়া করিয়া, বাড়ীর পশ্চাৎদিকের গবাক্ষ দিয়া পশ্চাৎদিক

নর্দ্যামাতে ফেলিয়া দিয়া আসিলেন। আসিয়া সে জানলাটা বন্ধ করিয়া শয়ন করিলেন। অপর একদিন রাত্রি ১০টার পর সকলে এক প্রকার ঘুমাংলে বাড়ীর একটা ঝাঁকুকামিনীকে নির্জনে একটা অন্ধকার স্থানে ডাকিয়া লইয়া গেল; এবং তাঁহার হস্তে এক ঠোঙ্গা মিঠাই দিয়া বলিল, “গিন্নির ভাই উমাশঙ্কর বাবু বড়বাজারে গিয়াছিলেন; এক ঠোঙ্গা মিঠাই তোমার জন্ত এনেছেন। তুমি এই অন্ধকারে দাঁড়িয়ে থাও, আমি জল এনে দিচ্ছি। তারপর একটু কথা আছে।” এই কথা শুনিয়াই কুঞ্চকামিনী অতিশয় কুপিত হইয়া উঠিলেন। সমুদায় খাবার মাটিতে ছুড়িয়া ফেলিয়া দিলেন, এবং ঝাঁকে অনেক তিরস্কার করিয়া বলিলেন, “আমি যাই এখন মামীকে বলে দেবো। তুই অতি অসৎ, তোর অসাধ্য কর্ম্য নাই, তোর মত মানুষকে বাড়ীতে রাখতে নাই, তুই গৃহস্থের সর্বনাশ করতে পারিস্,” ইত্যাদি বলিয়া যাইতে উত্তত হইলেন। চাকরাণী তাঁহার পায়ে ধরিয়া পড়িয়া রহিল; কোন মতেই যাইতে দিবে না; অবশেষে তাহাকে প্রতিজ্ঞা করাইয়া লইল, যে সে যাত্রা তিনি কিছু বলিবেন না, সে এমন কর্ম্ম আর করিবে না।

কিছুদিন এই প্রকারে চেষ্টা করিয়া উমাশঙ্কর বুঝিল যে তাহার চিরান্তান্ত বজ্রা এই বালিকার প্রতি খাটিবে না। সে ক্রমে নিরস্ত হইল। উমাশঙ্করের স্বভাব চারত্র জানা অবধি কুঞ্চকামিনী বাড়ীতে ফিরবার জন্ত ব্যগ্র হইয়া উঠিলেন। কিন্তু তাঁহার মাতুল ও মাতুলানী প্রভৃতি তাঁহাকে নিবারণ করিয়া রাখিতে লাগিলেন।

ক্রমে মানব-প্রকৃতির আর একটা দিকে কুঞ্চকামিনীর একটা চক্ষু পড়িতেছে। মাতুলালয়ে আসা পর্য্যন্ত তিনি যে ঘরে শয়ন করিতেন, সেই ঘরের মেজিতে বাড়ীর রাধুনি, একটা নিরীহস্বভাবা বৃদ্ধা স্ত্রীলোক শয়ন করিত। মাতঙ্গিনী অল্প এক ঘরে শয়ন করিত। কয়েক দিন পরে,

কি কারণে জ্বুনি না, মাতঙ্গিনী কৃষ্ণকামিনীর ঘরে শয়ন করিবার বন্দোবস্ত করিল। কৃষ্ণকামিনী আনন্দিত হইলেন, ছোট মাসীর সঙ্গে থাকিবেন। তাঁহার ভয়টা আর থাকিবে না। মাতঙ্গিনী আসিয়া বলিল,—“আমি কাহারও সঙ্গে এক বিছানাতে ঘুমাইতে পারি না। আমি মেজেতে শোব, তুমি তক্তপোষে থাক।” কৃষ্ণকামিনী সে বন্দোবস্তে আপত্তি করিয়া বলিলেন, “না ছোটমাসি! আমি মেজেতেই শোব, তুমি তক্তপোষে থাক।” মাতঙ্গিনী এই বন্দোবস্তে সন্তুষ্ট হইল। কৃষ্ণকামিনী সরল ভাবে বলিলেন, “ছোটমাসি, বাহির বাড়ীর দিকে জানালা খুলে রেখ না।” মাতঙ্গিনী বলিল, “বাপ্‌রে! আমি গরমি সহিতে পারিনে, হাওয়া না হলে বাঁচবো না।” স্নতরাং সে জানালা প্রতি রাত্রে খুলিয়া রাখা হইত। দুই একদিন গভীর রাত্রে কৃষ্ণকামিনী যেন দোঁধলেন, জানালা দিয়া হাত বাড়াইয়া কে কি দিতেছে। ভাল করিয়া বুঝিতে পারিলেন না। কিন্তু ‘পূর্ব বৃত্তান্ত’ স্মরণ করিয়া মনে কিঞ্চৎ সন্দেহের সঞ্চার হইল। আর একদিন তিনি অথোরে ঘুমাইতেছেন, কে যেন তাঁহার পা মাড়াইয়া চলিয়া গেল, তাহাতে তাঁহার নিদ্রাভঙ্গ হইয়া গেল; তিনি পার্শ্ব পরিবর্তন করিয়া শুইলেন; উঠিলেন না; মশারির মধ্য হইতে দ্বারের অল্লালোকে দেখিলেন যেন সেই কীটা চুপে চুপে কি বলিয়া ছোটমাসীকে ডাকিয়া লইয়া গেল। এই সকল দেখিয়া কৃষ্ণকামিনীর মনে এক প্রকার আনন্দিষ্ট আতঙ্কের সঞ্চার হইল। একবার ভাবিলেন, মাতুলানীকে সমুদায় জানাইবেন, কিন্তু আবার ছোটমাসীর ভয়ে ও স্বাভাবিক লজ্জাশীলতাবশতঃ বলিতে পারিলেন না। তিনি ঘরে যাইবার জন্ত বাস্ত হইয়া পড়িলেন। কিন্তু মিত্রজ মহাশয় যে উদ্দেশ্যে তাঁহাকে আনিয়াছিলেন, তাহা তখনও ব্যক্ত করেন নাই, তাহার আরও দুইদিন অবশিষ্ট আছে।

নৃত্যরাং তাঁহাকে কোন মতে বাইতে দিলেন না। সে উদ্দেশ্যটা এই, দুই দিন পরে বাড়ীর মেয়েদের কি একটা ব্রত আছে, সেই দিন প্রত্যুষে মহিলারা সকলে গঙ্গাস্নানে বাইবেন, গঙ্গাস্নান করিয়া আসিয়া পূজা করিবেন ও কথা শুনিবেন। মিত্রজ মহাশয় বাড়ীর রমণীগণের সহিত পরামর্শ করিয়া রাখিয়াছেন, যে, সেইদিন কৃষ্ণকামিনীর হাতের চুড়ি খুলিয়া তাহাকে থান পরাইতে হইবে ও ব্রত করাইতে হইবে। মাতঙ্গিনী এই পরামর্শের মধ্যে আছে; কিন্তু কৃষ্ণকামিনীর নিকট সমুদায় গোপন রাখিয়াছে।

ব্রতের পূর্বে দিন সায়ংকালে মিত্রজ মহাশয় আপীস হইতে আসিবার সময় কৃষ্ণকামিনীর জন্ত এক বোড়া থান কাপড় লইয়া আসিলেন। আহা! কৃষ্ণকামিনীকে ডাকিয়া বলিলেন, “কৃষ্ণ! মা লক্ষ্মি! তুমি ছেলেবেলা বিধবা হয়েছ, ছেলে মানুষের হাতের চুড়িগুলো খুলতে প্রাণে লাগে বলে, তোমার মা ভাই এতদিন তোমার হাতের গহনা খুলতে পারে নাই; পেড়ে কাপড়ও বদলাতে পারে নাই; এখন ত তুমি বড় হয়েছ; সব কথাই ত মা বুঝতে পার; হিঁদুর ঘরের বিধবা, এত বড় মেয়ে, পেড়ে কাপড়টা পরে থাকা ও হাতে চুড়িগুলো দেওয়া আর ভাল দেখায় না। তোমার জন্তে এই থান কাপড় এনেছি। কাল মেয়েদের ব্রতের দিন। কাল সকালে সকলের সঙ্গে গঙ্গাস্নান করে, হাতের চুড়ি খুলে এই থান পরবে, পূজা করবে, কথা শুনবে, তারপর সকলের সঙ্গে হবিষ্য করবে। আর একটা কথা বলি শোন। তোমার মা তোমাকে নির্ভালা একাদশী করান না; সেটা অতি অধর্মের কথা; হিঁদুর ঘরের বিধবার পক্ষে মহা পাপ। পরশু একাদশী, তোমাকে নির্ভালা উপবাস করতে হবে। আর প্রতিদিন বিকালে লুচি মিঠাই প্রভৃতি বাবুনানা জল খেলে চলবে না। অগ্রাঙ্ক বিধবাদের গ্রাম যা হয় একটু কিছু খেয়ে থাকতে

হবে।" কৃষ্ণকামিনী তখন আর কিছু উত্তর দিলেন না, নিজের ঘরে গিয়া চিন্তা করিতে লাগিলেন। প্রথমে তাঁহার মনে অতিশয় বিদ্রোহিতার ভাব আসিতে লাগিল। একপা পরাধীনতা, একপা বলপ্রয়োগ, তাঁহার ভাল লাগিল না। একবার মনে করিলেন, মাতুলের কোন অসুযোগ রক্ষা করিবেন না; আবার ভাবিলেন, চুড়ি ও পেড়ে কাপড়ে কি আছে, কেন পরিত্যাগ করিতে পারিব না? বরং আমি যে ভপস্ফাতে প্রবৃত্ত হইব ভাবিতেছি, তাহার পক্ষে কিঞ্চিৎ কুচু সাধন ত ভালই। এই ভাবটা মনে আসাতে বৈকালের অর্দ্ধাশন ও একাদশীর নির্জলা উপবাসের প্রস্তাবটাও তাঁহার চক্ষে ভাল বোধ হইতে লাগিল। কিন্তু পূজাটা করিতে মন কোনও প্রকারেই প্রস্তুত হইল না। তিনি নবরত্ন সভার আলোচনাতে কতদিন উপস্থিত থাকিয়াছেন; পৌত্তলিকতাকে মহাত্মাস্তি বলিয়া চিন্তা করিতে শিখিয়াছেন; পৌত্তলিকতা বর্জন করিতে হইবে, ইহা এক প্রকার সংকল্প করিয়া রাখিয়াছেন; নবীন যখন ঠাকুর প্রণাম না করাতে গৃহ হইতে তাড়িত হইয়া আসিলেন, তখন তাঁহাকে মনে মনে কত প্রশংসা করিয়াছেন; আজ তিনি কিরূপে নিজে ত্রত ও পূজা করিতে যাইবেন? যতবার ভাবেন, কি করি, নতুবা যে মামা ভয়ানক ক্রুদ্ধ হইবেন; অমনি মন বলে, তাহা হইলে অশ্রম্য হইবে; এবং তাহা হইলে তিনি আর নবীনচন্দ্র বসুর শ্রদ্ধার পাত্র থাকিতে পারিবেন না; অমনি মন সংকুচিত হইয়া আসে। তিনি শুনিতে কি ভাবিবেন, কেবল এই চিন্তাই মনে হয়।

অবশেষে ভাবিয়া চিন্তিয়া এই স্থির করিলেন যে কলাকল বাহ্যই হউক, তিনি গঙ্গাপ্রাণে বাইবেন না ও পূজা করিবেন না; চূড় খুলিবেন, খাঁস শরীবেন, অর্দ্ধাশনে থাকিবেন ও নির্জলা একাদশী করিবেন। কৃষ্ণকামিনী উত্তর না করাতে মিজদ মহাশয় ভাবিতেছিলেন, "যোদ্ধা

সম্মতিলক্ষণ,” সুতরাং নিশ্চিত মনে পরদিন অনেক বেলা পর্যন্ত নিদ্রা যাইতেছেন। মহিলারা অতি প্রত্যাষে উঠিয়া গঙ্গাস্নানে গিয়াছেন। যাইবার পূর্বে কৃষ্ণকামিনীকে ডাকিয়াছিলেন, তিনি বলিয়াছেন, “আমি যাব না।” একটু পীড়াপীড়িও করা হইয়াছিল; কিন্তু তাঁহারা আর অপেক্ষা করিতে না পারিয়া চলিয়া গিয়াছেন। মিত্রজ মহাশয় নিদ্রাভঙ্গে যখন শুনিলেন যে কৃষ্ণকামিনী গঙ্গাস্নানে যায় নাই, তখন অতিশয় বিরক্ত হইলেন। উগ্র ও কর্কশস্বরে কৃষ্ণকামিনীকে নিকটে ডাকিলেন,— “গঙ্গাস্নানে যাও নাই যে?” কৃষ্ণকামিনী উত্তর করিলেন, “আমি কাল রাত্রে স্থির করেছি গঙ্গাস্নানে যাব না, এবং পূজা কর্ত্তে পারব না; তব্ধিন্ন আপনি যা কিছু আদেশ করেছেন তা সকল করব।”

মিত্রজ। ( অতি বিরক্তি-কর্কশ স্বরে ) সকল জেঠা সহিতে পারি, মেয়ে জেঠা সহিতে পারিনে; আর রিফর্মার হতে হবে না; যাও, ভাল চাও ত এখন গিয়ে স্নান কর; যাও এখন যাও, আর এক মিনিট দেরি করোনা।

কৃষ্ণকামিনী স্নান করিতে গেলেন। মিত্রজ মহাশয় বাড়ীর একটা দাসীকে একখান থান কাপড় দিয়া ও কৃষ্ণকামিনীর হাতের চূড়ি খুলিয়া লইতে আদেশ করিয়া বাহিরে গেলেন। বাড়ার মহিলারা গঙ্গাস্নানান্তে ফিরিয়া আসিয়া দেখেন, কৃষ্ণকামিনী স্নানান্তে গাত্ৰের অলঙ্কার খুলিয়া ও থান পরিয়া প্রস্তুত হইয়া আছে। সকলে কিঞ্চিৎ আশ্চর্যান্বিত হইলেন। ক্রমে পূজার সময় উপস্থিত; এইবার সর্বাপেক্ষা কঠিন সংগ্রাম। মহিলাগণ সাজিয়া প্রস্তুত, কৃষ্ণকামিনীকে বার বার আহ্বান করিতেছেন, কৃষ্ণকামিনী একবার বলিয়াছেন যে তিনি পূজা করিবেন না, আর কিছুই বলিতেছেন না। অবশেষে গৃহের বৃদ্ধা বিধবাদিগের মধ্যে একজন আসিয়া তাঁহার হাতে ধরিলেন, “না লক্ষ্মি! চল, নইলে কৰ্ত্তা বড় রাগ করবেন,

বিধবা মানষের ত এই কাজ।” কৃষ্ণকামিনী সবিনয়ে উক্ত বৃদ্ধাকে প্রতিনিবৃত্ত হইতে অহুরোধ করিলেন; কোন ক্রমেই পূজাস্থানে গমন করিলেন না। তৎপরে তাঁহার মাতুলানী আগমন করিলেন। তিনি করে ধরিয়া টানাটানি করিতে লাগিলেন, “এক কেট্টো! এই সকাল বেলা একটা কাণ্ড বাধাবি, আয় আর দেরি করিস্নে।” কৃষ্ণকামিনী একপদও নড়িলেন না। তিনি টানাটানি করিতেছেন, ইতিমধ্যে মিত্রজ মহাশয় সংবাদ পাইয়া অতিশয় উত্তেজিত অন্তরে অসিয়া উপস্থিত। সকলেই ভয় পাইল, কি জ্ঞানি কি হয়। তিনি অতিশয় কর্কশস্বরে চীৎকার করিয়া বলিলেন, “যাও, এখনি যাও, ভাল চাও ত আর একটুও দেরি করো না।” কৃষ্ণকামিনী নিরুত্তর; যাহা বলিবার তাহা বর্ণিয়াছেন, আর কি বলিবেন? সূতরাং উত্তর করিলেন না; কিন্তু এক পদও নড়িলেন না। তাহাতে মাতুল আরও কুপিত হইয়া উঠিলেন। অবশেষে নিজের তাঁহার হাত ধরিয়া আকর্ষণ করিতে লাগিলেন। কৃষ্ণকামিনী পাষণ প্রতিমার ত্রায় দণ্ডায়মান, এক পদও নড়েন না; তিনি এত গোলযোগ কিছুই দেখিতেছেন না; কেবল ভাবিতেছেন, যাহা মানি না তাহা কিরূপে করিব, বিশেষতঃ তিনি গুনিলে কি মনে করিবেন!

মিত্রজ মহাশয় হাত ধরিয়া টানিতে লাগিলেন। সময় বুঝিয়া মাতাজ্ঞানী বলিয়া উঠিল, “মাগো! ধত্তি মেয়ে বলতে হবে, এত বড় লোকটা হাতে ধরে টানছেন, গ্রাহ্যই নাই। দাদা ছেড়ে দেও, কেন অপমানিত হও!” যেই এই কথা বলা, অমনি ঘূতাহতি পাইলে অগ্নি যেরূপ প্রজ্জ্বলিত হয়, সেইরূপ এই প্ররোচনাবাক্যে মিত্রজ মহাশয়ের কোপ জ্বলিয়া উঠিল। তিনি সিংহের ত্রায় গর্জন করিয়া বলিয়া উঠিলেন, “তবে যাও মর,” এই বলিয়া এমন সজোরে এক গলাধাক্কা দিলেন যে কৃষ্ণকামিনী তিন হাত ঠিকরাইয়া গিয়া একটা বইএর আলমারির



উপরে পড়িলেন। মিত্রজ মহাশয় আরও প্রহার করিতে উদ্ভত হইয়াছিলেন, কেবল গৃহিণী উভয়ের মধ্যে পড়িয়া ‘কর কি?’ ‘কর কি?’ বলিয়া নিবারণ করাতে নিরস্ত হইলেন। এদিকে কৃষ্ণকামিনী আঘাত পাইয়াই হঠাৎ চক্ষে অন্ধকার দেখিয়া বলিয়া পড়িয়াছেন, ও দুই হস্তে নিজ বসনাঞ্চলে মুখ আবরণ করিয়াছেন। তাঁহার দুই নাসারন্ধ্র দিয়া রক্তধারা বহিতেছে; তাহাতে বসনাঞ্চল ভিজিয়া যাইতেছে। গৃহিণী ক্রুদ্ধ পতিকে ধরিয়া বাহিরে লইয়া গেলেন; এবং অপরাপর মহিলারা কৃষ্ণকামিনীর পরিচর্যাতে নিযুক্ত হইলেন।

মহিলাদের পূজা শেষ হইলে, কৃষ্ণকামিনী মাতুলকে জানাইলেন, যে তিনি সেই দিনই বাড়ী ফিরিয়া যাইতে চান। মিত্রজ মহাশয়ের মন তখনও উষ্ণ ছিল; মাতঙ্গিনীর উদ্বেজনাবাক্য তখনও তাঁহার হৃদয়কে পারত্যাগ করে নাই;—“এত বড় লোকটা” এবং “অপমান” এই দুইটা শব্দ তখনও মনের মধ্যে ঘুরিতেছিল, স্মরণে তিনি কৰ্কশস্বরে বলিলেন, “যাক্, ওর আর এখানে থেকে কাজ নেই?” এই বলিয়া কৃষ্ণকামিনীকে গাড়ী করিয়া চাকরাণীর সঙ্গে বাড়ী পাঠাইবার জন্ত আদেশ করিয়া আপীসে গেলেন।

কৃষ্ণকামিনী দুপুর বেলা চাকরাণীর সঙ্গে, চুড়িবহীন হস্তে, ধান পারিয়া, বস্ত্রের দ্বারা মস্তক বাঁধিয়া বাড়ীতে উপস্থিত হইলেন। তাঁহার এই বেশ দোখিয়া ও প্রহারের বৃত্তান্ত শুনিয়া, বোধ গৃহিণী ডাক ছাড়িয়া কঁাদিতে লাগিলেন। ডাক ছাড়িয়া কঁাদিলে আর কি হইবে? কৃষ্ণকামিনী আর দাঁড়াইতে পারিতেছে না, শয্যা পাতিয়া দেও, বোধ হয় তাঁহার জ্বর আসিতেছে। বধূগণ ত্বর করিয়া শয্যা পাতিয়া দিল, কৃষ্ণকামিনী অরুণধার শয়ন করিলেন। সন্ধ্যা আসিতে না আসিতে তাঁহার কর্ণমূল ও একদিকের গণ্ড ফুলিয়া জ্বর আসিল।

এ দিকে মিত্রজ মহাশয় আপীসে গিয়া সুস্থিরভাবে কাজ করিতে পারিতেছেন না। তিনি ক্রোধের অধীন হইয়া যাহা করিয়াছেন, সেজন্য প্রবল অনুশোচনা তাঁহার হৃদয়কে অধিকার করিয়াছে। বস্তুতঃ তিনি অলং লোক নহেন ; ভগিনী ও ভাগিনেয়দ্বয়ের বিশেষতঃ এই ভাগিনেয়ীটির প্রতি তাঁহার অকৃত্রিম স্নেহ আছে। তাহাদের পিতার মৃত্যুর পর তিনিই পিতৃস্থানীয় হইয়া তাহাদিগকে প্রতিপালন করিয়াছেন ; কৃষ্ণকামিনী বাল্যকালে বৈধব্য-দশা প্রাপ্ত হইলে, তিনি অনেক কাঁদিয়াছিলেন, এবং তিনি নিজেই তাহার পেড়ে কাপড় ও হাতের চুড়িগুলি খুলিয়া লইতে বারণ করিয়াছিলেন। এখন যাহা করিয়াছেন, তাহার অনেকটা মাতঙ্গিনীর প্ররোচনাতে। মাতঙ্গিনী আসিয়া তাঁহাকে কি শুনাইয়াছে বলিতে পারি না, যাহাতে মিত্রজ মহাশয়ের বিশ্বাস জন্মিয়াছে, যে তাঁহার ভাগিনেয়দ্বয় ও ভাগিনেয়ীটি বিকৃত হইয়া যাইতেছে ; হিন্দু-স্বীতিনীতির প্রতি বিদ্বেষ-পরায়ণ হইতেছে ; কেবল তাহা নহে, মাতঙ্গিনীর মুখে তিনি শুনিয়াছেন, যে গোপনে কৃষ্ণকামিনীর বিবাহ দ্বিবার চেষ্টা হইতেছে। মাতঙ্গিনীর কথাতে যে তিনি বিশ্বাস স্থাপন করিয়াছিলেন, এজন্য তাঁহাকে দোষী করা যায় না। চারিদিকে যেরূপ বিধবাবিবাহের আন্দোলন উপস্থিত, নিত্য নিত্য যেরূপ নূতন নূতন জনরব উঠিতেছে, ইহাতে এরূপ বিশ্বাস করাতে আশ্চর্য্য কি ? মিত্রজ মহাশয় নিজে ইংরাজী শিখিয়াছেন, আপীসে চাকুরীও করেন বটে, কিন্তু লৌকিক আচারব্যবহারগুলি মাত্র করিয়া চলেন ; কারণ তিনি সমাজে বাস করেন, তাঁহাকে সে সমাজের মুখ দেখিয়া চলিতে হয়। আর ইহাও মনে করা কর্তব্য নয়, যে কেবল মাত্র মাতঙ্গিনীর কথাতে তিনি কৃষ্ণকামিনীর হস্তের অলঙ্কার খুলিয়া ধান পরাইতে চাচ্ছিলেন। তিনি অনেক দিন হইতে মধ্যে মধ্যে ভাবিয়াছিলেন,

“কৃষ্ণকামিনী বড় হইয়া গেল, এখন বিধবার আচার করাই উচিত।” এত দিনের পর সেই সংকল্পটা কার্যে পরিণত করিতে অগ্রসর হইয়াছিলেন এই মাত্র। যাহা হোক তিনি সমস্ত দিন মনের যন্ত্রণায় কাল কাটাইয়া অবশেষে স্থির করিলেন যে, আপীস হইতে ফিরিবার সময় কৃষ্ণকামিনীকে দুইটা মিষ্ট কথা বলিয়া যাইবেন।

ব্রজরাজ ও মথুরেশ আপীস হইতে আসিয়া সমুদায় বৃত্তান্ত শুনিয়া একেবারে আশ্তন হইয়া গেলেন। পূর্বাবধিই মাতুলের সঙ্গে তাঁহাদের অনেক বিষয়ে মতভেদ উপস্থিত হইয়া মধ্যে মধ্যে তর্কবিতর্ক ও রাগারাগি হইয়াছে। তাঁহারা এক্ষণে বয়ঃপ্রাপ্ত হইয়াছেন, মাতুল যে এখনও তাহাদিগকে নাবালকের ছায় ব্যবহার করিবেন, ইহা তাহাদের সহ্য হয় না। মথুরেশ বলিলেন, “একি জুলুম, একি অত্যাচার! এত বড় মেয়েকে এই প্রহার! আশ্রন দেখি মামা, তাঁর সঙ্গে আর কথা কব না। আমাদের এমন অভিভাবকের দরকার নেই।” ব্রজরাজ জননীকে বলিলেন, “বল আর মামার বাড়ী যেতে চাবে না?” দুই ভ্রাতাতে এইরূপ আক্রোশ প্রকাশ করিতেছেন, এমন সময়ে গ্রামচাঁদ মিত্র মহাশয় আসিয়া উপস্থিত। তাঁহাকে যেই দেখা, অমনি সকলে নিস্তব্ধ। অল্প দিন তিনি আসিলে সকলে যেমন আনন্দ প্রকাশ করে, আজ আর কেহই তাহা করিল না; কাহারও মুখে প্রসন্নতার চিহ্ন নাই; অভ্যর্থনাসূচক শব্দ নাই! কেনই বা থাকিবে? মিত্রজ মহাশয় তাহাতে কিছুমাত্র বিরক্ত, দুঃখিত বা আশ্চর্য্যান্বিত হইলেন না। একেবারে নিজ ভগিনীর ঘরে গিয়া ভগিনী ও ভাগিনেয়দ্বয়কে নিকটে ডাকিলেন; এবং তাঁহাদের নিকট অনেক ক্লেভ প্রকাশ করিলেন। তাহাতে তাঁহাদের মন কিঞ্চিৎ শান্তভাব ধারণ করিল। অবশেষে তিনি কৃষ্ণকামিনীর ঘরে গেলেন। মনে করিয়াছিলেন, তাহারও নিকটে ক্লেভ প্রকাশ করিবেন, সান্ত্বনার্থ

দুই চারিটা মিষ্ট কথা বলিলেন, কিন্তু ঘরে প্রবেশ করিয়াই যখন দেখিলেন যে কৃষ্ণকামিনীর একদিকের গণ্ডি বিলক্ষণ ফুলিয়াছে, তখন মনে এতই লজ্জা হইতে লাগিল যে আর মুখে কথা সরিল না। মৌনী হইয়া তাঁহার শয্যার এক পাশে উপবেশন করিলেন। কৃষ্ণকামিনী চক্ষু মুদ্রিয়া ছিলেন, মাতুল মহাশয় এক পাশে বসিবামাত্র চাহিয়া দেখিলেন। এক মুহূর্তের জন্ত উভয়েরই মুখে কথা নাই। ক্রমে কৃষ্ণকামিনী মৌনভাবে ভঙ্গ করিলেন—“মামা, আপনি কি আপীস হতে আসছেন।” উত্তর, “হাঁ, আপীস থেকেই আসছি কৃষ্ণ, আমি সমস্তদিন মনের ক্রেশে আপীসে কাজ করতে পারি নি। রাগ চণ্ডাল, তার অধীন হয়ে সকালে যা করেছি, তা জীবনে করি নাই।”

কৃষ্ণ। (মাতুলের হস্তের উপরে নিজ হস্তখানি রাখিয়া) কেন মামা! আপনি মন খারাপ করেছেন? রাগ হবারই ত কথা, আমার বাবা থাকলে ত ওর চেয়ে রাগতেন। না মামা, অমন করে বলবেন না, আমি জানি আপনি আমাদের ভালবাসেন, কখনও গায়ে হাত তোলেন নি। হঠাৎ রাগ হ’য়ে গিয়েছিল, তা কি করবেন।

কৃষ্ণকামিনীর এই কথাগুলিতে মিত্রজ মহাশয় বালকের ত্রায় নিজ হস্তে মুখ আবরণ করিয়া কাঁদিতে লাগিলেন। মাতুলের চক্ষে জল দেখিয়া কৃষ্ণকামিনী একেবারে অস্থির হইয়া পড়িলেন; মাতুলের হাত ধরিয়া বার বার শাস্ত হইবার জন্ত অনুরোধ করিতে লাগিলেন। মিত্রজ মহাশয় অশ্রু নিবারণ করিলেন বটে, কিন্তু কৃষ্ণকামিনীকে আর কিছু বলিতে পারিলেন না; যাইবার জন্ত তাঁহার নিকট বিদায় লইলেন। একটা কথা কৃষ্ণকামিনীর মনে এই সময়ে ঘুরিতেছে, বলি বলি করিয়া বলিতে পারিতেছেন না; অবশেষে বলিয়া ফেলিলেন, “মামা, উমাশঙ্কর বাবু কি বেশী দিন ও বাড়ীতে থাকবেন?”

মিত্রজ। না, হুই চারি দিনের মধ্যেই বাবে ; কিন্তু কেন বল দেখি এ প্রশ্ন আমাকে করলে ?

কৃষ্ণ। থাক ; তিনি যখন চলে যাবেন তখন আর অধিক কথার সময়কার নেই।

ইহাতে মিত্রজ মহাশয় আরও আগ্রহসহকারে ধরিয়া বসিলেন।

কৃষ্ণ। আর কিছু নয়, এই বলতে চাচ্ছিলাম যে, তিনি মানুষ ভাল নন ; তাঁকে বাড়ীতে রাখলে আপনাকে অনেক ক্লেশ পেতে হবে।

মিত্রজ মহাশয় ভিতরের কথা জানিবার জন্য অনেক পীড়াপীড়ি করিলেন ; কৃষ্ণকামিনী আপাততঃ ইহার অধিক আর কিছুই বলিতে সম্মত হইলেন না। মাতুল মহাশয় উঠিতে যাইতেছেন, এমন সময়ে কৃষ্ণকামিনী আবার বলিলেন,—“আর একটা কথা, বামী চাকরাণীকে বাড়ীতে রাখবেন না, সে অতি অসৎ।” শ্যামচাঁদ বাবু এই উভয় অনুরোধ শুনিয়া চিন্তিত অন্তরে গৃহাভিমুখে চলিলেন। আজ তাঁহার চিন্তার অনেক কারণ উপস্থিত। প্রথম, কৃষ্ণকামিনীর পীড়া ; যেয়েটা কতদিনে সারিয়া উঠিবে ? এমন লক্ষ্মী মেয়ে কি হয় ? কথা শুনলে প্রাণ জুড়িয়ে যায় ; কিন্তু এসব বিদকুটে মত কে ওর মাথার ঢুকিয়ে দিলে ? সত্য সত্য কি ওর বিবাহের পরামর্শ চলছে ? তা হলে আমি বলবামাত্র পেড়ে কাপড় ছেড়ে ধান পরলে কেন ? ও মাতঙ্গিনী হতভাগীর মিথ্যে কথা। অমনি কৃষ্ণকামিনীর শেষ কথাগুলি মনে হইল। কেন কৃষ্ণকামিনী ডামাশঙ্করকে বাড়ীতে রাখতে নিবেদন করলে ? সেই যে গৃহিণী মাতঙ্গিনীর বিষয় কিছু কিছু বলেছেন, কৃষ্ণও কি তার কিছু জানে ? বামী চাকরাণীর বিষয়েই বা কেন এমন কথা কহলে ? যে প্রকারেই

হোক, তিনি গৃহের যত নিকটবর্তী হইতে লাগিলেন, কৃষ্ণকামিনীর  
পীড়ার চিন্তা ক্ষয় হইতে অন্তর্হিত হইয়া, উমাশঙ্কর ও মাতঙ্গিনী এই  
দুইটা নাম একত্রে মনে জাগিয়া উঠিল; এবং অন্তরে প্রতিজ্ঞা হইতে  
লাগিল, তৎপর দিনই উমাশঙ্করকে চলিয়া যাইতে বলিবেন।



## ষোড়শ পরিচ্ছেদ

পরদিন প্রাতে নবীনচন্দ্র মথুরেশের মুখে যখন শুনিলেন যে, মাতুল কৃষ্ণকামিনীকে বলপূর্বক চুড়ি খুলিয়া ধান পরাইয়াছেন, ও পূজা করে নাই বলিয়া এমন প্রহার করিয়াছেন যে, তাহার মুখ ফুলিয়া জ্বর হইয়াছে, তখন যেন তাঁহাকে শত বৃষ্টিকে একেবারে দংশন করিল ! তাঁহার প্রধুমিত অনুরাগিণী যেন দপ্ করিয়া জলিয়া উঠিল ! যতক্ষণ মথুরেশ ছিলেন, ততক্ষণ কোনও প্রকারে তর্জয় মানসিক শক্তির দ্বারা আপনার মনোভাব গোপন করিয়া থাকিলেন । কিন্তু মথুরেশ যাইবামাত্র নিজ গৃহের দ্বার বন্ধ করিলেন ; এবং প্রথমে শয্যাতে পড়িয়া বালিশে মুখ লুকাইয়া অনেকক্ষণ রহিলেন ; তৎপরে উঠিয়া ফোভে, অনুরাগে, বিরাগে অস্থির হইয়া গৃহের মধ্যে পাদচারণা করিতে লাগিলেন । মনে মনে বলিতে লাগিলেন, “হায় রে ! এই ত আমার জীবনের উপযুক্ত সঙ্গিনী, এই ত সেই আদর্শ নারী, যাহাকে পাইলে জীবন ধৃত হয় । এখন কি করি ! এ যাতনা, এ নিগ্রহ, এ অত্যাচার সব ত আমারই জন্ত । কি কৃষ্ণণে সে বাড়ীতে পদার্পণ করিয়াছিলাম ! বেশ ত বৃষ্টিতে পারিতেছি, মাতঙ্গিনী ইহার মূলে আছে । বাপ্ রে স্ত্রীলোকের প্রতিহিংসা কি ভয়ানক ! আমার উপর আক্রোশে এই নিরপরাধার প্রাণ যায় । কি করি, ব্রজরাজকে কি ভাগিয়া বলিব ? কৃষ্ণকামিনীকে কি ভিক্ষা চাহিয়া লইব ?” ভাবিতে ভাবিতে এমন যে শান্ত, ধীর, দীক্ষর-ভক্ত ও কন্দ-প্রিয় মানুষ নবীন, তিনিও ক্ষণকালের

জ্ঞাত্য ভাবুক হইয়া পড়িলেন। উদ্দেশে বলিতে লাগিলেন,—“কৃষ্ণ-  
কামিনী! কৃষ্ণকামিনী! আমার জ্ঞাত্য তোমার এই শাস্তি! চল  
তোমাকে বৃকে করিয়া এদেশ হইতে পলাইয়া যাই; এ শত্রুতার হস্ত  
হইতে তোমাকে উদ্ধার করি।” কিন্তু সে ভাবুকতা অধিকক্ষণ রহিল  
না; ক্ষণকাল পরেই আবার কর্তব্যের কঠিন ভূমিতে অবতরণ করিলেন।  
ভাবিতে লাগিলেন,—“এখন কর্তব্য কি? আমার কারণে এই  
নিরপরাধার প্রাণ যায়, তাহা ত সহ্য হয় না। কিরূপে এ অত্যাচার  
নিবারণ করি? তবে কি ব্রজরাজ ও মথুরেশের নিকট বিবাহের প্রস্তাব  
করিব? যে ভাব ত দিন সময়ে গোপন করিতেছি, তাহা কি তাহাদের  
নিকট ব্যক্ত করিব? তাই বা কিরূপে করি? কৃষ্ণকামিনীর  
মনের ভাব ত সম্পূর্ণরূপে জানি না। আর এরূপ প্রস্তাব কার্য্যে পরিণত  
করাও সহজ নয়। তাহার মাতুল জানিতে পারিলে ত রক্ষা রাখিবেন না।  
আর, বিবাহ করা সম্ভব হইলেও আমার বিবাহের মত অবস্থা কৈ?  
আমার ঘর নাই, দ্বার নাই, মাথা রাখিবার স্থান নাই, আশ্রয় সামান্য,  
আমি কোন্ সাহসে একজনের জীবনের ভার লইব?” এইরূপ ভাবিতে  
ভাবিতে স্থলে গেলেন। কিন্তু সোদিন আর পড়াইতে পারিলেন না।  
হেড মাষ্টারকে বলিয়া ছুটি লইয়া গৃহে আসিয়া সমস্ত দিন ঘরের দ্বার  
বন্ধ করিয়া পড়িয়া রহিলেন। অবশেষে প্রায় দিবাবসান সময়ে স্থির  
হইল যে, আর সহরে থাকিবেন না; কোনও একটা কাজ কর্ত্ত্বের  
যোগাড় করিয়া দূরদেশে গমন করিবেন! কারণ তিনি নিকটে থাকিলেই  
কৃষ্ণকামিনীর প্রতি অত্যাচার চলিবে।

এই সংকল্পে উপনাত হইয়া মনটা একটু স্থিতির হইল। কিন্তু  
কৃষ্ণকামিনীর চিন্তা প্রবলভাবেই হৃদয়কে অধিকার করিল। ক্রমে সন্ধ্যা  
সমাগত, মন ব্রজরাজদিগের বাড়ীতে যাইবার জ্ঞাত্য বড়ই ব্যাকুল হইতে



লাগিল; একবার দেখিয়া আসি কৃষ্ণকামিনী কিরূপ আছে; কিন্তু সে মনকে সংযত করিয়া রাখিলেন, সন্ধ্যার পর গড়ের মাঠে অনেকক্ষণ বেড়াইয়া আসিলেন; এবং শ্রান্ত ক্লান্ত হইয়া নিদ্রার ক্রোড়ে আপনাকে সমর্পণ করিলেন। তৎপরে দিনের পর দিন চলিয়া যাইতে লাগিল, প্রতিদিনই কৃষ্ণকামিনীর অবস্থা জানিবার জন্ত মন ব্যগ্র হয়, প্রতিদিনই হুঃ ব্রজরাজ না হয় মথুরেশের সঙ্গে দেখা হয়, তাহাদিগকেও বিশেষ করিয়া জিজ্ঞাসা করিতে সাহসী হন না; উপরে উপরে সংবাদ পান।

ওদিকে অশনে, বসনে, শয়নে, উপবেশনে কৃষ্ণকামিনী হৃদয়কে অধিকার করিয়া রহিয়াছে। সেই মূর্তি মনকে জড়াইতেছে, চিন্তাতে মিশিতেছে, গপ্পে আসিতেছে! নবীন তাহাকে হৃদয় হইতে বিদায় করিয়া অগ্র কাজ করিতে চান, কিন্তু সে মূর্তি যেন এক দ্বার দিয়া বাহির হইয়া, অপর দ্বার দিয়া হৃদয়ে প্রবেশ করে; এবং নিজে ভিতরে থাকিয়া সমুদায় জগৎকে বাহিরে ফেলিয়া দিতে চায়। এইরূপ মনের উত্তেজনা দুই তিন দিন গেল। অবশেষে নবীন বন্ধুদিগের নিকটে সহর ছাড়িবার সংকল্প জানাইলেন। সকলেই অতিশয় দুঃখিত হইলেন।

সহর পরিত্যাগ করিবার সংকল্প হৃদয়ে জাগ্রত হওয়া অবধি নবীনচন্দ্র সেই চেষ্টাতেই তৎপর হইলেন। মফঃস্বলে যে সকল জেলা স্কুল স্থাপিত হইয়াছে, তাহার কোনও স্কুলে কোনও কর্ম খালি আছে কিনা জানিবার জন্ত ইন্স্পেক্টর সাহেবের আপীসে গতায়াত আরম্ভ করিলেন; এবং সহর ছাড়িতে হইলে কলিকাতার কার্যের কি প্রকার বন্দোবস্ত করিবেন, সে বিষয়ে অনেক চিন্তা করিতে লাগিলেন। এই সকল কারণে তিনি কয়েক দিন তাঁহার জ্যেষ্ঠ সহোদর সুরেশচন্দ্রের বাসাতে যাইতে পারেন নাই। তাঁহার ভ্রাতৃজায়া তাঁহার প্রতি এতই অমুরক্ত যে, সেখানে প্রত্যহ একবার, অন্ততঃ একদিন অন্তর একবার, না গেলে চল

না। ঐ ভ্রাতৃজ্ঞার নাম সৌদামিনী। সৌদামিনী তাঁহার সমবয়স্কা, কি ছই এক বৎসরের ছোট হইবেন। তথাপি নবীন তাঁহাকে বৌদিদি বলিয়া ডাকিয়া থাকেন; আপনার ভগিনীর ছায় ভালবাসেন; নিজে তাঁহাকে লেখা পড়া শিখাইয়াছেন; এবং অনেকটা উদারভাবাপন্ন করিয়া তুলিয়াছেন।

একদিন স্কুল হইতে আসিয়া কিঞ্চিৎ জলযোগ করিয়া চান্দরখানি স্বন্ধে লইয়া বাসী হইতে বাহির হইতেছেন, এমন সময়ে পঞ্চ তাঁহার সহিত সাক্ষাৎ করিবার জন্ত আসিয়া উপস্থিত। পঞ্চকে দেখিয়াই নবীন বলিলেন, “এই যে পঞ্চ, বেশ হয়েছে, আমি দাদার বাসায় যাচ্ছি, চল দুজনে পথে পথে অনেক কথা হবে।” এই বলিয়া পঞ্চর কণ্ঠালিঙ্গন পূর্বক দুই বন্ধুতে প্রিয় নবরত্ন সভার বিষয়ে ও তাঁহার অনুপস্থিতিকালে কলিকাতার কার্য্য কিরূপে চলিবে, সে বিষয়ে নানা কথা কহিতে কহিতে সুরেশচন্দ্রের বাসার অভিমুখে চলিলেন। সুরেশচন্দ্রের বাসার দ্বারে উপস্থিত হইয়া নবীনচন্দ্র বলিলেন, “পঞ্চ, তুমি এখান থেকে ফিরে যাবে কেন, বাহিরের ঘরে একটু অপেক্ষা কর না, আমি বাড়ীর ভিতর হতে বৌদিদির সঙ্গে দেখা করে আসছি, তারপর আবার দুজনে কথা কহিতে কহিতে যাব।” এই বলিয়া উভয়ে বাড়ীতে প্রবিষ্ট হইয়া চাকরকে সুরেশচন্দ্রের বসিবার ঘরের দ্বার খুলিয়া দিতে বলিলেন। নবীনচন্দ্র উপরে উঠিয়া পঞ্চকে সেই ঘরে বসাইয়া, তাঁহাকে পড়িবার জন্ত একখানা পুস্তক দিয়া, বাড়ীর মধ্যে গেলেন।

যেই বাড়ীর মধ্যে পদার্পণ করা, অমনি শিশুদিগের ঘোর কোলাহল, —“কাকা!—কাকা!—কাকা!” সকলেই ছুটিয়া আসিল। একজন আসিয়া জাহ্নু আলিঙ্গন করিয়া ধরিল; অপর জন অঙ্গুলি ধরিয়া টানিতে লাগিল; সর্ব্বকনিষ্ঠ ছই বৎসরের বালক, খর্ব্বাকৃতি ও বলবান্ বলিয়া

নবীন তাহাকে নেপোলিয়ান বলিয়া ডাকেন। সে আসিয়া তাহার নিজের স্থান অধিকার করিবার ইচ্ছা জানাইল। নেপোলিয়ানকে যেমন তেমন আদর করিলে চলে না, স্বন্ধের উপরে বসাইতেই হইবে। দুই স্বন্ধের উপরে দুইদিকে দুইখানি পা দিয়া বসিবেন, এবং মুখে “হেট্ হেট্” শব্দ করিবেন, তবে তাঁর মনোমত আদর হইবে। নবীনচন্দ্র তাহাকে সে স্থান দিতে অপ্রস্তুত নহেন, কিন্তু তৎপূর্বে নেপোলিয়ানকে কিছু করিতে হইবে। নেপোলিয়ানের অনেক প্রকার বিজ্ঞা আছে। তিনি নানাপ্রকার জানোয়ারের ডাক ডাকিয়া দেখাইতে পারেন, এবং অনেকের গতিবিধিরও অনুকরণ করিতে পারেন, অগ্রে সেগুলির একবার পরীক্ষা হওয়া চাই। নবীনচন্দ্র জিজ্ঞাসা করিলেন,—“বাঘ কি রকম ডাকে?”—নেপোলিয়ান—“আলুম”।—নবীনচন্দ্র—“কুকুর কি রকম ডাকে?”—নেপোলিয়ান—“গেও”।—নবীনচন্দ্র, “বিড়াল?”—“মও”। “গরু?”—“আহা”। এইরূপে বেচারা কাঁধে চড়িবার লোভে কতই অশ্রাব্য ও মানবের অযোগ্য ডাক ডাকিল। অবশেষে নবীনচন্দ্র হাসিয়া একটা চুহন করিয়া তাহাকে স্বন্ধের উপরে তুলিলেন। নেপোলিয়ান তাহার চিরাভ্যস্ত হেট্ হেট্ শব্দ আরম্ভ করিল।

এইরূপে ভ্রাতৃপুত্র ও ভ্রাতৃপুত্রীগণে পরিবেষ্টিত হইয়া নবীন ভ্রাতৃজ্ঞায়ার অন্বেষণ আরম্ভ করিলেন। ভ্রাতৃজ্ঞায়াকে যে অন্বেষণ করিতে হইতেছে, ইহাতেই প্রমাণ যে তিনি আজ মানিনী; কারণ অল্প দিন তিনি ছেলের কাক! ধ্বনি শুনিবামাত্র যেখানেই থাকেন দৌড়িয়া আসেন এবং দেবরকে অভ্যর্থনা করিয়া থাকেন; আজ কেন দর্শন নাই? নবীনচন্দ্র বুঝিলেন, কয়দিন না আসার অপরাধের কিঞ্চিৎ প্রায়শ্চিত্ত করিতে হইবে। স্মৃতরাং বৌদিদি, বৌদিদি! করিয়া ডাকিয়া বেড়াইতে লাগিলেন। অবশেষে তাঁহাকে রান্নাঘরে রাধুনীর

নিকটে পাওয়া গেল। নবীন বলিলেন,—“কি বোদিদি! কেমন আছ, দিনটে চলছে কেমন?”

সৌদামিনী। কেন, যে দেশে নবীনচন্দ্র বসু নাই, তাদের দেশে কি সূর্য্য উদয় হয় না? তাদের দিন কি চলে না? দিন বেশ চলছে।

নবীন। এস তোমার ঘরে এস, একটা কথা আছে।

সৌদামিনী। আমার সঙ্গে কি কথা? এখন তোমার কথার লোক ত ঢের হয়েছে, তাদের সঙ্গে গিয়ে কথা কও।

নবীন। ছি বোদিদি, রাগ করো না। আমি কি জ্ঞে এতদিন আসতে পারিনি, তা শুনবে এস।

অনেক সাধ্য-সাধনার পর সৌদামিনী দেবরের সঙ্গে নিজের ঘরে আসিলেন। পুনরায় কথাবার্তা আরম্ভ হইল।

নবীন। আমি সহর ছেড়ে যাচ্ছি, তাই একটা কাজকর্মের যোগাড়ে ঘুরে বেড়াতে হচ্ছে, সেই জ্ঞে এ কয়দিন আসতে পারিনি।

সৌদামিনী। (নবীনচন্দ্রের সহর ছেড়ে যাওয়ার কথা শুনিয়াই বিশ্বস্মে স্তব্ধ) সত্যি!

নবীন। সত্য সত্যই আমি সহরে থাক্চি না।

সৌদামিনী। তা হবে বৈকি, যেদিন বাড়ী হ'তে বেরিয়ে অল্প জায়গায় বাসা করেছ, সেই দিন থেকে বুঝেছি, আমাদের প্রতি আর ভালবাসা নাই।

নবীন। না বোদিদি! আমার প্রতি অবিচার করো না। তুমি এই কথাটা বললে, আমি তোমাদের ভালবাসি না! যে জ্ঞে আমি তোমাদের সঙ্গে থাকি না, তা ত তুমি জান!

এদিকে সৌদামিনী অঞ্চলে চক্ষু মুছিতেছেন। দেবর সহর হইতে চলিয়া যাইবেন, ইহা শুনিয়া তাঁহার প্রাণ বোর বিষাদে মগ্ন হইয়াছে।

সৌদামিনী। তোমার কাছে থাকবে তাতে আপত্তি কি? আমিও তা হলে বেঁচে যাই, এ কুদৃষ্টান্ত থেকে যত দূরে থাকে ভাল। ঈশ্বর করুন, তোমার গুণ যেন ওরা একটু একটু পায়। কর্তার কি মত হবে?

নবীন। তুমি বলে কয়ে মত করতে পারবে না?

সৌদামিনী। আমার কথা কি শোনেন?

নবীন। তুমি যে কোনও কর্মের নও, তুমি শক্ত মেয়ে হলে কি দাদা এত বেগড়াতে পারতেন? আমি যদি স্ত্রীলোক হতাম, তা হলে স্বামীকে মুটোর ভিতর রাখতাম।

সৌদামিনী। আচ্ছা বাপু, আমার দ্বারা ত হলো না, একদিন ত বিয়ে হবে, দেখা যাবে কে কাকে কত মুটোর ভিতর রাখে। তোমাদের ছুভাইকে বশে রাখা সামান্য মেয়ের কাজ নয়।

নবীন। সে যা হোক, এই কথা কিন্তু রৈল, ভোনাকে আমার সঙ্গে দিতে হবে। দাদার মত না হবার কারণ দেখছি না।

সৌদামিনী। আমারও বোধ হয় রাজি হলে হতে পারেন; তিনি ত ওদের একবার দেখবার সময় পান না। কেউ ভার নিলে যেন বেঁচে যান।

ইতিমধ্যে চাকরাণী জলখাবার লইয়া উপস্থিত।

নবীন। ওকি বৌদিদি, আমি এই জল খেয়ে এলাম।

সৌদামিনী। তা হোক, একটু খেতেই হবে, আমার মাথার দিবিব।

নবীন হাত ছাড়াইতে না পারিয়া নামমাত্র কিঞ্চিৎ আহার করিলেন। অবশিষ্ট সমুদায় শিশুদের উদরে গেল। বাহিরে পক্ষুর জ্ঞাও কিঞ্চিৎ প্রেরিত হইল।

এইরূপে আহার ও আমোদ প্রমোদ চলিতেছে, এমন সময়ে বাহির বাড়ী হইতে একটা কলরব শ্রুত হইল। ভূপেন তাহার পড়িবার ঘরে বসিয়াছিল। সে জানালা দিয়া দেখিয়া চীৎকার করিয়া বলিল,—“কাকা-

বাবু, বাবা কাকে ধরে এনে মারছেন।” শুনিবামাত্র নবীনচন্দ্র ব্যস্ত সমস্ত হইয়া দৌড়িয়া বাহির বাড়ীতে গেলেন। গিয়াই দেখেন, তাঁহার জ্যেষ্ঠ সহোদর আপীস হইতে ফিরিবার সময় একজন লোককে রাস্তা হইতে ধরিয়া বাড়ীর মধ্যে পুরিয়াছেন; এবং দ্বার বন্ধ করিয়া দিয়া তাহাকে প্রহার করিতেছেন। তাঁহাদের ভৃত্যটী ঐ ব্যক্তির হস্ত দুখানি পৃষ্ঠের দিকে কাপড় দিয়া বাধিয়া ধরিয়া আছে, এবং তাঁহার জ্যেষ্ঠ পদাঘাত, মুণ্ডাঘাত, চড় চাপড় প্রভৃতি যথেষ্ট মারিতেছেন ও গালাগালি দিয়া বলিতেছেন, “আর ভদ্রলোকের ছেলেকে অপমান কর্বি; বেটা পাজি ছোট লোক!”

তাঁহার জ্যেষ্ঠের বাহির বাড়ীতে নীচের ঘরে দয়ালচাঁদ নামে তাঁহার জ্যেষ্ঠের আশ্রিত একটী লোক থাকে, সে ব্যক্তি অদূরে দাঁড়াইয়া আছে এবং বার বার বলিতেছে, “বাবু আর মারবেন না, যথেষ্ট হয়েছে, ওর খুব শিক্ষা হয়েছে, ছেড়ে দিন,” কিন্তু সে ছাড়াইয়া দিবার চেষ্টা করিতেছে না। নবীনচন্দ্র একেবারে গিয়া উভয়ের মধ্যে পড়িলেন; তাঁহার জ্যেষ্ঠের হাত ধরিয়া বাধা দিলেন; বলিলেন, “দাদা কর কি, ব্যাপারটা কি, ও করেছে কি?” তিনি যদি প্রতিবন্ধক হইলেন, ত পক্ষু উপর হইতে দৌড়িয়া আসিলেন। তিনি এতক্ষণ এই ব্যাপার দেখিতেছিলেন, অপারচিত ব্যক্তি, কিছু বলিতে পারেন না, হঠাৎ বাধা দিতে পারেন না, কি করিবেন ভাবিয়া কিছু স্থির করিতে পারিতেছিলেন না।

নবীনচন্দ্র তাঁহার জ্যেষ্ঠকে ধরিয়া বাড়ীর মধ্যে লইয়া গেলেন; এবং পক্ষু সেই ব্যক্তির হস্তের বন্ধন উন্মোচন করিয়া দ্বার খুলিয়া তাহাকে বাড়ীর বাহির করিয়া দিলেন। পরে কথাটা এই জানা গেল যে, সে একজন সামান্য দোকানদার, সুরেশচন্দ্র যে ব্যবসায় আরম্ভ করিয়াছেন, তাহাতে ঐ ব্যক্তির সহিত কি কারবার হয়, সেই কারবারে সে তাঁহাকে

প্রতারণা করিয়াছে, এবং কয়েক দিন পূর্বে সে বিষয়ের উল্লেখ করিয়া তাঁহাকে সকলের সমক্ষে অপমান করিয়াছে। আজ ইঠাং সে সুরেশচন্দ্রের বাটীর সম্মুখ দিয়া যাইতেছিল, এমন সময়ে তিনি আপীস হইতে বাটীতে আসিতেছেন। বাড়ীর দ্বারে তাহাকে দেখিতে পাইবামাত্র ভৃত্যসহ তাহার উপর পড়িয়া বলপূর্ব্বক তাহাকে বাড়ীর মধ্যে টানিয়া আনিয়া দ্বার বন্ধ করিয়া, উত্তম মধ্যম দিবার ব্যবস্থা করিয়াছেন।

জ্যেষ্ঠকে শাস্ত করিতে নবীনচন্দ্রের অনেকক্ষণ গেল। তৎপরে পক্ষকে সন্ধে করিয়া তিনি আবার কথাবার্তা কহিতে কহিতে স্বীয় বাসার অভিমুখে যাত্রা করিলেন।

কয়েকদিন পরেই শুনিতে পাওয়া গেল, সেই দোকানদার পুলিশ আদালতে সুরেশচন্দ্রের নামে নালিশ উপস্থিত করিয়াছে। সে যে কোথা হইতে নবীনচন্দ্র ও পক্ষুর নাম সংগ্রহ করিল, তাহা বলা যায় না; কিন্তু যথাসময়ে নবীনচন্দ্র ও পক্ষু উভয়ে সাক্ষীর সপিলা পাইলেন। সুরেশচন্দ্র ও তাঁহার ভৃত্য উভয়ের প্রতি অভিযোগ; আরও দুইজনকেও সাক্ষী মানিয়াছে; প্রথম, সুরেশচন্দ্রের বাড়ীর সম্মুখের মুদীর দোকানের মুদী ও তাঁহার ভবনস্থিত আশ্রিত দয়ালচাঁদ।

সাক্ষীর সপিলা পাইয়াই নবীনচন্দ্র মকদ্দমা মিটাইয়া দিবার জন্ত ব্যস্ত হইলেন। অনেকবার সেই দোকানদারের দোকানে হাঁটাইটি করিলেন। তাহাকে বুঝাইবার চেষ্টা করিলেন যে, সে যে প্রকার প্রবঞ্চনা করিয়াছিল ও তৎপরে ভদ্রলোকের সমক্ষে সুরেশচন্দ্রকে যে প্রকার অপমান করিয়াছিল, তাহাতে তাহার প্রতি ক্রোধের সঞ্চার হওয়াই স্বাভাবিক। অতএব সে নিজ কার্যের উপযুক্ত শাস্তিই পাইয়াছে। এ নালিশে অতি সামান্য দণ্ড হইবে, এবং সে যদি নিবৃত্ত না হয়, সুরেশচন্দ্র তাহার নামে প্রতারণার নালিশ আনিতে পারেন। এইরূপে সে ব্যক্তিকে ভয় ও মৈত্রী

উভয়ের দ্বারা নালিশ তুলিয়া লইবার জন্য অনেক প্রয়োচনা দিলেন ; সে কিছুতেই সম্মত হইল না। অবশেষে সুরেশচন্দ্রের নিকট উপস্থিত হইলেন। তিনি যেরূপ ভাবিয়াছিলেন, তাহাই দেখিলেন। সুরেশচন্দ্র মিটাইবার পক্ষ নন। অবশেষে মকদ্দমাহুলে কিরূপ করা হইবে, সেই কথা আরম্ভ হইল।

নবীন। আচ্ছা, মকদ্দমা না মেটাও, আদালতে উপস্থিত হ'য়ে সমুদায় কথা স্বীকার কর।

সুরেশ। হাঁ, তোর বুদ্ধিতে হাড়িকাঠে গলাটা বাড়িয়ে দি, দিয়ে সাজা পাই।

নবীন। স্বীকার করতে ভয় কি ? বড় জোর ৫৭ টাকা জরিমানা হবে ; ও বাক্তি প্রতারণা করেছে, অপমান করেছে, তা ত আদালত বুঝবে।

সুরেশ। হাঁ অপরাধ স্বীকার করে, জরিমানা দিয়ে, একটা দাগ নিয়ে বাহির হই।

নবীন। যে দিক দিয়েই যাওয়া যাক কিছু সাজা ত পেতেই হবে, আমাকে আর পঙ্খুকে ত সত্য কথা বলতেই হবে।

সুরেশ। তা বল্‌বি বৈকি ? সহোদর ভাইকে জেলে না পুরলে রিফর্মেশনটা ভাল করে হবে কেন ?

নবীন। দাদা, কঠিন কঠিন কথাগুলো বলো না। আমার ত আর চারা নেই।

সুরেশ। চারা থাক্‌বেনা কেন ? তোরা বল্‌বি, এসোছিল বটে, বকাবকিও হয়েছিল, কিন্তু মারামারি হয় নাই।

নবীন। সেটা ত সত্যি হবে না।

সুরেশ। আ মরি কি সত্যবাদী ঘুঁধাষ্টির গো ! মিথ্যে যেন আর



কোনও রকমে বলেন না। নিক্তির ওজনের সত্যি কি এ জগতে চলে ?

নবীন। না দাদা, তোমার পায়ে পড়ি, আমার দ্বারা সেটা হবে না ; আমি হলপানা মিথ্যে বলতে পারবো না ।

সুরেশ। আচ্ছা তবে তোরা দুজনে সাক্ষী দিতে যাস্নি ; ব্যায়রাম হয়েছে বলে একটা ডাক্তারের সার্টিফিকেট পাঠাস্ ।

নবীন। সেটাও ত মিথ্যে হবে ।

সুরেশ। তবে মরগে যা, তোদের যা ইচ্ছে করিস ; আমার যে সাজা হয় হবে ।

নবীন। তোমাকে বার বার বলছি স্বীকার করলে অতি সামান্য সাজাই হবে । আমি একজন ভাল উকীলকে জিজ্ঞাসা করেছি । তুমি ভয় পাচ্ছো কেন ? সামান্য একটা ভয়ের জন্তে ধম্মটা খোঁয়াবে কেন ?

সুরেশ। ( অতিশয় বিরক্ত ভাবে ) যা যা, আমার সুমুখ হতে উঠে যা ! ধর্মের ছালা ভুই বাঁধিস্, আমার অত ধর্মের দরকার নেই ।

নবীনচন্দ্র অতিশয় হুঃখিত অন্তরে চলিয়া গেলেন । নবদ্বার দিন যথাসময়ে পুলিশ আদালতে যাইতে হইল । গিয়া তিনি আবার মিটাইবার জন্ত উভয় পক্ষের উকীলদিগকে ধরিলেন । যখন অকৃতকার্য্য হইলেন, তখন যাহাতে জ্যেষ্ঠের সাজাটা লঘু হয়, তাঁহার উকীলদিগকে এমন পরামর্শ দিলেন ।

যথাসময়ে জ্যেষ্ঠের বিরুদ্ধে সাক্ষী দিতে হইল । দয়ালচাঁদ ও মুদী দুই জনকেই তাঁহার জ্যেষ্ঠ গড়িয়াছিলেন, সুতরাং তাহার মারপিটের কথা উড়াইয়া দিল । মুদী বলিল, “আমি রাস্তা হতে টানিয়া লইতে দেখি নাই ; আমার দোকান হইতে সুরেশ বাবুর উঠান দেখিতে পাওয়া যায় ; আমি দোকানে বসিয়া দেখেছি যে বাদী তাঁহার বাড়ীর উঠানে

দাঁড়াইয়া কি বকাবকি করছে, এই মাত্র।” দয়াল বলিয়াছে, “হাঁ আমি সেখানে ছিলাম। বাদী উক্ত দিবস বৈকালে সে বাড়ীতে আসিয়াছিল বটে এবং অনেক বকাবকি করিয়াছিল বটে। কৈ আমি কাহাকেও দ্বার বন্ধ করিতে দেখি নাই, এবং প্রহার করিতেও দেখি নাই। তবে সুরেশ বাবু মারবো খরবো এমন কথা বাবহার করেছিলেন বটে।”

এই দুইটা সাক্ষী মাত্র সম্মল হইলে, হয়ত মকদ্দমা ফাঁসিয়া যাইত, সুরেশচন্দ্রের কিছুই শাস্তি হইত না। নবীনচন্দ্র ও পঞ্চু যে সাক্ষী দিবার জন্ত উপস্থিত হইবেন, ও যদি উপস্থিত হন, সত্য সাক্ষী যে দিবেন, ইহা সুরেশচন্দ্র সম্ভব মনে করিতে পারেন নাই। কিন্তু উভয়ের সাক্ষী যখন লওয়া হইল, তখন প্রকৃত কথা সমুদায় প্রকাশ হইয়া পড়িল। নবীনচন্দ্রের কথাতে যাহা হয় নাই, তাহা আবার পঞ্চুর কথাতে হইল। সে ব্যক্তিকে যে সর্বপ্রথমে বাড়ীতে পুরিয়াই কাণে ধরিয়া ঘোড় দৌড় করান হইয়াছিল, তাহা নবীনচন্দ্র দেখেন নাই; কিন্তু পঞ্চু দেখিয়াছিলেন; তাহা তাঁহার উক্তির দ্বারা প্রমাণ হইয়া গেল।

প্রতিবাদীর নহোদর ভ্রাতা তাহার বিপক্ষে সাক্ষী দিতেছে, ইহাতে ম্যাজিষ্ট্রেটের মনে বিশ্বাস হইতে বাকি থাকিল না। যদিও সুরেশচন্দ্রের উকীল নবীনচন্দ্রকে স্বধর্ম্মত্যাগী, গৃহত্যাগী ও ভ্রাতার বিদ্বেষ্টা বলিয়া প্রতিপন্ন করিবার ও তাঁহার সাক্ষ্যের মূল্য হ্রাস করিবার জন্ত চেষ্টা করিতে ক্রটি করিলেন না, তথাপি ম্যাজিষ্ট্রেটের মনের বিশ্বাস কোনও মতে টলিল না। পরিশেষে সুরেশচন্দ্রের ২০৮ বিশ টাকা জরিমানা হইল।

বিশ টাকা যে কিছু অধিক, তাহা নহে, কিন্তু অপমানটা বড়ই লাগিল। তাঁহার আপীসের কর্ত্তা সাহেবেরা যখন এই কথা শুনিলেন, তখন সুরেশচন্দ্রের নিকট কৈফিয়ৎ চাহিলেন। তিনি কৈফিয়ৎ দিয়া তাঁহাদিগকে একপ্রকার সন্তুষ্ট করিলেন বটে, কিন্তু মনের মধ্যে একটা

ক্লেশ থাকিয়া গেল ; এবং মনে মনে নবীনের প্রতি অতিশয় ক্রুদ্ধ হইয়া রহিলেন ।

একদিন আপীস হইতে আসিয়া দেখেন, নবীনচন্দ্র তাঁহার গৃহিণীর সহিত কথা কহিতেছেন । অমনি কোপাবিষ্ট হইয়া বলিলেন, “নেমক-হারাম, বদমাশ, বকাখান্নিক, দূর হ ; আমার বাড়ী হতে বেরো ; আমার স্ত্রী পুত্রের সঙ্গে তোর সম্পর্ক কি রে ?”

নবীনচন্দ্র দেখিলেন, থাকিলে বা উত্তর করিলে কোপ বাড়িবে । অমনি আস্তে আস্তে চলিয়া গেলেন ।

তৎপরে ষতদিন তিনি সহরে ছিলেন, তাঁহার ভ্রাতৃজায়া তাঁহাকে লইবার জন্ত বার বার লোক পাঠাইতেন । চাকর ও দাসী আসিয়া বলত, “মা ঠাকুরণ কেবল কাঁদছেন, আপনি না গেলেই চলবে না ।” তিনি কি করেন, তাঁহার জ্যেষ্ঠের কোপের ভয়ে যাইতে পারেন না ; অথচ তাঁহারও প্রাণ ভ্রাতৃজায়াকে সাস্থনা করিবার জন্ত ব্যগ্র । অবশেষে সোদামিনীকে নিম্নলিখিত পত্র লিখিলেন :—

“বৌদিদি ! শুনিলাম দাদা আমাকে বাড়ী হইতে তাড়াইয়া দেওয়াতে তুমি প্রাণে বড় ক্লেশ পাইয়াছ, ও সর্বদা কাঁদিতেছে । তোমার এত ক্লেশ কেন ? দাদাতে কি ছোট ভাইকে গালি দেয় না ? আমার গলাটিপে ত কতবার বাড়ী থেকে তাড়িয়ে দিতে চেয়েছেন । দাদার রাগটা একটু পড়ুক, আবার দেখা সাক্ষাৎ হবে । এখন রাগের উপরে গেলে তোমারই যাতনা বাড়িবে । আমি বিদেশ যাত্রার পূর্বে তোমার সঙ্গে একবার দেখা করিবার চেষ্টা করিব । আর কিছু নয়, ভোনাকে যে সঙ্গে লইয়া যাইতাম, সেইটা হলো না । যাহা হউক, আমার একটা অনুরোধ তোমাকে রাখিতে হইবে । আমি গোপনে তোমার কাছে মাসে পনের টাকা করিয়া পাঠাইব, তাহা হইতে তুমি ভোনার হিন্দুকুলের মাহিনা ৫ পাঁচ

টাকা দিবে; এবং অবশিষ্ট দশ টাকা তোমার নিজের জন্ত, যাহা ইচ্ছা খরচ করিবে। বোদিদি! এ দশ টাকা অতি সামান্য, উল্লেখের যোগাই নয়। তোমার স্নেহের স্বর্ণ শুধিবার নয়। যদি দয়া করিয়া এই কয়টা টাকা নেও, আমার চাকুরী মিষ্ট হইবে। আমাকে পদধূলি দিও ও তাই বলিয়া আশীর্বাদ করিও।

তোমাদেরই

নবীন।”

এই পত্রের উত্তরে সৌদামিনী লিখিলেন, যে তিনি মাসে পনের টাকা করিয়া লইতে প্রস্তুত আছেন। নবীনচন্দ্রের বিদেশযাত্রার পূর্বে এই বন্দোবস্ত হইয়া রহিল।

## সপ্তদশ পরিচ্ছেদ

উক্ত ১৮৫৬ সালের ভাদ্র মাসে একদিন বেলা প্রায় ১২টা বাজিয়া গিয়াছে; শোভাবাজারের রাজবাড়ীর রাস্তাতে লোকসমাগম অনেক কম হইয়া পড়িয়াছে; দুই একজন দোকানদার ও বাবুর বাড়ীর দুই একটা চাকরাণী সেই বেলাতে গঙ্গাস্নান করিয়া ফিরিয়া আসিতেছে; দুই একজন ফেরিওয়ালাও মধ্যে মধ্যে ডাকিয়া যাইতেছে; এক পশলা বৃষ্টি হইয়া গিয়া এখনও টিপ টিপ করিয়া জল পড়িতেছে, এবং রাস্তার দুই ধারের নর্দমা দিয়া জল বহিতেছে; কোনও কোনও দোকানে দোকানদার আহার করিতে যাইবার জন্ত দোকানের ঝাঁপ তাড়া বন্ধ করিতেছে। এমন সময়ে, এত বেলাতে, ঐ রাস্তার পার্শ্বস্থ একটা ভবনে একজন বৃদ্ধ একটা ঘরে মাতুর পাতিয়া বসিয়া কি কাগজপত্র পরীক্ষা করিতেছেন। বাড়ীটা সেকেলের খরণের; বোধ হয়, ৫০।৬০ বৎসর পূর্বের নিৰ্ম্মিত হইয়া থাকিবে; এবং পনর কি বিশ বৎসরের মধ্যে যে তাহাতে হাত পড়ে নাই, তাহাতে আর সন্দেহ নাই। বাড়ীর বাহিরে রাজপথ হইতে দেখিলে বোধ হয়, সে বাটা প্রথমে যিনি নিৰ্ম্মাণ করিয়াছিলেন, তিনি কুচিশালী লোক ছিলেন; কারণ বাহিরের বারাণ্ডাটা বেশ সুন্দর করিয়া নিৰ্ম্মাণ করা হইয়াছিল। কিন্তু মেরামতের অভাবে সকলই কদাকার মূৰ্ত্তি ধারণ করিয়াছে। নীচের তালাতে লোণা ধরিয়া প্রায় ৪।৫ হাত পর্য্যন্ত বাগি চূণ খসিয়া পড়িয়াছে; লোণাধরা ইষ্টক সকল বাহির হইয়া রহিয়াছে; দারে প্রবেশ করিতেই দুই ধারের খিলানের অবস্থা একরূপ যে, দেখিলে বাস্তবিকই মনে শঙ্কার উদয় হয়। বাহির বাড়ীতে একটা পূজার দালান আছে, তাহারও থামগুলিতে লোণা ধরিয়া

ইষ্টক বাহির হইয়া পড়িয়াছে। তবে প্রতি বৎসর বাসন্তী পূজার সময়ে এক একবার করিয়া সেই ইষ্টকেরই উপরে চূণ বুলাইয়া দেওয়া হয় বলিয়া, তাহাদের আকৃতি তত চক্ষের পীড়াদায়ক নহে। বাহির বাড়ীর কোন ঘরের অবস্থা সন্তোষজনক নহে। প্রায় সকল ঘরেই স্থানে স্থানে বালিচূণ খসিয়া গিয়া কদাকার দেখাইতেছে ও কোনও কোনও ঘরের পিলান ফাটিয়া বৈশাখের ফুটীর ত্যায় হইয়াছে; কেবল গৌজা দিয়া কোনও প্রকারে রক্ষা করা হইতেছে। সর্বাপেক্ষা বড় ও বৈঠকখানা ঘর যেটী, সেটীর অবস্থা একটু ভাল, এত ফাটা চটা নয়। তাহাতে কতকগুলি ছবিও আছে; বোধ হয় পনের কি বিশ বৎসর তাহাতে কেহ হাত দেয় নাই; কোন ছবিটার কাচ ভাঙ্গিয়া গিয়াছে, কোনটীর নাক মুখ পোকাতে খাইয়াছে; দেখিলে বোধ হয় এই বাড়ীতে এক সময়ে কেহ একজন ছিলেন, তাঁহার একটু ঘর সাজাইবার সখ ছিল, তাঁহার পরলোক হইলে যাহারা আছে, তাহাদের আর সে সখ নাই। বাড়ীর অবস্থা দেখিলে অনুমান হয়, ইহার এক সময়ে সম্পন্ন গৃহস্থ ছিল, কালক্রমে দারিদ্র্যের মধ্যে পতিত হইয়াছে; কিন্তু গৃহস্থামীর মৃত্যু হওয়াতে বাড়ীটী বেওয়া বিধবাদিগের হস্তে পড়িয়াছে। কিন্তু বস্তুতঃ তাহা নহে। গৃহস্থামী এখনও বর্তমান, তাঁহার অবস্থাও মন্দ নহে; কিন্তু এ সকল দিকে তাঁহার দৃষ্টি নাই। বাড়ীর লোকে বা সমাগত বন্ধুবান্ধবগণ মধ্যে মধ্যে বাড়ীটা মেরামত করিবার আবশ্যকতা দেখাইয়া দিলে তিনি এক একবার সজাগ হইয়া উঠেন; রাজমিস্ত্রীদিগকে ডাকাইয়া আনেন, এবং সম্ভাবিত খরচের একটা আনুমানিক তালিকা প্রস্তুত করিতে বলেন, সেই তালিকা দেখিয়াই আবার নিরুৎসাহ হইয়া যান, বলেন, “ও এত খরচ! থাক্, হাতে টাকা আসিলে কিছুদিন পরে করা যাবে।” প্রায় দশ বৎসর অতীত

হইয়া গেল, টাকাও হাতে আসে না, “কিছুদিন পর”ও আর আসে না।

ঐ যে বৃদ্ধটী মাহুর পাতিয়া বসিয়া মনোযোগ সহকারে কাগজপত্র দেখিতেছেন, উনি এই বাড়ীর কর্তা, উহার নাম শ্রীযুক্ত হলধর বসু। উহার স্বর্গীয় পিতা ৬ রামনারায়ণ বসু কলিকাতাতে আসিয়া বাস করেন। তিনিই এই বাড়ী নির্মাণ করিয়াছিলেন। হলধর বসুর বয়স্ক্রম এখন ৭১।৭২ এর কম হইবে না। তিনি পাথুরিয়াঘাটার ঠাকুর বাবুদের বাড়ীতে মোক্তারী কর্ম করেন। ঐ কাজ বহুদিন করিয়া আসিতেছেন। এক্ষণে কাজ কর্ম বড় করিতে হয় না, বসিয়া মাসহারা পাইয়া থাকেন; এবং বড় বড় মকদ্দমা পড়িলে, এক আধ বার আদালতে যাইতে হয়, ও উকীলদিগকে পরামর্শাদি দিতে হয়। তবে বাবুদের বৈঠকখানাতে মধ্যে মধ্যে দেখা দিয়া আসিতে হয়। এক্ষণে তাঁহার প্রগান কাজ কোম্পানির কাগজের সুদের হিসাব রাখা ও তেজারতে যে টাকা খাটিতেছে, তাহার সুদ প্রভৃতি আদায় করা। এটা একটা প্রতিদিনের কাজ; সর্বদাই তাঁহাকে এজন্ত ব্যস্ত থাকিতে হয়; এবং কখনও কখনও ছোট আদালতে নালিশ করিবার জন্ত যাইতে হয়। বৃদ্ধটী আজ যেরূপ কাগজপত্র দেখিতেছেন, ঐরূপ কাগজপত্র প্রায় প্রত্যহই দেখিয়া থাকেন। ঐ চিন্তা ভিন্ন তাঁহার অন্য চিন্তা যে আছে, এরূপ বোধ হয় না। দেবতা ব্রাহ্মণে কোনও দিন বিশেষ ভক্তি জন্মিয়াছে কিনা সন্দেহ। বাল্যকালে পারসী, আরবী ও কাজ চালাইবার মত ইংরাজী শিখিয়াছিলেন; সেইমাত্র সম্বল; তাহাও মরিচা পড়িয়া গিয়াছে।

পাড়াতে মধ্যে মধ্যে কথকতা, পুরাণ পাঠ, রামায়ণ গান প্রভৃতি হইয়া থাকে, কিন্তু বৃদ্ধটী সেদিকে বড় একটা যাইতে চান না। তাহার দুইটা

কারণ আছে; প্রথম এ সকল বিষয়ে তিনি তৃপ্তি পান না, পেলেও এ সকলে তাঁহার মন বসে না; ‘মারীচ বধ’ গুনিতে গুনিতে কোম্পানির কাগজের স্তদ মনে পড়ে, বা ছোট আদালতের কোনও মকদ্দমার চিন্তা উদয় হয়। দ্বিতীয়তঃ—তিনি গিয়া বসিলেই লোকে আশা করে যে, তাঁহার যখন দুই পয়সা আছে, তখন তিনি নিশ্চয় কিছু দিবেন। লোকের মনের এই “নিশ্চয় কিছু দিবেনটা” তাঁহার অসহ্য বোধ হয়। এই কারণে এ সকল স্থানে যাইবার ভার তিনি গৃহিণীর উপরে দিয়াছেন। বাড়ীর পরিবারদিগের মধ্যে গৃহিণী, একটা বিধবা শালী ও একটা বিধবা কনিষ্ঠ ভ্রাতৃবধূ, এইমাত্র। স্থান দিলে আসিবার লোক অনেক আছে, কিন্তু থাইতে দিবার ভয়ে হলধর তাহাদিগকে আনিতে চান না। বৃদ্ধের আর কোনও সখ দেখা যায় না, কেবল সখের মধ্যে কতকগুলি বিড়াল পুষিয়াছেন।

বৃদ্ধের মধ্যম সহোদর গোপীমোহন বহু নিম্নক মহলে চাকুরী করিতেন। তিনি অধিকাংশ সময় হিজলী কাঁথির দিকে থাকিতেন এবং যে তিন শত টাকা বেতন পাইতেন, তিনি প্রাচীন রীতি অনুসারে আবশ্যক ব্যয় বাদে সমুদায় অর্থ জ্যেষ্ঠের নিকট পাঠাইতেন। তিনি একটু উদার-রুচি-সম্পন্ন ও ধর্ম্মভীরু লোক ছিলেন; এবং প্রায় পঁচিশ বৎসর পূর্বে একবার বাড়ী নেরামত করিয়াছিলেন। তৎপরে প্রায় ২০২২ বৎসর গত হইল, তাঁহার পরলোক হইয়াছে। ইহার মধ্যে এ বাড়ীতে হাত পড়ে নাই। গোপীমোহন মৃত্যুর সময়ে দুই পুত্র ও দুই কন্যা রাখিয়া যান। কন্যা দুইটী এখন পতিগৃহে, তাহার একটা বিধবা। পুত্র দুইটীর মধ্যে একজন সুরেশচন্দ্র বহু ও অপর জন নবীনচন্দ্র বহু। কি কারণে ইহাদিগকে এ বাড়ী পরিত্যাগ করিতে হইয়াছে, তাহা সকলে একপ্রকার অবগত আছেন; স্মরণ্য তাহার পুনরুক্তি নিম্নয়োজন।



সুরেশচন্দ্রের বয়স্ক্রম এখন ৩৩।৩৪ হইবে, তাঁহার চারি পাঁচটা পুত্রকন্যা।

যে দিনের কথা বলিতেছি, সেদিন বাড়ীর ভিতরের একটা ঘরে মাহুর পাতিয়া বসিয়া বৃদ্ধটী একমনে কি কাগজপত্র দেখিতেছেন। এমন সময়ে একটা চাকরাণী আসিয়া ডাকিল,—“কর্তা, গা তুলে আনুন, ভাত বাড়ি হয়েছে।” বৃদ্ধ অগ্রমনস্কভাবে একবার “হঁ” করিয়া উত্তর দিলেন, কিন্তু উঠিলেন না। কিয়ৎক্ষণ পরে এক গোরাক্ষী স্থলাকৃতি প্রবীণা আসিয়া বলিলেন,—“কি, খেতে দেতে হবে? না ভাতগুলো শুকিয়ে যাবে?” ঐ গোরাক্ষীর নাম রূপাময়ী, উনি ইঁহার গৃহিণী ও নবীনের রাজা মা।

বৃদ্ধ কাগজপত্র বাক্সে তুলিয়া উঠিলেন। তাঁহার আহারের স্থানে যাইবার পূর্বেই দুইটা বিড়াল তাঁহাকে ডাকিতে আসিয়াছিল। তিনি উত্তিবামাত্র তাহারা লান্সুল উর্দ্ধ করিয়া আনন্দধ্বনি করিতে করিতে আহার স্থানে চলিল। বৃদ্ধ খড়ম জোড়াটা পায়ে দিয়া খট্ খট্ শব্দে অগ্রসর হইলেন; বৃদ্ধটী কিছু অধিক শুষ্কাকৃতি! রূপণ হইলে কি মানুষ কিছু শুষ্কাকৃতি হইয়া থাকে? বলিতে পারি না;—মনে সাধারণতঃ এই একটা সংস্কার আছে যে, রূপণ ও হিংস্রকে লোক বেশ মোটাসোটা ও প্রসন্নাকৃতি হয় না। সে যাহা হোক, এ বৃদ্ধটী বড় শুষ্কাকৃতি, নীরস ও একহারা; বর্ণটা ঘোবনকালে কিরূপ ছিল বলা যায় না, বোধ হয় উজ্জল শ্রামবর্ণই ছিল; কিন্তু তাহা শুষ্কাকৃতিতে ভাল করিয়া ধরিতে পারা যাইতেছে না; কপালে অনেক চিন্তার রেখা; চক্ষু দুইটা বিষয় চিন্তা করিয়া করিয়া দৃষ্টি বরাটক-কল্প; পরিধানে একখানি আটহাতি ধুতি। লোকের মুখে শুনি, মধ্য বয়সে তিনি নাকি বাড়ীতে থাকিবার সময় এত ছোট কাপড় পরিতেন যে কাছা দিতে কুলাইত না। লোকে

জিজ্ঞাসা করিলে বলিতেন,—“ওহে বাপু, ঘরের ভিতরে আছি, কে দেখতে আসচে? দুখানা কাছাতে একখানা গামছা হয় তা জান?” এই কারণে সহরের কোন সুরসিক ব্যক্তি এক নূতন নামতা প্রস্তুত করেন, যথা—“কাছাকে কাছা, কাছা দ্বিগুণে গামছা, তিন কাছায় পৌনে ধুতি, চার কাছায় ধুতি!” যাহা হোক বসুজ মহাশয়ের সেদিন এখন নাই, অবস্থার উন্নতি হওয়াতে এখন কাছা দিয়া থাকেন।

বৃদ্ধ আসিয়া আহার করিতে বসিলেন, অমনি চারি পাঁচটা বিড়াল মেও মেও করিয়া ঘর মাথায় করিয়া তুলিল। বৃদ্ধ অগ্রে তাহাদিগকে অন্ন দিলেন, তৎপরে ভোজনে প্রবৃত্ত হইলেন। গৃহিণী দ্বারের কপাটে পৃষ্ঠ দিয়া দণ্ডায়মান। কিয়ৎক্ষণ আহারের পর বৃদ্ধ বলিলেন,—“ওগো ব্যেস ত অনেক হলো, কোন দিন কি হয় তার ঠিক নেই, একটা কথা ভাব্ছি। তুমি কি বল?”

গৃহিণী। কি কথা?

বসুজ। একটা পোষ্যপুত্র নিলে হয় না?

গৃহিণী। অভাগ্যি পোড়া কপাল! সোনার চাঁদ ছেলে ঘরেই রয়েছে, তা থাকতে পুষ্টিপুত্র নিতে যাব কেন? সোনা বাইরে আঁচলে গিরে! যাদের ধন, যারা থাকে, নেবে, দেবে, তারা রৈল বাইরে, আর একটা কলমের চারা এনে বসাতে হবে। না, না, ও সব হবে না।

বসুজ। (কিঞ্চিৎ বিরক্তির সহিত) ঐ দোষেই ত তোমার সঙ্গে আমার কোনও পরামর্শ হয় না।

গৃহিণী। আর মাথা মুণ্ডু পরামর্শ কি হবে?

বসুজ। আমি ত তোমার ভালর জন্তেই বলছি, আমার ত সময় হয়ে এসেছে, তোমাকে এখনও কিছুদিন থাকতে হবে, আমি চক্ষু মুদলে তোমায় দেখবে কে?

গৃহিণী। তুমি আপনার চরকায় তেল দেও ; আমার ভাবনা আর তোমাকে ভাবতে হবে না। কেন আমার ভয়েরা কি আমায় এক-মুঠো খেতে দেবে না ? আর তারাই যদি না দেয়, বেঁচে থাক, আমার সোনার চাঁদেরা ; তারা কি আমায় ফেলতে পারবে।

বসুজ। ( বিকৃত মুগ্ধভঙ্গী করিয়া ) হাঁ সোনার চাঁদেরা তোমায় দেখবে ? একটা ত মাতাল, গোঁয়ার, কাণ্ডাকাণ্ড-জ্ঞানহীন, আর একটা ত খ্রীষ্টান, তারা তোমায় দেখবে বৈ কি ? গাছে কাঁঠাল গোঁপে তেল ! উনি সোনার চাঁদেরের আশা ধরে বসে আছেন !

গৃহিণী। তারা ত আর তোমার মত অধুশ্নে নয়, তারা দেখবে না কেন ?

বসুজ। ( অতিশয় ক্রুদ্ধভাবে ) মিছে বকোনা বলছি, কথায় কথায় শব্দ কথাগুলো বগো, লজ্জা করে না।

গৃহিণী। লজ্জা কি, ঠিক কথাই ত ; তুমি অধুশ্নে নও ? সেদিন বড় ছেলেটাকে তাড়িয়ে দিলে, বললে তোর বাপ কিছু রেখে যায় নি ; আমি কি ঘরের কথা জানিনি, তার বাপ কিছু রেখে যায় নি ? তার পর ছোট ছেলেটাকে গলা টিপে বার করে দিলে, যেন সে এ বাড়ীর কেউ নয়। কেন তারা কি বানের জলে ভেসে এসেছে ? আজ যদি তারা তোমার নামে নালিশ করে, তাহলে কোথায় থাক ? এ বাড়ীর ভাগ দিতে হয় না ?

বসুজ। আমি কি বলছি, বাড়ীর ভাগ দেব না ?

গৃহিণী। পেয়াদার দেওয়াবে, দায়ে পড়ে দেবে ?

বসুজ। ( অতিশয় ক্রুদ্ধভাবে ) মেয়ে মানুষের বুদ্ধি আর কত হবে ?

গৃহিণী। জন্ম জন্ম যেন মেয়ে মানুষ থাকি, আর এই বুদ্ধিই থাকে।

তোমার ও বুদ্ধির গলায় দড়ি ! যে বুদ্ধিতে পরকে প্রবঞ্চনা করে, তার মুখে আগুন ।

বসুজ । ( অতি ক্রুদ্ধস্বরে ) তবে উইল করে টাকাগুলো আমি পথের লোককে দিয়ে যাব, তোমাকে পথে বসাব ।

গৃহিণী । হুঃ বড় ভয় ! পথের লোককে দেবে কেন, টাকাগুলো ভাঙ্গিয়ে গিনির মালা কর, তাই গলায় দিয়ে তোমাকে চিতের তুলে দেওয়া যাবে । নিজে পর আর ওই বেরালগুলোকে এক এক ছড়া পরিয়ে দেও, তা হলেই তোমার পরকালের কাজ হবে ।

বসুজ । তুমি যে বড় বাড়ালে দেখছি ।

গৃহিণী । বাড়ান আবার কি ? উচিত কথা বললেই গায়ে তপ্ত জলের ছড়া দেয় । তিন কাল গিয়ে এক কালে ঠেক্‌লো, এখনও পর-প্রবঞ্চনার বুদ্ধি গেল না ! না হয় দুদণ্ড বসে ঠাকুর দেবতার নাম কর, পাড়াতে কথা হয়, পাঠ হয়, না হয় দুদিন গুণতে যাও, নিজেদের সম্মান ভাগ্য নেই, ভাইপো, ভাইবীদের এনে না হয় দুদিন আমোদ আহ্লাদ কর, তার কিছুই নেই, কেবল বাক্স আর কাগজ, কাগজ আর বাক্স । আর দুদিন পরেই ত সব ফেলে যেতে হবে ।

কি জানি কেন গৃহিণীর এই শেষ উক্তির পরেই বসুজ মহাশয় আর কথা কহিলেন না ; অতি গম্ভীরভাবে আহার করিতে লাগিলেন । গৃহিণী স্থানান্তরে চলিয়া গেলেন ।

বসুজ মহাশয় ও তাঁহার গৃহিণীর এই কলহের কিছুদিন পরে, আশ্বিন মাসের প্রথম ভাগে, এক দিবস “হিতৈষী” পত্রিকার আপীসে নবরত্ন সভার অধিবেশন হইতেছে । আজ পূর্ণসংখ্যক সভা উপস্থিত । নবীন সহর পরিত্যাগ করিবার অভিপ্রায় জ্ঞাপন করার পর সভ্যদিগের মধ্যে তাহা লইয়া অনেক আলোচনা হইতেছে । বে নবীন বলিয়াছিল

তাহার জীবনের অল্প উদ্দেশ্য নাই, দুই বেলা দুইটা আহার করিবার মত সংস্থান হইলেই, সে সহরে পড়িয়া থাকিবে, ও প্রিয় নবরত্ন সভার উন্নতি সাধনে সমুদায় শক্তি নিয়োগ করিবে, যে নবীন বিত্তা, বুদ্ধি, সুপারিস প্রভৃতি সত্ত্বেও সামান্য একটা ৫০ টাকার শিক্ষকতা লইয়া সহরে পড়িয়া রহিয়াছিল, বড় বড় চাকুরীর সুবিধা পাইয়াও এক দিনের নিমিত্ত সহর ছাড়িবার ইচ্ছা করে নাই, সে নবীন কেন আজ সহর ছাড়িতে চায়? তবে কি আমাদের প্রতি নিরাশ হইয়া গেল? আমাদের দ্বারা কিছু হইবে না কি মনে করিল? অথবা উহার মনে আরো কোন ক্লেশের কারণ উপস্থিত হইয়াছে? এইরূপ নানা প্রকার আলোচনার পর সকলে স্থির করিয়াছেন যে অদ্যকার সভাতে সকলে উপস্থিত হইয়া নবীনকে ভাস্কিয়া বলিবার জন্ত অনুরোধ করিবেন। এতদ্ভিন্ন নবীনচন্দ্রও সহর পরিত্যাগের পূর্বে সভার কার্যের বন্দোবস্ত করিবেন বলিয়া, সকলকে বিশেষ ভাবে ডাকিয়াছেন; সেইজন্ত আজ সকলেই সমবেত। যথাসময়ে সভার কার্য আরম্ভ হইল। প্রথমে “হিতৈষী” পত্রিকার কথা উপস্থিত হইল। নবীনচন্দ্র বলিলেন, সুরেনকে উহার সম্পাদক করা যাউক; এবং ব্রজরাজ সরকারী সম্পাদকই থাকুন।

সুরেন। কে সম্পাদক হবে সে কথা এখন থাক। নবীন, আমরা ভেবে কিছু ঠিক কর্তেই পারছি না, তুমি সহর ছেড়ে যাচ্চো কেন?

নবীন। তোমরা কি মনে কর বিশেষ কারণ না থাকলে আমি সহর ছেড়ে যাচ্ছি?

পঞ্চ। সে কারণটা কি? আমাদের উপর কি নিরাশ হয়ে গিয়েছে?

নবীন। না, না, সেকি কথা! আমি যে কারণে সহর ছাড়ছি, তা সব তোমাদের কাছে বলবার যো নাই, নতুবা বলতাম; কিন্তু তার সঙ্গে

আমাদের সভার কোনও সম্পর্ক নাই। তোমাদের প্রতি নিরাশ হওয়া দূরে থাক্ আমাদের সভার কার্যকারিতা বিষয়ে আমার বিশ্বাস কখনও এমন প্রবল হয় নাই। আমি কিছু দিনের জন্ত দূরে থাক্লেও তোমাদের সঙ্গেই আছি। আশা করি, অল্প দিন পরে আবার আমাকে কার্যক্ষেত্রে দেখতে পাবে।

ব্রজরাজ। আর কিছু নয়, আমার ভয় হয় তোমার অনুপস্থিতিকালে পাছে সভাটা ম্লান হয়ে পড়ে।

নবীন। সে কি, তোমরা কিছুদিন কাজটা চালাতে পার্বে না? আমার ত আশা হয়, তাতে ভালই হবে। সকলের উৎসাহ আরও বাড়বে।

সুরেন। এতদিন পরে সভাটার কাজ আরম্ভ হয়েছে, এমন সময়ে তোমার না গেলে ভাল হত :

নবীন। আমি কর্তব্যজ্ঞানের দ্বারা বাধ্য হয়ে কিছু দিনের জন্ত দূরে যাচ্ছি। ঈশ্বর যদি করেন, বোধ হয় অধিক দিন দূরে থাকতে হবে না।

সকলেই নিরুত্তর। নবীনের অনুপস্থিতিকালে কিরূপে কার্য চলবে, সেই কথোপকথন আরম্ভ হইল। সুরেন্দ্রলাল গুপ্ত হিতৈষী সম্পাদক ও ব্রজরাজ সহকারী সম্পাদক নিযুক্ত হইলেন। পঞ্চু একজন প্রধান লেখক হইলেন। মথুরেশের উপর ম্যানেজারের ভার অর্পিত থাকিল। তৎপরে সভার অগ্রাগ্র কথা আরম্ভ হইল। স্থির হইল য, নবীন সহর ত্যাগ করিলেও সভাপতি থাকিবেন; এবং চিঠি পত্র দ্বারা তাঁহার পরামর্শ লওয়া হইবে। তত্ত্বিন্ন প্রতি বৎসর পূজার অব্যবহিত পরেই একবার সভার বার্ষিক অধিবেশন হইবে; তাহাতে নবীনচন্দ্র উপস্থিত থাকিবেন; এবং অপরাপর সভ্যগণও উপস্থিত থাকিবার জন্ত বিশেষ চেষ্টা করিবেন।

এইরূপ কথা হইতেছে এমন সময় একজন ভৃত্য একখানি পত্র আনিয়া নবীনের হস্তে দিল। নবীন খুলিয়া পাঠ করিতে লাগিলেন। পড়িতে পড়িতে তাহার মুখ চিন্তাভারে পূর্ণ হইতে লাগিল। সকলেই ব্যস্ত সমস্ত হইয়া জিজ্ঞাসা করিলেন, কি, ব্যাপারটা কি? নবীন বলিলেন, “আমার জেঠা মহাশয়ের শত্রু পীড়া হয়েছে; আমাকে এখনি যেতে হবে। রাস্তা মা একজন পাড়ার লোকের দ্বারা পত্র লিখাইয়াছেন; আমি চললাম।” এই বলিয়া ব্যস্ত সমস্ত হইয়া বাহির হইয়া গেলেন।

নবীন বাড়ীতে গিয়া দেখেন, বসুজ মহাশয় চারি পাঁচদিন হইতে জ্বররোগে আক্রান্ত হইয়া ক্লেশ পাইতেছেন। পূর্বাধিন হইতে পীড়া বৃদ্ধি পাইয়াছে; দেখিবার কেহ নাই; কাজ করিবার কেহ নাই। গৃহিণী দুই একজনকে খবর দিয়াছিলেন, তাঁহাদের কেহই আসেন নাই। একজন প্রতিবেশীকে ডাকিয়া অনেক করিয়া বলাতে তিনি একবার ডাক্তার ডাকিয়া দিয়াছেন; ও চিঠিখানি লিখিয়া দিয়াছেন; তৎপরে তাঁহার আর দেখা নাই। দুই তিন দিন খাটিয়া বিধবা শালিটী একটা কাজের ছল করিয়া তাঁহার ভ্রাতার বাড়ীতে গিয়াছেন। বাড়ীতে কেবল দুইটী স্ত্রীলোক ও একটা দাসী আছে। নবীনেরা এবাড়ীতে থাকিতে একটা চাকর ছিল; বসুজ মহাশয়ের রূপণতার জন্ত তাহাকেও ছাড়াইয়া দেওয়া হইয়াছে। ডাক্তারখানা হইতে ঔষধটা আনিবে এমন লোক নাই, চাকরাণী কোনও প্রকারে ঔষধটা আনিয়াছে। কিন্তু হিসাব করিয়া খাওয়ায় কে? ভাগ্যে ডাক্তারখানা হইতে শিশির গায়ে দাগ করিয়া দিয়াছিল, তাহা দেখিয়া গৃহিণী দুই একবার খাওয়াইয়াছেন। এমন সময়ে নবীনচন্দ্র গিয়া উপস্থিত! প্রথমে তিনি বসুজ মহাশয়ের ঘরে যাইতে সাহস

করিলেন না ; বাহিরে অপেক্ষা করিতে লাগিলেন । তাঁহার আগমন-বার্তা পাইয়াই গৃহিণীর দেহে প্রাণ আসিল ! তিনি অন্ধকার দেখিতে-ছিলেন, যেন অকূল সমুদ্রে কূল পাইলেন । নবীনের নিকটে গিয়া কাঁদিয়া ফেলিলেন ; তাঁহার দাড়িতে হাত দিয়া কত স্নেহের কথা বলিলেন ; এবং তিনি রোগা হইয়াছেন বলিয়া অশ্রুপাত করিতে লাগিলেন ; কিন্তু নবীন আর বিবশ করিতে পারিতেছেন না । বসুজ মহাশয়ের ঘরে যাইবার জ্ঞান অনুমতি চাহিয়া পাঠাইলেন । গৃহিণী গিয়া বসুজ মহাশয়ের মুখের নিকট অবনত হইয়া জিজ্ঞাসা করিলেন, “নবীন তোমাকে দেখতে এসেছে, আর কেউত দেখবার নেই ; সে আসবে কি ? আর কেউ যে দেখবার নেই, তাহা এত বৃদ্ধ কয়দিনে বিলক্ষণ অনুভব করিয়াছেন, স্ততরাং অধিক অনুরোধ করিতে হইল না, প্রার্থনা মাত্র অনুমতি দিলেন ।

নবীন বসুজ মহাশয়ের ঘরে গিয়া, তাঁহার মুখের নিকট অবনত হইয়া বলিলেন, “জ্যেষ্ঠা মহাশয় ! আমি এসেছি, কি কষ্ট হচ্ছে, আমাকে বলুন ।”

বসুজ মহাশয় অভ্যর্থনাসূচক দৃষ্টির দ্বারা নবীনকে বসিতে বলিয়া ক্ষীণস্বরে বলিলেন, “একটু জল ।” নবীন জল দিলেন ; ও পাখাখানি লইয়া মস্তকে অল্পে অল্পে বাতাস করিতে লাগিলেন । তিনি অর্ধ ঘণ্টা না বসিতে বসিতে বাহির বাড়ীতে ব্রজরাজ, পঞ্চু, ও সুরেন গুপ্ত প্রভৃতি আসিয়া উপস্থিত ; যদি কোন সাহায্যের প্রয়োজন হয় । নবীনের আর মানুষের অপ্রভুল রহিল না । পঞ্চু ও সুরেন গুপ্ত সে রাত্রি বাহির বাড়ীতেই রহিলেন, নবীন ও রাজা মা রোগীর নিকট রাত্রি জাগরণ করিলেন । পরদিন প্রাতে পঞ্চু একজন ভাল ডাক্তার ডাকিয়া আনিলেন । ডাক্তার বাবু বলিলেন, “পীড়া সঙ্কট নহে, কিন্তু আরোগ্য লাভ করিতে কিছু



বিলম্ব হইবে; চিন্তিত হইবার বিশেষ কারণ নাই।” চিকিৎসকের বাক্যে নবীনচন্দ্র অনেকটা আশ্বস্ত হইলেন। দিন রাত্রি রোগীর শুশ্রূষা চলিল। এই কারণে তাঁহাকে স্থল হইতে কয়েক দিনের ছুটি লইতে হইল। তৎপরে তিনি, পঞ্চ, গোবিন্দ ও সুরেন গুপ্ত চারিজনে পাণী করিয়া স্থলের কাজ ও রোগীর সেবা দুইই চালাইতে লাগিলেন। এই উপলক্ষে পঞ্চ, গোবিন্দ ও সুরেনের সহিত বসুজ মহাশয় ও তাঁহার গৃহিনীর পরিচয় হইয়া গেল। ক্রম বসুজ মহাশয় আরোগ্যলাভ করিতে লাগিলেন।

মানুষের মন কি বিচিত্র! যাহাকে কিছুতেই নরম করিতে পারে না, তাহাকে অনেক সময়ে রোগে নরম করে। এই রোগ-শয্যায় শয়ন করিয়া বৃদ্ধ হলধর বসু অনুভব করিয়াছেন যে তিনি যমের দ্বার হইতে ফিরিয়া আসিলেন। যখন পরকালের ছায়া তাঁহার উপরে পড়িতেছিল, তখন তিনি জগৎকালের জ্ঞাত বিষয়ের অনিত্যতা অনুভব করিতে সমর্থ হইয়াছিলেন। তাঁহার মৃত্যুর পরে তাঁহার সে বিষয় কে ভোগ করিবে, তাঁহার কোম্পানির কাগজের সুদ কে আদায় করিবে, কে তাঁহার বিষয়ের জ্ঞাত ছোট আদালত আর ঘর করিবে? এই সকল চিন্তা অতি প্রবল ভাবেই কয়েকবার তাঁহার মনে উদয় হইয়াছে। যতবারই এই সকল প্রশ্ন আসিয়াছে, ততবারই যেন চক্ষে অন্ধকার দেখিয়াছেন; এবং এক একবার তাঁহার আশার ষ্টি ঐ পার্শ্বস্থিত ভ্রাতৃপুত্রের উপরে পড়িয়াছে, যে ব্যক্তি পুত্রের অধিক একাগ্রতার সহিত তাঁহার সেবা করিতেছে। রোগ-যাতনার মধ্যে তিনি এক একবার নবীনকে উইল করিবার কথা বলিয়াছেন, কিন্তু নবীন সে কথা উড়াইয়া দিয়াছেন; বলিয়াছেন, “এ ব্যারাম শীঘ্র সারিয়া যাইবে, ওসব কথা এখন থাক।” এমন যে কঠিন বৃদ্ধ, এমন যে শুষ্কাকৃতি ও শুষ্কহৃদয় বৃদ্ধ, তিনিও নবীনের শুশ্রূষাতে সন্তুষ্ট হইয়া কৃতজ্ঞতা প্রকাশ না করিয়া থাকিতে পারেন

নাই। কয়েকবার বলিয়াছেন—“ভাগ্যে তুমি ও তোমার বন্ধুরা ছিলে, তাই এ যাত্রা রক্ষা পেলাম, তুমি আমার কাছ আর ছেড় না।” এই সকল কথাতে নবীনচন্দ্রের চক্ষে জল আসিয়াছে ; কিন্তু তিনি সে অশ্রু নিবারণ করিয়া রাখিয়াছেন।

বল্লভ মহাশয় রোগমুক্ত হইতে না হইতে পূজা অতীত হইয়া গেল। পূজার পরেই পূর্বোক্ত সঙ্কল্পানুসারে নবরত্ন সভার সাপ্তাহিক প্রথম অধিবেশন উপস্থিত। সভাগণ সকলে সমবেত হইলে, নবীনচন্দ্র যথা-সময়ে সভাপতির আসন পরিগ্রহ করিয়া পঞ্চকে একটা সঙ্গীত করিতে অনুরোধ করিলেন। সঙ্গীত শেষ হইলে নিজেই নিম্নলিখিত মর্মে প্রার্থনা করিলেন,—“হে করুণাময় বিধাতা, এত বৎসর একত্রে বাস করিয়া আমরা তোমার যে অপার করুণা সন্তোষ করিয়াছি, সেজন্ত তোমাকে অগণ্য ধন্যবাদ করি। আমাদের বিচ্ছেদের দিন সম্মুখে আসিতেছে। প্রাণ বিধাদে ম্লান হইতেছে ; তোমার চরণে এই প্রার্থনা জানাইতেছি যে, এই বিচ্ছেদকালে যেন আমরা তোমারই করুণাকে আশ্রয় করিয়া থাকিতে পারি ; এবং সর্বদা সর্বত্র আমাদের নিঃস্বার্থ জীবনের দ্বারা যেন তোমার পূজা করিতে পারি।” নবীনকে কেহ কখনও মুখ ফুটিয়া প্রার্থনা করিতে শুনে নাই ; সহস্র অনুরোধ করিলেও তিনি তাহা করিতেন না। কেমন এক প্রকার লজ্জা হইত। আজ এই কয়েকটা কথা বলিতে অশ্রুতে মুখ ভাসিয়া যাইতে লাগিল, ও ভাবাবেশে কথা রোধ হইয়া আসিল ; আর অধিক বলিতে পারিলেন না। তাঁহার এই ভাব দর্শনে সে ক্ষেত্রে এক অপূর্ব ভাবের উদয় হইল। উপস্থিত সভাগণের অনেকেই কাঁদিতে লাগিলেন। পঞ্চ ভাবে বিভোর হইয়া আবার গান করিলেন ও নিজে প্রার্থনা করিতে লাগিলেন। সকলেই অশ্রুভব করিলেন নবরত্ন সভার প্রতিষ্ঠা অবধি এমন দিন কখনও আসে নাই।

ক্রমে সকলে একটু শান্তভাব ধারণ করিলে, সভার ভবিষ্যৎ কার্যাদির বিষয়ে কথোপকথন আরম্ভ হইল। এমন সময়ে সুরেন্দ্রলাল গুপ্ত আসিয়া উপস্থিত। নবীন পূর্বাবধিই “সুরেন এলো না কেন?” বলিয়া বারবার জিজ্ঞাসা করিতেছিলেন, সকলেই বলিতেছিলেন তার একটু বিলম্ব হবে। সুরেন যখন আসিলেন তখন নবীন তাহার বিলম্বের কারণ বুঝিতে পারিলেন। অঙ্ককার সভাতে নবীনচন্দ্রকে কিছু প্রীতির উপহার দেওয়া হইবে, সুরেন সেই যোগাড় করিতে গিয়াছিলেন। তিনি তাহা লইয়া উপস্থিত। একটা চমৎকার বাক্স আনিয়াছেন, বাহা দেখিলে উপরে একখানি পুস্তক বলিয়া বোধ হয়, অথচ তাহার মধ্যে দোয়াত, কলম, চিঠির কাগজ টাকা পয়সা প্রভৃতি সমুদায় রাখিবার বন্দোবস্ত আছে ও একটা সোণার বড়ি আছে। এ মূল্যবান বস্তুটির মূল্য এই যুবকদের সকলে সানন্দে দিয়াছে। সুরেন বাক্সটী লইয়া নবীনচন্দ্রের নিকটস্থ হইগে তিনি আসন হইতে উঠিয়া দাঁড়াইলেন ও হস্ত দ্বারা নিজের মুখ আবরণ করিয়া কাদিতে লাগিলেন। সভারা সকলে দণ্ডায়মান। সুরেন সকলের মুখপাত্রস্বরূপ নবীনের করে ধরিয়া বলিতে লাগিলেন, “প্রাণের ভাই! তোমার গুণ আমরা ভুলিতে পারিব না; তুমি আমাদের যে উপকার করিয়াছ, তাহার প্রতিশোধ জন্মেও হইবে না; আমরা তোমাকে এমন কিছুই দিতে পারি না, বাহা তোমার গুণের উপযুক্ত হয়; তথাপি এই সামান্য উপহার গ্রহণ কর। এইটী যখন ব্যবহার করিবে, তখন আমাদের কথা স্মরণ করিও।” সকলে চারিদিকে কাদিয়া উঠিলেন, এবং নবীনচন্দ্রও ভাবাবেগে কাঁপিতে লাগিলেন।

একদিকে নবীনচন্দ্র তাঁহার বন্ধুদিগের হস্ত হইতে প্রীতির উপহার প্রাপ্ত হইলেন; অপর দিকে তাঁহার জ্যেষ্ঠতাত মহাশয় একটু স্নহ হইয়াই একদিন তাঁহাকে ডাকিয়া পাঠাইলেন। তিনি খেলে বলিলেন,

“সুরেশকে সঙ্গে করিয়া সন্ধ্যার সময়ে একবার এস, একটু বিশেষ কাজ আছে।” নবীনচন্দ্র রাজা মার মুখে শুনিয়া গেলেন, যে, বৃদ্ধ তাঁহাদের পিতার গচ্ছিত সমুদায় ধন তাঁহাদিগকে অর্পণ করিবেন, এরূপ সংকল্প করিয়াছেন। বসুজ মহাশয়ের পীড়ার সময় নবীনচন্দ্র দুই দিন দীর্ঘ জ্যেষ্ঠ সহোদরকে ডাকিতে গিয়াছিলেন, তিনি তখন আসেন নাই, কিন্তু যখন শুনিলেন যে টাকা কড়ি বুঝাইয়া দিবেন, তখন আর আপত্তি রহিল না। তাঁহারা উভয়ে সায়ংকালে উপস্থিত হইলে, বৃদ্ধ বলিলেন, “তোমাদের পিতার গচ্ছিত স্মদে আসলে প্রায় ২২ বাইশ হাজার টাকা আমার নিকট আছে। আমি ক্রোধ করিয়া তাহা তোমাদিগকে জানিতে দিই নাই; কিন্তু আমার বঞ্চিত করিবার অভিপ্রায় ছিল না। সেই টাকা ১ হাজার করিয়া দুই ভাইয়ে গ্রহণ কর; আর আমি এই বাড়ীর দাম ১৬ বোল হাজার ধরিয়াছি, সেই ছায়া দাম। আমার অংশের ৮ হাজার বাদে তোমাদের দুই ভাইকে আট হাজার দিতেছি। বাড়ীটা আপাততঃ আমারই থাক। কারণ, আমাদের এত বিষয়ে মতান্তর ঘটেছে যে, এক বাড়ীতে বনিবনাও হওয়া সম্ভব নয়; আর বাড়ীটা প্রাচীর দিয়া ভাগাভাগি করলেও একেবারে বাসের অবোধ্য হয়ে যাবে। অতএব একজনের হাতে থাকাই ভাল।” এই প্রস্তাবে উভয় ভ্রাতা সন্মতি প্রকাশ করিলেন।

তৎপরে একটা দিন স্থির হইল, যে দিন লেখা পড়া করিয়া টাকা দেওয়া হইবে। নবীন বলিলেন, “জেঠা মহাশয়, আমি এখন সহরের বাহিরে চাকুরী লইয়া যাইতেছি; আমার টাকার প্রয়োজন নাই, আমার টাকা আপনার নিকটেই থাক; ঐ টাকার স্মদ মাসে মাসে রাজা থাকে দেবেন, তিনি দান ধ্যান করবেন।” বৃদ্ধ তথাপি টাকাগুলি লইবার দ্রুত অনেক অনুরোধ করিলেন, নবীন লইতে স্বীকৃত হইলেন না।

এদিকে পুজার পরেই নবীন ফরিদপুর জেলা স্কুলের দ্বিতীয় শিক্ষকের  
কর্ম্য পাইলেন। ঐ পদের বেতন ৭৫ টাকা। এই কর্ম্য পাইয়া তিনি  
রাজা মা, ভাতৃজায়া, ব্রজরাজের মাতা প্রভৃতির নিকট বিদায় লইয়া ও  
পক্ষকে নিজের কাজটা যোগাড় করিয়া দিয়া, আপাততঃ কিছু কালের  
জন্ত ফরিদপুর যাত্রা করিলেন।

---

## অষ্টাদশ পরিচ্ছেদ

১৮৫৬ সালের মাঘ মাসেই বিদ্যাবাসিনীর বিবাহ উপস্থিত ১৮৫২ সালে স্বীয় জননীর সঙ্গে সে যখন নশিপুরে মাতামহালয়ে যায়, তখন তাহার বয়স ৭ বৎসর অতিক্রম করিতে চলিল। শাস্ত্রানুসারে ও দেশাচারানুসারে সে অরক্ষণীয়া হইয়াছে। এতদিন যে তাহার বিবাহ হয় নাই, সে কেবল বিজয়ার জন্তই! এক বৎসরের অধিককাল হইতে শিবচন্দ্র বিজয়ারত্ন ও বিশ্বনাথ তর্কভূষণ মহাশয় ত্বরাদিতেছেন। বিজয়া কেবল এই কথা বলিতেছেন,—“থাক্ যতদিন বিবাহ না হয়ে যায় থাক্ —বিবাহ হইলেই ত ওর পড়াশুনা সব বন্ধ হবে।” তর্কভূষণ মহাশয় এই কথা শুনিয়া বিশেষ পীড়াপীড়ি করেন নাই। কিন্তু মেয়ে বার বৎসরে পা দিতে যায়, আর কেহই স্থির থাকিতে পারিতেছেন না। বিগত পূজার সময়ে পাত্র দেখিয়া শীঘ্র বিবাহ দেওয়া একপ্রকার স্থির হইয়া গিয়াছে। পাকাপাকিরূপে বিবাহের প্রস্তাব উঠিলেই বিজয়া তাঁহার মনোগত ভাব ব্যক্ত করিতে ক্রটি করেন নাই। তিনি বলিয়াছেন, যদি বিবাহ দিতেই হয় তবে গোবিন্দের সঙ্গে বিবাহ দিলে ভাল হয়। গোবিন্দের স্বভাব চরিত্র তিনি উত্তমরূপে জানেন। সে যদিও দরিদ্রের সন্তান, তথাপি সে যেরূপ মনোযোগ দিয়া লেখা পড়া শিখিতেছে, তাহাতে যে ত্বরায় আপনার অবস্থার বিশেষ উন্নতি করিবে, সে বিষয়ে সন্দেহ নাই। এই প্রস্তাবে শিবচন্দ্র হাড়ে জলিয়া গিয়াছেন। যে ব্যক্তিকে তিনি বাসা হইতে তাড়াইয়া দিয়াছেন, যাহাকে দেখিলে তাহার বিরাক্তর উদয় হয়, তাহাকে কহা সম্প্রদান! ইহা হইতেই পারে না। তিনি বিজয়ার প্রস্তাব ও তত্পরি নিজের আপত্তি জানাইয়া নশিপুরে

তর্কভূষণ মহাশয়কে পত্র লেখেন। অপর সকল আপত্তির প্রতি তর্কভূষণ মহাশয় বিশেষ মনোযোগ করেন নাই; তাঁহার মনে সর্বপ্রধান আপত্তি এই, গোবিন্দের পিতা রামনিধি চাটুয্যে ব্রাহ্মণ কিনা কে জানে? আর যদিই ব্রাহ্মণ হয়, কোন জাতীয় ব্রাহ্মণ তাই বা কে বলিতে পারে? হরিহর চক্রবর্তী না হয় দায়ে পড়িয়া রামনিধিকে কণ্ঠা সম্প্রদান করিয়াছিলেন, বিজয়ার এমন কি দায় উপস্থিত হইয়াছে? সুতরাং বিজয়ার প্রস্তাব তর্কভূষণ মহাশয় হাসিয়া উড়াইয়া দিয়াছেন।

অবশেষে বহু অন্বেষণের পর নৈহাটীর মুখুয্যেদের বাড়ীর একটি ছেলের সঙ্গে বিবাহ স্থির করা হইয়াছে। ছেলেটির বয়স ১৬।১৭ বৎসর হইবে; হৃগলী কালেজে পড়ে। পাত্রটী দেখিতে গুণিতে যে ভাল তাহা নহে। বিজয়া যতদূর সংবাদ লইয়াছেন, তাহাতে জানা গিয়াছে যে ছেলেটির পড়াশুনাতে বড় মনোযোগ নাই; এবং স্বভাব চরিত্রও ভাল নয়। কিন্তু কর্তাদের নিকট সর্বোপরি তাহার সদৃশ্য এই যে, সংকুলজাত ও তাহার পিতা একজন সম্পন্ন লোক, খাইবার পরিবার কষ্ট হইবে না। এ পাত্র কোনওরূপেই বিজয়ার মনোমত হয় নাট; অথচ জ্যেষ্ঠের মতে বাধা দিয়া রাখিতে পারিতেছেন না। নাশপুর হইতে শঙ্কর তাঁহার দেবরদ্বয়কে পত্র লিখিয়াছিলেন, তাঁহারাও এ পাত্র মনোনীত করিয়াছেন। তবে আর উপায় কি? বিজয়ার হইয়া কেবা কথা বলে? তাঁহার পক্ষে কেহই নাই, কেবল এক পক্ষ। পক্ষের প্রথম ইচ্ছা, বিক্র্যবাসিনী আরও কিছুদিন লেখা পড়া করে; কারণ তিনি বাণ্যবিবাহের বিরোধী। দ্বিতীয়তঃ, বিবাহ যদি দিতেই হয়, তবে গোবিন্দের সহিত দেওয়া কর্তব্য। পক্ষ বিশেষ অনুসন্ধান দ্বারা জানিয়াছেন যে, মনোনীত পাত্র, চাকচন্দ্র ভাল ছেলে নহে; এবং সে বাড়ীর লোকের স্বভাব চরিত্রও ভাল নহে। সে সমুদায় সংবাদ তিনি বিজয়াকে দিয়াছেন; এবং

এই বিবাহ সম্বন্ধ ভাঙ্গিবার জন্ত বার বার প্ররোচনা দিতেছেন। তাঁহার সহিত বিজয়ার মনের সম্পূর্ণ মিল, কিন্তু এ বিষয়ে তিনি জ্যেষ্ঠের অবাধ্য হইয়া কাজ করিতে সাহসী হইতেছেন না। ওদিকে তাঁহার মনের অনুশোচনা ও আত্মনিন্দার মধ্যে বিবাহের দিন ঘনাইয়া আসিতেছে।

বিবাহ একপ্রকার স্থির হইয়া গেলে এই প্রশ্ন উঠিল, কোথায় বিবাহ হইবে? নশিপুরের বাড়ীতে, কি কলিকাতায় বিদ্যাবাসিনীর পিত্রালয়ে? মেদিনীপুরে বিজয়ার মধ্যম দেবরের মত জিজ্ঞাসা করিয়া পাঠাইলে, তিনি লিখিলেন, যে তাঁহার প্রথমা কন্যাটিরও বিবাহ শীঘ্র দিতে হইবে, তিনি একটি উপযুক্ত পাত্র হাতে পাইয়াছেন, আর বিলম্ব করিতে পারিতেছেন না; সুতরাং নিজ কন্যার আট বৎসরেই বিবাহ দিতেছেন। মায় মাসে একদিনে বিবাহের দুইটা লগ্ন আছে; ঐ দিনে দুই কন্যারই বিবাহ দেওয়া হইবে; তাহা হইলে ব্যয়ের অনেক সুবিধা হইবে। তর্কভূষণ মহাশয় এ প্রস্তাবে সম্মতি প্রকাশ করিয়াছেন। তদনুসারে কলিকাতার বাড়ীতে বিবাহ দেওয়াই স্থির হইয়াছে। ১২ই মায় বিবাহের দিন। বিজয়ার মধ্যম দেবর লিখিয়াছেন, যে তিনি সে সময়ে ছুটি লইয়া আসিবেন। বিজয়া এক মাস পূর্ব হইতেই কলিকাতার বাসাতে ছোট দেবরের নিকটে গিয়া রহিলেন; ও কন্যাদ্বয়ের বিবাহের আয়োজন করিতে লাগিলেন। তর্কভূষণ মহাশয় বিদ্যাবাসিনীর বিবাহের ব্যয়ের সাহায্যার্থে গোপনে বিজয়ার নিকটে ১৫০ দেড় শত টাকা প্রেরণ করিলেন। অবশিষ্ট দেবরেরা দিবেন।

বিজয়া দেবরদিগের বাড়ীতে আসিয়া অবস্থিতি করা অবধি পক্ষু ও গোবিন্দ প্রায় প্রতিদিন আসিয়া তাঁহার সহিত সাক্ষাৎ করিয়া থাকেন। এই বিবাহটা হইতেছে বলিয়া পক্ষু অতিশয় দুঃখিত। তিনি বিজয়ার নিকটে সর্বদাই দুঃখ প্রকাশ করেন। বিজয়ার বলিবার কিছু নাই,



তিনি নিজেই দ্রুপিত, স্তূতরাং মৌনীয় হইয়া থাকেন। বিবাহের দিন সন্নিবট হইলে পঞ্চু দ্রুপিত হইয়া বলিয়া গেলেন, “আমি এবিবাছে আসিব না; আপনি ঐ বালিকাটির প্রতি মাযের কৰ্ত্তব্য করিলেন না।” পঞ্চু চলিয়া গেলে বিজয়া মনঃক্ষুব্ধ হইয়া রহিলেন।

ক্রমে বিবাহের দিন উপাস্থত। যথাসময়ে নিমন্ত্রিত ব্যক্তিগণে বাড়ী পূর্ণ হইতে লাগিল। দুই স্থানে দুইটী আসন ও দুই স্থানে বিবাহমণ্ডপ করা হইয়াছে। কন্যাকর্ত্তা দুইজন। হরিকিশোর নিজ কন্যাকে সম্প্রদান করিবেন; এবং যুগলকিশোর বিদ্যাবাসিনীকে সম্প্রদান করিবেন। যুগলের পত্নী বিদ্যাবাসিনীর বরকে বরণ প্রভৃতি কন্যাকর্ত্তার সমুদায় কার্য্য করিবেন। বিজয়ার প্রতি কেবল নিমন্ত্রিত নারীগণের তত্ত্বাবধানের ও ভাড়ার রক্ষার ভার আছে।

আজ দুইটী কন্যাতে অনেক প্রভেদ দৃষ্ট হইতেছে। হরিকিশোরের কন্যা অষ্টালঙ্কারে ভূষিতা হইয়া বসিয়া আছে; কিন্তু বিদ্যাবাসিনীর অঙ্গে সর্ব্বসমেত একশত টাকারও গহনা হইবে কিনা সন্দেহ। এতদ্ভিন্ন অল্পকাল দিনে আর একটু পার্থক্য দৃষ্ট হইতেছে। হরিকিশোরের পত্নী মোক্ষদা, আজ এমনি সাজিয়াছেন, যে দেখিলে তিনি যে কন্যাকর্ত্তা এরূপ বোধ হয় না; বোধ হয় যেন তিনি নিমন্ত্রিত কোনও ধনীর রমণী। তাঁহার হাতে হাজার টাকা মূল্যের এক জোড়া বালা, ও তৎপার্শ্বে নারিকেল ফুল; গলে পাঁচনলি ও দক্ষিণ বাহুর উপরে সোণার বাজু, তাবিজ ও তাগা; এবং কোমরে চন্দ্রহার। তিনি দক্ষিণ বাহুখানি অনাবৃত করিয়া ঘুরিয়া বেড়াইতেছেন; এবং স্বর্ণালঙ্কার দেখিয়া দেখিয়া নারীগণকে আদর করিয়া নিজের ঘরে বসাইতেছেন। সমাগত নারীগণ সকলই তাঁহার বালা দেখিতেছেন, ও তাঁহার গড়নের অনেক প্রশংসা করিতেছেন। বিজয়া গরীব গোছের স্ত্রীলোকদিগকে আদর

করিয়া নিজ গৃহে বসাইয়া আপ্যায়িত করিতেছেন। ভাগ্যে বিজয়া ছিলেন, তাহা না হইলে এই গরীবেরা খোদ হয় মনঃক্ষুব্ধ হইয়া যাইত।

যথাসময়ে বর আসিল; কন্যাসম্প্রদান হইল; নিমন্ত্রিত ব্যক্তিদিগের ভোজনাদি হইতে লাগিল। নীচে আহাৰাদি চলিয়াছে; ওদিকে উপরে বৈঠকখানার পার্শ্বের ঘরে হরিকিশোর তাঁহার কয়েকটা বন্ধুকে লইয়া বসিয়াছেন। দ্বারটী বন্ধ আছে। নিমন্ত্রিত ব্যক্তিদিগের একজনের গোপাল নামক একটা ভৃত্য দ্বারের বাহিরে বসিয়া আছে; যেন কেহ হঠাৎ ঘরে প্রবিষ্ট না হয়। তাঁহার পাঁচ ছয় জন লোকে একটা টেবলের চারিদিকে বসিয়াছেন; সকলেই ইংরাজীতে সুশিক্ষিত এবং সকলেই উচ্চপদস্থ লোক; কেহ সদরওয়ালা, কেহ ডেপুটী ম্যাজিস্ট্রেট, কেহ প্রফেসর। এই জন্ত তাঁহাদের বিশেষ আদর ও তাঁহাদের জন্ত বিশেষ বন্দোবস্ত। টেবলের উপর একটা মদের বোতল ও একটা গ্লাস রহিয়াছে; তাঁহাদের কথোপকথন চলিতেছে। একজন গ্লাসে একটু মদ ঢালিয়া, এক ঢোক পান করিয়া হাসিয়া বলিলেন,—“I say Harikisor, how did you feel, when going through that farce of a ceremony of giving away a daughter in the presence of the fire?—অর্থ, আচ্ছা হরিকিশোর অগ্নি সাক্ষী করিয়া কন্যাসম্প্রদানরূপ ছেলেখেলাটা যখন করিতেছিলে, তখন কেমন লাগিতেছিল?”

হরিকিশোর। You can well imagine that sort of thing no longer suits educated men, these things should be left to the women and the ignorant priests—অর্থ, তা ত বুঝিতেই পার; শিক্ষিত ব্যক্তিদের কি আর ওসব করা শোভা পায়? ওসব কাণ্ড মেয়েদের ও মূর্খ প্রবোধিতদের জন্য থাকাই ভাল।

প্রথম ব্যক্তি । ( অট্ট হাস্য করিয়া ) All religious ceremonies are intended for the ignorant masses ; they are not meant for enlightened people—অর্থ, সমুদায় ধর্ম্মাচুষ্ঠানই অজ্ঞ লোকদিগের জন্য, শিক্ষিতদিগের জন্য নহে । ( আর এক চোক সুরাপান ) ।

দ্বিতীয় ব্যক্তি । Then what do you think of that curse of child-marriage ? Is it not sapping the very foundations of our national life ?—অর্থ, তৎপরে এই বালাবিবাহরূপ মহানিষ্টের বিষয় তুমি কি বিবেচনা কর ? ইহাতে কি আমাদের জাতীয় জীবনের ভিত্তি পর্য্যন্ত বিনষ্ট করিতেছে না ? ( বলিয়াই এক চোক সুরাপান ) ।

হরিকিশোর । Oh yes, equally objectionable or perhaps more.—অর্থ, তা বৈ কি, সমান আপত্তি-জনক অথবা বোধ হয় বেশি । ( সুরাপান ) ।

তৃতীয় ব্যক্তি । What is the age of your daughter ?—অর্থ, এখন তোমার মেয়ের বয়স কত ?

হরিকিশোর । Only past eight.—অর্থ, সবে অষ্টম বৎসর পার হইয়াছে ।

তৃতীয় ব্যক্তি । Oh foolish ! you could have waited a few more years.—অর্থ, কি নির্বোধের কাজ, তুমি বোধ হয় আরও দুই এক বৎসর দেরী করতে পারতে ।

প্রথম ব্যক্তি । What is the age of your niece ?—অর্থ, তোমার ভাইবির বয়স কত ?

হরিকিশোর । I think she is twelve—অর্থ, আমার বোধ হয় তার বয়স বার বৎসর ।

তৃতীয় ব্যক্তি। Then it seems your sister-in-law is a more rational being than yourself.—অর্থ, তবেই ত দেখছি তোমার ভাজ তোমার অপেক্ষা বুদ্ধিমতী।

ইহা শুনিয়াই মানসিক উত্তেজনাতে হরিকিশোরের ইংরাজী অন্তহিত হইল। তিনি কর্কশ ও নেশা-বিকৃতস্বরে বলিলেন, “বললে হয় না বাবা, উপস্থিত পাত্রটা ছেড়ে দিয়ে তার পর কোথায় খুঁজে বেড়াই?”

চতুর্থ ও পঞ্চম। Quite right—ঠিক কথা?

এইরূপ নানা বিষয়ে কথোপকথন চলিল; এবং মদের গ্লাসটী ঘন ঘন ঘুরিয়া আসিতে লাগিল। অবশেষে অপরাপর লোকের ভিড় কিঞ্চিৎ কমিয়া আসিলে, ক্রমেই বাবুদের ঘরের দ্বার বন্ধ করিয়া রাখা কঠিন হইয়া উঠিতে লাগিল। সেই ঘরের ভিতর হইতে অট্টহাস্য ও নানা-প্রকার চাঁৎকারের ধ্বনি শ্রুত হইতে লাগিল। নির্মাত্রিত ব্যক্তিদিগের মধ্যে যাহারা অবশিষ্ট ছিল, সকলে ছুটিয়া গিয়া উকি মারিয়া দেখিতে চায়, যুগলকিশোর ও বাড়ীর অপরাপর লোকে নিষেধ করিয়া রাখেন, “ও ঘরে যাবেন না, ওখানে বাবুয়া আমোদ করছেন।”

বাবুদের আমোদ ক্রমে অনেকদূর গড়াইয়া গেল। তাঁহাদের জন্ত বিশেষ ভাবে মাংসাদি পাক হইয়াছিল, কিন্তু আহারের দ্রব্য যখন আসিল, তখন আর তাঁহাদের আহারের মত অবস্থা নাই। একজনের মস্তকটা বক্ষঃস্থলের উপর ঝুঁকিয়া পড়িয়াছে। তিনি গৃধ্ররাজ জরদগবের ন্যায় অবনত মস্তকে, টেবলের উপরে ছইখানি হস্ত প্রসারিত করিয়া, যেন তন্ময় হইয়া আছেন। গোপাল তাঁহারই ভৃত্য। তিনি এতক্ষণ মধ্যে মধ্যে গোপালকে ডাকিতেছিলেন। এ ডাকার মধ্যে কিঞ্চিৎ চমৎকারিত্ব আছে। নেশা যতই পাকিতেছে, ততই ডাকের প্রণালীও বদলাইতেছে। ছই এক গ্লাস খাইয়াই ডাকিলেন—গুপ্তে—এ—এ—

নেশা আর একটু পাকিলে ডাকিতে লাগিলেন—প্রে—এ—এ ; তৎপরে নেশার আরও গাঢ়তা হইলে ডাকিতে লাগিলেন—লে—এ—এ। এক্ষণে সেটুকুও গিয়াছে ! এখন যেন নিদ্রাভিভূত ! আহারের জন্য অনেক ঠেলাঠেলি করাতে একবার চক্ষু খুলিয়া জিজ্ঞাসা করিলেন—Is the Hugly on fire ?—অর্থ, গঙ্গাতে কি আগুন লেগেছে ? তিনি গঙ্গাতে আগুন দেখিতেছেন ! আর একজন উঠিয়া নৃত্য করিতেছেন, তাঁহাকে ধরিয়া বসান ভাব ! হরিকিশোরের ইংরাজী বক্তৃতার কোঁক আসিয়াছে ! তিনি টেবল চাপড়াইয়া চাঁৎকার করিয়া বলিতেছেন ;—

Be thou a spirit of health, or goblin damned or that sea-beast, leviathan, which God of all his works, created hugest, that swim the ocean stream ;—

ইতিমধ্যে আর এক ব্যক্তি লক্ষ দিয়া উঠিয়া তাঁহার মুখ আবরণ করিয়া তাঁহাকে জোরে বসাইবার চেষ্টা করিতে লাগিলেন। বক্তার তখন কোঁক আসিয়াছে, বক্তৃতা পাইয়াছে, তিনি শুনিবেন কেন ? তিনি নিবারণকারীর হাত ছাড়াইয়া চাঁৎকার করিয়া আবার বলিতে লাগিলেন,—

Be thou a Canning or Channing ; be thy intents sacred or charitable ;—

পূর্বোক্ত ব্যক্তি আবার তাঁহার মুখ আবরণ করিলেন ; সুতরাং বক্তৃতাটা এইখানেই বন্ধ হইয়া গেল। বক্তৃতাটা অবশ্য মাতালে উচ্চারণে হইয়াছিল, তাহা লেখাতে প্রকাশ হইল না। যাহারা ইংরাজী জনেন না, তাঁহাদের জন্য অজ্ঞবানও দিতে পারা গেল না। তাঁহারা এই বলিয়া সবকে সাধনা দিবেন, যে এক্রপ ইংরাজী বক্তৃতা তাঁহারা নাই-বা বুঝিলেন। তাহাতে কোনও ক্ষতি নাই। পূর্বেই বলা হইয়াছে,

হরিকিশোর লেক্সপীয়ার ও মিল্টনের গ্রন্থে সুপণ্ডিত। পূর্বোক্ত বক্তৃতাতে সেই পাণ্ডিত্যের কিঞ্চিৎ শ্রদ্ধা হইল, এইমাত্র।

এই কোলাহল ও গোলযোগের মধ্যে আর এক ব্যক্তি বসি করিয়া টেবল, কাগজ, বই ও অপর একজনের কাপড় ভাসাইয়া দিলেন।

এইরূপে সেদিনকার বিবাহকার্য সমাধা হইয়া গেল। যুগলকিশোরের প্রশংসার বিষয় এই যে, তিনি অঙ্ককার বিশেষ প্রলোভনের মধ্যেও ধৈর্যধারণ করিয়া আছেন। পক্ষু আসেন নাই, কিন্তু গোবিন্দ আসিয়াছেন। কেবল তাহা নহে, পরিবেশনাদিতে তিনি তিনজনের শ্রম একা করিতেছেন।

বিক্রাবাসিনীর বিবাহের পরেই বিজয়া বিজ্ঞারত্ন মহাশয়ের বাসাতে গমন করিলেন। কিন্তু দুঃখের বিষয় এই যে, দুই মাস যাইতে না যাইতে সংবাদ আসিল যে, তাঁহার নব জামতা চারুচন্দ্র যে জ্বরগায়ে দিব্যের দিন আসিয়াছিল, সেই জ্বরেই প্রাণত্যাগ করিয়াছে। ইহাতে বিজয়া হৃদয়ে অতিশয় আঘাত পাইলেন। বিক্রাবাসিনী যে অকাল-বৈধব্যে পতিত হইল, ইহা তাঁহার হৃদয়ে শেলসম বিদ্ধ হইল।

## উনবিংশ পরিচ্ছেদ

অনেক দিন হইল আমরা তর্কভূষণ মহাশয়ের কনিষ্ঠা কন্যা ভুবনেশ্বরীকে ভুলিয়া রহিয়াছি। ভুবনেশ্বরী প্রথম স্বপ্তর ঘর করিতে গিয়া বিনা দোষে নিগ্রহ সহ্য করিয়া পূজার সময় পিত্রালয়ে আসিয়াছে, এইমাত্র সকলে অবগত আছেন। সে হইল ১৮৫৩ সালের দুর্গোৎসবের সময়। ভুবনেশ্বরীকে আনিবার সময় কথা ছিল যে, তৎপরবর্ত্তী মাঘ মাসে রামরতন মুখ্যে মহাশয় তাকে লইবার জন্ত লোক পাঠাইবেন। তদনুসারে ১৮৫৪ সালের মাঘ মাস পড়িলেই ভুবনেশ্বরীকে লইবার জন্ত নশিপুরে লোক আসিয়াছিল। কিন্তু ভুবনেশ্বরী তাহার প্রথম বারের নিগ্রহের কথা, ও স্বপ্তর বাড়ীতে যাহা দেখিয়াছিল ও শুনিয়াছিল, তাহার কিছু কিছু বিবরণ বিজয়াকে ও নিজ জননৌকে বলিয়াছিল। সেই সকল শুনিয়া গৃহিণী কুপিত হইয়াছিলেন। তিনি মাঘ মাসে ভুবনেশ্বরীকে পাঠাইলেন না; বলিলেন, —“এই সেদিন এসেছে; কিছুদিন থাক না।” পাঠান ত হইল না; অধিকন্তু সমাগত দাসীর দ্বারা বৈবাহিক গৃহিণীকে অনেক ভৎসনা করিয়া পাঠাইলেন।

এত কথা তর্কভূষণ মহাশয় কিছুই জানিতে পারিলেন না। তিনি পত্রে এইমাত্র লিখিলেন,—“ছেলে মানুষ কয়েক মাস মাত্র আসিয়াছে, এখনও আরও কয়েক মাস থাক। জ্যৈষ্ঠ মাসে শ্রীমান জ্ঞানেন্দ্রনাথ বাবাজীকে জামাই-ঘটীর সময়ে আনিতে লোক যাইবে। অমনি বাবাজীর সঙ্গে শ্রীমতীকে প্রেরণ করা যাইবে।” তর্কভূষণ মহাশয়ের পত্র পাইয়া মুখ্যে মহাশয় সন্তুষ্ট হইলেন; কিন্তু মুখ্যে গৃহিণী দাসীর মুখে আরও কিছু অধিক সমাচার পাইয়া আগুন হইয়া রহিলেন।

ক্রমে জামাই-বধীর সময় উপস্থিত। বধাসময়ে জ্ঞানেন্দ্রনাথকে আনিবার জ্ঞাত লোক গেল। জ্ঞানেন্দ্র নশিপুরের বাড়ীতে আগমন করিল। তখন গ্রীষ্মাবকাশের সময়; ছেলেরা সকলেই বাড়ীতে আছে। হরচন্দ্র অনুতাপ ও নবজীবনের মধ্যে বাস করিতেছেন। নশিপুরের সকলে পূর্বেই লোকমুখে জ্ঞানেন্দ্রের স্বভাব-চরিত্রের বিষয়ে অনেক কথা শুনিয়াছিলেন, সুতরাং কেহই তাহাকে তেমন আগ্রহের সহিত অভ্যর্থনা করিল না। জামাই বাড়ীতে আসিলে ভদ্র লোকে যেরূপ আদর যত্ন করে, তাহার কিছু অপ্রতুল হইল না বটে, কিন্তু কি জানি কেন, জলের মাছকে ডাঙ্গায় রাখিলে যেরূপ হয়, জ্ঞানেন্দ্রেরও যেন সেই প্রকার দশা ঘটিল। সে গোপনে গাঁজা খাইতে শিখিয়াছে, ইহারা কেহ তামাকটী পর্য্যন্ত খায় না; হরচন্দ্র তামাক খাইতে শিখিয়াছিলেন, অনুতাপের দিন হইতে তাহা ছাড়িয়া দিয়াছেন; সে পড়াশুনা ছাড়িয়া দোকানদারি করে; ইহারা পণ্ডিতবংশ, সকলেই বিদ্যাচর্চাতে নিযুক্ত; সে সর্বদা ছোটলোকের সঙ্গে মিশিয়া কুৎসিত আমোদ প্রমোদ ভালবাসে; ইহারা সে সকলকে অন্তরের সহিত ঘৃণা করে; সে জুয়াখেলাতে পরিপক; ইহারা অনেকে ভাস খেলিতেই জানে না; সুতরাং জলের মাছ ডাঙ্গায়, এইরূপ অনুভব কবিবারই কথা।

তর্কভূষণ মহাশয় অতিশয় ধীর গম্ভীর মানুষ, অধিক কথা কহা তাঁহার অভ্যাস নয়, তাহাতে আবার জ্ঞানেন্দ্র পড়াশুনা ছাড়িয়া বাজারে দোকান করিয়াছে শুনিয়া তাঁহার মনে মনে মুখুয্যে মহাশয়ের পরিবারের প্রতি ঘৃণা জন্মিয়াছে। তিনি প্রথম দিনে দুই চারিটা কথা কহিয়াছেন, মধ্যে আরও দুই একবার দুই একটা প্রশ্ন করিয়াছেন, তৎপরে আর বিশেষ বাক্যালাপ নাই।

যাহা হোক জ্ঞানেন্দ্র যে কয়েকদিন শ্বশুরবাড়ীতে ছিল সে কয়েকদিন



যেন তাহার পক্ষে মৃত্যুযজ্ঞ গিয়াছে। জামাই-ষষ্ঠী হইয়া গেলেই সে ভুবনেশ্বরীকে লইয়া উলোতে নিজ ভবনে গেল। পথে মনে মনে সেই নিরপরাধা বালিকাকে শাসাইয়া গেল, একবার চল না, এক বার উলোর বাড়ীতে গিয়ে দেখাব! আপনারা হয় ত জিজ্ঞাসা করিবেন, তার অপরাধ কি? আমিও ভাবি, তার অপরাধ কি? কিন্তু এদেশে দুই বাড়ীর কলহে এইরূপ সহস্র সহস্র নিরপরাধা বালিকা যাতনা পাইতেছে।

এক দিকে স্ত্রের বিষয় বলিতে হইবে যে প্রথম বারে মেজবৌ চাতুরী খেলিয়া নিজের দোষ ভুবনেশ্বরীর ঘাড়ে চাপাইয়া যে যাতনা দিয়াছিল, এবারে সে বিপদ কাটিয়া গিয়াছে। যাহার যাহা স্বভাব, তাহা কি সহজে যায়? এবং সত্য কি অধিক দিন চাপা থাকে? ভুবনেশ্বরীর অল্পপস্থিতি কালে মুখ্যো মহাশয়ের বাড়ীতে আরও কয়েকবার টাকা পরমাচুরি হইয়াছিল। গৃহিণী প্রথমে জ্ঞানেন্দ্রকে সন্দেহ করেন, তৎপরে একদিন স্বচক্ষে দেখিয়া মেজবৌকে ধরিয়া ফেলেন। তদবধি মেজবৌ তাঁহার বিষয়নয়নে পড়িয়াছে; এবং ভুবনেশ্বরীর প্রতি অবিচার করা হইয়াছিল বলিয়া অহুতাপেরও উদয় হইয়াছে। স্ততরাং এবার ভুবনেশ্বরীকে সমাদরে অভ্যর্থনা করিয়া লইবার কথা। কিন্তু কালচক্রে কখন কোন্ ঘটনা আনিয়া উপস্থিত করে, তাহা কে বলিতে পারে? গৃহিণীতে গৃহিণীতে কথা চালাচালি হইয়া বিষম বিবাদ বাধিয়া গেল। ভুবনেশ্বরী আসিবামাত্র শান্তি বালিলেন, “এস বাছা, ঘরে ঢোক, আর বাপের বাড়ী যাবার নামটী কর্ত্তে পারবে না।” জ্ঞানেন্দ্রের সেই প্রতিহিংসা-দ্যত মুখ দেখিয়া এবং স্বস্ত্রর এই গুম্বিষ্ট সম্বোধন শুনিয়া, ভুবনেশ্বরীর প্রাণটা কিরূপ হইল, তাহা কি বর্ণনাপক্ষে? বেচারী বুঝিল, তাহার জন্ত হৃৎকের অমানিশা আসিতেছে। ক্রমে জ্ঞানেন্দ্র স্বপ্নরবাড় গিয়া যে

কষ্টে দিন কাটাইয়াছে, সমুদায় বিবরণ জননীর কর্ণগোচর করিল। ভুবনেশ্বরীকে সাজা দিবার এই আর একটা কারণ যুটিল।

১৮৫৩ সালে পূজার সময় ভুবনেশ্বরী পিত্রালয়ে যাওয়ার পর রামরতন মুখুয্যে মহাশয়ের পরিবার মধ্যে যে যে পরিবর্তন ঘটয়াছিল, তাহার কিঞ্চিৎ বিবরণ দেওয়া আবশ্যিক। মুখুয্যে মহাশয়ের প্রথম দুই পুত্র, রাজেন্দ্র ও ব্রজেন্দ্র, ঐ বৎসর পূজার সময়ে বাড়ীতে আসিয়া পাড়ায় সমবয়স্ক একজন বন্ধুর সঙ্গে এই পরামর্শ করিল, যে পূজার পরেই তিনজনে সমানংশে উপোর বাজারে উচ্চদরে একখানা মনিহারির দোকান খুলবে। তাহাতে কাগজ, কলম, বই, গ্লাস, ল্যাম্প, এমন কি চীনের বাড়ীর জুতা পর্যন্ত থাকিবে। জ্ঞানেন্দ্র ও সেই বন্ধুটী দুজনে দোকান দেখিবে। টাকা পয়সা সমুদায় সেই বন্ধুটির হাতে থাকিবে, জ্ঞানেন্দ্র শুধু বসিয়া থাকিবে ও খরিদদারকে বেচিবে। তদনুসারে পূজার পরেই কলিকাতা হইতে সমুদায় জিনিষপত্র আসিল; এবং গথাসময়ে দোকান খোলা হইল। জ্ঞানেন্দ্র প্রাতে উঠিয়াই দোকানে যায়, একবার দুপুরবেলা আহার করিতে আসে, আবার আহায়াস্তে বৈকালে দোকানে যায়, পরে রাত্রি প্রায় ৯টার সময়ে ঘরে আসে।

কয়েক মাসের মধ্যেই দেখা গেল যে এই দোকানটী জ্ঞানেন্দ্রকে একেবারে পাপ-সাগরে নিমগ্ন করিবার উপায়গুরুত্ব হইল। একেই তাহার স্বভাবচরিত্র ভাল ছিল না, তাহাতে সে আবার প্রোভেনজালের মধ্যে গিয়া পড়িল। দোকানে দিন রাত্রি থাকাতে বাজারের কতকগুলি ছুশ্চরিত্র যুবকের সঙ্গে তাহার পরিচয় ও বন্ধুতা হইল। সে তাহাদের সঙ্গে মিশিয়া তামাক হইতে চরশ, চরশ হইতে গাঁজাতে প্রমোশন পাইল; তাস খেলাতে উত্তম পরিপক্ব হইয়া উঠিল। বাজারের পার্শ্ববর্তী একটা জ্বীলোকেয় ভবনে এই তাসের আড্ডা হইত। সুতরাং জ্ঞানেন্দ্রের

সেখানে গতায়ত করা অভ্যাস হইয়া গেল। প্রথমে এই সকল কথা গোপনে ছিল, কিন্তু ১৮৫৬ সালে চৈত্র মাসে খাতা পত্র নিকাষ করিবার সময় রাজেন্দ্র ব্রজেন্দ্রের অংশীদার জানিতে পারিল যে, জ্ঞানেন্দ্র দোকানের অনেক টাকা ভাঙ্গিয়াছে। কি করিয়াছে? সে টাকা কোথায় গিয়াছে? অনুসন্ধান করিতে করিতে সমুদায় কথা বাহির হইয়া পড়িল। সে জুয়া খেলিয়া সেই টাকা উড়াইয়াছে। ১৮৫৬ সালের বৈশাখ মাসে রাজেন্দ্র ও ব্রজেন্দ্র বাটীতে আসিয়া এই কথা শুনিল ও একদিন তাহাদের পিতার সমক্ষেই এই বিষয় লইয়া তিন ভ্রাতাতে ঘোর বিবাদ হইয়া গেল।

রাজেন্দ্র। গাধা, হতভাগা, পাজি, তোমার ভালর জন্তেই একটা কাজ দেখিয়ে দিয়ে গেলাম, ভিতরে ভিতরে এই কাণ্ড!

জ্ঞানেন্দ্র। মিছে গালাগালি দিও না বল্ছি!

রাজেন্দ্র। গালি দেব না, হাজার বার দেব। জুতিয়ে হাড় ভেঙ্গে দেব জানিস্।

জ্ঞানেন্দ্র। উঃ, চের জুত দেখেছি।

ব্রজেন্দ্র। বল্ রাল্কেল, এতগুলো টাকা নিয়ে কি করলি বল্? টাকা অমনি মাদ্রনা আসে, না? যদি টাকা রোজগার করতে হতো তবে বুঝতে পারতিস্! বল্ না টাকা কি করলি?

জ্ঞানেন্দ্র নিরুত্তর।

রাজেন্দ্র। জবাব থাক্লে ত জবাব দেবে, ওর গুপ্তীর পিণ্ডী করেছে, জুয়ো খেলে উড়িয়েছে। মুখটো দেখ না, ইচ্ছে করে এক লাথি মেরে দাঁতগুলো ভেঙ্গে দি; গাধা, নছার।

জ্ঞানেন্দ্র। আর লাথি মারতে হয় না, তুই গাধা, তুই নছার।

রাজেন্দ্র। কি এত বড় আত্মপক্ষা, দুষ্কর্মে করে আবার চোখ রাঙ্গানি!

দেখি তবে, ( বলিয়া দৌড়িয়া গিয়া জ্ঞানেন্দ্রের চুলের মুটি ধরিয়া গালে সজোরে চপেটাঘাত ) ।

জ্ঞানেন্দ্র অতি ইতর লোকের সঙ্গে মিশিয়া থাকে, কুৎসিত স্থানে যে ভাষা সর্বদা বিহার করে, তাহা তাহার অভ্যাসপ্রাপ্ত, সুতরাং সে ক্রোধের অধীন হইয়া ভ্রাতৃদ্বয়কে যে অকথা ভাষাতে গালাগালি দিল, তাহা উল্লেখযোগ্য নহে । আশ্চর্য্যের বিষয় এই, পিতা, মাতা, ও গৃহস্থ রমণী-দিগের সাক্ষাতে এই ব্যাপারটা হইল । পিতা মাতা দৌড়িয়া আসিয়া ছাড়াইয়া দিলেন ; তাহা না হইলে, দুই ভ্রাতাতে জ্ঞানেন্দ্রকে সে দিন এমন নিগ্রহ করিত, যে তাহাকে কয়েকদিন শয্যা হইতে উঠিতে হইত না ।

সকলে বৃদ্ধিতে পারিতেছেন এই গালাগালি ও মারামারির পরে আর তাহাকে দোকানের ভার দেওয়া সম্ভব নহে । দুই ভ্রাতাতে বাড়ী হইতে বাইবার সময় জ্ঞানেন্দ্রকে দোকান হইতে বিদায় করিয়া আর একজনকে সে কাজ দিয়া গেল ।

হায় ! হায় ! মানুষ মানুষকে চালাইতে জানে না ! মানুষকে কি করিয়া ভাল করিতে হয়, তাহা সহোদর ভ্রাতাও বৃদ্ধিতে পারে না । মানুষকে শাসন করাটা সহজ কিন্তু ভাল করাটা সেরূপ সহজ নহে । হায় প্রেম ! তোমার অভাবে পৃথিবী কি পাপেই ডুবিতেছে ! প্রেমের শক্তি যাহার নাহি সে যেন মানুষকে ভাল করিতে চাহে না । সহোদর ভ্রাতৃদ্বয় যদি জ্ঞানেন্দ্রকে যথার্থ ভাল বাসিত তাহা হইলে বোধ হয় তাহাকে ভাল করিবার জন্ত কোনও উপায় আবিষ্কার করিতে পারিত, হয়ত কলিকাতাতে লইয়া চক্ষে চক্ষে রাখিত । কিন্তু প্রেমের অভাবে তাহাদের বুদ্ধি সে পথেই গেল না । এতদিন জ্ঞানেন্দ্রের তবু একটা কাজ ছিল, দোকানে কয়েক ঘণ্টা বসিত, ক্রয়বিক্রয় দেখিত, নিত্য নূতন

লোক দেখিত, নূতন কথা শুনিত, কিন্তু এখন সে নিষ্কর্মা হইয়া ঘুরিয়া বেড়াইতে লাগিল। তাহার কর্ম গেল; কিন্তু তাহার অভ্যাসগুলি ত গেল না। গ্রামে একদল নিষ্কর্মা যুবক ছিল, সিদ্ধি খাওয়া, খেঁউর টপ্পা গাওয়া বেড়ান, লোকের উপর উপদ্রব করা, লোকের মধ্যে বাবাদ বাধাইয়া আদালতে মিথ্যা সাক্ষ্য দিতে যাওয়া, এতদ্ভিন্ন তাহাদের অগ্র কর্ম ছিল না। জ্ঞানেন্দ্র তাহাদের দলে ভর্তি হইল।

এদিকে ভুবনেশ্বরীর ক্রেশের অবধি নাই। সেই যে ১৮৫৪ সালে শ্বশুরালয়ে আসিয়াছে, তৎপরে তিন বৎসর হইয়া গেল, আর পিতালয়ে ঘাইতে পারে নাই। শ্বশুর সর্বদাই তাহার প্রতি খড়াহস্ত, সর্বদাই তাহাকে রাঁধিতে হয়। বালিকা পিতৃগৃহে কবেই বা রাঁধিয়াছে? রন্ধন ত একটা বিঘ্ন; ইহা ত শিক্ষা করা চাই; শিথিলার সময়ে ভুল চুক হওয়া ত অপরিহার্য; কিন্তু, মুখুযো গৃহিণীর নিকটে ভুল চুকের মাপ নাই। ব্যঞ্জনে যদি লবণ টুকু কম হয়, বা ডালে জলটা একটু অধিক হয়, অমনি এমন অভদ্র ভাষাতে গালাগালি দেন, যে শুনিলে কর্ণে হাত দিতে হয়। কেবল গালাগালি নহে, মধ্যে মধ্যে প্রহারও সহ করিতে হয়। একদিন বেচারির কি ভুল হইয়াছিল বলিয়া শ্বশুর ধরিয়া উনান কাঁধায় মুখ ঘষিয়া দিলেন। আর একটু হইলে উনানের আগুনে চুলগুলি পুড়িয়া যাইত। বড়বো ও মেজবোএর প্রতি যে শ্বশুর প্রসন্ন তাহা নহে, কিন্তু তাহাদিগকে আর পূর্বের মত নির্যাতন করিতে পারেন না, কারণ তাহারা উভয়েই উপার্জক পুত্রের পত্নী, তাহাদের পতিগণ তাহাদিগকে ভালবাসে; শ্বশুর তাহা জানেন; তাহারাও জানে, যে তাহারা উপার্জক পুত্রের স্ত্রী, সুতরাং শ্বশুর এক গুণ বলিলে দশগুণ শুনাইয়া দেয়। সুতরাং শ্বশুর যত কোপ, যত বিক্রম, যত শাসনশক্তি সমুদায় ভুবনেশ্বরীর অরক্ষিত ক্ষুদ্র মস্তকের উপরে পড়িতেছে। সে যে

শ্বশুর নিকট গল্পনা পাইয়া পতির নিকট কাঁদিলে তাহারও ঘো নাই। “স পাপিষ্ঠ স্ততোহধিকঃ।” সে এই অসহ্য যাতনার প্রতি দৃকপাতও করে না; বরং তাহার মাত্রা বৃদ্ধি করিয়া থাকে। অগ্রেই এলা হইয়াছে জ্ঞানেন্দ্র জুয়া খেলিতে আরম্ভ করিয়াছে; সে অভ্যাসটী তাহার যায় নাই। পয়সা কোথায় পায়? হতভাগিনী ভুবনেশ্বরীর পিতালায় হইতে প্রাপ্ত যা কিছু টাকা হাতে ছিল, সমুদায় লইয়া জুয়াতে উড়াইয়াছে। অবশেষে তাহার বাক্য প্রভৃতি ভাঙিতে আরম্ভ করিয়াছে। শ্বশুর এই সকল ব্যাপার জানিতে পারিয়া ভুবনেশ্বরীর গহনাগুলি নিজের ঘরে নিজের নিকট রাখিয়াছেন। কিন্তু জ্ঞানেন্দ্র নিজে প্রবঞ্চক ও মিথ্যাবাদী, সুতরাং সে ভুবনেশ্বরীর সত্যবাদিতাতে বিশ্বাস করিতে পারে না; মনে করে গহনা কোনও স্থানে লুকাইয়া রাখিয়া মিথ্যা বলিতেছে; মধ্যে মধ্যে সে জন্ত তাহাকে গুরুতররূপে প্রহার করে। এক একদিন এত মারে যে সে শয্যা হইতে উঠিতে পারে না। এই যন্ত্রণার মধ্যে ভুবনেশ্বরীর মুখে রব নাই; সে বুঝিয়াছে যে পিতা মাতা তাহাকে জন্মের মত অগ্নিকুণ্ডে ফেলিয়া দিয়াছেন, ক্রেম জানাইয়া আর কি হইবে? প্রাণ যত দিন না যায়, এ যাতনা ভুগিতে হইবে। অসহ্য যাতনাতে এক একবার তাহার আত্মহত্যা করিবার ইচ্ছা হইয়াছে; অমনি বৃদ্ধ পিতা-মাতার কথা স্মরণ করিয়া সে উদ্বিগ্ন হইতে নিরন্ত হইয়াছে।

এইরূপ যাতনাতে দিন যাইতেছে, একদিন জ্ঞানেন্দ্র রাত্রে শয়ন করিতে আসিবার সময় কতকগুলি ছবি আনিয়া তক্তপোষের নীচে এক পার্শ্বে কাপড় চাপা দিয়া রাখিল। ভুবনেশ্বরী জিজ্ঞাসা করাতে বলিল, “ও সব কথা থাক, কারকে বলো না, একজন লুকিয়ে রাখবার জন্যে দিয়েছে।” ভুবনেশ্বরী আর অধিক জিজ্ঞাসা করিল না। দুইদিন পরে

একদিন বৈকালে জ্ঞানেন্দ্রকে বাঁধিয়া লইয়া পুলিশের জমাদার পাহারা-ওয়ালা প্রভৃতি খানাতালাসি করিবার জন্য বাড়ীতে উপস্থিত। দেখিয়া মুখ্যে মহাশয়ের বুদ্ধি শুদ্ধি উড়িয়া গেল। কথাটা এই, সেই ছবিগুলি বাজারের একজন স্ত্রীলোকের। নিষ্কর্মা যুবকদল মধ্যে মধ্যে তাহার ঘরে তাসখেলার আড্ডা করিত; জয়গোপাল নামে একটি যুবক এক দিন রাত্রে ঐ ছবিগুলি চুরি করিয়া আনে। আনিয়া লুকাইয়া রাখিবার জন্য জ্ঞানেন্দ্রের হাতে দেয়। জ্ঞানেন্দ্রের সঙ্গে কথা ছিল, সেগুলি কলিকাতায় বিক্রয় করা হইবে; বিক্রয় করিয়া যাহা উঠিবে, তাহা দুই জনে ভাগ করিয়া লইবে।

যে রমণীর ছবি চুরি যায়, সে পরদিন প্রাতেই পুলিশে খবর দেয় ও যাহারা তাহার ভবনে সে দিন আসিয়াছিল, তাহাদের নাম জানাইয়া দেয়; এবং ইহাও বলে যে জয়গোপালের উপরে তাহার বড় সন্দেহ। পুলিশ প্রথমে জয়গোপালকে ধরে; সে উড়াইয়া দেয়; কিন্তু দুইদিন অনুসন্ধানে এমন কিছু কিছু কথা বাহির হইয়া পড়ে যাহাতে পুলিশ তাহাকে একেবারে ধরিয়া বসে। তখন সে নিজেকে নিষ্কৃতি পাইবার জন্য জ্ঞানেন্দ্রের উপরে সেই দোষের আরোপ করে, এবং প্রমাণও দেয় যে জ্ঞানেন্দ্র গোপনে তাহার একখান ছবি একজনকে বেচিয়াছে। অনুসন্ধানে জানা গেল, বাস্তবিক জ্ঞানেন্দ্র একখানা ছবি একজনকে আট আনাতে বেচিয়াছে। তখন আর পুলিশের সন্দেহ রহিল না। জ্ঞানেন্দ্রকে একেবারে গ্রেপ্তার করিল। কিন্তু জয়গোপালকে ছাড়িল না। আজ জ্ঞানেন্দ্র পুলিশের হস্তে গ্রেপ্তার হইয়া নিজ ভবনে উপস্থিত। আর প্রমাণের প্রয়োজন কি? সেই সমুদায় ছবি তাহার ঘরের তক্তপোষের নিম্নদেশ হইতে বাহির হইল। মাল সমেত জ্ঞানেন্দ্র চালান হইয়া খানাতে গেল। অথচ যে রাত্রে চুরি হয় সে দিন জ্ঞানেন্দ্র

গ্রামেই ছিল না; স্থানান্তরে গিয়াছিল। জয়গোপাল তাহাকে ছবিগুলি পরদিন দিয়াছিল।

ভাল মানুষ বুদ্ধ রামরতন মুখুয়ের মস্তকে বজ্রাঘাত হইল। ব্রাহ্মণ-পণ্ডিত মানুষ, আইন আদালতের ধার কি ধারেন, অশরণ হইয়া গ্রামের দুই একজন বিষয়ী লোকের শরণাপন্ন হইলেন; সকলেই বলিলেন, নিষ্কৃতি পাওয়া সম্ভব নহে। সে যে চুরি করিয়াছিল, তাহাতে সন্দেহ নাই; কারণ উহার স্বভাবচরিত্র পূর্বাধিই মন্দ। সে যে সে রাত্রে গ্রামে ছিল না, সে কথা কেহই বিশ্বাস করিল না। এই যুবককে সাহায্য করিবার জন্ত কাহারও প্রবৃত্তি হইল না। মুখুয্যে মহাশয় কলিকাতাতে পুত্রদ্বয়কে পত্র লিখিলেন; তাহারা লিখিয়া পাঠাইল, “যেমন কর্ম তেমন ফল; জেলে যাক; আমাদের কিছু দুঃখ নেই।” বুদ্ধ ব্রাহ্মণ অন্ত্রোপায় হইয়া ছুটিয়া বেড়াইতে লাগিলেন। সাজা বাহা হইবার তাহা ত পরে হইবে, এখন ত বাঁচাইবার জন্ত চেষ্টা দেখিতে হয়। কে অর্থ দেয়, কে পরামর্শ দেয়, কে সাহায্য করে? ব্রাহ্মণের তখনকার বাগ্রতা ও কাতর ভাব দেখিলে পাষণ্ডও বিদীর্ণ হইয়া যাইত।

শুণ্ডর ভাল মানুষ বলিয়া তাঁহার প্রতি ভুবনেশ্বরীর একটু শ্রদ্ধা ছিল। তিনি শ্রদ্ধাকে বলিলেন,—“ঠাকুর কেন ছুটিয়া বেড়ান, আমার ত গহনা আছে, বিক্রী করে মকদ্দমার খরচ করুন।” এ প্রস্তাবটা শ্রদ্ধারও মনঃপূত হইল; কারণ তদ্ব্যস্ত আর উপায় নাই। ভুবনেশ্বরীর গহনা বাঁধা দিয়া মকদ্দমার খরচ চলিল। বিচারে জ্ঞানেন্দ্র চুরির প্রধান অপরাধ হইতে নিষ্কৃতি পাইল বটে, কিন্তু চোরাই মাল গ্রহণ ও বিক্রয় করা অপরাধে একমাস কারাবাস দণ্ডে দণ্ডিত হইল; এবং জয়গোপালের তিন মাস কয়েদ হইল। ইহা গেল ১৮৫৭ সালের চৈত্র মাসের কথা।

জ্ঞানেন্দ্র কারাগার হইতে আরও বিকৃত হইয়া আসিল। পূর্বে



তাহার যে একটু লজ্জা সরম ছিল, এবারে তাহা একেবারেই গেল। এখন প্রকাশ্যভাবে বাজারে জুয়ার আড্ডাতে যাতায়াত আরম্ভ করিল; এবং পূর্বে যে দোষ ছিল না, অথবা থাকিলেও জানিতে পারা যায় নাই, এবারে তাহাও ধরিল; সে সুরাশান করিতে আরম্ভ করিল। অগ্রে সে যাহাই করুক, প্রায় প্রতি রাত্রে গৃহে আসিয়া নিদ্রা যাইত; এখন তাহাও গেল; মধ্যে মধ্যে রাত্রিতে আর বাড়ীতে থাকে না। যে দিন আসে তাহার দৌরায়ে পরিবারস্থ সকলের মনে হয়, না আসিলেই ভাল। অপর দিকে তাহার মেজাজ অতিশয় কর্কশ ও উদ্ধত হইয়া উঠিল; অতি সামান্য কারণে ভগ্নানক জুড় হয়, এবং জুড় হইলে জ্ঞান থাকে না। ভুবনেশ্বরীর কি যন্ত্রণাই আরম্ভ হইল! সর্বদা সশঙ্কিত, কখন কি ঘটে। যে রাত্রে জ্ঞানেন্দ্র বাড়ীতে আসে, মাতাল হইয়া আসে, ও ভুবনকে অশেষ নিগ্রহ করে, এবং একরূপ অশ্রাব্য ভাষায় গালি দেয় যে সে জন্মে তাহা কখনও শুনে নাই। কখন কখনও সে ভয় দেখায় বাড়ীর সকলকে কাটিয়া ফাঁস যাইবে।

দিন দিন এই অত্যাচার এত অসহ্য হইয়া উঠিল যে, আশঙ্কা ও মনের ক্লেশে ভুবনেশ্বরীর শরীর ভাঙ্গিয়া যাইতে লাগিল। সহস্র কষ্টেও সে এতদিন পিতামাতাকে কষ্টের কথা জানায় নাই। সেই যে ১৮২৪ সালের জ্যৈষ্ঠ মাসে শ্বশুরালয়ে আসিয়াছে, তদবধি আর একবারও পিত্রালয়ে যাইতে পারে নাই। কয়েকবার তাহাকে লইবার জন্ত লোক আসিয়াছিল, স্বস্তি গালাগালি দিয়া তাহাদিগকে কিরাইয়া দিয়াছেন, এবং বলিয়াছেন যে আর ভুবনেশ্বরীকে পিত্রালয়ের মুখ দেখিতে দিবেন না। ভুবন সমুদায় সহ্য করিয়া রাখিয়াছে। কিন্তু জ্ঞানেন্দ্র দিন দিন যে মূর্ত্তি ধরিতেছে তাহা দেখিয়া তাহার চিন্তে অতিশয় ভয়ের সঞ্চার হইয়াছে। সে পিতামাতার নিকটে পলাইতে পারিলে বাঁচে, এই প্রকার

মনে হইতেছে। অনেক দিনের পর পিতামাতাকে নিজের দুঃখের সংবাদ দিবার জন্ত মন ব্যস্ত হইতেছে। কিন্তু কি করিয়া সংবাদ দিবে? নিজে লেখাপড়া জানে না, যে চিঠি লিখিবে। গৃহস্থের কুলবধু সংবাদ পায় না, উলোর কেহ নশিপুরের দিকে যায় কিনা। হাতে একটা পয়সা নাই, যে কোনও লোককে দিয়া সংবাদ পাঠায়, আর স্বস্তির অজ্ঞাতসারেই বা তাহা কিরূপে করে? জানিতে পারিলে স্বস্তি সাজার কিছু বাকি রাখিবেন না। ভুবনেশ্বরী ভাবিয়া ভাবিয়া কুল কিনারা কিছুই দেখিল না। অবশেষে জ্যেষ্ঠা বধু এক সন্ধান বলিয়া দিলেন। যত্ন নামে একটা বালক সর্বদা তাঁহাদের বাড়ীতে আসিত। সে স্কুলে পড়ে। বড়বৌ পরামর্শ দিলেন যে সেই যত্ন দ্বারা গোপনে পত্র লিখিয়া ডাকে ফেলিয়া দিলে নশিপুরের লোকে পাইতে পারেন। বড়বৌ এ বিষয়ে প্রধান উত্তোগী হইয়া একদিন রবিবার বৈকালে, গৃহিণীর অনুপস্থিতিকালে তাঁহার নিজের ঘরে যত্নকে ডাকিয়া ভুবনেশ্বরীর জবান পত্র লিখাইলেন। সে পত্র পরদিন যত্ন হাত দিয়া ডাকে দেওয়া হইবে, স্থির রহিল। একথা যে স্বস্তির কাণে কি প্রকারে গেল, তাহা বলা যায় না। তিনি সন্ধ্যার সময় ভুবনেশ্বরীকে জিজ্ঞাসা করিলেন, “যত্নকে বৈকালে কেন ডাকান হয়েছিল?”

ভুবন। সে ত রোজই আসে।

গৃহিণী। সে ত জানি। আজ তাকে ডাকিয়ে আনা হয়েছিল কিনা?

ভুবন। (বিস্মনাথ তর্কভূষণের কণ্ঠা মিথ্যা কথা কখনও বলে নাই।)

(ধীরভাবে) হাঁ হয়েছিল?

গৃহিণী। কেন?

ভুবন। একখান চিঠি লেখবার জন্তে।

গৃহিণী। কাকে?

ভুবন। বাবাকে।

গৃহিণী। আ মরি, মরি, বাপের বাড়ী যাবার সাধটা বুঝি আবার বেড়ে উঠেছে? তা মনে করো না, সে শুড়ে বালি। কোথায় সে চিঠি?

ভুবন। আমার কাছে আছে, কাল ডাকে দিতে হবে।

গৃহিণী। আর ডাকে দিয়ে কাজ নি, চিঠিখানা আন দেখি।

ভুবনেশ্বরী বিরক্তিসহকারে চিঠিখানা আনিয়া দিলেন। গৃহিণী বলিলেন, “থাক্ জ্ঞানেন্দ্র এলে পড়িয়ে দেখতে হবে।” ভুবনেশ্বরী জানিল, সে দিন একটা ফাঁড়ার দিন।

যথাসময়ে জ্ঞানেন্দ্র আসিয়া উপস্থিত। আজ সে মাতাল হইয়া আসে নাই বটে, কিন্তু জুয়া খেলিতে গিয়া হারিয়াট আশুক, বা কাহারও নিকট অপমানিত হইয়াই আশুক, তাহার পদার্পণেই বুঝিতে পারা গেল, সে দিন তাহাব মেজাজ অতিশয় গরম। মাহুঘের দয়া মায়া থাকিলে, এমন সময়ে, এমন ব্যক্তিকে আর সে চিঠি দেখায় না; কিন্তু মুখুষ্যে গৃহিণীর বধুদিগের প্রতি সে দয়া মায়া নাই; সূতরাং বাড়ীতে প্রবেশ মাত্র সে চিঠিখানি তিনি জ্ঞানেন্দ্রকে পড়িতে দিলেন। অবশ্য ইহা বলা নিম্প্রয়োজন যে তাহাতে জ্ঞানেন্দ্রের স্বভাব চরিত্রের কথা কিছু কিছু ছিল। সেই হৃদ্যন্ত দানবসমান যুবক তাহা দেখিয়া কি আর স্থির থাকিতে পারে? একখানি প্রকাণ্ড চেলা কাঠ লইয়া নিজ গৃহাভিমুখে ধাবিত হইল। গৃহিণী “ওরে মারিস্নে মারিস্নে” বলিয়া সঙ্গে চলিলেন বটে, কিন্তু তিনি গিয়া ধরিবার পূর্বেই প্রহার আরম্ভ হইয়াছে। ভুবনেশ্বরী প্রথমে হস্তের দ্বারা উত্তত কাঠের আঘাত হইতে আপনাকে রক্ষা করিবার চেষ্টা করিয়াছে, কিন্তু সজোরে সেই কাঠ যখন তাহার মস্তকের উপর পড়িল, তখন কেবল একবার—“মঁ—আঁ—আঁ” করিয়া একটা শব্দ হইল, তৎপরেই নীরব। গৃহিণী গিয়া দেখেন ভুবনেশ্বরী অচেতন

হইয়া যে তক্তপোষে বসিয়াছিল তাহাতেই পড়িয়া গিয়াছে, রক্ত তক্তপোষ ভাসিয়া যাইতেছে। গৃহিণী চীৎকার করিয়া উঠিলেন—“ওরে গেছেরে গেছে, ও হতভাগা করলি কি ? খুন করে ফেললি।” এই কথা শুনিয়া বড়বৌ, মেজবৌ উভয়ে ছুটিয়া আসিল। জ্ঞানেন্দ্র তখনও ক্রোধে ফুলিতেছে। ক্রমে জল ঢাল, জল ঢাল, বাতাস কর, বাতাস কর, বলিয়া গোল পড়িয়া গেল। পাশের বাড়ীর লোক দৌড়িয়া আসিল; মুখ্যে মহাশয় কোথায় বেড়াইতে গিয়াছেন, তাঁহাকে একজন দৌড়িয়া ডাকিতে গেল; মুখ্যে মহাশয় ছুটিয়া আসিলেন; নিকটে একজন লোক ছিলেন; তিনি একটু ডাক্তারি জানিতেন; তাঁহাকে ডাকিয়া আনা হইল। সে রাতে গুপ্তাষা যথেষ্ট হইল; কিন্তু সমস্ত রাত্রির মধ্যে ভুবনের চেতনা হইল না। পরদিন প্রাতে চেতনা হইল, কিন্তু দিন শেষ না হইতে হইতে জ্বর দেখা দিল। একে তাহার শরীর অনেক দিন হইতে দুর্বল হইতেছিল, তাহার উপরে এই আঘাত, তাহার দেহে আর সহিল না। জ্বর দিন দিন বাড়িতে লাগিল। মুখ্যে মহাশয় ব্যস্ত সমস্ত হইয়া, তাঁহার সাধ্যে যাহা হয়, এবং গ্রাম্য ডাক্তারের দ্বারা যত দূর হইতে পারে, করিতে লাগিলেন।

চতুর্থ দিবসে শঙ্কর নশিপুর হইতে আসিয়া উপস্থিত হইলেন। কে তাঁহাদিগকে সংবাদ দিয়াছে তাহা বলিলেন না। পরে জানা গেল, যে নশিপুরের একটী যুবক উলোতে নিজ ঋগুরাণ্যে আসিয়াছিল, পরদিন প্রাতে এই আঘাতের সংবাদ পাড়ায় ছড়াইয়া পড়িলে সে সেই দিনেই নশিপুরে শঙ্করকে ও কলিকাতায় গিরিশকে সংবাদ দিয়াছিল। শঙ্কর আসিয়াই ভুবনেশ্বরের চিকিৎসা করাইবার জন্ত রাণাঘাট হইতে একজন ভাল ডাক্তার আনাইলেন ও চিকিৎসাতে নিযুক্ত হইলেন। ষষ্ঠ দিবসে কলিকাতা হইতে হরচন্দ্র ও গিরিশ একজন ডাক্তার সঙ্গে করিয়া উপস্থিত।

তঁাহারা আসিয়া দেখিলেন জ্বর একটু কমিতেছে, এবং মধ্যে মধ্যে বে মূচ্ছা হইতেছিল, তাহা গিয়াছে। দুই একদিন পরেই সকলে ভুবনেশ্বরীকে কলিকাতায় লইয়া যাওয়া স্থির করিলেন। মুখুষ্য মহাশয় তখন প্রস্তুত, কিন্তু গৃহিণীর অভিপ্রায় নয়। তিনি অনেক প্রকার ওজর আপত্তি করিতে লাগিলেন, বলিলেন,—“এখন ত সেরে উঠেছে, আবার টানা হেঁচড়া করে নিয়ে যাওয়া কেন?” কিন্তু ভুবনেশ্বরীর আত্মীয়েরা কোনও আপত্তিই শুনিলেন না। স্থির হইল যে যখন ডাক্তার ও ঔষধ সঙ্গেই আছে, তখন নোকায় করিয়া কলিকাতায় লইয়া গেলে ভাল হয়। তাহাতে কয়েক দিন বিলম্ব হইবে বটে, কিন্তু পথে নোকাতে কয়েক দিন থাকাতে উপকার হইতে পারে। তদনুসারে নোকা করা হইল; যাত্রার সময় স্থির হইল। এত যে ব্যাপার হইতেছে, জ্ঞানেন্দ্রের দেখা সাফাৎ নাই। সে কোথায় ঘুরিয়া বেড়াইতেছে! যাত্রা করিবার সময়ে বোধ হয় কেহ তাহাকে তামাসা করিয়া বলিয়া থাকিবে, “তুই এখানে বেড়াচ্চিস, ওদিকে তোর স্ত্রীকে নিয়ে গেল।” সে এই কথা শ্রবণে দৌড়িয়া বাড়ীতে আসিয়া উপস্থিত। আসিয়াই ত হাঁক ডাক আরম্ভ করিল, ও যাহারা ভুবনেশ্বরীকে পাল্কীতে তুলিবার যোগাড় করিতেছেন, তঁাহাদের হাতে ধরিয়া বাধা দিতে লাগিল। ইহাতে কুপিত হইয়া হরচন্দ্র সজ্ঞারে তাহার নাকের উপরে এক ঘুসি মারিলেন। তাহাতে দুই নাক দিয়া দর দর ধারে রক্তধারা বহিতে লাগিল। সে মুখে হাত দিয়া বসিয়া পড়িল; গৃহিণী চীৎকার করিয়া কাঁদিয়া উঠিলেন; নশিপুরের লোকেরা তাহার কিছুতেই কর্ণপাত করিলেন না; ভুবনেশ্বরীকে পাল্কীতে তুলিয়া নোকাতে লইয়া গেলেন। এইটানা আশ্বিনের প্রথমে সংঘটিত হইল। নোকা কলিকাতায় পৌঁছিতে পৌঁছিতে ভুবনেশ্বরী অনেক স্থান হইল।

## বিংশ পরিচ্ছেদ

১৮৫৭ সালের পূজাও নশিপুরের বাড়ীতে মহা সমারোহে সম্পন্ন হইল। ভুবনেশ্বরী যে ভাবে পিত্রাণয়ে উপস্থিত হইয়াছিল, তাহা দেখিয়া তর্কভূষণ মহাশয়ের অন্তরে যে কি ক্রেশ হইয়াছে, তাহার বর্ণনা নিম্নয়োজন; তাহা সহজেই অমুমান করিতে পারা যায়। ভুবন বখন কলিকাতা হইতে নশিপুরের বাড়ীতে উপস্থিত হইল, তখন তাহার আকৃতি দেখিয়া ও তাহার মুখে তাহার যাতনার সমুদায় বিবরণ শুনিয়া সেই ধীর গম্ভীর বৃদ্ধেরও চক্ষে জল পড়িয়াছিল। বাহা হউক ভুবন যে বাঁচিয়া আসিয়াছে এজন্ত তিনি ঈশ্বরকে যথেষ্ট ধন্যবাদ করিলেন। সুতরাং দুই মাস পরে বখন শুনিলেন যে জ্ঞানেন্দ্রের পিতামাতা তাঁহাদের প্রতি ক্রোধ করিয়া পুত্রের আবার একটা বিবাহ দিয়াছে, তখন তিনি বিশেষ দুঃখ প্রকাশ করিলেন না। বলিলেন, “যাক্ আপদ গেল। কুলীনের কন্ডারা ত চিরজীবন পিত্রাণয়েই থাকে, হিন্দুর ঘরের বিধবারা ত চিরজীবন ব্রহ্মচর্যা করে, ভুবন না হয় তাই করিবে।” ভুবনের জন্ত তাঁহার প্রাণে যেমন একটু ক্রেশ থাকিল, তেমন একটা গুণের সংবাদ পাইয়া একটু সুখও হইল। পূজার পূর্বেই বারাণসী হইতে সংবাদ আসিল, যে গৌরীপতি বেদবেদান্তে পারদর্শী হইয়া সম্মানসূচক উপাধি প্রাপ্ত হইয়াছেন; তাঁহার যশঃসৌরভে কাশীধাম আমোদিত হইয়াছে; তিনি তথাকার পণ্ডিতনগরীর মধ্যে সর্বাগ্রগণ্য ব্যক্তি হইয়াছেন, এবং কাশীরাজ তাঁহাকে নিজ সন্মানপণ্ডিতের পদে বরণ করিয়াছেন।

এই সংবাদ তর্কভূষণ মহাশয়কে অতিশয় সুখী করিল। অনেক দিন হইতে তাঁহার মনোশেষ দশাটা কাশীতে যাপন করিবার ইচ্ছা

আছে। এবারে বুঝি সে ইচ্ছা পূর্ণ হয়। গৌরীপতি অনেক আগ্রহ সহকারে তাঁহাকে ও গৃহিণীকে ষাইবার জন্ত অনুরোধ করিয়া পত্র লিখিয়াছেন। গৌরীপতির অনুরোধে তাঁহার মনের সংকল্প দৃঢ় করিয়া দিয়াছে। কিন্তু তৎপূর্বে তাঁহার কিঞ্চিৎ কার্য্য অবশিষ্ট আছে। তিনি অনেক দিন হইতে একটি ইচ্ছা হৃদয়ে পোষণ করিয়া আসিতেছেন। বর্ষে বর্ষে গ্রীষ্মের সময় জলাভাবে তাঁহার বাসগ্রামের চতুষ্পার্শ্বের চাষা গ্রামের লোকের বিরূপ ক্রোধ হয়, তাহা তিনি লক্ষ্য করিয়া আসিতেছেন। অনেক দিন হইতে তাঁহার মনে এই বাসনা জন্মিয়াছে, যে একটু অর্থের সচ্ছল হইলেই মাঠের মধ্যে একটি বড় পুষ্কবিণী খনন করিয়া তাহা ঐ সকল গ্রামবাসী দরিদ্র লোকদিগের জন্ত উৎসর্গ করিবেন। এবার পূজা শেষ হইলেই সেই কার্য্যে হস্তার্পণ করিলেন। পাঁচখানি গ্রামের মধ্যস্থিত একটা মাঠের ধারে দশ বিঘা পতিত জমি ক্রয় করিলেন। শীতকালে জমি একটু শুকাইবা মাত্র খনন কার্য্য আরম্ভ হইল।

ওদিকে খনন কার্য্য আরম্ভ হইল, এদিকে কালীর মন্দিরে তদর্থ বিশেষ স্বস্ত্যয়ন চলিল। চৈত্র মাসের মধ্যে কার্য্য এক প্রকার শেষ হইল। বৈশাখের প্রারম্ভে তর্কভূষণ মহাশয় উক্ত ভূমিখণ্ডকে প্রাচীরের দ্বারা ঘিরিয়া একটি উদ্যান করিবার আয়োজন করিতে লাগিলেন। সে বিষয়ে একটু গোলযোগ ছিল। তিনি যে জমি ক্রয় করিয়াছিলেন, তাহার উপর দিয়া বহু বৎসর পূর্বে হইতে লোকে গতায়ত করিত। জমির ভাব গতিক দেখিলে বোধ হয়, বহুকাল পূর্বে তদুপরি কাহারও বসত বাটী ছিল। কিন্তু অন্যান্য ২৫৩০ বৎসর কাল লোকে ঐ ভূমিখণ্ডকে পতিত অবস্থাতে দেখিয়া আসিতেছে, ও তাহার উপর দিয়া গতায়ত করিতেছে। কাজেই ঐ ভূমিকে প্রাচীর দ্বারা আবদ্ধ করিবার সময় তাঁহাকে একটু ভাবিতে হইল। অবশেষে চিন্তা করিয়া স্থির

করিলেন যে, প্রাচীরের পার্শ্ব দিয়া লোকের গতায়ত করিবার জন্য কিছু জমি ফেলিয়া রাখিবেন। কিন্তু দেখিলেন যে দুই হাতের অধিক জমি রাখিতে গেলে প্রাচীরটাকে বাঁকাইয়া দিতে হয়, অথচ দুই হাত মাত্র জমি থাকিলে লোকের গতায়তের পক্ষে সুবিধা হইবে না। অবশেষে নিজ জমির পার্শ্বস্থ ভূমির অধিকারীকে ডাকাইয়া তাহার ভূমি হইতে দুই হাত ভূমি ক্রয় করিবার প্রস্তাব করিলেন। সে ব্যক্তি বলিল, “সে কি কথা, আপনি এত বড় একটা বাগান ও পুষ্করিণী লোকের জন্য দিলেন, আর আমি দুই হাত জমি দিতে পারব না, তার আবার দাম নিতে হবে? আমি দুই হাত জমি ছেড়ে দেব। দাম চাই না।” তর্কভূষণ মহাশয় ব্রাহ্মণ পণ্ডিত মাহুষ, সাদা সিদা লোক, তিনি তাহার মৌখিক কথা অবলম্বন করিয়াই কার্য্য করিতে লাগিলেন। বিষয়ী লোক হইলে ঐ ব্যক্তির কথার উপরে নির্ভর না করিয়া একটা পাকা লেখা পড়া করা ইয়া লইত। কিন্তু তাঁহার সরল বুদ্ধিতে তাহা যোগাইল না। কেহ কেহ পাকা লেখা-পড়ার কথা শ্রবণ করা ইয়া দিয়াছিল, তাহাতে তিনি বলিলেন,—“সে পয়ে হবে, তাড়াতাড়ি কি, ভদ্রলোকের ছেলে দুই হাত জমি দিয়ে কি আবার না বলবে?” তৎপরে তিনি সেই পথ দিয়া পার্শ্ববর্তী গ্রামের যে সকল লোক গতায়ত করিত তাহাদের অনেককে ডাকাইয়া ঐ প্রস্তাব উপস্থিত করিলেন। সকলেই আনন্দের সহিত তাঁহার পরামর্শে সম্মতি জানাইল। সুতরাং দুই হাত জমি ফেলিয়া রাখিয়া প্রাচীর গাঁথা আরম্ভ হইল।

এদিকে রামহরি মিত্র ও চিমে ঘোষের নিকট এই সংবাদ পৌছিল, যে তর্কভূষণ মাঠের মধ্যে এক বাগান করিতেছেন, তাহাতে সাধারণের রাস্তা ঘিরিয়া লইয়াছেন, ও তৎপরিবর্তে প্রাচীরের পাশ দিয়া রাস্তা দিয়াছেন। অমনি তাহারা এ বিষয়ে লাগিয়া গেল। যে ব্যক্তি রাস্তার



জন্ত দুই হাত জমি দিয়াছিল, তাহাকে ডাকাইয়া প্রথমে তিরস্কার, পরে প্ররোচনা দ্বারা তাহাকে সে প্রতিজ্ঞা ভঙ্গ করিবার জন্ত উৎসাহিত করিতে লাগিল। সে ব্যক্তি প্রথমে কিছুতেই স্বীকৃত হইল না, পরে জমিদার বাবুর ভয়ে ও আগ্রহে স্বীকৃত হইল। কি কি করিতে হইবে, কে মকদ্দমা উপস্থিত করিবে, সে জন্ত কি কি জোগাড় করা আবশ্যিক, প্রভৃতি সমুদায় বিষয় স্থির হইয়া রহিল।

তর্কভূষণ মহাশয়ের প্রাচীরও শেষ হইয়া গেল, আর অপর দিকে সেই ব্যক্তি বেড়া দিয়া নিজের জমি ঘিরিতে আরম্ভ করিল। তর্কভূষণ মহাশয় সংবাদ পাইয়া ঐ জমির মালিককে পুনরায় ডাকাইলেন, এবং এক্রূপ আচরণের কারণ জিজ্ঞাসা করিলেন। সে বলিল,—“আমি পরে ভেবে দেখলাম ও জমি ফেণে রাখলে আমার পোষাবে না।” তর্কভূষণ মহাশয় নিরুপায় হইয়া ঐ দুই হাত পরিমাণ ভূমি খণ্ডের দ্বিগুণ দাম দিতে চাহিলেন। সে কিছুতেই বিক্রয় করিতে সন্মত হইল না। বলিল, “আজ্ঞে, এ অনুরোধ করবেন না, আমি জমি বেচতে পারব না। দিতে পারতাম ত অমনি দিতাম। কিন্তু দিতে পারব না।” এই বলিয়া চলিয়া গেল।

ক্রোধে তর্কভূষণ মহাশয়ের শরীর ও মন আন্দোলিত হইতে লাগিল; কিন্তু কি করিবেন, নিরুপায়। মনে করিলেন, যাহাদের উপকারার্থে ঐ বাগান ও পুষ্করিণী উৎসর্গ করা হইয়াছে, তাহারা ইহা হৃদয়ঙ্গম করিতে পারিবে এবং ঐ দুই হস্ত পরিমাণ পথ দিয়াই কোনও প্রকারে গতায়াত করিবে। তাঁহার পুরাতন শক্রগণ যে পশ্চাতে লাগিয়াছে, তখনও তিনি তাহা বুঝিতে পারেন নাই। তাহা হইলে এক্রূপ আশা করিতেন না। বৈশাখমাসের অর্দ্ধেক অতীত হইতে না হইতে পার্শ্ববর্তী গ্রামের কয়েকজন প্রজা আদালতে তর্কভূষণ মহাশয়ের নামে এই বলিয়া নালিশ উপস্থিত করিল, যে তিনি সাধারণের বহুদিনের চলিবার পথ ঘিরিয়া নিজে

বাগানে লইয়াছেন। তিনি উত্তর দিলেন যে, প্রাচীরের পার্শ্বে রাস্তার  
অল্প জমি রাখিয়া পাশ্চাত্য গ্রামের প্রজাদের সম্মতিক্রমে বিরিয়া লওয়া  
হইয়াছে। বাদিগণ উত্তর করিল, যে রাস্তা দিয়াছেন সে রাস্তাতে  
যাইতে হইলে অনেক বাঁকিয়া যাইতে হয়, বিশেষতঃ যে জমি দিয়াছেন,  
তাহা যথেষ্ট নহে, গরু, হাল, খড়ের বোঝা প্রভৃতি লইয়া সে রাস্তা দিয়া  
যাওয়া সম্ভব নহে।

বিচারক তর্কভূষণ মহাশয়ের সদভিপ্রায় বুঝিতে পারিলেন। কিন্তু  
তাহার হাত কি? সাধারণের এতকালের যাতায়াতের রাস্তা বাহাল  
রাখিতে তিনি আইনানুসারে বাধ্য। অবশেষে বাদিদের সম্মতিক্রমে এই  
রায় হইল, যে তর্কভূষণ মহাশয়কে প্রাচীর ভাঙ্গিয়া লইয়া আরও দুই হাত  
জমি রাস্তার জন্য দিতে হইবে।

যে দিন এই মকদ্দমাতে বাদীদিগের জয় হইল, সে দিন ঢাক ও  
কাড়ার শব্দে নশিপুর গ্রাম কাঁপিয়া যাইতে লাগিল। সন্ধ্যার পর একদল  
লোক তর্কভূষণ মহাশয়ের ভবনের দ্বার দিয়া বাদ্যোদ্যম সহকারে, তাঁহাকে  
নাম ধরিয়া ঠাট্টা ও বিক্রপ করিতে করিতে চলিল। শব্দর দেগিলেন সে  
দলের মধ্যে চিমে ঘোষ ও জ্বরলাল অগ্রগণ্য। দলের মধ্যে কেহ শিয়াল  
ডাকিতেছে; কেহ বিড়াল ডাকিতেছে; কেহ কুকুরবৎ চীৎকার  
করিতেছে; এবং কেহ কেহ বিকৃত অঙ্গভঙ্গী পূর্বক নাচিয়া তর্কভূষণ  
মহাশয়ের ও তাহার পরিবারস্থ ব্যক্তিগণের নামে ছড়া গাইতেছে। তর্ক-  
ভূষণ মহাশয় না হইলে, সে দিন অল্প কেহ শব্দরকে ও ছাত্রগণকে  
ধরিয়া রাখিতে পারিত না। তর্কভূষণ মহাশয় বলিলেন,—“নৌচের সঙ্গে  
তোমরাও নৌচ হবে? উহাদের যেরূপ প্রকৃতি সেইরূপ আচরণ করছে,  
করুক।” কাজেই সকলকে নিরস্ত হইতে হইল। কিন্তু যে রক্তারক্তি  
নিবারণের আশায় তিনি স্বীয় গৃহের যুবকগণকে নিষেধ করিয়া রাখিলেন,

সে রক্তারক্তি নিবারণ হইল না। উক্তদল তাঁহার ভবন অতিক্রম করিতে না করিতে একটা দাঙ্গা হান্সামার কলরব শ্রুত হইল। যেন বোধ হইল মার মার শব্দ করিয়া কোথা হইতে একদল লোক ছুটিয়া আসিয়া পড়িল। এ বাড়ীর সকলে দেখিতে যাইতে চাহিলেন, কিন্তু তর্কভূষণ মহাশয় নিষেধ করিয়া রাখিলেন। পরে শুনিলেন হাঁসের দলের যুবকগণ ইহাদের গহিতাচরণের কথা শুনিয়া ছুটিয়া আসিয়া পড়িয়াছিল, এবং তাহাদের সঙ্গে চিমু ঘোষ ও জহরলাল প্রভৃতির ভয়ানক দাঙ্গা হইয়া গিয়াছে। চিমু ও জহরলাল উভয়েই গুরুতর আঘাত প্রাপ্ত হইয়াছে।

পরদিন প্রাতেই সংবাদ আসিল যে, প্রতিপক্ষগণ রাত্রিকালের মধ্যে মাঠের বাগানের প্রাচীর ভাঙ্গিয়া দিয়াছে, প্রাচীরের ইট পুকুরের মধ্যে ফেলিয়াছে, গাছ পালা যাহা বসান হইয়াছিল, সমুদায় নষ্ট করিয়াছে। এই সংবাদ শুনিয়া শঙ্কর ক্রোধে অগ্নি সমান হইয়া গেলেন; যে যে লোক সে কাজ করিয়াছে, তাহা অনুসন্ধানে জানিতে পারিলেন; এবং তাহাদের নামে ফৌজদারী আদালতে নালিশ করিবার জ্ঞাত ব্যগ্র হইয়া উঠিলেন। তর্কভূষণ মহাশয় তাহাকে নিবারণ করিয়া রাখিলেন; বলিলেন,—“সেই ত আমাদের পাঁচীর ভেঙ্গে গাঁথতেই হোত, ওদের ছোট মন, এইটুকু ক্ষতি করে যদি সন্তুষ্ট হয় হোক।” আবার প্রাচীর সরাইয়া দুইহাত জমি রাখিয়া গাঁথা হইল। তাহাতে প্রাচীরটী বাকা হইয়া গেল, কিন্তু উপায় কি ?

তর্কভূষণ মহাশয় স্বীয় পরিবারস্থ ব্যক্তিদিগকে মামলা মকদ্দমা হইতে নিবৃত্ত করিয়া রাখিলেন বটে, কিন্তু মামলার হাত এড়াইতে পারিলেন না। তাঁহার ভবনের সম্মুখে যে দাঙ্গা হইয়া গিয়াছিল, যাহার ত্রিসীমার মধ্যে তিনি ছিলেন না, সেই দাঙ্গার জ্ঞাত তাঁহাকে ফৌজদারী আদালতে আসামোশ্রেণী-গণ্য হইতে হইল।

বৃদ্ধ ব্রাহ্মণের শেষ দশাতে এ কি নিগ্রহ ! ব্যাপারটা এট ! দাঙ্গার পরেই জমিদার রামহরি মিত্র মনে করিলেন উত্তম হইয়াছে, তিনি এক গুলিতে দুইটা পাখী মারিবেন। হাঁসের দলের প্রতি তাঁহার আক্রোশ ছিল। পূর্বের জহরলালের পথপার্শ্বে অচেতন হইয়া পড়িয়া থাকার যে বিবরণ প্রদত্ত হইয়াছে, তাহা ঐ হাঁসের দলের দ্বারাই সংঘটিত হইয়াছিল। তাহারাই রজনীর অন্ধকারে জহরলালের গলে বস্ত্র দিয়া প্রহার করিয়াছিল। জমিদার বাবু বহাদুর পরে অনুসন্ধান দ্বারা তাহা জানিতে পারিয়াছিলেন। তদবধি এই দলের প্রতি তিনি জাতক্রোধ হইয়া রহিয়াছেন। তর্কভূষণ মহাশয়ের প্রতি তাঁহার বিদ্বেষপরায়ণ হইয়া থাকিবারও যথেষ্ট কারণ আছে। বিষয়ী লোকের কাণে পাক দিয়া দুই সহস্র টাকা লওয়া, আর সর্পের লেজ ছিঁড়িয়া লওয়া, দুই এক কথা। সেই দুই হাজার টাকার কথা রামহরি কখনও ভুলিবেন না। স্মরণে দাঙ্গার পরেই তিনি ভাবিলেন, একসঙ্গে দুই শত্রু দলন করিবেন। অতএব জহরলালকে বাদী এবং তর্কভূষণ মহাশয়, শঙ্কর ও হাঁসের দলের অগ্রণী স্বরূপ চারি ব্যক্তিকে প্রতিবাদী করিয়া, ফৌজদারীতে মকদ্দমা রুজু করিয়া দিলেন, এবং চিমু ঘোষকে ডাকাইয়া তাহার পক্ষের আর একটা মকদ্দমা হাতে রাখিলেন। এটা কিছু না হইলে সেটা ধরা হইবে। যে কোন প্রকারে গৌরব বৃদ্ধ ব্রাহ্মণকে জয় করিতে হইবে।

মকদ্দমার সমন পাইয়া তর্কভূষণ মহাশয় আশ্চর্য্যান্বিত হইলেন, তাঁহার নামে নালিশ কি প্রকারে হইল ? তিনি ত বাড়ী হইতে বাহির হন নাই। কোন্ সাক্ষী বলিতে পারিবে যে তিনি দাঙ্গার মধ্যে ছিলেন ? কিন্তু একরূপ চিন্তা করাই বৃথা ! পল্লীগ্রামের এই জমিদার বাবুদের অসাধ্য কৰ্ম্ম নাই ! তাঁহারা সত্যকে মিথ্যা, মিথ্যাকে সত্য, দিনকে

রাত, রাতকো দিন করিতে পারেন। সাক্ষীরই বা অপ্রতুল কি ? ইংরাজের আদালতের স্থিতির সঙ্গে সঙ্গেই এমন একদল লোকের স্থিতি হইয়াছে, মিথ্যা সাক্ষ্য দেওয়া যাহাদের ব্যবসায়। বিশেষ, বাবুদের অনুরোধে গ্রামের কোন্ লোক না মিথ্যা সাক্ষ্য দিবে ? যাহা হোক, তর্কভূষণ মহাশয় সমন পাইয়া কিছুই চঞ্চলতা প্রকাশ করিলেন না ; ধীর ভাবে একটু হাসিয়া বলিলেন,—“ধর্ম্মভয় যাহাদের নাই, তাহারা করিতে পারে না এমন গর্হিত কর্ম্মই নাই।”

ওদিকে গ্রামের লোকে যখন জানিতে পারিল যে, বিনা অপরাধে তর্কভূষণ মহাশয়কে ফৌজদারী আদালতে আসামী করিয়াছে, তখন আবালবৃদ্ধ-বনিতা সকলেই ক্ষেপিয়া একেবারে আগুন হইয়া উঠিল। সকলেই ছি ছি করিতে লাগিল। ব্রাহ্মণগণ দলে দলে জমিদার বাবুর নিকটে গিয়া এমন কার্য্য হইতে প্রতিনিবৃত্ত হইবার জন্ত অনুরোধ করিতে লাগিলেন। তর্কভূষণ মহাশয়ের বাড়ীতে সর্বদাই চতুষ্পার্শ্ব গ্রামের চাষা লোকের ভিড়। তাহারা জানিতে আসিয়াছে এ সংবাদ সত্য কি না ? অবশেষে দলে দলে প্রজা জমিদার বাবুর কাছারিতে গিয়া এমন কাজ হইতে নিবৃত্ত হইবার জন্ত প্রার্থনা জানাইল। রামহরি কাহারও কথার প্রতি কর্ণপাত করিলেন না ; উপহাস করিয়া ব্রাহ্মণদিগকে বিদায় করিলেন, এবং গরিব প্রজাদিগকে কটুক্তি করিয়া তাড়াইয়া দিলেন।

যথাসময়ে আদালতে মকদ্দমা উপস্থিত হইল। তর্কভূষণ মহাশয় যখন এজলাসে প্রবেশ করিলেন, তখন তাঁহার প্রশান্ত, গভীর ও পবিত্র মুখশ্রীর প্রতি দৃষ্টিপাত করিয়া কাহারও অনুভব করিতে বাকি থাকিল না যে, তিনি সে অভিযোগের পাত্র নছেন। তাঁহার নাম সকলেই শুনিয়াছিল, সুতরাং আদালতের মকদ্দমা-ব্যবসায়ী লোকদিগেরও কোপাঘি

অজলিত হইয়া উঠিল। তাঁহার বিক্রমে মিথ্যা সাক্ষ্য দিবার জন্য যাহারা আসিয়াছিল, তাহারা পাকা জালিয়াত, মিথ্যাসাক্ষ্য-ব্যবসায়ী, অনেকবার অনেক পাকা উকীলের জেরাতে উত্তীর্ণ হইয়াছে; তথাপি, কি আশ্চর্য্য চরিত্রবান্ লোকের চরিত্রের প্রভাব। তাহারা একে আর বলিয়া, হাশ্রুভাজন হইয়া, আদালত হইতে বাহির হইয়া গেল। এদিকে নশিপুর গ্রামের অবস্থা এক্ষণে যে সাক্ষীর কয়েকদিন আর গ্রামে ফিরিতে সাহসী হইল না। তর্কভূষণ মহাশয় সম্পূর্ণে নিরপরাধ বলিয়া প্রমাণিত হইয়া ফিরিয়া আসিলেন। লোকের আনন্দের সীমা রহিল না। কিন্তু তাঁহাকে যে বৃদ্ধবয়সে ফৌজদারী আদালতে আসামী হইয়া দাঁড়াইতে হইল, ইহা ভাবিয়া অনেকে অশ্রুপাত করিল। হাঁসের দলের অগ্রণী-দিগের কিঞ্চিৎ সাজা হইল।

গ্রামের লোকের মনের ভাব দেখিয়া চিমু ঘোষ আর সংকলিত মকদ্দমা তুলিতে সাহসী হইল না।

এই সকল গোলমাল চুকিয়া গেলেই তর্কভূষণ মহাশয় কাশীযাত্রার আয়োজন করিতে লাগিলেন। কয়েকদিন রাত্রে শঙ্করকে বিষয়-বিভব সংক্রান্ত সমুদায় পরামর্শ দিলেন; গৃহ ও পরিবার রক্ষাদি সম্বন্ধে অনেক উপদেশ দিলেন; কৈলাস চক্রবর্তীর টাকা তাঁহার হস্তে অর্পণ করিলেন; দাসদাসীদিগকে প্রচুর পরিমাণে পারিতোষিক বিতরণ করিতে লাগিলেন; গ্রামের যাহাদের বাটীতে কখনও পদার্পণ করেন নাই, তাহাদেরও গৃহে গিয়া বিদায় লইলেন; সমাগত চাষা লোকদিগকে মিষ্ট ভাষায় তুষ্ট করিয়া বিদায় করিলেন। তৎপরে পূজার পূর্বে শুভদিনে গৃহিণী, ভুবনেশ্বরী ও সেক্সবৌকে সঙ্গে লইয়া কাশীযাত্রা করিলেন। সেদিন গ্রামের অনেক লোক কাদিতে কাদিতে ও চক্ষু মুছিতে মুছিতে প্রায় এক ক্রোশ পথ তাঁহার সঙ্গে গিয়াছিল। বিশ্বনাথ তর্কভূষণ এ জীবনের মত বঙ্গদেশ

পরিভ্রাণ করিয়া গেলেন, নশিপুর গ্রাম মধ্যমণিহীন ছিন্ন মালার আশ্রয় পড়িয়া রহিল।

তর্কভূষণ মহাশয়ের কাশীখাত্রার অল্পদিন পরেই শিবচন্দ্র বিজ্ঞানরত্ন মহাশয়ের ভবনে যে যে পরিবর্তন ঘটয়াছিল, তাহার কিঞ্চিৎ বিবরণ দেওয়া যাইতেছে। তিনি যে বিজয়া ও হরচন্দ্রের প্রতি বড় প্রসন্ন নহেন, তাহা সকলেই এক প্রকার অনুভব করিতে পারিয়াছেন। পঞ্চ ও গোবিন্দকে তাড়াইয়া দেওয়ার অন্ততর উদ্দেশ্য এই, উভয়কে দমন করা। কিন্তু তাহার বিপরীত ফল ফলিয়াছে। নবরত্ন সভার অগ্রগণ্য-ব্যক্তিদিগের সহিত বিজয়া ও হরচন্দ্র উভয়ের ঘনিষ্ঠতা জন্মিয়াছে। কলিকাতাতে আসার পর এই কয়েক বৎসরে বিজয়ার মনে অনেক পরিবর্তন ঘটয়াছে। পূর্বাপেক্ষা তাঁহার প্রকৃতির গাভীর্ষ্য ও চিন্তাশীলতা কিঞ্চিৎ বাড়িয়াছে। ঈশ্বরারাদনা তাঁহার নিত্যকর্ম্য হইয়াছে। তাঁহার মুখের উপর ভক্তির গাঢ়তা ও হৃদয়ের পবিত্রতাজ্বলিত এমন এক প্রকার আভা পড়িয়াছে, যাহা দেখিলেই স্বতঃই সম্মমের উদয় হয়। যে সময়ের কথা বলিতেছি, এই সময়ে তাঁহার অন্তরে তিনটী ভাব প্রবল দৃষ্ট হইতেছে। প্রথম, নশিপুরে থাকিতে তিনি ধর্ম্মের যে উদার ভাব হৃদয়ে ধারণ করিয়াছিলেন, পাঠ চিন্তা আলোচনা সর্বোপরি ঈশ্বরারাদনা দ্বারা তাহা উজ্জ্বলতা প্রাপ্ত হইয়াছে। তিনি যতই আধ্যাত্মযোগের রসাস্বাদন করিতেছেন, ততই সর্বপ্রকার ক্ষুদ্র ও পরিমিত ভাবের পূজাকে ছেলেখেলা বোধ হইতেছে। কেবল তাহা নহে, পূর্বে এরূপ পূজাতে তিনি আপত্তি করিতেন না, এক্ষণে অবিধেয় বলিয়া অনুভব করিয়াছেন। হয়ত অনেকে বলিবেন ইহা তাঁহার নবরত্ন সভার সভ্যদিগের সহিত সংস্রবের ফল। জানি না, কিন্তু এই পরিবর্তনটী তাঁহার অন্তরে ঘটয়াছে। দ্বিতীয়তঃ, নবরত্ন সভার সভ্যদিগের সংস্রবে আসিয়া তাঁহার মনে পরহিতকর

কার্যে আপনাকে অর্পণ করিবার বাসনা অত্যন্ত প্রবল হইয়াছে। যে ভাবে দিন যাইতেছে, ইহা তাঁহার ভাল লাগিতেছে না। কোন ভাল কার্যে আপনাকে না দিগে যেন মনটা সন্তুষ্ট হইতেছে না। তৃতীয়তঃ, কল্লার বিবাহের পর অমুতাপের মুহূর্ত্তে এই প্রতিজ্ঞা তাঁহার অন্তরে উদিত হইয়াছে, যে তিনি যাহা কর্তব্য ও ঈশ্বরের আদেশ বলিয়া অনুভব করিবেন, তাহা হটতে আপনাকে বিচ্যুত হইতে দিবেন না। এই তিনটি ভাব হৃদয়ে ধারণ করিয়া তিনি তদনুসারে কার্য্য করিয়া চলিয়াছেন।

এই কয়েক বৎসরের মধ্যে হরচন্দ্রের বিশেষ উন্নতি হইয়াছে। ১৮৫৭ সালের প্রারম্ভে বুক ক্যাপিং নামক বিজ্ঞাতে পরীক্ষা দিয়া তিনি কোন গবর্ণমেন্ট-আপিসে ৮০ টাকা বেতনের একটা কর্ম্ম পাইয়াছেন। বেতন পাইলেই তিনি সমস্ত টাকা জ্যোষ্ঠের হস্তে অর্পণ করেন। বিদ্যারঙ্গ মহাশয় তাহা হইতে ৪০ টাকা লইয়া অবশিষ্ট ৪০ টাকা হরচন্দ্রের নিজ ব্যয়ের নিমিত্ত প্রত্যর্পণ করেন। এইরূপ নিয়মে কার্য্য চলিতেছে। হরচন্দ্রের জ্ঞান-পিপাসা অতিশয় প্রবল। উক্ত ৪০ টাকা হইতে ১২ টাকা দিয়া তিনি একটা কালেক্টরের উচ্চশ্রেণীর ছাত্রকে নিযুক্ত করিয়াছেন। তাহার সহিত প্রতি রাত্রে দুই ঘণ্টা করিয়া ইংরাজী পড়েন। ৮ টাকা দিয়া একজন সংস্কৃতজ্ঞ পণ্ডিতকে নিযুক্ত করিয়াছেন। তাঁহার নিকট প্রাতে সংস্কৃত পড়েন। অবশিষ্ট ২০ টাকার মধ্যে প্রায় প্রতি মাসে ১০ টাকার নূন পুস্তক ক্রয় করিয়া থাকেন। পুস্তক ক্রয় করা ও ভাল করিয়া বাধান তাঁহার একটা বাতকের মধ্যে। এইরূপে জ্ঞানালোচনাতে তাঁহার সমুদায় সময় অতিবাহিত হইয়া যাইতেছে। তিনিও নবরত্নের সভ্যদিগের সংস্রবে আসিয়া দিন দিন তাহাদের ভাব প্রাপ্ত হইতেছেন।

এই কয়েক বৎসরের মধ্যে গিরিশচন্দ্র কালেক্স হইতে উত্তীর্ণ হইয়া ১০০ এক শত টাকা বেতনে একটা ডেপুটী ইন্স্পেক্টারি কর্ম্ম পাইয়াছেন।



তাঁহার স্বভাব-চরিত্র নশিপুরের পরিবারস্থ ব্যক্তিগণেরই অনুরূপ ; এ সময়ের কোনও দোষই তাঁহাতে নাই। তাঁহার পিতৃ-মাতৃভক্তি বিশেষ প্রশংসনীয়। তিনি প্রাতে উঠিয়া সন্ধ্যাত্রে পিতামাতার চরণে প্রণাম না করিয়া কোনও কার্যে হস্তার্পণ করেন না। গিরিশচন্দ্র, সুপণ্ডিত ও বুদ্ধিমান, পাশ্চাত্য জ্ঞানবিজ্ঞানের অধিকাংশ গ্রন্থই তিনি পড়িয়াছেন ; কিন্তু তাহাতে তাঁহাকে পাশ্চাত্য-ভাবাপন্ন না করিয়া বরং আরও অধিক পরিমাণে প্রাচ্য-ভাবাপন্ন করিয়াছে। তিনি প্রথর বুদ্ধ ও পাশ্চাত্য জ্ঞানের সাহায্যে সনাতন হিন্দুধর্ম ও রীতি-নীতির বিজ্ঞানসম্মত ব্যাখ্যা করিয়া আপনায় মনকে গড়িয়া লইয়াছেন, এবং যেখানে যান, তাহা প্রচার করিতে ভাল বাসেন। এমন কি তিনি বিজয়া ও হরচন্দ্রকে বলিয়াছেন যে, সামাজিক ও পারিবারিক ধর্ম এবং রীতিনীতি সম্বন্ধে তাঁহার দুইখানি গ্রন্থ লিখিবার ইচ্ছা আছে। তিনি নবরত্ন সভার ঘোর বিরোধী ; কিন্তু তাহা বলিয়া কাহারও প্রতি বিদ্বেষপরায়ণ নহেন।

তর্কভূষণ মহাশয়ের কাশীযাত্রার দুই এক মাস পরেই এক দিন বিদ্যারত্ন মহাশয় সন্ধ্যার পর রাজবাড়ী হইতে ঘরে আসিতেছেন, এমন সময় শুনিতে পাইলেন যে বিজয়ার ঘরে বিজয়া, হরচন্দ্র ও গিরিশ তিন জনে খুব তর্ক চলিয়াছে। শুনিবামাত্র তিনি অন্ধকারে এক পার্শ্বে দাঁড়াইয়া শুনিতে লাগিলেন। তাঁহার জ্ঞানিতেন সে দিন বিদ্যারত্ন মহাশয়ের অনেক রাতে বাড়ী আসিবার কথা, সুতরাং তিন জনে নিশ্শঙ্কচিত্তে মন খুলিয়া তর্ক করিতেছেন। বিচারের বিষয় কালী-পূজা। হরচন্দ্র বলিয়াছেন, কালী অনার্য্য আদিম বর্বর অধিবাসীদিগের অর্থাৎ রাক্ষসদের দেবতা ছিল ; নতুবা নরবলি নরশৃগু নর-কপাল প্রভৃতিতে এত আস্থা কেন ?

গিরিশ। গুন কাকা, কালীর ভিতরে কত বড় একটা গভীর অর্থ আছে, তা দেখলে না ?

হরচন্দ্র। গভীর অর্থটা কি ?

গিরিশ। কালী হলো কাল, Time, Time; কাল অনন্ত; বাহা অনন্ত তাহা নীল; দেখ সমুদ্র নীল, আকাশ নীল, অতএব কালীও নীল। তার পরে দেখ, কালের তিন ভাগ আছে, ভূত, বর্তমান ও ভবিষ্যৎ; কালীরও দেখ তিন ভাগ; পদদ্বয়, মধ্যভাগ ও উত্তমাস্ত্র। অতীত কালের বিষয় চিন্তা করিলেই দেখিতে পাইবে, যে সকল প্রকার ঘটনার মধ্য হইতেই একটা মঙ্গলকর কিছু বাহির হইয়াছে; এমন যে ফ্রেঞ্চ রেভোলিউশন, তাহারও চরম ফল মঙ্গল। অতএব দেখ, কালীর পদতলে শিব, অর্থাৎ মঙ্গল। আর কালের বর্তমানের প্রতি দৃষ্টি করিলে দেখিবে, কেবল বিবাদ, কলহ, বিদ্বেষ, রক্তপাত; অতএব দেখ, কালীর মধ্য ভাগে নরমুণ্ড ও নরহস্তমালা; কালের ভবিষ্যতে আশা; কাল হুঃখশোকার্ত্ত জীবকে আশীর্বাদ-হস্ত তুলিয়া সর্বদা বলিতেছে—“অপেক্ষা কর, দৈর্ঘ্যাবলম্বন কর, হুঃখের পর সুখের দিন আসিতেছে।” অতএব দেখ, কালীও আশীর্বাদের হস্ত তুলিয়া রহিয়াছেন। কালী ত একটা রূপক, একটা চমৎকার সুন্দর রূপক; বাহারা প্রচলিত করিয়া ছিলেন তাঁহাদের উদ্দেশ্য বোধ হয় এই ছিল যে, কালরূপী অনন্তের ধ্যান করিয়া মানুষ আপনার হৃদয়কে সেই অনন্তে লীন করিবে।

হরচন্দ্র। (অট্টহাস্ত করিয়া) সাবাস্ গিরিশ! বুদ্ধিমান বটে, কিন্তু জিজ্ঞাসা করি কালীমূর্ত্তির প্রথম কল্পনা যারা করেছিল, তারা কি সত্যই এই ভাবে করেছিল ?

গিরিশ। কে বলিল করে নাই? আর করেছিল কি না তা আমার ভাব্য প্রয়োজন কি? আমি ত এই ভাবে নিতে পারি ?

হরচন্দ্র । যেটাকে তুমি রূপক বললে, তাতে ভক্তির উদয় হবে কেন ? তার পূজা কি সম্ভব ? আমায় ত বোধ হয়, তুমি ব্রহ্মজ্ঞানীদের অপেক্ষাও পৌত্তলিকতার শত্রু ।

গিরিশ । কেমন করে ?

হরচন্দ্র । তা নয় ? তারা পৌত্তলিকতাকে একটা জিনিষ না ভাবলে আর তার সঙ্গে লড়াই করতে যায় না ; তুমি বলছ, “বৃথা কার সঙ্গে লড়াই কর ? ওসব রূপক ।” ভেবে দেখ দেখি কথাটা কিরূপ দাঁড়াল ।

গিরিশ । তা বললে কি হয় ; যে জিনিষগুলো আছে, তাকে ত উন্নত জ্ঞানের সঙ্গে মিলিয়ে নিতে হবে ; নতুবা এখনকার লোকে নেবে কেন ?

হরচন্দ্র । কি বলবো, বাবা দেশে নাই ! তিনি যদি তোমার এরূপ ব্যাখ্যা শুনতেন, তা হলে তোমাকে বিলক্ষণ শিক্ষা দিতেন ।

গিরিশ । কেন, কি করতেন ?

হরচন্দ্র । তোমার গালে ঠাস্ করে একটা চড় মেরে বলতেন. আমার সম্মুখ হ’তে উঠে যা, কালী রূপক ? এত বড় আশ্পর্ক ! আমরা বাপু সোজাসুজি বুঝি, সোজাসুজি বলি ; আমরা বলি, এরূপ পূজার দ্বারা দেশের মহানিষ্ঠ হয়েছে ।

গিরিশ । তোমরা যে একটা কথা ভুলে যাও ; এই পুতুলগুলোকে ত এই ভাবে দেখলেই হয় যে এগুলো Repositories of human reverence.

বিজয়া । গিরিশ, কি বললে ? ও কথাটার অর্থ কি ?

গিরিশ । ঐ সকল প্রণালীর দ্বারা বংশ-পরম্পরাক্রমে মানবের ভক্তিশ্রোত প্রবাহিত হয়েছে । তাদের সমক্ষে প্রণত হলে মানবের ভক্তিবৃদ্ধির নিকট প্রণত হওয়া হয় ।

হরচন্দ্র । এটা বাপু বুঝতে পারলাম না ; যাকে সত্য ভাবি না, তার নিকট প্রণত হব কিরূপে ?

এমন সময়ে বিজ্ঞানরত্ন মহাশয় গিরিশকে ডাকিলেন,—“গিরিশ, এদিকে শোন্।” গিরিশ উঠিয়া গেলেন। হরচন্দ্র চুপে চুপে বলিলেন,—“যাঃ এইবারেই সর্বনাশ! বড়দা বোধ হয় আমাদের কথাবার্তা সব শুনেছেন।”

বিজয়া । শুনলেই বা, তা আর ঢাক ঢাক শুড়্ শুড়্ কি ? অজ্ঞায় কথাটা তাকছু হয় নি।

বিজ্ঞানরত্ন মহাশয় সায়ংসন্ধ্যা সমাপন করিয়াই হরচন্দ্রকে ডাকিলেন—“হর”।

হরচন্দ্র । আজ্ঞে।

বিজ্ঞানরত্ন । এ দিকে এস দেখি। (হরচন্দ্র নিকটস্থ হইলেন।) তোমার এ রকম মত শত হলো কেন ? তুমিও ওদের সঙ্গে পড়ে বয়ে গেলে ?

হরচন্দ্র । কি রকম মত শত ?

বিজ্ঞানরত্ন । কেন আমি কি শুনিনি ? এইমাত্র তোমাদের খুব বিচার হচ্ছিল। আমি সমুদায় শুনেছি।

হরচন্দ্র । ও একটা তর্ক হচ্ছিল, গিরিশের কালীর ব্যাখ্যা শুনে আমরা হাসছিলাম।

বিজ্ঞানরত্ন । শেষকালটায় একেবারে বয়ে গেলে, পিতাপিতামহের নামটা ডোবাতে বসলে ?

হরচন্দ্র । বড়দা, আপনি কি বলছেন ? মানুষ যদি প্রাণপণে ভাল হবার চেষ্টা করে, তাকে কি বয়ে যাওয়া বলে ? তা হলে কি পিতা-পিতামহের নাম ডোবে ?

বিজ্ঞারত্ন। (অতিশয় বিকৃতস্বরে) হী! ভাল হবার চেষ্টা করে।  
ছাই ভাল হবার চেষ্টা! এর চেয়ে তুমি আগে যা ছিলে তা ছিল ভাল।

হরচন্দ্র। (অতিশয় দুঃখিতভাবে) বড়দা, এ কথাটা আপনি মনে থেকে বলছেন না।

বিজ্ঞারত্ন। মনে থেকে বলছি বৈ কি?

হরচন্দ্র। তবে আর আমি কথা কব না। আপনি ক্রোধবশতঃ  
কি বলছেন ভেবে দেখছেন না। (বলিয়া নীরব)

বিজ্ঞারত্ন। ঐ ছোট পিসীই তোমার মাথা ধেলে। পিছনে কতক-  
গুলো ছোঁড়া জুটেছে, আমি তাদের একেবারে দেখতে পারিনি। (না  
হরচন্দ্র না বিজ্ঞা কেহ আর কোনও কথাই বলিলেন না।)

তৎপর দিনের পর দিন চলিয়া যাইতে লাগিল। বিজ্ঞারত্ন মহাশয়  
আর বিজ্ঞা কি হরচন্দ্র কাহারও সহিত বা ক্যালাপও করেন না।  
হরচন্দ্র পর মাসের প্রথমে টাকাগুলি আনিয়া গিরিশের হাতে দিয়া  
বিজ্ঞারত্ন মহাশয়ের নিকট পাঠাইয়া দিলেন। তিনি টাকাগুলি ছুঁড়িয়া  
ফেলিয়া দিয়া বলিলেন—“চাই না ওর টাকা, ওর যা ইচ্ছে করুক গিয়ে।”  
হরচন্দ্র বিপদে পড়িলেন। নিজে একবার গিয়া বলিলেন—“বড়দা, টাকা  
গুলি নিন, তা না হলে আমি মনে বড় ক্লেশ পাব।”

বিজ্ঞারত্ন। পেলেই বা ক্লেশ? আমি তোমার টাকা নিতে পারবো  
না, তুমি শঙ্করের কাছে পাঠাও।

হরচন্দ্র। তবে কি আপনার ইচ্ছে, আমি এখানে না থাকি?

বিজ্ঞারত্ন। আমার ত ইচ্ছে সকলে একত্রে থাকি। তোমাদের পে-  
রকম গা নয়, তা আর কি হবে? তাহলে আর এমন কর?

হরচন্দ্র। (গম্ভীরভাবে) তবে কি আপনার ইচ্ছে আমি চলে যাই?

বিজ্ঞারত্ন। তোমার ইচ্ছে, যেতে হয় যাও, সোজা পথ আছে।

হরচন্দ্র। আচ্ছা তবে আমাকে পদধূলি দিন। (বলিয়া পদধূলি লইলেন।)

উহার পরেই হরচন্দ্র স্বতন্ত্র বাসা করিলেন। ওদিকে তাঁহার বেতন বৃদ্ধি হইয়া দেড়শত টাকা হইল; বিজয়া সেই সঙ্গে গেলেন; এবং বাহির হইতে পঞ্চ ও গোবিন্দ আসিয়া এক সঙ্গে রহিল। কিছুদিন পরে হরচন্দ্র নশিপুর হইতে স্বীয় স্ত্রীপুত্রকে কলিকাতার বাসাতে আনিলেন। তাঁহার স্বতন্ত্র বাসা করিলে তাঁহাদের ভবনেই নবরঙ্গ সভার অধিবেশন হইতে লাগিল।

---

## একবিংশ পরিচ্ছেদ

১৮৫৬ সালের পূজার পর নবীনচন্দ্রকে ফরিদপুরে ছাড়িয়া আসিয়াছি। তৎপরে তর্কভূষণ মহাশয়ের পরিবার মধ্যে যে সকল ঘটনা ঘটিয়াছে, তাহার বর্ণন করিতে গিয়া নবীনকে ভুলিয়া গিয়াছি। এখন নবীনের বিষয় কিছু বলি। নবীন দ্বিতীয় শিক্ষক হইয়া ফরিদপুর স্কুলে উপস্থিত হইবামাত্র স্কুলে যেন নবজীবনের সঞ্চার হইল। তাঁহার, বিনয়, সৌজন্য ও সাধুতা দ্বারা তিনি অল্পকাল মধ্যে সকলকে আকর্ষণ করিলেন। হেডমাষ্টার মহাশয় তাঁহার গুণে আকৃষ্ট হইয়া তাঁহার প্রতি ভ্রাতৃ-মেহ প্রদর্শন করিতে লাগিলেন। তাঁহার এমন সুন্দর পড়াইবার রীতি যে, বালকগণ তাঁহার প্রতি আসক্ত হইয়া পড়িল। তিনি সুচারুরূপেই নিজ কর্তব্য সাধন করিতে লাগিলেন।

দুই মাস যাইতে না যাইতে স্থানীয় অনেক ভদ্রলোকের সহিত নবীনের পরিচয় ও আশ্রয়তা হইল। প্রায় প্রতিদিন সন্ধ্যার সময় স্কুলের কয়েকটি শিক্ষক ও অপর কয়েকটি ভদ্রলোক তাঁহার বাসা বাড়িতে নানা বিষয়ের আলোচনার জন্ত আসিতেন। নবীন তাঁহাদের সঙ্গে সম্মিলিত হইয়া কয়েকটি কার্যের সূত্রপাত করিলেন। প্রথমতঃ, সপ্তাহে একদিন সন্ধ্যার পর তাঁহার বাসাতে ধর্ম্মালোচনার্থ সম্মিলিত হইবার নিয়ম করিলেন। উক্ত দিবস বড় অধিকসংখ্যক লোক আসিতেন না, চারি পাঁচ জন ধর্ম্মানুরাগী লোক আসিতেন। তন্মধ্যে একজন প্রাচীন ব্যক্তি ছিলেন, তাঁহাকে সকলে বাগ্‌চী মহাশয় বলিত। বাগ্‌চী মহাশয়ের বয়ঃক্রম তখন পঞ্চাশ বৎসরের অধিক হইবে। তিনি স্থানীয় জজের আদালতে সেরেস্তাদারি কাজ করিতেন। বাগ্‌চী মহাশয় বড়

ভক্ত ও সাধক লোক, ভক্তির কথা শুনিতে বড় ভাল বাসিতেন। তাঁহার কণ্ঠ বড় স্নানষ্ট ছিল। তিনি ভক্তিতত্ত্ব বিষয়ে যে কোন গান করিতেন, তাহা তাঁহার মুখে অপূৰ্ণ শুনাইত। এই ধৰ্ম্মালোচনা-সভাতে তিনি সঙ্গীত করিতেন; সঙ্গীতানন্তর মহানিৰ্দ্ধারণতন্ত্র হইতে একটী স্তোত্র পাঠ করা হইত; তৎপরে নবীন কোনও গ্রন্থ বা পত্রিকা হইতে কিয়দংশ পাঠ করিতেন, কখনও কখনও নিজে কিছু লিখিয়া পড়িতেন; তৎপরে অনেকক্ষণ বসিয়া ধৰ্ম্মতত্ত্ব বিষয়ে অনেক আলোচনা হইত। নবীন গীতা, শ্রীমদ্ভাগবত, বিষ্ণুপুরাণ, নারদ পঞ্চরাত্র, প্রভৃতি উৎকৃষ্ট উৎকৃষ্ট ভক্তিরসাস্রক গ্রন্থ পড়িয়া ও ব্যাখ্যা করিয়া শুনাইতেন। কখন কখনও অপরাপর ধৰ্ম্মের সাধুদিগের চরিত্রও পাঠ হইত।

এই সভাটির দ্বারা নবীনের বিশেষ উপকার হইতে লাগিল। তাঁহার স্বাভাবিক লজ্জাশীলতাবশতঃ ধৰ্ম্মের কথা মানুষকে তিনি বলিতে পারেন না। আত্মশয় অন্তরঙ্গ বন্ধুদিগের নিকট তাঁহার মন খোলে। কিন্তু, এখানে কর্তব্যবোধে তাঁহাকে সমুদায় আলোচনার প্রধান ভার লইতে হইল; সুতরাং সে জন্ত যেন একটা গুরুতর দায়িত্ব তাঁহার উপর পড়িল; তিনি সেই ভাবে গড়িয়া উঠিতে লাগিলেন। পাঠ ও ঈশ্বর-চিন্তা দ্বারা তাঁহার নিজের ধৰ্ম্মভাব দিন দিন বৃদ্ধি হইতে লাগিল। সকলেই বলিতেন ঈশ্বরের নাম তাঁহার মুখে যেরূপ মধুর শুনাইত এমন প্রায় শুনিতে পাওয়া যায় না। এই ধৰ্ম্মালোচনা সভার সভ্যদিগের সঙ্গে, বিশেষতঃ বৃদ্ধ বাগ্‌চী মহাশয়ের সঙ্গে, নবীনচন্দ্রের গভীর প্রীতির যোগ স্থাপিত হইল।

দ্বিতীয়তঃ, যে সকল সমবয়স্ক শিক্ষিত যুবক প্রায় প্রতিদিন সন্ধ্যাকালে তাঁহার ভবনে আসিতেন, তাঁহাদিগকে উৎসাহ দিয়া তিনি একটী বঙ্গ-সাহিত্য-সমালোচনী সভা স্থাপন করিলেন। হেড্‌ মাষ্টারকে



বলিয়া স্কুলের একটা ঘর চাহিয়া লইলেন। সেই ঘরে সন্ধ্যার সময়ে সকলে বসিয়া বাঙ্গালা সংবাদ পত্র, পত্রিকা, গ্রন্থাদি পাঠ করিতেন। এই সভা হইতে “তত্ত্ববোধিনী”, “বিবিধার্থ সংগ্রহ”, “হিতৈষী” প্রভৃতি মাসিক ও সাপ্তাহিক পত্রিকা সকল লওয়া হইত। তত্ত্বিম্নায়ে কোনও উৎকৃষ্ট বাঙ্গালা পুস্তক প্রকাশিত হইত, তাহা ক্রয় করিয়া পাঠ করা হইত।

তৃতীয়তঃ, স্থানীয় কতকগুলি ভদ্র লোককে উৎসাহ দিয়া একটা সুরাপাননিবারণী সভা স্থাপন করিলেন। মধ্যে মধ্যে সেই সভার অধিবেশন হইত। এই সভার সভ্যগণ সুরাপাননিবারণসম্বন্ধীয় পুস্তিকা ও পত্রিকাদি শিক্ষিত ব্যক্তিদিগের গৃহে গৃহে বিতরণ করিতেন ও হিতৈষীর গ্রাহক যুটাইতেন।

চতুর্থতঃ, স্কুলের বালকদিগকে লইয়া তিনি ব্যায়াম ক্রীড়া প্রভৃতির জন্য একটা দল বাধিলেন। তাহাদিগকে নানাপ্রকার কুস্তী শিখাইবার উপায় অবলম্বন করিলেন। নিজে তাহাদের কাপ্তেন হইয়া অপরাহ্নে স্কুলের মাঠে তাহাদের সঙ্গে খেলিতেন। এই দল হইতে ক্ষান্তন মাসের শেষে আর একটা দল প্রস্তুত হইল। ফরিদপুরের ত্রায় মফঃস্বলস্থ নগর সকলে সে সময়ে প্রায় প্রতি বৎসর কাহারও না কাহারও ঘরে আশ্বিন লাগিয়া অনেকের সর্বনাশ হইয়া যাইত। যতই বাতাসের দিন নিকটস্থ হইতে লাগিল, ততই লোকে বলিতে লাগিল, বাতাসের দিন আসিতেছে, সেই সঙ্গে আশ্বিনের ভয় আসিতেছে। নবীনচন্দ্র স্কুলের উচ্চশ্রেণীর বালকদিগকে লইয়া “গৃহদাহনিবারক সৈন্যদল” বলিয়া এক সৈন্যদল সৃষ্টি করিলেন। কিছু অর্থ সংগ্রহ করিয়া তাহাদের এক প্রকার পোষাক ও টুপি প্রস্তুত করিলেন, এবং একটা বিলাতি শিক্ষা আনাইলেন। নিজে তাহাদিগকে মধ্যে মধ্যে ডিল করাইতে লাগিলেন। তাহারা অচিরকালের মধ্যে একরূপ শিক্ষিত হইল যে তিনি

শিকার শ্বনি করিবামাত্র তাহারা যে যেখানে যে অবস্থাতে থাকুক, ছুটিয়া আসিত ও নিমেষের মধ্যে সকলে বদ্ধপনিকর হইয়া এক একটা জলের টব হাতে করিয়া সারিবন্দী হইয়া দাঁড়াইত, এবং জল সেচনের অভিনয় করিত।

এইরূপে নানা কার্যের চিন্তাতে নবীনচন্দ্রের দিন কাটিয়া যাইতে লাগিল। ইহার মধ্যে ধর্ম্মাণোচনা সভা ও বালকদিগের দল ইহার প্রতি তাঁহাকে বিশেষ মনোযোগ করিতে হইত, অপর দুইটা সভাতে তিনি উৎসাহ ও পরামর্শদাতা হইয়া অপরের দ্বারা কাজ করাইয়া লইতেন। কিন্তু এখানেই তাঁহার কার্যের অবসান নহে। বলিতে কি, কলিকাতাতেই তাঁহার মন পড়িয়া রহিয়াছে। নবরত্ন সভার সভ্যদিগের সহিত সর্ব্বদাই চিঠিপত্র চলিতেছে। যে সকল কাজে বিলম্ব করিলে ক্ষতি নাই, এমন কোনও কাজ তাঁহার পরামর্শ ভিন্ন হয় না। প্রত্যেক সপ্তাহের সভাতেই তাঁহার পত্র পাঠ করা হয়। নবীনচন্দ্র যেরূপ আশা করিয়াছিলেন, তাহাই ঘটিয়াছে। তাঁহার আগমনের পর নবরত্ন সভার দুর্ব্বলতা না হইয়া বলবৃদ্ধি হইয়াছে। ব্রজরাজ ও সুরেন শুণ্ড দিন দিন কাজের লোক হইয়া উঠিতেছেন। সভ্যদিগের মধ্যে ভ্রাতৃত্বাবের গাঢ়তা যেন পূর্ণাপেক্ষা দৃষ্টিগোচর হইয়াছে।

কেবল নবরত্ন সভার সভ্যগণ নহে, নবীনচন্দ্রকে চিঠিপত্র লিখিবার লোক আরও অনেক। তাঁহার ভ্রাতৃজায়া সোদামিনী প্রায় প্রতি সপ্তাহে তাঁহাকে পত্র লিখিয়া আপনার সকল দুঃখের কথা জানাইয়া থাকেন। তদুত্তরে তাঁহাকে সান্ত্বনা দিতে হয়। মাসটা পাড়লেই তাঁহার জন্ম ১৫ টাকা প্রেরিত হইয়া থাকে; তাহাতে সোদামিনী অতিশয় সন্তুষ্ট। ইহা নবীনচন্দ্রের একটা আনন্দের বিষয়। এতদ্ব্যতীত বুদ্ধ হৃদয় বহুর সহিতও মধ্যে মধ্যে চিঠিপত্র চলে। নবীনচন্দ্র তাঁহার

রাগী মার সংবাদ লইবার অন্ত তাঁহাকে চিঠিপত্র লিখিয়া থাকেন। তদন্তরে বৃদ্ধ অনেক ভালবাসা ও আশীর্বাদ জানাইয়া থাকেন। কান্তনের শেষে নবীনচন্দ্র চিন্তা করিলেন যে, বাসন্তী পূজার সময় তাঁহার জ্যেষ্ঠতাতের অনেক চাউল খরচ হয়। কলিকাতাতে চাউলের মূল্য অধিক ; করিদপুর হইতে কিনিয়া পাঠাইতে পারিলে ভাল হয়। এই ভাবিয়া একেবারে তাঁহার জ্যেষ্ঠতাতের বাড়ীর সম্বৎসর খরচের মত ও বাসন্তী পূজার ব্যয়ের মত চাউল খরিদ করিয়া একটি চলিত নোকাযোগে কলিকাতায় প্রেরণ করিলেন ; ও তৎসঙ্গে নিম্নলিখিত পত্র লিখিলেন :—

শ্রীচরণে অসংখ্য প্রণতিপূর্ব্বক নিবেদন—

আমরা বাল্যকালে পিতাকে হারাইয়া তাঁহার স্নেহ অধিক দিন লাভ করি নাই। আপনিই আমাদের পিতা। আপনারই ক্রোড়ে আমরা লালিত পালিত হইয়াছি। আমরা অতি অধম, আপনার পিতৃস্নেহের উপযুক্ত কাজ কিছু করি নাই, করিতে যে পারিব সে আশাও নাই। এবারে এদিকে চাউল অতিশয় শস্তা হইয়াছে। বাসন্তী পূজার সময়ে আপনার অনেক চাউল ব্যয় হয়, ভাবিয়া, কিঞ্চিৎ চাউল খরিদ করিয়া পাঠাইলাম। ইহাতে বাসন্তী পূজার ব্যয় হইয়া বাড়ীর সম্বৎসরের ব্যয় চলবে। চাউলগুলি গ্রহণ করিয়া আমাকে আশীর্বাদ করিবেন, যেন আমার ঈশ্বর-চরণে সর্বদা মতি থাকে।

সেবক,

শ্রীনবীনচন্দ্র বসু।

চাউলগুলি ও পত্রখানি যখন কলিকাতাতে পৌছিল, বৃদ্ধ হলধর বসু অতিশয় আনন্দিত হইলেন ; তাঁহার বিষয়-চিন্তা-জর্জরিত চিত্তেও যেন কিঞ্চিৎ আর্দ্রভাব হইল ; তিনি গৃহিণীকে বলিলেন,—“গুপীর পুণ্যফলেই এমন সুসন্তান জন্মেছে। বড়টা এমন হলো কেন ?”

নবীনচন্দ্র যে এত প্রকার কার্যের আয়োজন করিয়াছেন ও সর্বদাই আপনাকে বাস্তব রাখিবার প্রয়াস পাইতেছেন, তথাপি মনের কৃষ্ণকামিনী-মুগ্ধ গতি ফিরাইতে পারিতেছেন না। নির্জজন হইলেই সেই চিন্তা হৃদয়কে অধিকার করে। মনটা সর্বদা কৃষ্ণকামিনীর সংবাদ পাইবার জ্ঞাত হা হা করে; ব্রজরাজ ও মথুরেশের পত্রে তাঁহার সংবাদ যে একটু আধটু পান, তাহা অমূল্য সম্পত্তির হ্রাস তুলিয়া রাখেন, বার বার পাঠ করেন। এক একবার ব্রজরাজের নিকট নিজ হৃদয়ের ভাব ব্যক্ত করিয়া কৃষ্ণকামিনীর সহিত চিঠিপত্রে আলাপ আরম্ভ করিবার জ্ঞাত মনে আবেগ উপস্থিত হয়, কিন্তু আবার তাঁহার শাস্তির প্রতি লক্ষ্য করিয়া সে আবেগ দমন করিয়া রাখেন; এবং সর্বদা কোন না কোনও ভাল বিষয় পাঠ ও চিন্তাতে আপনাকে নিযুক্ত করিবার চেষ্টা করেন।

তিনি কলিকাতাতে থাকিতে একটী বিষয়ে মনোযোগ দিতে আরম্ভ করিয়াছিলেন। এখানে আসিয়া সে বিষয়টী মনোযোগ পূর্বক পাঠ করিতেছেন। তাহা উদ্ভিদ-বিদ্যা। এখানে গাছ-পালার অভাব নাই, সুতরাং উদ্ভিদ-বিদ্যা সম্বন্ধে গ্রন্থাবলী পাঠের বিশেষ সহায়তা হইতেছে। এটী তাঁহার একটী প্রধান বিনোদনের উপায়। স্কুলের বালকগণ কোনও প্রকার নৃতন বা বিচিত্র বৃক্ষলতা ফুল পাতা পাইলেই স্কুলে আসিবার সময় আনিয়া উপস্থিত করে, তিনি সেগুলি দইয়া পরীক্ষা ও পাঠ করেন। কিন্তু এই সকল পাঠ ও চিন্তার ভিতরেও কৃষ্ণকামিনীর চিন্তা আসিয়া হৃদয়ে প্রবিষ্ট হয়। মধ্যে মধ্যে কৃষ্ণকামিনী যেন আসিয়া বলেন,—“রাখ রাখ তোমার পড়া রাখ, এখন আমার সঙ্গে কিয়ৎকাল থাক।” নবীন যেন বলেন,—“আমি যে তোমাকে দূরে রাখিতে চাহিতেছি, কেন তুমি আমার হৃদয়ে আসিয়া প্রবেশ কর?” এইরূপে নবীনচন্দ্র কঠোর তপস্যার দ্বারা আত্ম-শাসন করিবার প্রয়াস পাইতেছেন।

এ দিকে চৈত্র মাসে এক দিন সন্ধ্যার পূর্বে ফরিদপুরের বাজারে আশ্বিন লাগিয়া গেল। নবীনচন্দ্র তখন স্কুলের মাঠে বালকদিগের সহিত খেলিতেছিলেন। আশ্বিন দেখিবামাত্র দৌড়িয়া পোষাক পরিতে গেলেন ও তাঁর শিক্ষাতে ফুঁ দিলেন। শিক্ষাধরনি হইবামাত্র সৈন্তগণ যে যে প্রকার অবস্থাতে ছিল, আসিয়া হাজির হইল; তিনি তাহাদিগকে সঙ্গ করিয়া, এক একটা জলের টব হস্তে ধাবিত হইলেন। সারিবন্দী করিয়া সৈন্তদলকে পুষ্করিণী পর্য্যন্ত দণ্ডায়মান করিলেন এবং নিজে জলস্ত গৃহের সন্নিধানে দাঁড়াইলেন। জলসিঞ্চন আরম্ভ হইল। এই কার্য্যে বালকগণের মনে যেন এক অদ্ভুত তাড়িতের সঞ্চার হইল! ঝপাঝপ জলের টব হাতে হাতে ছুটিয়াছে, ও জলস্ত চালের উপরে জল পড়িতেছে! এই অপূর্ব দৃশ্য দেখিয়া যাহারা তামাসা দেখিতে আসিয়াছিল, তাহাদেরও মনে এক অপূর্ব উৎসাহের আবির্ভাব হইল। তাহারাও কেহ কলস, কেহ ভাঁড়, যে যাহা পাইল, লইয়া জল সিঞ্চন করিতে লাগিল।

ইতিমধ্যে জেলার ম্যাজিস্ট্রেট H. J. Greive গ্রীভ সাহেব আসিয়া উপস্থিত। স্কুলের ছাত্রদিগের এই উৎসাহ দেখিয়া তাঁহার মন আনন্দে নৃত্য করিয়া উঠিল। তিনি নবীনচন্দ্রের নিকটে গিয়া বলিলেন—That's it Baboo, I admire your boys, I am your captain, give me one of those buckets; অর্থ,—“বাবু ঠিক, এই ঠিক, তোমার ছেলেদের দেখে আমার আনন্দ হচ্ছে, আমি তোমাদের কাপ্তেন, আমাকে একটা জলের টব দেও।” ম্যাজিস্ট্রেট সাহেব কাপ্তেন হইয়া দাঁড়াইলেন ও জল সিঞ্চন করিতে আরম্ভ করিলেন। পরম উৎসাহে অগ্নিনির্ব্বাণ কার্য্য চলিল। যথা সময়ে অগ্নি নির্ব্বাণ হইয়া গেল।

পরদিন ম্যাজিস্ট্রেট সাহেব গৃহ-দাহ-নিবারক সৈন্তদলকে বিশেষ পারিতোষিক দিবার জন্ত স্কুলে উপস্থিত হইলেন। সৈন্তদলকে তাঁহার

নিকট ডাকা হইল, তাহাদিগকে যথোচিত প্রশংসা করিয়া তাহাদের ভোজের জন্য ২৫টী টাকা দিলেন এবং নবীনচন্দ্রকে হাসিয়া বলিলেন—  
“আমি কিন্তু একদিনের জন্য কাপ্তেন হই নাই, আমি এ দলের কাপ্তেন, তুমি আমার সহকারী।” নবীনচন্দ্র বলিলেন,—সে ত সোভাগ্যের কথা।” তৎপর হইতে ম্যাজিষ্ট্রেট সাহেব উক্ত দলের কাপ্তেন হইলেন। ইহার কিছুদিন পরেই নবীনচন্দ্র বালকদিগের বাচ খেলিবার জন্য দুই খানি নৌকা কিনিলেন; এবং ঢোল সমুদ্রের জলে ভাসাইলেন। গ্রীষ্ম সাহেব উক্ত কার্যে বিশেষ অর্থ সাহায্য করিলেন। এইরূপে ম্যাজিষ্ট্রেট সাহেব ও তাঁহার পত্নীর সহিত নবীনচন্দ্রের পরিচয় ও আত্মীয়তা হইয়া গেল।

বাসন্তী পূজার কিছুদিন পরেই নবীনচন্দ্র সংবাদ পাইলেন যে, তাঁহার জ্যেষ্ঠভাত মহাশয় রক্তামাশয় রোগে আক্রান্ত হইয়াছেন, ও তাঁহাকে দোখবার জন্য অতিশয় ব্যগ্র হইয়াছেন। তখনও গ্রীষ্মাবকাশের ১১১২ দিন বলম্ব আছে, তিনি বিদায় লইয়া সত্তর কালকাতাতে আসিয়া উপস্থিত হইলেন। আবার তাঁহার নবরত্ন সভার বন্ধুগণ তাঁহার সঙ্গে জুটিল। উত্তমরূপেই বম্বুজ মহাশয়ের চিকিৎসা চলিল। একে বম্বুজ অধিক, তাগাতে রক্তামাশয় রোগ, বৃদ্ধ অনেক দিন ভুগিলেন ও দিন দিন ক্রীণ হইয়া পড়িতে লাগিলেন। এই রোগের মধ্যে একদিন একটু নির্জনে পাঠ্য বৃদ্ধ নবীনচন্দ্রের হস্তে একখানি কাগজ দিলেন, দিয়া বলিলেন,  
—“সমগ্রতবে পড়ে দেখো।” নবীন স্বতন্ত্র ঘরে, আর এক সময়ে পড়িয়া দেখেন যে সেখানি বম্বুজ মহাশয়ের উইল। সে উইলে বাড়ী খানি বাদে দুই লক্ষ দশ হাজার টাকার সম্পত্তির উল্লেখ আছে। ঐ সমগ্র সম্পত্তি তিনি নবীনচন্দ্রের নামে লিখিয়া দিয়াছেন। ঐ উইলখানি নবীনচন্দ্রের ভাল লাগিল না। তিনি নির্জনে বম্বুজ মহাশয়কে বলিলেন,

—“আমি এত সম্পত্তি লইয়া কি করিব? জগদীশ্বরের কৃপায় আমার দুটাকা উপার্জন আছে, আরও বাড়িবার সম্ভাবনা, পৈতৃক কিছু টাকাও আছে, আমার আর সম্পত্তির প্রয়োজন কি? আপনি আমাকে পদধূলি দিন, তাহাই আমার যথেষ্ট সম্পত্তি।” বৃদ্ধের তখন অধিক কথা কহিবার শক্তি নাই, তিনি কেবলমাত্র বলিলেন,—“তবে কি পথের লোককে দেব?” ইহার পরে নবীন নির্জনে অনেক চিন্তা করিতে লাগিলেন। একবার ভাবিলেন, এই ত সুযোগ উপস্থিত; কলিকাতায় আসিবার জন্য উৎসুক আছি; এই আয় অবলম্বন করিয়া ত স্বচ্ছন্দে কর্ম কাজ ছাড়িয়া আসিতে পারি, স্বচ্ছন্দে কৃষ্ণকামিনীকে বিবাহ করিয়া সুখী করিতে পারি, এবং নবরত্ন সভাকেও যথেষ্ট সাহায্য করিতে পারি। আবার মনে হইল,—না না আমি যে একটা কাজ যুটাইয়া কলিকাতায় আসিব ভাবিয়াছি, সেই ভাল। এত টাকা লইয়া আমি কি করিব? এ টাকা দ্বারা লোকের একটা উপকার হওয়া ভাল; আর আমিই বা একাকী কিরূপে এত টাকা লই? আমি পৈতৃক ধনে রাজভোগে থাকিব, আর দাদা দারিদ্র্যে মগ্ন থাকিবেন, তাহা কখনই হয় না। কিন্তু দাদার যে অবস্থা তাহাতে তাঁহার হাতে যে টাকাই পড়ুক তিন দিনে উড়াইয়া দিবেন। বৌদিদি ও ছেলেরা কিছু টাকা পান, ইহা বড় ইচ্ছা করে; কিন্তু জেঠা বোধ হয় দাদাকে কিছু দিতে সম্মত হইবেন না। এইরূপ নানা চিন্তার পর একদিন বৃদ্ধকে বলিলেন,—“জেঠা মহাশয়! টাকাগুলো আপনি পাঁচজন ঊষ্টির হাতে দিয়ে যান, এবং এই কথা লিখিয়া দিন যে, তাঁরা রাজা মার জীবদ্দশা পর্য্যন্ত তাঁহাকে সুখে স্বচ্ছন্দ রাখিবেন ও তাঁর ধর্মকর্মার্থে ঐ টাকা ব্যয় করিবেন। তৎপরে তাঁর দ্বেহান্ত হলে, ঐ টাকার সুদ দেশের কোনও হিতকর কার্যে লাগাবেন।” এ প্রস্তাব কোনও প্রকারেই বৃদ্ধের মনোমত হইল না।

নবীনচন্দ্র আবার ভাবিতে লাগিলেন। আবার দুই এক দিন পরে দ্বিতীয় প্রস্তাব উপস্থিত করিলেন। “উক্ত দুই লক্ষ দশ হাজার টাকার মধ্যে দশ হাজার টাকা বাড়ী মেরামত ও আপনাদের শ্রাদ্ধাদির জন্য থাকুক ; দানার ছেলেদের নামে ২৫ হাজার টাকা দিয়ে যান, তাহা আমার হাতেই থাকুক ; আমাকে যদি কিছু দিতে চান, পঁচিশ হাজার দিলেই হইবে। ঐ পঁচিশ হাজার টাকা আপাততঃ রাস্তা মার নামেই থাকুক ; আমার পনের হাজার ও এই ২৫ হাজারে তাঁহার চলিয়া যাইবে ; অবশিষ্ট দেড় লক্ষ টাকা পাঁচ জন ট্রস্টির হাতে দেশহিতকর কার্যের জন্য থাকুক।” অবশেষে এ প্রস্তাব যখন আসিল, তখন বুদ্ধ অতিশয় অবসন্ন। ক্লান্তিবশতঃই হউক, আর নবীনের জেদ ছাড়াইতে না পারিয়াই হউক, তিনি নবীনকে বলিলেন,—“আমি তোমাকে দিলাম, তুমি যাহা ইচ্ছা হয় কর, আমি আর ভাবিতে পারি না।” নবীনচন্দ্র তাড়াতাড়ি দুই এক দিনের মধ্যে একজন আইনজ্ঞ লোকের দ্বারা একটা উইল লিখাইয়া আনিলেন, ও উপযুক্ত সাক্ষার সমক্ষে স্বাক্ষর করাইয়া লইলেন। বাড়ী মেরামত প্রভৃতির জন্য দশ হাজার রহিল ; তাঁহার জ্যেষ্ঠ সহোদরের সম্মানগণের জন্য ২৫ হাজার তাঁহার হস্তে রহিল ; তাঁহার ২৫ হাজার রাস্তা মার নামে রহিল ; অবশিষ্ট দেড় লক্ষ পাঁচজন ট্রস্টির হাতে রহিল। তিনি এবং সুরেশচন্দ্র উভয়ে ট্রস্টিদের মধ্যে রহিলেন। বসত বাড়ীটা গৃহিণীর থাকিল। তিনি দান বিক্রয় করিতে পারিবেন। উইল হইয়া গেলে যথাসময়ে বুদ্ধ বশুজ মহাশয়ের জন্য প্রায়শ্চিত্ত হইল। তিনি জ্যেষ্ঠের শেষভাগে পরলোক যাত্রা করিলেন। নবীনচন্দ্র গোবিন্দকে বাহির বাড়িতে তাঁহার রাস্তা মায়ের রক্ষক স্বরূপ রাখিয়া গেলেন।

এবারে কলিকাতাতে আসিয়া নবীনচন্দ্র জ্যেষ্ঠভাতের পীড়া লইয়া বাস্তব ছিলেন ; সুতরাং নবরত্ন সভার কার্যে অধিক সহায়তা করিতে



পারেন নাই। তথাপি দুই দিন সভার অধিবেশনে উপস্থিত ছিলেন, এবং বন্ধুদিগকে উৎসাহ দিতে ক্রটি করেন নাই। কলিকাতায় আসিয়াই ব্রজরাজের মুখে শুনিয়াছিলেন যে, তাঁহার ফরিদপুর যাত্রার পর মাতঙ্গিনীর শয্যাতে উমাশঙ্করের কি চিঠি ধরা পড়াতে, মিত্রজ মহাশয় তাহাকে অনেক তিরস্কার করিয়া দেবরের বাড়ীতে পাঠাইয়া দিয়াছেন, এবং তাহাকে আর কোথাও যাইতে দেন না। সে বহুকাল তাঁহাদের বাটীতে আসে নাই। এই সংবাদে নবীনচন্দ্রের মনটা অনেক আশ্রস্ত হইল; ভাবিলেন কৃষ্ণকামিনীর প্রতি আর অত্যাচার হইবে না। তৎপরে তিনি দুইদিন ব্রজরাজদিগের বাড়ীতে গিয়াছিলেন, কিন্তু কৃষ্ণকামিনীর সহিত অধিক কথাবার্তার সুবিধা হয় নাই। তিনি উদ্বিগ্ন থাকিতে শীঘ্র আসিতে হইয়াছিল।

যথাসময়ে সেই দশ হাজার টাকা হইতে ৩ হাজার টাকা ব্যয় করিয়া বসুজ মহাশয়ের শ্রাদ্ধ হইয়া গেল। সেদিন নবীন ফরিদপুরে দরিদ্রদিগকে দান করিলেন, এবং স্কুল হইতে ছুটি লইয়া সমস্ত দিন পরকাল চিন্তা ও ঈশ্বরারাদনাতে যাপন করিলেন।

পূজার সময় স্কুল বন্ধ হইলে নবীন সত্বর কলিকাতাতে আসিলেন। আসিয়া তাঁহার জ্যেষ্ঠভ্রাতার নিযুক্ত ট্রাষ্টদিগের মাটিং ডাকিলেন। ট্রাষ্টরা আপাততঃ স্থির করিলেন, উক্ত দেড় লক্ষ টাকার সুদ হইতে কতকগুলি অনাথা হিন্দু বিধবার ভরণ পোষণের সাহায্য করিবেন। তাঁহার ভ্রাতৃপুত্রদিগের ২৫ হাজার টাকার সুদ ব্যাঙ্ক হইতে লইয়া তাঁহার ভ্রাতৃজ্ঞার হস্তে অর্পণ করিলেন। তাঁহার অংশের ৪০ চল্লিশ হাজার টাকার সুদ তাঁহার রাজা মাকে তাঁহার ভরণপোষণ ও দান ধ্যানাদির জন্য দিলেন; এবং পূর্বোল্লিখিত দশ হাজার টাকার মধ্যে

অবশিষ্ট ৭ হাজার টাকা হইতে দুই হাজার টাকা দিয়া বাড়ীটা ভাল করিয়া মেরামত করিবার বন্দোবস্ত করিলেন।

এবারে সহরে আসিবার সময়ে তিনি পরামর্শ করিয়া আসিয়াছিলেন যে, ব্রজরাজের নিকট, কৃষ্ণকামিনীর প্রতি তাঁহার কিরূপ ভাব, তাহা ব্যক্ত করিবেন। তদনুসারে একদিন প্রাতে ব্রজরাজকে সঙ্গে করিয়া নৌকাযোগে শিবপুরে কোম্পানির বাগানে বেড়াইতে গেলেন। সেখানে একটী নির্জজন তরুক্ষেত্র তরুচ্ছায়াতে বসিয়া ব্রজরাজের হস্ত নিজ হস্ত মধ্যে লইয়া, আবেগপূর্ণ দৃষ্টিতে তাঁহার মুখের দিকে চাহিয়া বলিতে আরম্ভ করিলেন।

নবীন। ব্রজরাজ, আমি একটা অতিশয় গুরুতর প্রস্তাব উপস্থিত কর্বে বলি তোকে ডেকে এনেছি।

ব্রজরাজ তাঁহার ভাব দেখিয়া প্রথমে একটু চমকিয়া উঠিলেন। হস্তে হস্ত দিয়া আছেন, অনুভব করা যাইতেছে, যেন তাঁহার শরীরের অন্তস্তলে কি এক প্রকার কম্পন হইতেছে; তাঁহার মুখ ভাবাবেশে আরক্তিম; কণ্ঠতালু যেন শুষ্ক হইতেছে; বলি বলি করিয়া বলিতে পারিতেছেন না।

ব্রজরাজ। ও কি, বল্বে বল্বে, তা বল্ছো না কেন?

নবীন। বলছি, আমি তোমাদের বাড়ীতে প্রায় দুই মাস ছিলাম, কৃষ্ণকামিনীর প্রতি আমার কোনও বিশেষ ভাব লক্ষ্য করেছিলে?

ব্রজরাজ। কৈ? না, তা ত কিছু করিনি।

নবীন। বাড়ীর মেয়েরা কেউ কি লক্ষ্য করেছেন?

ব্রজরাজ। কৈ কাকুর মুখে ত কিছু শুনিনি।

নবীন। আমার প্রতি কৃষ্ণকামিনীর কোনও ভাব কি লক্ষ্য করেছ?

ব্রজরাজ। তৈ না ? সে ত তোমার সঙ্গে বড় একটা মিশ্ ত না।

নবীন। আমি সহর ছেড়ে গেছি কেন, তা কি বুঝতে পেরেছ ?

ব্রজরাজ। না, কি ক'রে বুঝবো ? তুমি ত কিছু বলনি।

নবীন। তবে বলি শুন ; আমি কৃষ্ণকামিনীকে কিছু বিশেষ চক্ষে দেখি। আমি কোন প্রকারে আমার মনকে সে ভাব হতে ফেরাতে পারছি না। তোমার মাসী বোধ হয় এ ভাবও কিছু বুঝতে পেরে থাকবে। তার প্ররোচনাতেই তোমার মামা কৃষ্ণকামিনীকে নিগ্রহ করেছিলেন। তা কি তোমরা বুঝতে পারনি ? আমি দেখলাম আমি নিকটে থাকলে, তোমাদের বাড়ীতে যাওয়া একেবারে বন্ধ করতে পারব না, অথচ ছুতোয় নাতায় বেচারিকে নিগ্রহ সহ্য করতে হবে, তাই কিছুদিনের জন্ত দূরে গিয়েছি। তখন ত সে বিপদ কেটে গিয়েছে। তাই বলছি, আমাদের বিবাহের বিষয়ে তোমার মত কি ?

ব্রজরাজ। ( বিস্ময়ে কিয়ংকাল নিস্তব্ধ। পরে আনন্দে নবীনকে মর্দন কবিশ্য ) তাকি আবার জিজ্ঞাসা করতে হয় ? কেটোর সৌভাগ্য যে তোমার মত পতি পাবে ; আর আমাদেরও কম আনন্দের বিষয় নয়।

নবীন। রসো, একেবারে লাফিয়ে উঠলে হবে না ; ভাববার অনেক কথা আছে। এমন একটা কাজের ধাক্কা তোমরা সামলাতে পারবে ত ?

ব্রজরাজ। তা আর পারবো না ? তবে এতদিন জল্পনা করে আমরা কি করলাম ?

নবীন। তোমার মামা যে বিরক্ত হবেন, তার কি হবে ?

ব্রজরাজ। না হয় মামা আমাদের মুখ দর্শন করবেন না ; আমরা ভগিনী ত স্ত্রী হবে।

নবীন। তোমার মায়ের মত হবে কি না, কি মনে কর!

ব্রজরাজ। মায়ের মতটা করা কঠিন, কারণ তিনি আমার ভয়টা অতিরিক্ত রকম করেন। তবে মথুর ও আমি বুকে পড়লে তিনি আমাদের মতে মত না দিয়ে থাকতে পারবেন না।

নবীন। কৃষ্ণকামিনীর ভাব কি প্রকার, কিরূপে জানা যায়?

ব্রজরাজ। সেটা ভাই আমার দ্বারা হবে না! বড় লজ্জা করবে, আমি তাকে জিজ্ঞাসা করতে পারবো না।

নবীন। তবে কার দ্বারা হবে? তোনার মায়ের দ্বারা?

ব্রজরাজ। মাকে যে সে কিছু খুলে বলবে এমন বোধ হয় না।

নবীন। তবে উপায় কি? বোধ হয় তাঁকে বললে বলতে পারে। তাঁর কাছে একবার মতটা পেলে পরে আমি লিখতে পারি।

ব্রজরাজ। আচ্ছা, মাকে আগে গড়ি, তারপর মার দ্বারা জানবায় চেষ্টা করবো।

নবীন। সেই বেশ কথা। তোমার মায়ের মত না হলে কৃষ্ণকামিনী কখনই এমন কাজে অগ্রসর হবে না। তোমার মাকে গড়ে ঠিক করে আমাকে খবর দিলে, তবে আমি কৃষ্ণকামিনীকে লিখবো।

ব্রজরাজ। আচ্ছা, দুই চারিদিন অপেক্ষা কর, মাকে গড়বার চেষ্টা করি।

এইরূপ কথোপকথনের পর নবীনচন্দ্র উৎসুকচিত্তে দিনের পর দিন অপেক্ষা করিতে লাগিলেন। ইচ্ছা ছিল করিদপুর যাত্রার পূর্বে কৃষ্ণকামিনীকে লিখিয়া পাকা কথা করিয়া যাইবেন। কিন্তু বোম্বাইহীণী শুনিয়াই মহা অনর্থ উপস্থিত করিলেন। বলিলেন,—“ওমা, ওমা, পুরুষ মানুষ চেনা ভার, ভালমানুষটীর মত বাড়ীতে থাকতো, ভিতরে ভিতরে এই বুদ্ধি। তবে ত আমার দাদা ঠিক বলেছিলেন।” ব্রজরাজ ও

মথুরেশ অনেক বুঝাইবার চেষ্টা করিলেন। তিনি কোন প্রকারেই  
 ফুঙ্কিলেন না। তৎপরে প্রতিদিন মাতা পুত্রে এই কথা চলিল।  
 শুদ্ধিকে নবীনচন্দ্রের ফরিদপুরে ফিরিবার সময় হইয়া আসিল।

ফরিদপুরে যাত্রার পূর্বে নবরত্ন সভার সাপ্তাহিক উৎসব সম্পন্ন  
 হইল। এবারে পূর্ববারের ত্রায় সভাগণের উৎসাহ ও অনুরাগের  
 উচ্ছ্বাস দৃষ্ট হইল।

.

---

## দ্বাবিংশ পরিচ্ছেদ

করিদপুরে ফিরিয়া নবীনচন্দ্র উৎসাহের সহিত পূর্বোন্মিথিত সমুদায় কার্য চালাইতে লাগিলেন। কিছুদিনের মধ্যেই সংবাদ আসিল যে কৃষ্ণকামিনীর বিবাহ বিষয়ে তাঁহার মাতার মত হইয়াছে ; এবং কৃষ্ণকামিনীও সে বিষয়ে নিজ সম্মতি প্রকাশ করিয়াছেন। নবীনচন্দ্র এই সংবাদ পাইয়া ঈশ্বরকে অগণ্য ধন্যবাদ করিলেন ; এবং নিজ হৃদয়ের সমুদায় ভাব ব্যক্ত করিয়া কৃষ্ণকামিনীকে এক পত্র লিখিলেন। এই সময় হইতে তিনি নিয়মিতরূপে কৃষ্ণকামিনীর পত্র পাইতে লাগিলেন ও তাঁহাকে পত্র লিখিতে লাগিলেন।

কথায় বলে “শ্রেয়ান্স বহুদ্বিঘ্নানি”, শ্রেয়ের পথে কতই বিঘ্ন ! এদিকে বিবাহ-সম্বন্ধ স্থির হইতে না হইতে কিরূপে সে কথা শ্রামচাঁদ মিত্র মহাশয়ের কর্ণে উঠিল। অনুমান করি, বোম্বাইস্থিত পুত্রদ্বয়ের বার বার নিষেধ সত্ত্বেও বধূদ্বয়কে সে সংবাদ দিয়া থাকিবেন। অবশ্য তিনিও বলিবার সময় গোপন রাখিবার জন্ত অনুরোধ করিতে বিস্মৃত হন নাই ; এবং বধূদিগের মধ্যে কেহ একজন বোধ হয় বাগবাজারের বাড়ী হইতে সমাগত কোনও দাসীকে ঐরূপ গোপন রাখিবার অনুরোধ সহকারে সংবাদটা দিয়া থাকিবেন। আমরা জনসমাজে অনেক গুপ্ত কথা এইরূপে গোপন রাখিয়া থাকি। যাহা দুই কর্ণে যায় তাহা অনেক সময়ে শত কর্ণে গিয়া পড়ে। যেকূপেই হোক, পোষ মাসের শেষভাগে সংবাদটি মিত্র মহাশয়ের কর্ণে উঠিল। তিনি অপার চিন্তাতে নিমগ্ন হইলেন। তিনি ভগিনীর সন্তানদিগকে নিজ সন্তানের ত্রায় জ্ঞান করিয়া থাকেন, এবং এ পরিবারটিকে নিজ পরিবারের অন্তর্ভুক্ত বলিয়া গণনা করেন।

তিনি দিব্যচক্ষে দেখিতে পাইলেন, সম্মুখে একটা বিপদ আসিতেছে। এতদিনের পরে বুঝি ভাগিনেয়দিগের সহিত বিচ্ছেদ ঘটে। তিনি যে কেবল লোক ভয়ে এরূপ ভয় পাইতেছেন, তাহা নহে, হিন্দু-বিশ্ববাস পক্ষে বিবাহাধিনী হওয়া তাঁহার চক্ষে অমার্জ্জনীয় অপরাধ। মাতঙ্গিনী তাঁহাকে এক যাতনা দিয়াছে, যাহা তিনি ক্রমে ভুলিতেছেন; আবার কৃষ্ণকামিনী আর এক যাতনা দিতে চাণিয়াছে। এখন কর্তব্য কি? তিনি কয়েকদিন গভীর চিন্তায় মগ্ন থাকিলেন। একবার কৃষ্ণকামিনীর প্রতি কৃষ্ণ ব্যবহার করিয়া বিশ্বাস জন্মিয়াছে যে কৃষ্ণ ব্যবহারে কিছু হইবে না। সত্ত্বর স্থানান্তরে প্রেরণ করা কর্তব্য; কিছুকাল এই সকল সংসর্গ হইতে দূরে থাকিলে এ প্রকার ভাব চলিয়া যাইতে পারে। কিন্তু কোথায় পাঠান যায়? কাহার সঙ্গেই বা পাঠান যায়? এই চিন্তা করিতে করিতে স্মরণ হইল যে, তাঁহার পরিচিত কয়েকজন লোক মাঘের প্রথমে বুন্দাবনে দোল দেখিবার জন্ত যাত্রা করিবে। তাহারা পথে গয়া, কাশী ও প্রয়াগ হইয়া যাইবে। মিত্রজ মহাশয় মনে করিলেন, এই সুযোগে কিছুকালের জন্ত পশ্চিমে পাঠান ভাল। নানা তীর্থ ভ্রমণ করিলে, নানা স্থান দেখিলে এবং সকলে বুঝাইলে মনটা বদলাইতেও পারে। কিন্তু তদগ্রে ভগিনীকে হাত করা আবশ্যক।

পরামর্শটা স্থির হইলেই তদনুসারে কার্য আরম্ভ হইল। মিত্রজ মহাশয় একদিন আপীস হইতে ফিরিবার সময় ভগিনীকে সঙ্গে করিয়া বাড়ীতে লইয়া গেলেন। লইয়া গিয়া তাঁহাকে যৎপরোনাস্তি তিরস্কার করিলেন। এরূপ কাজ করিলে তাহার ফল কি হইবে, তাহা বুঝাইয়া দিলেন। লোকে একঘরে করিবে, বাধ্য হইয়া তাঁহাকেও ভাগিনেয়-দিগকে পরিত্যাগ করিতে হইবে, তিনি আর পিত্রালয়ে আসিতে পারিবেন না, ইত্যাদি। ঘোষণা করিয়া বলিলেন,—“ওমা, আমি কি

এত কথা জানি? ওরা বলে বিধবার বিয়ে শাস্ত্রে আছে, বিচ্ছেদাগর প্রমাণ করেছে, এতে দোষ কি, ওর ত বিয়ে হয় নাই বলতে হবে; তাই আমি বণেছি তবে হোক।” ভগিনীকে গড়িতে মিত্রজ মহাশয়ের আর বিলম্ব হইল না। কিরূপে তীর্থযাত্রা হইবে, কোথায় কাহাদের সঙ্গে থাকা হইবে, পরচপত্রের কি হইবে, সমুদায় পরামর্শ স্থির হইয়া রহিল। গৃহিণীকে প্রশংসা করিতে হইবে যে, তিনি এতটা গুপ্ত কথা গোপন রাখিতে পারিলেন। বাড়ীতে ফিরিয়া আসিয়া পুত্রদিগকে কিছুই বলিলেন না।

মাঘ মাস পাড়িলেই মিত্রজ মহাশয় ভগিনীকে ও কৃষ্ণকামিনীকে নিজ ভবনে কয়েকদিন রাখিবার জন্ত লইয়া গেলেন। কাহারও মনে কোনও প্রকার সন্দেহ হইল না। কিন্তু কয়েকদিনের মধ্যেই পুত্রদ্বয়ের নিকট সংবাদ আসিল যে মাতুল কন্যাসহ জননীকে কোথায় প্রেরণ করিয়াছেন। শুনিবামাত্র ব্রজরাজ মাতুলালয়ে গিয়া জিজ্ঞাসা করিলেন। মাতুল বলিলেন, “ভাবনা কি? জলে ত পড়ে নি! পাড়ার কতকগুলি লোক তীর্থে যাচ্ছিল, সেই সঙ্গে তারাও তীর্থে গিয়েছে। কয়েক মাস পরেই আবার আসবে।” ব্রজরাজ তাঁহাদের ঠিকানা জানিতে চাহিলেন। মাতুল হাসিয়া বলিলেন,—“তারা বেলপথে, ঠিকানা দেব কি করে? ক্রমে জানতে পারবে।” তৎপরে দিনের পর দিন বাইতে লাগিল, সর্বদাই এবাড়ী হইতে ঠিকানা জানিবার জন্ত লোক যায়, মাতুল ঠিকানা না দিয়া ফিরাইয়া দেন। ব্রজরাজ ও মথুরেশ উভয়েই ঘোর দৃষ্টিভ্রান্তে বাস করিতে লাগিলেন, ও মাতুলের প্রতি বৃথা আক্রোশ প্রকাশ করিতে লাগিলেন।

ওদিকে ফরিদপুরে নবীনচন্দ্রের নিকট এই সংবাদ পৌছিল। তিনি একেবারে অস্থির হইয়া উঠিলেন। ভাবিতে লাগিলেন,—“কৃষ্ণ-



কামিনীকে যে প্রাণে রাখিবে, তার নিশ্চয় কি ? একি সর্বনাশ উপস্থিত হলো !” তাঁহার দিনে আহার ও রাত্রে নিদ্রা একেবারে রহিত হইয়া গেল। আর পূর্বের ত্রায় নিজ কার্যে ভাল করিয়া মনোযোগ করিতে পারেন না ; ছাত্রদিগকে ভাল করিয়া পড়াইতে পারেন না। সকলেই লক্ষ্য করিতে লাগিল,—“হেড মাষ্টারের কি একটা হয়েছে।” বাগ্‌চী মহাশয় তাঁহাকে পুত্রবৎ স্নেহ করিতেন ; তিনি একদিন জিজ্ঞাসা করিলেন,—“কয়েকদিন হতে তোমাকে বড় বিষন্ন ও অগ্রমনস্ক দেখছি। ব্যাপারটা কি ?” নবীন তাঁহাকে পিতৃতুল্য ভক্তি শ্রদ্ধা করিতেন, তাঁহার নিকট সমুদায় কথা খুলিয়া বলিলেন। বৃদ্ধ ব্রাহ্মণ অতি উদার লোক ছিলেন, তিনি নবীনের সমজুখী হইলেন। তিনি বয়সে প্রবীণ এবং বিজ্ঞ লোক ; তিনি বলিলেন, “প্রাণে মারিবার ভয় করো না ; তাদের সেরূপ অভিসন্ধি থাকুণে তার মাকে সঙ্গে দিয়ে বিদেশে পাঠান না। এই থানেই কর্ম্ম পরিষ্কার করবার যোগাড় কর্ত। আর হঠাৎ মারবেই বা কেন ? আমার বোধ হয় তার ভ্রাতাদের সংসর্গ হতে কিছুদিন দূরে রাখলে মন বদলাতে পারে, এই আশাতেই তীর্থে পাঠিয়েছে।” তাঁহার কথাতে নবীনচন্দ্র কিঞ্চিৎ আশ্বস্ত হইলেন। কিন্তু মনের মধ্যে কৃষ্ণ-কামিনীর কুশল সংবাদ পাইবার জন্ত কিরূপ ব্যগ্রতা রহিল, তাহা অবর্ণনীয়। কাকটা উড়িয়া গেলে যেন মনে হয় “আহা অমনি একখানা চিঠি ফেলে দিয়ে যায় ত বেশ হয়।” প্রতিদিনের ডাক পৌঁছিতে বিলম্ব হয় না, ডাকঘরে গিয়া চাকর দাঁড়াইয়া থাকে, যদি কোনও সংবাদ আসে ! এইরূপে দুই মাস অসহ যন্ত্রণাতে কাটিয়া গেল।

চৈত্রের প্রারম্ভে নবীনচন্দ্র কৃষ্ণকামিনীর নিকট হইতে হঠাৎ নিম্ন-লিখিত পত্রখানি পাইলেন ;—

“না জানি আমার জন্ত তোমরা কতই চিন্তা করিতেছ। আমি

ঈশ্বরের কৃপায় এখনও প্রাণে প্রাণে বাঁচিয়া আছি। আমাকে প্রতীক্ষা করিয়া ইহারা এইদিকে আনিয়াছে। মামা বলিলেন— “বর্দ্ধমানে বন্ধুর-বাড়ী নিমন্ত্রণ আছে সপরিবারে যাইব।” তিনি বর্দ্ধমানে নামিয়া গেলেন; আমরা বরাবর চলিয়া আসিলাম। তারপর কতক পথ হাঁটিয়া কতক গাড়িতে এইরূপ করিয়া গয়া হইয়া প্রয়াগে পৌছিলাম। পরে বুঝিলাম তোমার পথ হইতে আমাকে সরাইয়া দেওয়া আমার উদ্দেশ্য। প্রয়াগে আসিয়া বলপূর্ব্বক আমার মাথা মুড়াইবার চেষ্টা করে; আমি কিছুতেই দি নাই। তিন চারিজন আমাকে জোর করিয়া ধরিয়া নাপিত দিয়া মুড়াইতে গিয়াছিল; পারে নাই। চুলের প্রতি যে আমার বড় একটা মায়া আছে তাহা নয়, কিন্তু যেই মাথার কাছে ক্ষুর লইয়া যায়, অমনি মনের ভিতর হইতে কেমন একটা বাধা আসে। যাহা হউক সঙ্গের লোক তাহার পর রাগ করিয়া আর আমাদের বৃন্দাবনে লইয়া গেল না। লোক সঙ্গে দিয়া মাকে ও আমাকে কাশীতে পাঠাইয়াছে। এখানে আমি একপ্রকার কয়েদে আছি; চিঠি লিপিবার একখানি কাগজ পাই না; পড়িবার একখানি বই পাই না; তাহার উপরে দিবানিশি কতকগুলি বৃদ্ধা স্ত্রীলোকের তিরস্কার সহ করিতেছি। শুনিতেছি আমাদের শীঘ্র আবার কোথায় লইয়া যাইবে। আমি মাকে তিরস্কার করিয়া বলিয়াছি,—তোমার যদি মত বদলাইয়াছিল, কেন কলিকাতায় বলিলে না? এত কষ্ট দিবার প্রয়োজন কি ছিল? আমার ত প্রতিজ্ঞা আছে তোমাদের সকলের সম্মতি না হইলে এ কাজ করিব না। আর তোমার বিষয়ে বলিয়াছি,—“তোমার মত বদলাইয়াছে জানিলে তিনিও এমন কাজে প্রবৃত্ত হইতেন না, এতদিন অপেক্ষা করিয়াছেন আরও না হয় কিছুদিন করিতেন।” ঠিক বলি নাই? তা তাঁহাকে বলাই বৃথা। তাঁহার নিজের একটা মত নাই; মামা এক প্রকার বুঝাইয়া দিয়াছেন,

আবার বোধ হয় দাদা ও তুমি বুঝাইলে আর একপ্রকার বুঝিবেন। আজ এই পর্য্যন্ত। তুমি আমার জন্য চিন্তিত হইও না। আমি ঈশ্বরের কৰুণার উপর নির্ভর করিয়া রহিয়াছি। এ কয়েকের অবস্থাও ভাল লাগিতেছে; অনেক আত্ম-চিন্তার সময় পাইতেছি। যদি বাঁচিয়া থাকি এবং যদি কোনও রূপে আবার পত্র লিখিবার সুবিধা করিতে পারি, তাহা হইলে সংবাদ পাইবে। কলিকাতায় দাদাকেও পত্র লিখিলাম।

কৃষ্ণকামিনী।”

এই পত্র পাইয়াই নবীনচন্দ্র ভাবিতে লাগিলেন,—“শীঘ্র অল্প কোথায় লইয়া যাইবে”—তবে ত আর কালাবলম্ব করা উচিত নয়। ত্বরায় তাহাকে উদ্ধার করিবার চেষ্টা করিতে হইবে। এই ভাবিয়া, অবিলম্বে স্কুল হইতে দুই মাসের ছুটি লইয়া, কলিকাতায় আসিলেন, এবং ব্রজরাজ, পঞ্চ ও গোবিন্দকে ছুটি লওয়াইলেন। রাজা মাকে সমুদায় ভাঙ্গিয়া বলিলেন। তিনি বলিলেন,—“আর বাবা! আমি ত আর দেশে থাক্চি না; তুমি যাতে সুখী হও, তাই কর।” তৎপরে রাজা মাকে সঙ্গে লইয়া চারি বন্ধুতে কাশীর অভিমুখে যাত্রা করিলেন।

কাশীতে উপস্থিত হইয়াই তাঁহার কৃষ্ণকামিনীও অনুসন্ধান আরম্ভ করিলেন। দুই তিন দিনের মধ্যেই কৃষ্ণকামিনীর উদ্দেশ পাওয়া গেল। একদিন সন্ধ্যার সময় ব্রজরাজ তাঁহার মাতাকে বিশ্বেশ্বরের মন্দিরের নিকট দেখিতে পাইয়া, নবীনের রাজা মার বাসাতে ডাকিয়া আনিলেন; সেখানে সকলে পড়িয়া বুঝাইয়া পুনরায় তাঁহার মত ফিরাইলেন। স্থির হইল যে, তৎপরদিন সন্ধ্যার পর কৃষ্ণকামিনীকে সঙ্গে লইয়া তিনি বিশ্বেশ্বরের মন্দিরে আসিবেন; ব্রজরাজ ও গোবিন্দ তাঁহাদের জন্ত পথে অপেক্ষা করিবেন; তৎপরে তাঁহারা তাঁহাদের বাসাতে আসিবেন এবং তৎপরদিনই বিবাহ হইবে।

পরদিন পরামর্শানুসারে ব্রজরাজ ও গোবিন্দ বিশ্বেশ্বরের মন্দিরের পথে অপেক্ষা করিতেছেন। যথাসময়ে ঘোষণাহিণী ও কৃষ্ণকামিনী উপস্থিত হইলেন। তৎক্ষণাৎ ব্রজরাজ অগ্রে ও গোবিন্দ পশ্চাতে, তাঁহাদিগকে লইয়া রাস্তামার বাসার অভিমুখে যাত্রা করিলেন। এদিকে যে বাড়ীতে কৃষ্ণকামিনী ছিলেন, সে বাড়ীতে মিত্রজ মহাশয়ের আদেশানুসারে তাঁহাকে রক্ষা করিবার ভার যে সকল লোকের প্রতি ছিল তাহারা যখন শুনিল যে কৃষ্ণকামিনী মায়ের সঙ্গে গিয়াছে, তখনই তাহাদের মনে সন্দেহ হইল। কারণ কৃষ্ণকামিনীকে কখনও বাড়ীর বাহির করিবার পরামর্শ ছিল না। তাহারা তৎক্ষণাৎ দুই জন গুপ্তা ভাড়া করিয়া বিশ্বেশ্বরের মন্দিরাভিমুখে ধাবিত হইল। পথে রাস্তার লোকের মুখে শুনিল, দুইটা জ্বালোককে মধ্য করিয়া দুইটা বাবু ত্রিপুরা স্তম্ভরীর গলির দিকে গিয়াছেন। তাহারা কিয়দূর আসিয়াই দূর হইতে তাঁহাদিগকে দেখিতে পাইল; দেখিয়া ধাবিত হইল। তখন তাঁহারা বাড়ীর দ্বারে পৌঁছিয়াছেন। গোবিন্দ পশ্চাতে ছিলেন। তিনি পশ্চাৎ ফিরিয়াই দেখিলেন, কয়েকজন লোক তাঁহাদিগের অভিমুখে দৌড়িয়া আসিতেছে। তিনি বলিলেন,—ব্রজরাজ, লোক আসছে শীগ্গির তাঁহাদিগকে বাড়ীর ভিতর নিয়ে দ্বার দেও।” এই বলিতে বলিতে তাহারা আসিয়া উপস্থিত। গোবিন্দ প্রবেশ করিতে না করিতে ব্রজরাজ ব্যস্ত সমস্ত হইয়া দ্বার দিয়া ফেলিলেন। পক্ষু ও নবীনজ্ঞ উপরে ছিলেন, গোলমাল শুনিয়া নীচে দৌড়িয়া আসিলেন, দেখিলেন, রমণীদ্বয় নিরাপদে পৌঁছিয়াছেন। নবীন জিজ্ঞাসা করিলেন,—“গোবিন্দ কৈ?”

ব্রজরাজ। সে হুকুতে পারে নাই।

নবীন। কি সকলশ! তবে ত তারে মেরে ফেলবে; খোলোঃ খোলো, দোর খোল, মরি ত সকলেই মরি, কাশী বড় ভয়ঙ্কর স্থান!

তাড়াতাড়ি দ্বার খুলিয়া দেখেন গোবিন্দের দেহ রুধিরে প্লাবিত হইয়া দ্বারের নিকট পড়িয়া রহিয়াছে; আর কেহ কোথাও নাই। একি সর্বনাশ! যাহা ভয় করিয়া গিয়াছিল, তাহাই ঘটিয়াছে। নবীনচন্দ্র অনেক পরীক্ষা করিয়া দেখিলেন প্রাণবায়ু তখনও দেহকে পরিত্যাগ করে নাই; গোবিন্দ অচেতনাবস্থাতে আছে। তখন সকলে ধরাধরি করিয়া তাঁহাকে বাড়ীর মধ্যে লইয়া গেলেন। সেখানে ক্রন্দনের রোল উঠিল। নবীনচন্দ্র ও পঞ্চ ডাক্তার আনিতে গেলেন। ডাক্তার আসিবার পূর্বেই গোবিন্দের চেতনা হইল। ডাক্তার আসিয়া মাথা বাঁধিয়া দিলেন ও অভয় দিয়া গেলেন। পরদিন প্রাতঃকালে গোবিন্দকে অনেকটা সুস্থ বোধ হইল।

তাঁহারা সেই রাত্রেই বিবাহক্রিয়া সমাধা করা স্থির করিলেন। কিন্তু সে দিন বিশেষরূপে পুলিশ পাহারা চাই। কলিকাতার একজন মিশনারী সাহেব তখন কাশীতে বাস করিতেন। কলিকাতায় অবস্থিতি কালে, তাঁহার সহিত ব্রজরাজ ও পঞ্চুর আলাপ পরিচয় ছিল। তিনি উভয়কে প্রাতি করিতেন। ব্রজরাজ ও পঞ্চু প্রথমে তাঁহার নিকট গিয়া সমুদায় বিবরণ তাঁহার গোচর করিলেন। তিনি তাঁহাদিগকে লইয়া পুলিশ সুপারিন্টেন্ডেন্ট সাহেবের নিকট গেলেন। পুলিশ সাহেব খৃষ্টধর্ম্মে একটু আস্থাবান লোক ছিলেন; তিনি মিশনারী মহাশয়ের কথাতে তখনই সেই বাড়ীর দ্বারে দুইজন পাহারাওয়াল বসাইয়া দিলেন। এইরূপ স্থির রহিল যে সন্ধ্যাকালে উক্ত মিশনারী সাহেব ও স্বয়ং পুলিশ সাহেব বিবাহস্থলে উপস্থিত থাকিবেন। সমস্ত দিন বাড়ীর দ্বারে পাহারা রহিল। সন্ধ্যার সময় গোবিন্দকে পার্শ্বের ঘরে বিছানা করিয়া একটা তাকিয়া দিয়া বসাইয়া দেওয়া হইল, যেন সে সেখানে হইতে বিবাহ দেখিতে পারে।

যথা সময়ে পুলিশ সাহেব ও মিশনারী সাহেব আসিলেন। কিন্তু কি প্রণালীতে বিবাহ হইবে? পঞ্চ ব্রাহ্মসমাজে যান বটে, কিন্তু ব্রাহ্মসমাজের কোনও পদ্ধতি তখনও হয় নাই। হিন্দু পদ্ধতি যে কি তাহা এই ইংরাজীনবিশদিগের কাহারও জানা ছিল না। আর কাশীর মত স্থানে বিধবা বিবাহের পুরোহিত বা কোথা পাওয়া যায়? অবশেষে স্থির হইল, পঞ্চ একটু ঈশ্বরের স্তুতি করিবেন, বরকত্যা একটা প্রার্থনা পাঠ করিবেন, ও একটা প্রতিজ্ঞাপত্র লিখিয়া সাক্ষীদের সমক্ষে স্বাক্ষর করিবেন; তৎপরে নবীনচন্দ্র একটা উইল লিখিয়া কৃষ্ণকামিনীকে তাঁহার সমুদায় সম্পত্তির স্বত্বভাগিনী করিবেন। তদনুরূপ প্রণালীতেই বিবাহক্রিয়া সম্পন্ন হইল। যে প্রতিজ্ঞাপত্রে নবীনচন্দ্র ও কৃষ্ণকামিনী স্বাক্ষর করিলেন, তাহাতে ব্রজরাজ, পঞ্চ, মিশনারী সাহেব ও পুলিশ সাহেবেরও স্বাক্ষর রহিল।

বিবাহের আশ্রয় প্রমোদ কিছুই হইল না। নবীনচন্দ্র পুলিশ সাহেবকে বলিয়া আরও দুইদিন পাহারা রাখিলেন। দুই দিনের মধ্যে তিনি রাজ্য মার সমুদায় বন্দোবস্ত করিলেন। তাঁহার পূর্বপরিচিত একজন বন্ধুকে সপরিবারে সেই বাড়ীতে রাখিবার পরামর্শ স্থির করিলেন।

দুই দিন পরে তাঁহারা রাত্রিকালে নৌকাযোগে কাশীধাম পরিত্যাগ করিয়া স্বেচ্ছাভিমুখে যাত্রা করিলেন। পথে আসিয়া রেলগাড়ি ধরিয়াছিলেন। নবরত্ন সভার সভ্যগণ পূর্ক হইতেই সংবাদ পাইয়াছিলেন। তাঁহারা সকলে রেলওয়ে স্টেশনে উপস্থিত হইয়া মালাচন্দন দিয়া বর ও কত্যাাকে অভ্যর্থনা করিয়া লইলেন। দুই এক দিনের মধ্যে বর কত্যাার সম্মানার্থ নবরত্ন সভার সভ্যদিগের একটা মহাভোজ হইয়া গেল। আনন্দ ও উৎসাহের সীমা পরিসীমা নাই।

নবীনচন্দ্র গ্রীষ্মের অবকাশকাল কলিকাতাতেই বন্ধুদিগের সহিত  
 যাপন করিলেন। এই সময়ের মধ্যে একটা ভয়ঙ্কর লোমহর্ষণ কাণ্ড  
 ঘটয়া গেল, যাহার অনুরূপ ঘটনা কেহ কখনও শুনে নাই। তাহা  
 বর্ণন করিবার পূর্বে পূর্ববৃত্তান্ত কিছু বলা আবশ্যক। ইহা অনেকে  
 অনেকবার দেখিয়া থাকিবেন যে, সন্ধ্যাকালে প্রদীপ জ্বালিলে সময়ে সময়ে  
 এক একটা পতঙ্গ আসিয়া সেই অগ্নিতে পড়িতে চায়। বসিয়া আছি,  
 কল্পজনে কথাবার্তা কহিতেছি; হঠাৎ দেখা গেল, একটা পতঙ্গ প্রদীপের  
 চারিদিকে ঘুরিতেছে; একজন বলিলেন,—“পোকাটা তাড়িয়ে দেও ত,  
 আগুনে পড়ে মরবে।” উঠিয়া পতঙ্গটাকে তাড়াইয়া দেওয়া গেল।  
 কিয়ৎক্ষণ পরে দেখা গেল, আবার আসিয়াছে। আবার পূর্বোক্ত ব্যক্তি  
 বলিলেন,—“মুর্ আবার এল, ধরে পোকাটাকে জানালা দিয়ে ফেলে  
 দেও ত।” সেবার উঠিয়া তাহাকে ধরিয়া জানালা দিয়া বাহিরে ফেলিয়া  
 দেওয়া গেল। আপদ শাস্তি, একটা জীবের জীবন রক্ষা হইল।  
 সকলে নিশ্চিন্ত আছি, হঠাৎ একজন বলিয়া উঠিলেন,—“বা, আবার  
 এসে আগুনে পড়লো, মরে তার পর ছাড়িলে!” হায়! হায়! এ  
 জগতে কোনও কোনও মানুষের যেন এই দশা হয় দেখি! তাহারা  
 পাপানলে না পুড়িয়া না মরিয়া ছাড়ে না। আত্মায় স্বজন বার বার  
 সতর্ক করে, নিষেধ করে, শাসন করে, কিছুতেই কিছু হয় না;  
 কিছুতেই তাহারা ছুপ্রবৃত্তিকে সংযত করিতে পারে না; পাপানলেই  
 আত্ম-সমর্পণ করে এবং ধনে প্রাণে সারা হয়। হতভাগিনী মাতঙ্গিনীর  
 সেই দশা ঘটিল। সকলে অবগত আছেন যে, কৃষ্ণকামিনীর রোগশয্যা  
 হইতে উঠিয়া গৃহে যাইবার সময়ে শ্রামচাঁদ মিত্র মহাশয় এই প্রতিজ্ঞা  
 করিয়া গিয়াছিলেন যে, তৎপর দিবসই উমাশঙ্করকে বাড়ী হইতে  
 তাড়াইয়া দিবেন। বাড়ীতে গিয়াই সে পরামর্শ পরবর্ত্তিত হইয়া যায়।

উমাশঙ্করকে হঠাৎ কিছু বলা অপেক্ষা মাতঙ্গিনীকে সাবধান করিয়া দেওয়া অধিক যুক্তিসঙ্গত বলিয়া মনে করেন। তদনুসারে মাতঙ্গিনীকে নির্জনে ডাকিয়া, বিশেষভাবে সতর্ক করিয়া দেন। ইহার দুই দিন পরেই উমাশঙ্কর আপনা হইতে চলিয়া গেল; এবং এক মাস পরেই কলিকাতার হোগলকুঁড়েতে একটা বাড়ী ক্রয় করিল। সেখানে মধ্যে মধ্যে সপরিবারে বাস করিত, কখনও কখনও একাকা আসিরা থাকিত। উমাশঙ্কর চলিয়া যাওয়ার পর গোপনে মাতঙ্গিনীর সহিত চিঠিপত্র চলিতে লাগিল। কিছুদিন কেহ কিছু লক্ষ্য করিতে পারিল না। একদিন মাতঙ্গিনীর অনুপস্থিতিকালে মিত্রজ মহাশয় কোনও কার্যে তাহার ঘরে প্রবেশ করিয়া হঠাৎ উমাশঙ্করের হস্তলিখিত একখানি চিঠির খাম কুড়াইয়া পাইলেন। উপরে বাড়ীর অপর একজন লোকের নাম। মাতঙ্গিনীর ঘরে ঐ খাম পাইয়া তাহার মনে সন্দেহ হইল; অন্বেষণ করিতে করিতে তাহার বালিশের নিম্নে উমাশঙ্করের লিখিত এক পত্র পাইলেন। তাহা পাঠ করিয়া তিনি কোপে জ্বলিতে লাগিলেন। সেই দিন রাত্রে মাতঙ্গিনীকে নির্জনে ঘরে ডাকিয়া যথেষ্ট ভৎসনা করিলেন; এবং তৎপর দিনই মাতঙ্গিনীর দেবরকে ডাকাইয়া তাহার স্বস্ত্রালায়ে পাঠাইয়া দিলেন। তাহার দেবরের বাসা বাহির সমিলা। মাতঙ্গিনী সেখানে এক প্রকার কয়েদে বাস করিতে লাগিল। ডাকে পত্রাদি যে লিখিত, তাহারও সুবিধা আর থাকিল না। এইরূপে কয়েক মাস চলিয়া গেল। ছুটি লোকের কত বুদ্ধিই যোগায়! উমাশঙ্কর পরামর্শ করিয়া মাতঙ্গিনীর সহিত চিঠিপত্র চালাচালি করিবার এক অদ্ভুত উপায় আবিষ্কার করিল। তখন কলিকাতাতে বেদের মেয়েরা অনেক সময় পাড়ায় পাড়ায় মিশি বিক্রয় করিত। এই সকল স্ত্রীলোক সচরাচর পুরুষেরা আপীসে গেলে বাহির হইত, এবং “বাত ভাল করিগো—ও—ও;” “দাঁতের পোকা বার



করিগো—ও—ও”, প্রভৃতি হাঁকিয়া যাইত। উমাশঙ্কর এইরূপ একটা জ্বীলোককে টাকা দিয়া হাত করিল, এবং তাহার দ্বারা চিঠিপত্র চালাচালি আরম্ভ করিল।

জ্বীলোকদিগের অন্তঃপুরে এই বেদের মেয়েদের অব্যবহৃত গতি; সুতরাং সে অবাধে গিয়া মাতঙ্গিনীর সহিত কথা কহিত, এবং একটু নির্জজন হইলে চিঠিপত্র দিত ও আনিত। এইরূপে চিঠিপত্র চলিতে লাগিল; জন-মানব কেহই জানিতে পারিল না। কয়েক মাস পরে মিত্রজ মহাশয় এবং মাতঙ্গিনীর দেবর উভয়েরই বিশ্বাস জন্মিল যে আর তাঁহাদের আশঙ্কার কারণ নাই। তখন তাঁহারা মাতঙ্গিনীকে পূর্বের স্থায় একজন চাকরাণী সঙ্গে গাড়ি করিয়া এক বাড়ী হইতে আর এক বাড়ীতে যাইতে দিতেন। মাতঙ্গিনী মধ্যে মধ্যে দেবরের বাড়ী হইতে পিত্রালয়ে যাইত। একদিন জানিতে পারা গেল যে সে বেলা ১১টা কি ১২টার সময়ে বাগবাজারের বাড়ী হইতে গাড়ি করিয়া বাহির হইয়াছিল, কিন্তু ৫টার পূর্বে বাহির সিমলাতে দেবরের বাড়ীতে পৌঁছে নাই। সঙ্গে বামী চাকরাণী ছিল। মাতঙ্গিনীর দেবর এই বিলম্বের কারণ জিজ্ঞাসা করিতে মাতঙ্গিনী বলিল যে, পথে আসিবার সময় তাহার ভাগিনীর অর্থাৎ ব্রজরাজের মাতার সহিত সাক্ষাৎ করিয়া আসিয়াছে। তাহার দেবর গুরুচরণ দত্ত অতি ভদ্রলোক, তিনি তাহাই বিশ্বাস করিলেন। অথচ মাতঙ্গিনী সেদিন ব্রজরাজদিগের বাড়ীতে যায় নাই। তৎপরে মাতঙ্গিনী যেদিন এক বাড়ী হইতে আর এক বাড়ীতে পৌঁছিতে বিলম্ব করিত, সে দিন একবার নামমাত্র ব্রজরাজদিগের ভবনে পদার্পণ করিয়া যাইত। যেন বলিতে পারে সে সেখানে গিয়াছিল। যে পৌষমাসে কৃষ্ণকামিনীর বিবাহ সম্বন্ধের সংবাদ মিত্রজ মহাশয়ের কর্ণগোচর হয়, সেই পৌষমাসে একদিন মথুরেশ আসিয়া স্বীয় জননীকে বলিলেন,—“দেখ মা,

আমি পথ দিয়া আসছিলাম, দূর হতে যেন দেখলাম ছোট মাসী উমাশঙ্কর বাবুর বাড়ীর খিড়কীর দরজা দিয়ে বেরিয়ে গাড়িতে উঠলো; সঙ্গে যেন বামী চাকরাণীও আছে।”

ঘোষণাহীনী। দুর্ভাগ্য কি হয়? তোর দেখবার ভুল হয়েছে; তাদের বাড়ীর মেনেরা ত এখানে নেই; মাতী সেখানে কোথায় যাবে?

মধুরেশ। তবে তাই হবে, আমারই দেখবার ভুল হয়েছে।

ইহার পরে এ সকল চিন্তা আর কাহারও মনে রহিল না।

যে বৈশাখে নবীনচন্দ্র নবপরিণীতা পত্নীসহ নবরত্নের বন্ধুদের মধ্যে বাস করিতেছেন এবং শ্রামচাঁদ মিত্র মহাশয় নবদম্পতীকে মনে মনে অভিসম্পাত করিতেছেন, সেই বৈশাখের শেষ ভাগে একদিন রাত্রি প্রায় ৯টার সময়ে উমাশঙ্কর নিজ ভগিনীর সহিত সাক্ষাৎ করিবার জন্ত মিত্রজ মহাশয়ের ভবনে উপস্থিত হইল। তাহার আকৃতিতে মানসিক উত্তেজনা ও হুঁশ্চিন্তার লক্ষণ ছিল, কিন্তু মিত্রজ মহাশয় সেদিকে তত লক্ষ্য করিলেন না। উমাশঙ্কর বলিল যে সে পরদিন প্রাতে স্বীয় বাসগ্রামে গমন করিবে, ভগিনীর সহিত একবার সাক্ষাৎ করিয়া যাইবে। বাহিরের ঘরে মিত্রজ মহাশয়ের সহিত তাহার এই সকল কথা হইতেছে এমন সময়ে মাতঙ্গিনীর দেবর গুরুচরণ দত্ত, অতিশয় উদ্বিগ্নভাবে সে স্থানে উপস্থিত হইলেন।

মিত্রজ। কিহে গুরুচরণ, এত রাত্রে যে?

গুরুচরণ। নির্জনে একটু কথা আছে।

উমাশঙ্কর। আমি দিদির সঙ্গে দেখা করিতে বাড়ীর ভিতর যাচ্ছি, আপনারা এইখানেই কথা বলুন। (বলিয়া চলিয়া গেল)।

মিত্রজ। এই ত নির্জনে হলো, কি বলবে বলো।

গুরুচরণ। কি আর বলবো, সর্বনাশ হয়েছে! সন্ধ্যার পর হতে বৌকে আর বাড়ীতে পাওয়া যাচ্ছে না।

মিত্রজ্ঞ। সে কি! যাবে কোথায়? দীনতারিণীর (ব্রজরাজের মাতার নাম) বাড়ীতে তাকে যেতে বারণ করেছি, সেখানে ত যাবে না; তবে কোথায় গেল? বাড়ীর কেউ কিছু বলতে পারে না?

গুরুচরণ। না, কারুকে কিছু বলে যায় নি।

মিত্রজ্ঞ। সে কি, আজ কাল তোমাদের মনে কারুর প্রতি কোনও সন্দেহ হয়েছে?

গুরুচরণ। না, বেশ ত মন দিয়ে ঘরের কাজ কর্ম করছিলেন সেরূপ কিছুই ত দেখিনি।

মিত্রজ্ঞ। উমাশঙ্করের বিষয়ে ত আর কিছু ভাববার যো নেই, সে ত এই বাড়ীতেই উপস্থিত।

গুরুচরণ। তাই ত দেখছি। ব্যাপারটা কি বুঝতে ত পারছি না।

মিত্রজ্ঞ। যা হোক, যে যে জায়গায় যাবার সম্ভাবনা একবার খুঁজতে চল, আমিও তোমার সঙ্গে যাই।

এই বলিয়া বাড়ীর মধ্যে গিয়া গৃহিণীকে কেবল এই মাত্র বলিলেন—  
“মাতী না বলে দেবরের বাড়ী থেকে কোথায় গেছে, তাকে খুঁজতে চললাম।” এই বলিয়া চাদরখানি স্বন্ধে লইয়া গুরুচরণের সহিত বাহির হইয়া গেলেন। তাঁহারা গেলেই মিত্রগৃহিণী বলিলেন, “নিজের ঘর সামলাতে পারেন না, কেবল পরের উপরে শাসন করে বেড়ান। এখন ত আমার ভাইকে কিছু বলবার যো নেই।” উমাশঙ্করকে লক্ষ্য করিয়া—  
“ভাগ্যে তুমি দিন বুঝে আজ এসেছিলে, তা না হলে নিশ্চয় তোমাকে ধূষী করতেন।”

উমাশঙ্কৰ। তাই ত দেখ্‌ছি। যা হোক এটা একটা বিপদ বলতে হবে। শ্ৰামচাঁদ বাবু ফেরা পৰ্য্যন্ত অপেক্ষা কৰতে হছে।

মিত্ৰগৃহিণী। এত ৰাত্ৰে আৰ যাৰে কেন, আজ এখানে থেকেই যাও।

উমাশঙ্কৰ। আচ্ছা, তবে বাহিৰেৰ ঘৰে বিছানা কৰে দিতে বল।

উমাশঙ্কৰ বাহিৰেৰ ঘৰে গিয়া মিত্ৰজ মহাশয়ের জন্ত অপেক্ষা কৰিতে লাগিল। তাঁহার ফিৰিতে ৰাত্ৰি প্ৰায় ১১টা কি ১১।০ টা বাজিয়া গেল। আসিয়া বলিলেন, মাতঙ্গিনীৰ উদ্দেশ পাওয়া গেল না।

পৰদিন প্ৰাতে জনৱৰ উঠিল যে নাৱিকেল ডাক্তাৰ থাণেৰ ধাৰে এক ষোপেৰ পাশে একটা সধবা স্ত্ৰীলোকের মৃতদেহ পাওয়া গিয়াছে। মেয়েটী ৰূপবতী, দেখিলে বোধ হয় ভদ্ৰ ঘৰেৰ মেয়ে; বয়স ২৩২৪, পৰিধানে লাল কস্তাপেড়ে ধুতি, পায়ে মল, হাতে লোহা, বালা ও শাঁকা; সিঁথিতে সিঁদূৰ। মিত্ৰজ মহাশয়ের বাড়ীৰ বা তৎসংক্ৰান্ত কোনও বাড়ীৰ কাহাৰও কোনও সন্দেহ হইল না, যে ঐ মৃতদেহ মাতঙ্গিনীৰ হইতে পারে। কিন্তু শুক্ৰচৰণ দত্ত মহাশয় আপীসে গিয়া এই সংবাদ যখন শুনিলেন, তখন কি জানি কেন, তাঁহার মনে হইল যে সকাল সকাল আপীস হইতে ছুটী লইয়া মোডিকেল কালেক্জে গিয়া দেখিতে হইবে এ মৃতদেহ মাতঙ্গিনীৰ কি না। তিনি যে আশঙ্কা কৰিয়াছিলেন, তাহাই ঘটয়াছে। মৃতদেহেৰ ঘৰে প্ৰবেশ কৰিয়াই দেখেন, সেই গৌৰাঙ্গী, তাক্ৰণ্য-পূৰ্ণা, নারীমূৰ্ত্তি সম্মুখে প্ৰসাৰিত! দেহেৰ কুত্ৰাপি কোনও প্ৰকাৰ বলপ্ৰয়োগেৰ বা অত্যাচাৰেৰ চিহ্ন মাত্ৰ নাই। দেখিয়াই তিনি একেবাৰে মিত্ৰজ মহাশয়ের আপীসে গিয়া তাঁহাকে ডাকিয়া এই সংবাদ দিলেন। উভয়ে পৰামৰ্শ কৰিয়া স্থিৰ কৰিলেন যে চাপিয়া বাইতে হইবে, কাহাৰও নিকট এ সংবাদ প্ৰকাশ কৰা হইবে না; কাৰণ ইহা বড় কলঙ্কেৰ কথা।

চাপ্পিরা রাখুন, তাহাতে কোন আপত্তি নাই ; কিন্তু এই আঘাতে মিত্রজ মহাশয়কে একেবারে ধরাশায়ী করিয়া ফেলিল। তিনি আপীসে অগ্নি কাজ করিতে পারিলেন না ; অস্থখ করিয়াছে বলিয়া ছুটি লইয়া গৃহে আসিলেন। গৃহিনীকে কিছুই ভাগিয়া বলিলেন না ; সে রাত্রে কিছু আহার করিলেন না ; শয্যাতে পড়িয়া কেবল কাঁদিতে লাগিলেন। পিতামাতার মৃত্যুর পর এই ভগিনীটী তাঁহার আদরে বোন ছিল। সে যখন যাহা চাহিয়াছে, তাহাষ্ট দিয়াছেন, টাকাকে টাকা জ্ঞান করেন নাই। বিধবা হইলে সে কিরূপে সুখে থাকিবে, এই চিন্তা সর্বদা তাঁহার মনে প্রবল থাকিত। এত আদর পাইয়াই বোধ হয় মাতঙ্গিনী আত্ম-শাসন করিতে শিখে নাই ; তাহার সাজা এষ্ট হইল।

পরিদিন প্রাতে খবরের কাগজে এই রমণীর আকৃতির বিবরণ প্রভৃতি প্রকাশিত হইল, এবং ইহা লিখিত হইল যে, “লোকলজ্জার ভয়ে এই হত্যা হইয়াছে ; এরূপ অনুমান হয় স্ত্রীলোকটী সধবা ছিল না ; সধবার বেশ একটা কোশল মাত্র। কুক্ষিমধ্যে এক প্রকার বিষ পাওয়া গিয়াছে ; কিন্তু কে হত্যা করিয়াছে তাহার কোনও উদ্দেশ্য পাওয়া যাইতেছে না।” মিত্রজ মহাশয় কয়েকদিন আপীসে যাঠিতে পারিলেন না, পড়িয়া পড়িয়া কেবল ভাবিতে লাগিলেন,—“এর চেয়ে হতভাগী বিষে করলো না কেন ?”

ক্রমে আত্মীয় স্বজন সকলেই জানিতে পারিল, যে ঐ হত্যা রমণী মাতঙ্গিনী। কিন্তু কে হত্যাকারী, তাহা কেহই অনুমান করিতে পারিল না। উমাশঙ্কর সেদিন মিত্রজ মহাশয়ের ভবনে না থাকিলে তাহার ঊপরেই সকলের সন্দেহ পড়িত। ঐ যাত্রা তাহাকে কেহই সন্দেহ করিতে পারিল না। কিন্তু বোধ হয় আপনাদের কাহার কাহারও সন্দেহ হইতেছে, যে ঐ ভীষণ হত্যাকাণ্ড উমাশঙ্করেরই কার্য। তাহাই বটে।

মানুষ যে পাপে এমন পরিপক্ব হইতে পারে তাহা আমরা অগ্রে জানিতাম না। উমাশঙ্কর যেরূপে এই সুখের প্রজ্ঞাপতিটার জীবনদীপ নির্বাণ করিয়াছে, তাহা আর বলিতে ইচ্ছা করিতেছে না। যদি সকল কথা বলিতে পারিতাম, সকলে দেখিতে পাইতেন, জ্বালোক হাজার অসং হইলেও, তাহার ভালবাসিবার শক্তি, বিশ্বাস করিবার শক্তি ও সরলতা একেবারে বিলুপ্ত হয় না; কিন্তু পুরুষ অসং হইলে তাহার অসাধ্য দৃষ্টি অতি অল্পই থাকে। হায়! হায়! মৃত্যুর দুই মিনিট পূর্বেও মাতঙ্গিনী ভাবিতেছিল, যে সধবা সাজিয়া, লোকচক্ষু এড়াইয়া সে নিজ প্রেমাস্পদের সহিত স্বচ্ছন্দে ও স্বাধীনভাবে বিহার করিতে বাইতেছে। যখন বিষ তাহার গলে ঢালিয়া দেওয়া হয় তখনও সে হাসিয়া জিজ্ঞাসা করিয়াছে, “আমাকে কি খাওয়াচ্চ?” এবং এই নরাকৃতি পিশাচ তখনও হাসিয়া বলিয়াছে,—“খেয়েই দেখ না।” এ পাপের চিত্র আর অঙ্কিত করিতে ইচ্ছা কবে না। প্রাচীন সংস্কৃত কবির সহিত একবাক্যে বলিতে ইচ্ছা করিতেছে,—

“উপকারিণি বিশ্রদ্ধে শুদ্ধমতৌ যঃ সমাচরতি পাপং

তং জনমসত্যসন্ধং ভগবতি বশুধে কথং বহসি।”

অর্থ—“উপকারী, বিশ্বাস-পরায়ণ ও সরল-চিত্ত ব্যক্তির প্রতি যে পাপাচরণ করিতে পারে, সে প্রবঞ্চকের ভার হে ধরণি! তুমি আর কেন বহন কর?”

## ত্রয়োবিংশ পরিচ্ছেদ

গ্রীষ্মাবকাশের অস্তে নবীনচন্দ্র সস্ত্রীক ফরিদপুরে উপস্থিত হইলেন। সহরের মধ্যে জননব পড়িয়া গেল, হেড মাষ্টার বিধবা বিবাহ করিয়া সপরিবারে আসিয়াছেন। পাড়ার নিম্নশ্রেণীর স্ত্রীলোকেরা দলে দলে কৃষ্ণকামিনীকে দোখবার জন্ত আসিতে লাগিল। সহরের ভদ্র গৃহস্থ গৃহের গৃহিণীরাও দাসী প্রেরণ করিয়া সংবাদ লইতে লাগিলেন। যেই দেখিয়া যায়, সেই কৃষ্ণকামিনীর রূপ শুণের প্রশংসা করে। ওদিকে সহরের ভদ্রলোকদিগের মধ্যে ঘোর দলাদলি বাধিয়া গেল। কতকগুলি লোক অতিশয় বিরোধী হইয়া দাঁড়াইলেন। তাঁহারা বলিতে লাগিলেন, —“বিবাহের কথা সর্বৈব মিথ্যা, কাশী হইতে স্ত্রীলোকটীকে সঙ্গে করিয়া আনিয়াছে।” যাহারা বিবাহ বলিয়া স্বীকার করিলেন, তাঁহারাও বিধবা-বিবাহ বলিয়া ঘৃণা করিতে লাগিলেন।

এই গোলমালে নবীনচন্দ্র অগ্রে যে সকল কার্য আরম্ভ করিয়াছিলেন, তাহার কিঞ্চিৎ ক্ষতি হইল। সৰ্ব্বাগ্রে ছেলেদের দলটী ভাঙ্গিয়া গেল। কর্তৃপক্ষগণ স্বীয় স্বীয় গৃহের বালকদিগকে হেড মাষ্টারের দলে থাকিতে নিষেধ করিয়া দিলেন। সুরাপাননিবারিণী সভাটীও এক প্রকার উঠিয়া গেল। যাহারা নবীনচন্দ্রের সহিত মিশিতেন, এরূপ দুই একজন সভ্য ব্যতীত আর সকলেই সভাতে আসা পরিত্যাগ করিলেন। বক্তৃতাশামালোচনী সভাটির বিশেষ ক্ষতি হইল না; কারণ তাহাতে যে কয়জন উৎসাহী লোক ছিলেন, তাঁহারা সকলেই নবীনচন্দ্রের সহিত প্রায় প্রতিদিন রাতে মিশিতেন, সুতরাং সকলেই প্রেমে আবদ্ধ ছিলেন। তাঁহারা পূর্বের ভায় স্থল ঘরে আসিয়া পাঠাদি করিতে লাগিলেন।

ধর্ম্মালোচনা সভায় ছই একজন সভ্য ভিন্ন সকলেই পূর্ববৎ রহিলেন। তাঁহাদের সহিত নবীনচন্দ্রের গূঢ় আধ্যাত্মিক আত্মীয়তা স্থাপিত হইয়াছিল, সুতরাং তাঁহারা তাঁহাকে পরিত্যাগ করিলেন না।

বৃদ্ধ বাগ্‌চী মহাশয়ের ভাব দেখিয়া নবীনচন্দ্রের মন মুগ্ধ হইয়া গেল। তিনি বিরোধী দলের নির্যাতন চেষ্টা দেখিয়া নিতান্ত বিরক্ত হইয়া গেলেন; এবং নবীনচন্দ্রের প্রতি পূর্বাপেক্ষা অধিক ভালবাসা দেখাইতে লাগিলেন। ফরিদপুরে পৌছিবার কয়েকদিন পরেই একদিন প্রাতে নবীনচন্দ্র বাগ্‌চী মহাশয়কে ডাকিয়া বাড়ীর মধ্যে লইয়া গেলেন এবং কৃষ্ণকামিনীকে ডাকিয়া বলিলেন,—“কৃষ্ণকামিনী! এই বাগ্‌চী মহাশয়, এর কথা ত তোমাকে বলিছি, উনি আমাদের পিতৃস্থানীয়, তোমাকে দেখতে এসেছেন।” কৃষ্ণকামিনী আসিয়া গলবজ্রে ভূমিষ্ঠ হইয়া বৃদ্ধ ব্রাহ্মণের চরণে প্রণতা হইলেন ও পদধূলি লইলেন। বাগ্‌চী মহাশয় ছই চারিটা মিষ্ট কথা বলিয়া তাঁহাকে আপ্যায়িত করিলেন। এইরূপে ক্রমে ক্রমে যে কয়েকজন নবীনচন্দ্রের শ্রদ্ধাভাজন ও আত্মীয় ছিলেন, তাঁহাদের সহিত কৃষ্ণকামিনীর পরিচয় হইয়া গেল। যে কেহ একবার তাঁহার সহিত আলাপ করেন, তিনিই তাঁহার বিনয়, সৌজন্ম ও সাধুতা দেখিয়া মুগ্ধ হইয়া যান, এবং বাহিরে গিয়া লোকের নিকটে মুক্তকণ্ঠে প্রশংসা করেন। এইরূপে হেড মাষ্টারের নবপরিণীতা পত্নীর প্রশংসা সেই ক্ষুদ্র সহরে ব্যাপ্ত হইয়া পড়িল।

আর এক শ্রেণীর লোকে এই প্রশংসাতে যোগ দিল। নবীনচন্দ্রের বাসার সন্নিবর্তন পল্লীর দরিদ্র লোক সকল কৃষ্ণকামিনীর সদয় ব্যবহারে অতিশয় প্রীত হইয়া চারিদিকে তাঁহার গুণের কথা বলিয়া বেড়াইতে লাগিল। কেবল ইহাও নহে, নবীনচন্দ্র ফরিদপুরে পৌছিয়াই তৎপরদিন ম্যাজিষ্ট্রেট সাহেব ও তাঁহার মেমের সহিত সাক্ষাৎ করিয়াছিলেন।



সেই সময়ে কথোপকথনের মধ্যে কৃষ্ণকামিনীর নির্বাসন, অন্বেষণ, উদ্ধার ও বিবাহ সংক্রান্ত সমুদায় ঘটনা বর্ণন করিয়াছিলেন। দুই এক দিনের পরেই একদিন ম্যাজিষ্ট্রেট সাহেব সজ্ঞীক তাঁহাদের ভবনে বেড়াইতে আসিলেন। মেম কৃষ্ণকামিনীকে অনেক ভালবাসার কথা বলিলেন।

এই সকল কারণে বিরোধী দলের বিদ্বেষ যেন আরও প্রজ্জ্বলিত হইয়া উঠিল। তাঁহারা নবীনচন্দ্রের নামে নানা প্রকার অখ্যাতি রটনা করিতে লাগিলেন। হেড মাষ্টারের বাড়ীতে প্রতিদিন সন্ধ্যার পর বাবুদের আড্ডা হয়, সেখানে মত্ত মাংস চলে, হেড মাষ্টারের স্ত্রী তাহার ভিতর থাকেন; বৃদ্ধ বাগ্‌চীকে মুরগীর ঝোল খাওয়াইয়াছে, বাগ্‌চী প্রথমে খাইতে চান নাই, ছোঁড়ারা ধরিয়া নাকে চালিয়া দিয়াছে ইত্যাদি ইত্যাদি। এদিকে বেচারী নবীন অক্ষয়কুমার দত্ত মহাশয়ের “বাহুবল্লভ” পড়িয়া যৌবনের প্রারম্ভ হইতেই নিরামিষাশী। কৃষ্ণকামিনীও একে ভক্ত বৈষ্ণবের কন্যা, তাহাতে হিন্দুর ঘরের বিধবা, বাল্যকাল হইতে আমিষ ভক্ষণের অভ্যাস নাই। তাঁহাদের ভবনে বিড়ালটা আসিলে তাহাকেও তপস্বীর ছায়া নিরামিষাশী থাকিতে হয়। নিদ্রুক লোকে কি এ সকল বিষয় দেখে, না গণনা করে? এইরূপ নানা কথা লোকের মুখে ঘুরিতে লাগিল।

এ দিকে কৃষ্ণকামিনী গৃহধর্মো নুতন ব্রতী হইয়া সংসার মধ্যে অতি সুন্দর শৃঙ্খলা স্থাপন করিলেন। মানুষ বতদিন না নিজের ক্ষেত্র পায়, কাজ করিবার স্বাধীনতা ও সুবিধা না পায়, তঁতদিন তাহার ভিতরে কি আছে তাহা জানিতে পারা যায় না। কৃষ্ণকামিনীর মধ্যে যে এতটা গৃহস্থালি ছিল, তাহা তাঁহার আত্মীয় স্বজনগণও এতদিন বুঝিতে পারেন নাই। এক্ষণে তাঁহার সেই সকল সদগুণ প্রকাশ পাইতে লাগিল। চারিদিক পরিষ্কার পারচ্ছন্ন, কোনও স্থানেও একটু অপরিষ্কার কিছু নাই; সমুদায় দ্রব্য সুশৃঙ্খলরূপে সজ্জিত; যেটী যেখানে থাকা আবশ্যিক,

সেটা সেইখানেই আছে ; তাঁহার কুচি এমনি সুন্দর যে এক মাস না যাইতে যাইতে বাড়ীখানি যেন ছবিখানির মত হইয়া উঠিল। এক দিন ম্যাজিষ্ট্রেটের মেম বেড়াইতে আসিয়া বাড়ীর পরিচ্ছন্নতা ও শৃঙ্খলা দেখিয়া অতিশয় প্রীত হইলেন, এবং ঘরে গিয়াই কতকগুলি ফুলের টব পাঠাইয়া দিলেন। কৃষ্ণকামিনী ফুলগাছগুলি পাইয়া বড়ই আহলাদিত হইলেন, এবং যেখানে যেটা দিলে সুন্দর দেখায় সেখানে সেটাকে বসাইলেন।

গৃহটি এইরূপে সুসজ্জিত হইল। তাঁহাদের সময়ও সেইরূপ সুশৃঙ্খল ভাবে অতিবাহিত হইতে লাগিল। যে ভূতাটী অগ্রে রন্ধন করিত, লোকে তাহাকে একঘরে করিবার ভয় প্রদর্শন করাতে সে ছাড়িয়া গিয়াছে। কিন্তু তাহাতে দুঃখ নাট; কৃষ্ণকামিনী রন্ধন কার্যে সুপরিপক। তাঁহারা উভয়ে অতি প্রত্যাষে গাত্রোথান করেন, মুখপ্রক্ষালনাদির পরে “ধান-মন্দিরে” প্রবেশ করেন। কৃষ্ণকামিনী এতদর্থে ঠাকুর ঘরের ত্রায় একটা ঘর রাখিয়াছেন, তাহা কেবল পাঠ চিন্তা ও ঈশ্বরারাধনার জন্তই ব্যবহৃত হয়, অত্র কার্যে ব্যবহৃত হয় না; নবীনচন্দ্র তাহাকে “ধান-মন্দির” বলিয়া থাকেন। সেখানে প্রবেশ করিয়া প্রথমে কোনও ধর্ম-গ্রন্থ হইতে নবীনচন্দ্র কিয়দংশ পাঠ করেন, তৎপরে উভয়ে একটা স্তোত্র পাঠ করেন, তৎপরে ক্ষণকাল নিস্তরঙ্গ ভাবে ধ্যান ও দিবসের কার্যের বিষয়ে চিন্তা করেন; তৎপরে নবীনচন্দ্র বায়ু সেবন করিতে বহির্গত হন এবং কৃষ্ণকামিনী গৃহকার্যে রত হন। এই সমুদায় কার্য যথাসময়ে নির্বাহ হইয়া থাকে। আশ্বিনাষ্তির জন্ত উভয়ের অত্যন্ত মনোযোগ। এক মাস না যাইতে যাইতে নবীনচন্দ্র কৃষ্ণকামিনীকে ইংরাজী পড়াইবার জন্ত মাসিক ১০ টাকা বেতনে তাঁহার অনুগত, স্কুলের একটা শিক্ষককে নিযুক্ত করিলেন, এবং নিজে তাঁহাকে উদ্ভিদবিজ্ঞা শিখাইতে লাগিলেন। এইরূপে জ্ঞানালোচনা চলিল।

কিন্তু ধর্মালোচনা সভাতেই কৃষ্ণকামিনীর প্রকৃতির সর্বশ্রেষ্ঠ ভাগ প্রকাশ পাইত। তিনি যখন ভক্তিভাবে ঈশ্বরের গুণকীর্তন শুনিতে বসিতেন, তখন তাঁহার বিনীত, পবিত্র ও প্রেমোজ্জ্বল মুখেয় প্রতি দৃষ্টিপাত করিলে অতি পাষাণেরও মনে ভক্তিরসের সঞ্চার হইত। বাগ্‌চী মহাশয় যখন ভক্তিতত্ত্বের গান সকল করিতেন, তখন কৃষ্ণকামিনীর বিমল মুখমণ্ডলের উপরে দর দর ধারে ভক্তি-অশ্রু প্রবাহিত হইত। তাহা দেখিয়া বাগ্‌চী মহাশয় এতই মুগ্ধ হইয়াছিলেন, যে কৃষ্ণকামিনীকে মধ্যে মধ্যে বলিতেন, “মা তুমি সাক্ষাৎ মীরাবাই, তুমি আর জন্মে মীরা ছিলে।” একদিন নবান বাগ্‌চী মহাশয়কে বলিলেন,—“আপনার পুত্রবধু বেশ গাইতে পারেন, আপনি বুঝি তা জানেন না? আপনাকে একটু গেয়ে শোনাবার জন্তে কত বলি, তা উনি কিছুতেই গাবেন না, বড় লজ্জা।”

বাগ্‌চী মহাশয়। ভগবানের নাম করবে তাতে লজ্জা কি মা? এদেশের মেয়েরা বিবাহের সময় কত গান করে, তাতে লজ্জা হয় না, তুমি পরমেশ্বরের নহিমা কীর্তন করবে তাতে লজ্জা?

কৃষ্ণকামিনী। ওঁর কথা আপনি শোনেন কেন? আমি গাইতে জানি না, পঞ্চ বাবুর গান শুনে শুনে এক আধটু শিখেছি।

বাগ্‌চী মহাশয়। আচ্ছা, তাই একটু গাও দেখি?

নবানচন্দ্র এবং বাগ্‌চী মহাশয় দুইজনে অনেক অনুরোধ করিতে করিতে কৃষ্ণকামিনী অতিশয় সঙ্কুচিত ভাবে, ভক্তির সহিত একটা সঙ্গীত গাইলেন। শুনিয়া বাগ্‌চী মহাশয় শত শত ধন্যবাদ করিতে লাগিলেন।

তৎপরে এই স্থির হইল যে, বাগ্‌চী মহাশয় সপ্তাহে দুই দিন আসিয়া তাঁহাকে ভক্তিতত্ত্বের সঙ্গীত সকল শিখাইবেন। সেইরূপ বন্দোবস্তে কার্য্য চলিল। এইরূপ এক প্রকার সুখেই তাঁহাদের দিন কাটিয়া

যাইতেছে ; এমন সময়ে হঠাৎ একদিন শিক্ষাবিভাগের ডিরেক্টরের আপীস হইতে হেড মাষ্টারের নামে একখানি কাগজ আসিল। নবীনচন্দ্র পড়িয়া দেখিলেন, যে ফরিদপুরের কতকগুলি লোক নাম স্বাক্ষর করিয়া ডিরেক্টরের নিকট তাঁহার নামে অভিযোগ করিয়াছেন, এবং তাঁহাকে হেড মাষ্টারের পদ হইতে অপসৃত করিবার জন্ত অনুরোধ করিয়াছেন। অভিযোগকারীরা বলিয়াছেন—হেড মাষ্টার গ্রীষ্মের ছুটির পর আসিবার সময় একটা স্ত্রীলোক সঙ্গে করিয়া আসিয়াছেন, ঐ স্ত্রীলোক তাঁহার বিবাহিতা পত্নী নহে ; তাহার স্বভাব চরিত্র অতিশয় মন্দ, সে অতি বেহায়া, সকলের সঙ্গে বসিয়া গান বাজনা করে ; এতদ্ব্যতীত প্রায় প্রতিদিন সন্ধ্যার পর হেড মাষ্টারের ভবনে বাবুদের বৈঠক হয়, তাহাতে সুরাপান ও অশাস্ত ভোজন প্রভৃতি চলে, এতদ্বারা বালকদের নীতি অতিশয় দূষিত হইবার সম্ভাবনা। এই দরখাস্তের একটা নকল স্কুল, কামটীর সভাপতি গ্রীভ সাহেবেরও নিকট প্রেরিত হইয়াছিল। ম্যাজিস্ট্রেট সাহেব ঐ দরখাস্ত দেখিয়া স্বাক্ষরকারীদের প্রতি একেবারে চটিয়া গেলেন এবং তাহাদের নামে নালিস করিবার জন্ত নবীনচন্দ্রকে প্ররোচনা দিতে লাগিলেন। নবীন স্বাক্ষরকারীদের প্রায় সকলকেই চিনিতেন। তাঁহারা অল্পশিক্ষিত সেকেলে লোক। অনেকে লোকমুখো গুনিয়া সরল ভাবে বিশ্বাস করিয়াই তাহাতে স্বাক্ষর করিয়াছিলেন। নবীনচন্দ্র কোন ক্রমেই ইহাদের নামে নালিস করিতে সম্মত হইলেন না। অবশেষে তাঁহার উত্তর ডিরেক্টর আপীসে প্রেরিত হইল। সেই সঙ্গে গ্রীভ সাহেব ডিরেক্টরকে যে পত্র লিখিয়াছিলেন তাহা নিম্নে প্রদত্ত হইল :—

DEAR Mr. Young,

The charges brought against the Head-master of

the local school are unfounded and malicioius. I have personally examined his marriage-certificate. It bears the signatures of a European missionary, Mr. Mervin, and of a European police officer of Benares, in whose presence the ceremony was performed. Babu Nobin Chunder Bose, whom I have known both as a teacher and as a citizen, for the last two years, is a man of high principles, actuated by everything good. He is manly and honourable to his backbone. That marriage itself is a proof of the sincerity of his convictions. He has brought home an estimable and lovable young woman who in every fiber of her nature is a lady. To tell you the truth, we look upon them more as our friends and equals than as our inferiors and subordinates.

Then as to the charge of having drinking bouts in his house, nothing is farther from the truth. On the cotnrary, if my information be correct, and it is derived from the most trustworthy sources, the quite evening parties, in his drawingroom, have been largely instrumental in saving several educated Bengalees of the station, from a drunken and disorderly life. Besides, Baboo Nobin Chunder himself is a staunch temperance man.

I have advised him to sue the malicious persons who

have signed that petition, for libel, and I hope you will agree with me in this. But the man is so gentle, and so forgiving, that, he would not stir even to vindicate his own character from unmerited slur. He seems to illustrate in his life, the well-known principle of the Founder of our religion—"Bless them that curse you ; do good to them that hate you."

Yours very sincerely

H. J. GREIVE

পূর্বোক্ত পত্রের তাৎপর্য্য এই :—

হেড মাষ্টারের নামে যে সকল অভিযোগ হইয়াছে, তাহার সমস্তই অমূলক ও বিদ্বেষপূর্ণ। ম্যাজিস্ট্রেট সাহেব নিজে ইহাদের বিবাহে সার্টিফিকেট দেওয়াছেন। তাহাতে একজন ইউরোপীয় মিশনারী ও কাশীর একজন ইউরোপীয় পুলিশ অফিসারের স্বাক্ষর আছে। নবীনচন্দ্র বসু একজন সংলোক এবং তিনি যে যুবতীকে বিবাহ করিয়া আনিয়াছেন, তাঁহাকে দেখিলেই শ্রদ্ধা হয়, এবং ভক্তি করিতে ইচ্ছা করে ; তিনি সম্পূর্ণ ভাবে ভদ্রমহিলা নাম পাইবার উপযুক্ত।

আর তাঁহার বাড়ীতে মাতালদের জটলা হইবার কথা যে লিখিয়াছে এমন মিথ্যা আর কিছুই হইতে পারে না। তিনি যতদূর অসুস্থস্থান হার জানিয়াছেন, তাহাতে এই প্রমাণ পাইয়াছেন যে সন্ধ্যার সময় তাঁহার বাড়ীতে যাওয়াতে অনেকে সুরাপান পরিত্যাগ করিয়াছে।

এই সকল জানিয়া তিনি বাবু নবীনচন্দ্রকে এই স্বাক্ষরকারীদের নামে নালিস করিবার জন্ত পরামর্শ দিয়াছেন, কিন্তু তিনি এমন শাস্ত

স্বভাব ও ক্ষমাশীল যে আপনাকে এই অযথা নিন্দা হইতে রক্ষা করিবার জন্ত কিছু করিতে প্রস্তুত নহেন।

এই সকল গোলমাল কাটিয়া যাইতে প্রায় পূজার সময় উপস্থিত হইল। পূজার সময়ে নবীন ও কৃষ্ণকামিনীর কলিকাতাতে যাইবার কথা ছিল; কিন্তু এবারে তাঁহারা বিশেষ কার্যে ফরিদপুরেই আবদ্ধ হইয়া পড়িলেন। এবারে পদ্মার জল ভয়ানক বাড়িয়াছে; চারিদিকের গ্রাম-সকল জল-প্লাবিত হইয়া গিয়াছে; শত শত দরিদ্র লোক গৃহ-হীন হইয়া ফরিদপুর সহরে আসিয়াছে; তাহাদের উদবে অন্ন নাই; মস্তক রাখিবার স্থান নাই। এই দুর্ঘটনা ঘটাবামাত্র নবীনচন্দ্র তাঁহার কতিপয় বন্ধুর সহিত সম্মিলিত হইয়া একটা রিলীফ কমিটি (সাহায্যসভা) গঠন করিলেন; এবং ম্যাজিস্ট্রেটের নিকট ও জেলার অগ্রাগ্র পদস্থ লোকদের নিকট হইতে টাকা তুলিলেন, এবং কলিকাতার নবরত্ন সভার বন্ধুদিগের দ্বারা অর্থ সংগ্রহ করিলেন; তদ্বারা তাঁহার ভবনের অনতিদূরে একটা উচ্চ ভূমির উপর ঐ সকল লোকের থাকিবার জন্ত শীঘ্র শীঘ্র কতকগুলি চালা নির্মাণ করিয়া ফেলিলেন। সেই চালাতে তাহারা মস্তক রাখিবার স্থান পাইল। তৎপরে, তাহাদিগকে কার্যে ব্যস্ত রাখিবার জন্ত, ম্যাজিস্ট্রেটের হুকুম লইয়া, কয়েকটি পুরাতন রাস্তাতে মাটি ফেলিয়া মেরামত আরম্ভ করিলেন, এবং কয়েকজন লোক নিযুক্ত করিয়া তাহাদিগকে প্রতিদিন চাউল বিতরণ করিতে লাগিলেন। এমন শৃঙ্খলা ও সুব্যবস্থার সহিত এই কার্য চলিতে লাগিল, যে এক দিন ম্যাজিস্ট্রেট সাহেব নবীনচন্দ্রকে বলিলেন,—“তোমার হেড মাষ্টার না থাকিয়া ডেপুটি ম্যাজিস্ট্রেট হওয়াই উচিত ছিল; তোমার কাজ করিবার শক্তি অদ্ভুত দেখিতেছি।”

নবীনচন্দ্র এই সকল কার্যে ব্যস্ত। ও-দিকে কৃষ্ণকামিনী বাগচী মহাশয়কে সঙ্গে করিয়া দরিদ্রদের চালায় চালায় ঘুরিতেছেন, ও কে

কেমন আছে তাহার তত্ত্বাবধান করিতেছেন। কিন্তু হায়! তাহাদের অন্নকষ্টের এক প্রকার উপায় হইতে না হইতে তাহাদিগকে আর এক বিপদে ধরিল। তাহাদের মধ্যে ওলাউঠা দেখা দিল। এইবার নবীন-চন্দ্রের এক নূতন বিজ্ঞা কাজে লাগিল। পূর্বেই বলিয়াছি তাঁহার স্বভাব এ প্রকার ছিল, কোনও একটা নূতন বিষয় তাঁহার সমক্ষে উপস্থিত হইলে তিনি তাহার তদন্ত না কারয়া ছাড়িতেন না। তিনি যত নূতন বিষয় শিখিয়াছেন, তাহার মধ্যে একটা হোমিওপ্যাথি। যে সময়ের কথা হইতেছে, সে সময়ে এই নূতন চিকিৎসা-প্রণালীর সংবাদ সবে এ দেশে পৌঁছিয়াছে; কলিকাতায় ওয়েলিংটন স্কোয়ারের দত্তপরিবারের রাজেন্দ্র দত্ত মহাশয় সবে ইহা শিক্ষা করিয়া বক্তৃতাভবনের নিকট প্রচার করিতে আরম্ভ করিয়াছেন। নবীনচন্দ্র এক বৎসর হইতে এ বিষয়ে অনেক গ্রন্থ পাঠ করিয়াছেন, এবং এবার আসিবার সময় রাজেন্দ্র বাবুর নিকট হইতে একটা ঔষধের বাক্স লইয়া আসিয়াছেন। মধ্যে মধ্যে পল্লীস্থ দরিদ্রদের পীড়াদি হইলে ঔষধ দিয়া থাকেন। তাঁহার সে বিজ্ঞাটা কাজে লাগিবার সময় উপস্থিত। তিনি মনোযোগ সহকারে নূতন চিকিৎসা-প্রণালী অল্পসারে রোগীদের চিকিৎসা আরম্ভ করিলেন। ক্রী পুরুষে এক একদিন সমস্ত রাত্রি ঐ গরিবদের চালাতে বসিয়া রাত্রি কাটাইতে লাগিলেন। সে সময়ে কৃষ্ণকামিনীর ব্যস্ততা যিনি দেখিতেন, তাঁহারই হৃদয় আনন্দে উৎফুল্ল হইত; তিনি রোগীদিগকে ঔষধ খাওয়াইতেছেন, স্বহস্তে তাহাদিগকে পরিষ্কার করিতেছেন, মধ্যে মধ্যে পথ্যাদির জন্ত বাড়ীতে ছুটিয়া আসিতেছেন।

সদাশয় পরোপকারী বৃদ্ধ বাগ্‌চী মহাশয়ও তাঁহার ছাত্রীর কার্যে উৎসাহদাতা হইয়া প্রাতে ও সন্ধ্যাতে পরিশ্রম করিতে লাগিলেন। এই নবদম্পতীর ব্যস্ততা ও পরিশ্রম দেখিয়া সহরের লোক শুদ্ধ হইয়া



গেল। এদিকে দরিদ্রদিগের মধ্যে ওলাউঠার প্রকোপ একটু নিরস্ত হইতে না হইতে সহরের ভদ্রলোকদিগের মধ্যে উহা দেখা দিল। বাহাদুর নবীনচন্দ্রের নামে ডিরেক্টরের নিকট দরখাস্ত করিয়াছিলেন, তাঁহাদের মধ্যে একজনের একটি পুত্র ঐ ভয়ানক রোগে আক্রান্ত হইল। সংবাদ পাঠবামাত্র নবীনচন্দ্র তাঁহার ধর্ম্মালোচনা সভার দুই একজন বন্ধুকে সঙ্গে লইয়া গিয়া সেখানে পড়িলেন; এবং রাত্রি দিন পড়িয়া থাকিয়া বালকটিকে সুস্থ করিয়া তুলিলেন। সে বাড়ীর কাজ শেষ হইতে না হইতে আর এক বাড়ী, তৎপরে আর এক বাড়ী, এইরূপে তাঁহার আর প্রাতে ও রাত্রে বিশ্রাম থাকিল না। কি গুরুতর শ্রম হইতে লাগিল।

এই সংগ্রাম হইতে উঠিতে না উঠিতে কাশী হইতে দারুণ সংবাদ আসিল, যে কাস্তিকের প্রথমে তাঁহার রাগামা ভবদাম পরিত্যাগ করিয়াছেন। যে সদাশয়া, স্নেহপ্রবণা নারী মাতৃস্থানীয়া হইয়া মাতৃহীন শিশুকে ক্রোড়ে লইয়াছিলেন, যিনি নিজ পক্ষপৃষ্ঠের মধ্যে মাতৃহীন সন্তানকে আবরণ করিয়া চিরদিন রক্ষা করিয়াছেন, সকলে প্রতিকূল হইলেও যিনি নবীনের প্রতি একটি দিনের জন্ত প্রতিকূল হন নাই, যিনি মূর্ত্তিমতী দয়া, অথচ নবীনকে রক্ষা করিবার সময় সিংহীর সমান ছিলেন, সেই দয়াবতী, সেই স্নেহময়ী রমণী, সেই রাগামা আর নাই! নবীন এ সংবাদে গুরুতর আঘাত পাইলেন। তিনি শোকের বিকার কিছুমাত্র প্রকাশ করিলেন না বটে, কিন্তু কয়েক দিনে যেন তাঁহার চেহারার পরিবর্তিত হইয়া গেল। সর্বদা মৌনী রহিলেন। কৃষ্ণকামিনী ছায়ার ছায় সঙ্গিনী, অধিক কথা কহেন না, বুখা সাধনা দিবার প্রয়াস পান না, কিন্তু সঙ্গ ছাড়েন না, মধ্যে মধ্যে কোনও কোনও পুস্তকের ভাল ভাল স্থান পড়িয়া শুনান, এবং নবীনের প্রিয় সঙ্গীত দুই একটি গাইয়া থাকেন।

কয়েকদিনের মধ্যেই নবীন তাঁহার স্বাভাবিক প্রসন্নতা প্রাপ্ত হইলেন এবং সমুদায় কার্যের বন্দোবস্ত করিতে লাগিলেন। কলিকাতাতে তাঁহার জ্যেষ্ঠ সগোদরকে রাজ্যমার শ্রদ্ধের সময় পাঁচ হাজার টাকা ব্রাহ্মণ পণ্ডিত ও দীন দরিদ্রদিগকে দান করিবার জ্ঞা লিখিলেন। শ্রাদ্ধদিনে নিজে ফরিদপুরে অনেক দান ধ্যান করিলেন এবং সমস্ত দিন ঈশ্বরারাধনাতে যাপন করিলেন। ইহার দুই এক দিন পরেই বারাণসী হইতে সংবাদ আসিল যে তাঁহার রাজ্যমা দানপত্র লিখিয়া, বাড়ীখানি ও তাঁহার সমুদায় সম্পত্তি নবীনকেই দিয়া গিয়াছেন।

এদিকে মাজিষ্ট্রেট গ্রীভ সাহেবের নিকট সংবাদ পাইলেন যে, তিনি নবীনের অজ্ঞাতসারে তাঁহাকে ডেপুটী মাজিষ্ট্রেট কর্তৃক দিবার জ্ঞা কমিশনকে লিখিয়াছিলেন, এবং তদনুসারে নবীন তিন শত টাকা বেতনে মাজিষ্ট্রেটের পদ প্রাপ্ত হইয়াছেন। কিন্তু রাজ্যমার মৃত্যু সংবাদ প্রাপ্তির দিন হইতে নবীন ও কৃষ্ণকামিনীর অন্তরে আর এক সংকল্প উদ্ভূত হইয়াছে। তাঁহার আর চাকুবী কবির ইচ্ছা নাই। প্রিয় নবরত্ন সভার দিকে হৃদয় সর্বদা টানিতেছে। এতদিন কলিকাতাতে কর্ম জুটাইবার চেষ্টা করিয়াছেন, জুটে নাই। এক্ষণে আর সে চেষ্টার প্রয়োজন নাই। তাঁহার নিজের চল্লিশ হাজার টাকা এত দিনের পর তাঁহার হাতে আসিল। আর কেন, ইহার আয় হইতে তাঁহাদের বেশ সুখেই চলিয়া যাইবে; এখন কর্ম ছাড়িয়া কলিকাতায় যাওয়াই ভাল। কৃষ্ণকামিনী এই প্রস্তাবে অন্তরের সহিত আনন্দ প্রকাশ করিলেন।

পরামর্শ স্থির হইবামাত্র কার্যারম্ভ। নবীন মাজিষ্ট্রেট সাহেবের সহিত সাক্ষাৎ করিয়া তাঁহাকে অগণ্য ধন্যবাদ পূর্বক নিজ অভিপ্রায় তাঁহার গোচর করিলেন। মাজিষ্ট্রেট ও তাঁহার মেম অনেক নিষেধ করিলেন; বলিলেন, “তুমি এখন বিবাহ করিয়াছ, তোমাকে এখন গৃহস্থ্য করিতে

হবে, পুত্রকন্টার শিক্ষাদির উপায় বিধান করিতে হবে, তোমার চাকুরী ছাড়িলে চলবে কেন ?” কিন্তু কালিদাস বলিয়াছেন—“ক ঈপ্সিতার্থস্থির-নিশ্চয়ঃ মনঃ পরশ্চ নিম্নাভিমুখঃ প্রতীপয়েৎ,”—“স্থির-প্রতিজ্ঞ চিন্তকে ও নিম্নাামী জলকে কে ফিরাইতে পারে ?” নবীনচন্দ্র কাহারও বাধা শুনিলেন না।

কলিকাতায় আসিবার সময় ফরিদপুরের সকল লোকে, এমন কি তাঁহার ঘোর বিরোধী যাহারা ছিল, তাহারাও হায় হায় করিতে লাগিল। বাতীর দিন কৃষ্ণকামিনী যখন গলবস্ত্রে বৃদ্ধ বাগ্‌চী মহাশয়ের চরণে প্রণাম করিলেন, তখন সেই বৃদ্ধের গণ্ডস্থল দিয়া শোকাশ্রু প্রবাহিত হইতে লাগিল। কৃষ্ণকামিনীর সেই ভক্তি, বিনয় ও সাধুতাপূর্ণ মুখে ভক্তি-অশ্রু আর তিনি দেখিতে পাইবেন না এবং সেই অপূর্ব ভক্তিবসপূর্ণ সঙ্গীত আর শুনিতে পাইবেন না। নবীনচন্দ্র কলিকাতা আসিলেন, ফরিদপুর যেন নিবিয়া রহিল।

এদিকে কলিকাতাতে নবরত্ন সভার সভ্যগণ আনন্দে নৃত্য করিতে লাগিল। নবীন যে যাইবার সময় বলিয়াছিলেন—“ঈশ্বর যদি দিন দেন আমাকে আবার কার্যক্ষেত্রে দেখিতে পাইবে,”—ঈশ্বর সেই দিন দিয়াছেন। নবীনচন্দ্র আসিয়াই বিজয়ার পরামর্শে আর এক মহৎ অনুষ্ঠানের সূত্রপাত করিলেন। তাঁহার রাগামার পরিত্যক্ত বাড়ীটির অন্তর মহলটিতে একটি দ্বার খুলিয়া ও কিছু বদলাইয়া সে মহলটি নিজের বাসের জন্ত রাখিলেন, এবং বাহির বাড়ীটী উত্তমরূপে মেয়ামত করিয়া ও ঘরগুলি বদলাইয়া “কুপাময়া বিধবাপ্রম” নাম দিয়া তাঁহার জ্যেষ্ঠভাতের ট্রস্টিদিগের হস্তে অর্পণ করিলেন। সেই আশ্রমের ভার বিজয়ার হস্তে অর্পিত হইল। বিজয়া সেখানে হিন্দু বিধবাদিগকে লেখা পড়া শিখাইবার ও নানা প্রকার শিল্পকার্য্য শিখাইবার বন্দোবস্ত করিতে লাগিলেন।

প্রথমে অধিক বিধবা পাওয়া গেল না ; নবরত্ন সভার সভ্যদিগের চেষ্টাতে ৫৭ জন নিরাশ্রয় বিধবা পাওয়া গেল, তাহাদের প্রত্যেককে “হলধর বৃত্তি” নামে মাসে ৮ টাকা করিয়া বৃত্তি দেওয়া হইতে লাগিল ; এবং তাহাদিগকে স্কুলে আনিবার ও স্কুল হইতে দিয়া আসিবার জন্ত একখানি গাড়ি নিযুক্ত হইল। এতৎসঙ্গে নবীনচন্দ্র তাঁহার জ্যেষ্ঠতাতের পরিত্যক্ত টাকার সঞ্চিত সুদ হইতে ৮ হাজার টাকা দিয়া বিধবাশ্রমের অব্যবহিত পার্শ্বস্থ একটা বাড়ী ক্রয় করিলেন ; এবং আরও দুই হাজার টাকা দিয়া সেটা সংস্কার করিয়া ও দুই বাড়ীর মধ্যে গতাত্যাতের জন্ত দরজা খুলিয়া তাহা বিজয়ার থাকিবার জন্ত ট্রুটীদিগের হস্তে অর্পণ করিলেন। বিজয়ার পবানর্শে এই সঙ্গে একটা বালিকা বিদ্যালয়ও স্থাপিত হইল। তাহাতে বিধবাদিগকে শিক্ষয়িত্রীর কার্য্য শিক্ষা দেওয়া হইতে লাগিল। বিজয়া, কৃষ্ণকামিনী ও বিদ্যাবাসিনী তিন জনে এই বালিকা বিদ্যালয়ে পড়াইতে লাগিলেন। মহোৎসাহে কার্য্য আরম্ভ হইল।

হরচন্দ্র বিজয়ার পবিত্র সহবাসে থাকিবার জন্ত বিধবাশ্রমের পার্শ্বস্থ বাড়ীতে উঠিয়া আসিলেন। সেখানে নবরত্ন সভার অধিবেশন হইতে লাগিল। পঞ্চ ও গোবিন্দ সেই বাড়ীতে রহিলেন। এদিকে নবীনচন্দ্রের নিজ বাড়ীতে তাঁহার বিধবা ভগিনী নন্দরাণী আসিয়া যুটিলেন। ইহাতে কৃষ্ণকামিনীর মহা আনন্দ। অল্পদিনের মধ্যে উভয়ের মধ্যে এমন প্রীতি জন্মিয়া গেল, যে নন্দ ও ভাজে এমন প্রেম কেহ কখনও দেখে নাই। দুই জনে হৃষ্টচিত্তে সংসারের সকল কাজ করিতে লাগিলেন ও বালিকা স্কুলে পড়াইতে লাগিলেন।

নবরত্ন সভাতে যে নবজীবনের সঞ্চার হইল, তাহা বলা অত্যাশ্চর্য্যমাত্র। পঞ্চ পঞ্চাশ টাকার কস্মি ছাড়িয়া সামান্য বিশ টাকা অবলম্বনে নবরত্ন সভার সহকারী সম্পাদক পদে নিযুক্ত হইলেন। তিনি অবিবাহিত পুরুষ,

তাঁহার অধিক অর্থের প্রয়োজন কি? গোবিন্দ কালেজ হইতে উত্তীর্ণ হইয়া, মুন্সেফ হইয়া গেল। বিবাহাদি করিল না; মনে প্রতিজ্ঞা, বিদ্যাবাসিনীকে ভিন্ন অত্র কার্য্যকেও বিবাহ করিবে না; কিন্তু বিদ্যাবাসিনীর সে ভাব নাই, সে মাতার অগ্নিতে অগ্নিময়ী, সে বৈরাগ্যা ও ব্রহ্মচর্য্যের ব্রত লইয়াছে। হরচন্দ্রের বেতন আরও বৃদ্ধি হইল। তিনি একটু স্থির হইয়া বসিলেই তাঁহার পুরাতন সঙ্গীতবিদ্যার চর্চ্চা আবার আরম্ভ করিলেন। তিনি ও কৃষ্ণকামিনী একজন পাকা সেতারীর নিকট সেতার শিক্ষা করিতে লাগিলেন; এবং তিনি নিজে বিদ্যাবাসিনী, ইন্দুভূষণ ও ভবেশকে হারমোনিয়ম ও বেহালা বাজাইতে শিখাইতে লাগিলেন। হরচন্দ্রের পুস্তকালয়টী দিন দিন বৃদ্ধি পাইতে লাগিল; এবং তিনি উৎসাহের সহিত নবীনচন্দ্রের সঙ্গে প্রাচীন সংস্কৃত গ্রন্থাবলী পাঠ করিতে লাগিলেন। এইরূপে এই বিধবাস্রমের সন্নিকটস্থ পরিবারেই এক পরিবার হইয়া পথে দিন যাপন করিতে লাগিলেন।

ওঁদকে বঙ্গদেশে মহা পরিবর্তনের দিন আসিতেছে। বঙ্গের সাহিত্যাকাশে ধ্বংসের ছায়া লঘুসুদন উঠিয়াছেন। পাথুরিয়াঘাটার যতীন্দ্রমোহন ঠাকুর ও পাইকপাড়ার প্রতাপনারায়ণ সিংহ প্রভৃতি সমবেত হইয়া রঙ্গকাব্যে এক অভূত অবতারণা করিয়াছেন। তাঁহাদের প্ররোচনায় মাইকেল মধুসূদন দত্ত তাঁহার বিখ্যাত নাটকাবলী প্রণয়ন করিতে আরম্ভ করিয়াছেন। স্বরায় তিলোত্তমা ও মেঘনাদবধ দেখা দিল।

বঙ্গদেশের সামাজিক ইতিবৃত্তে এই ১৮৫৯ সাল চিরস্মরণীয় বৎসর। ভক্তিবাজন দেবেন্দ্রনাথ ঠাকুর জুই বৎসর কাল পরিত্যাগ করিয়া যাপন করিয়া ঋষিত্ব লাভ করিয়া এই বৎসরে বঙ্গভূমিতে অবতীর্ণ হইলেন এবং সেই সকল অগ্নিময় উপদেশ দিতে আরম্ভ করিলেন যাহা তাঁহার

আধ্যাত্মিক প্রতিভার চিরস্বরসীয়া কীর্তিস্তম্ভরূপে বিদ্যমান রহিয়াছে। এমন দিন আসিবে, যখন সেগুলি বঙ্গভাষায় শ্রেষ্ঠ অলঙ্কার বলিয়া সর্বত্র আদৃত হইবে। এই বৎসরেই খ্যাতনামা কেশবচন্দ্র সেন ব্রাহ্মসমাজে প্রবিষ্ট হইলেন। প্রাচীন দেবেন্দ্রনাথের সহিত তরুণ কেশবের সম্মিলনে নূতন বল আনিয়া দিল। উভয়ে একত্র হইয়া কলিকাতার যুবকগণকে উপদেশ দিতে আরম্ভ করিলেন। যুবকদলে মহা আন্দোলন উপস্থিত হইল; অনেক ব্রাহ্মণের সম্মান উপবীত ত্যাগ করিলেন, এবং নানা স্থানে যুবকগণ ব্রাহ্মধর্ম গ্রহণের জন্ত নিগ্রহ সহ করিতে লাগিল। এই সকল বিবরণ শুনিয়া এক দিন নবীনচন্দ্র পঞ্চকে বলিলেন—“পঞ্চ, এইবার বুঝি সত্য সত্যই যুগান্তর ঘটিল। তোমার ব্রাহ্মসমাজে ও বঙ্গদেশে বুঝি এইবার নবযুগ আসিল।”

---